

### 宋七

梁 沈 約 撰

華 書 局

中

第

卷

四二至 卷五八(傳) 五

册

# 宋書卷四十二

### 列傳第二

### 劉穆之 王弘

覽多通,爲濟陽江敳所知。」敳爲建武將軍、琅邪內史,以爲府主簿。 山,峯萼聳秀,林樹繁密,意甚悅之。及高祖克京城,問何無忌曰:「急須一府主簿,何由得 吏實須其才,倉卒之際,當略無見踰者。」高祖笑曰:「卿能自屈,吾事濟矣。」 卽於坐受署。 |祖謂之曰:「我始舉大義,方造艱難,須一軍吏甚急,卿謂誰堪其選。」]穆之曰:「貴府始建,軍 擊,晨起出陌頭,屬與信會。穆之直視不言者久之。旣而反室,壞布裳爲絝,往見高祖。 之。」無忌曰:「無過劉道民。」高祖曰:「吾亦識之。」即馳信召焉。 時穆之聞京城有叫譟之 劉穆之,字道和,小字道民,東莞莒人,漢齊悼惠王肥後也。 初,穆之嘗夢與高祖俱泛海,忽值大風,驚懼。俯視船下,見有二白龍夾舫。 世居京口。少好書、傳,博 旣而至一

列傳

蹙,自立無所。 日,風俗頓改。 從 穆之亦竭節盡誠,無所遺隱。 平京邑,高祖始至,諸大處分,皆倉卒立定,並穆之所建也。 遷尙書祠部郎,復爲府主簿,記室錄事參軍,領堂邑太守。以平桓玄功,封 重以司馬元顯政令違舛,桓玄科條繁密。穆之斟酌時宜,隨方矯正,不盈旬 時晉綱寬弛,威禁不行,盛族豪右,負勢陵縱,小民窮 **逐委以腹心之任**,動止

終大計 分也。 先見穆之、具說朝議。穆之僞起如廁,卽密疏白高祖曰:「皮沈始至,其言不可從。」高祖 非 州 西華縣五等子。 立 日 見沈,且令出外,呼穆之問曰:「卿云沈言不可從,其意何也。」]穆之曰:「昔晉朝失政,非復一 勳 可持 加加 大義,本欲匡主成勳,以取富貴耳。事有前後,故一時推功, 重,不可直置,疑畏交加,異端互起,將來之危難,可不熟念。 或欲令高祖於丹徒領州,以內事付尙書僕射孟昶。遣尙書右丞皮沈以二議咨高祖。沈 義熙三年,揚州刺史王謐薨,高祖次應入輔,劉毅等不欲高祖入,議以中領軍謝混爲揚 以桓玄篡奪,天命已移。公興復皇祚,勳高萬古。旣有大功,便有大位。 必宜若此 力敵 公今日形勢,豈得居謙自弱,遂爲守藩之將邪。劉、孟諸公,與公俱起布衣,共 勢均,終相吞咀。 而已哉。 今若復以他授,便應受制於人。 一失權 揚州根本所係,不可假人。 前者以授王謐,事出權道,豈是始 非為 今朝議如此, 宜相酬答, 必 柄、無由可得。 委體心服,宿定臣主之 位大勳高, 而 公功高

論,便暫入朝,共盡同異』。公至京,彼必不敢越公更授餘人明矣。」高祖從其言,由是入輔 云在 我,厝辭又難。 唯應云『神州治本,宰輔崇要,興喪所階,宜加詳擇。 此事旣大,非可懸

高祖 不舉不 又稟 故朝 下節 將來 函,齡石得八十函 高 重,高祖 祖 分有 會自 度。 毎 從之,一 野 善。」 同 征 得民間委密消息以示聰明,皆由穆之也。 愈信仗之。 在 聞 異 廣固, 高 祖 達。 穆之 。穆之乃曰:「但縱筆爲大字,一字徑尺,無嫌。大旣足有所包,且 紙 穆之莫不必知。 書素拙,穆之曰:「此雖小事 不 還拒盧循,常居幙中畫策,決斷衆事。 我蒙公恩, 與朱齡 過六七字 ,而穆之應對無廢 穆之外所聞見,莫不大小必白,雖復閭里言謔,塗陌細事,皆一二以聞。 石並便尺牘, 便滿。 義無隱諱,此張遼所以告關羽欲叛也。」高祖 雖復親暱短長,皆陳奏無隱。 凡 也。 所薦達,不進 嘗於高 轉中 ,然宣彼四遠,願公小復留意。」高 軍 祖 又愛好賓遊,坐客恒滿,布耳目以 太尉 坐 一與齡 不止,常云:「我雖不及荀令君之舉善,然 司馬。 石答書。 劉毅等疾穆之見親,每從容言其權 人或譏之,穆之曰:「以公之明, 八年,加丹陽 自 旦至日 舉 尹 中 其 止施爲,穆之皆 祖 **'**, (三) 、勢亦美。」 [1] 旣 不 穆之得百 爲 能厝意, 視

言,皆云太尉 建 成 將軍 高祖 西討 置 與我不平,何以至此。」穆之曰:「公泝流遠伐,而以老母稚子委節下,若一毫不 佐 劉 吏, 毅 ,以諸葛長民監留府,總攝 配給實 力。 長民果有異謀, 後 事。 而 猶 高祖 豫不 ·能發, 疑長民難 乃屛 獨 任, 人謂 留穆之以輔之。加 穆之日 「悠悠之

穆之左 錢 盡,豈容如 尙書右 三百萬。 僕 :僕射,領選,將軍、尹如故。 射,領監 此邪。」意乃小安。高祖還,長民伏誅。十年,進穆之前將軍,給前軍府年布萬匹, 十一年,高祖 軍、中軍二府軍司,將軍、尹、領選如故。〔三〕甲仗五十人,入殿。〔三〕入居 西伐司馬休之,中軍將軍道憐知留任,而 十二年,高祖北伐,留世子爲中軍將軍,監太尉留府,轉 事無大小,一決穆之。

東城

賞笑. 微爲 滿室 此爲常。 且 輒爲十人饌。 過豐。 了,目覽辭訟,手答牋書,耳行聽受,口並酬應,不相參涉**,** ,引日亘時,未嘗倦苦。 穆之內總朝政,外供軍旅,決斷如流,事無擁滞。 嘗白高 自此以外,一毫不以負公。」 祖曰:「穆之家本貧賤,贍生多闕。 穆之旣好賓客,未嘗獨餐, 裁有閑暇,自手寫書,尋覽篇章,校定墳籍。 每至食時,客止十人以還者,帳下依常 自叨忝以來,雖每存約損,而朝夕所須, 賓客輻輳,求訴百端,內外諮稟,盈堦 皆悉贍舉。 性奢豪,食必方丈, 又數客暱賓, 下食,以 言談

十三年,疾篤,詔遣正直黃門郞問疾。 十一月卒,時年五十八。

虚,乃馳還彭城,以司馬徐羨之代管留任,而朝廷大事常決穆之者,並悉北諮。 文武二萬人,以三千配羨之建威府,餘悉配世子中軍府。 高祖在長安,聞問驚慟,哀惋者數 日。 本欲頓駕 關中,經略趙、 追贈穆之散騎常侍、衞將軍、開府 魏。 穆之旣卒,京邑任 穆之前 軍 府

中、司徒、封南昌縣侯、食邑千五百戶。 後。臣契闊屯泰,旋觀始終,金蘭之分,義深情密。是以獻其乃懷,布之朝聽。」於是重贈侍 永傷,胡寧可昧。謂宜加贈正司,追甄土宇,俾大賚所及,永秩於善人,忠正之烈,不泯於身 者矣。履謙居寡,守之彌固,每議及封賞,輒深自抑絕。所以勳高當年,而未沾茅社,撫事 難彌結,時屯世故,靡歲暫寧。豈臣以寡乏,負荷國重,實賴穆之匡翼之益。 豈唯讜言嘉謀, 不可稱記。所以陳力一紀,克遂有成,出征入輔,幸不辱命,微夫人之左右,未有寧濟其事 溢于民聽,若乃忠規遠畫,潛慮密謨,造膝詭辭,莫見其際。功隱於視聽,事隔於皇朝者,〔<b 恩褒述,班同三事,榮哀兼備,寵靈已厚。臣伏思尋,自義熙草創,艱患未弭,外虞旣殷,內 車遠役,居中作扞,撫寄之勳,實洽朝野。方宣讚盛猷,緝隆聖世,志績未究,遠邇悼心。皇 謀猷,外勤庶政,密勿軍國,心力俱盡。及登庸朝右,尹司京畿,翼新王化,敷讚百揆。 必書,德之休明,沒而彌著。故尚書左僕射、前將軍臣穆之,至爰自布衣,協佐義始, 高祖又表天子曰:「臣聞崇賢旌善,王敎所先;念功簡勞,義深追遠。故司勳秉策,在勤 頃戎 內端

造大業,誠實匪躬。今理運惟新,蕃屏並肇,感事懷人,實深悽悼。可進南康郡公,邑三千 高祖受禪,思佐命元勳,詔曰:「故侍中、司徒南昌侯劉穆之,深謀遠猷,肇基王跡,勳

列傳第

劉穆之

佐命,翼亮景業,謀猷經遠,元勳克茂,功銘鼎彝,義彰典策,故已嗣徽前哲,宣風後代者矣。 庭。 戶 近因遊踐,瞻其塋域,九原之想,情深悼歎。 無忘厥 故左將軍 二十五年四月,車駕行幸江寧,經穆之墓,詔曰:「故侍中、司徒、南康文宣公穆之,秉德 心。 可 、青州刺史王鎭惡,荆、郢之捷,剋翦放命,北伐之勳,參跡方叔。 進龍陽縣侯,增邑千五百戶。」諡穆之曰文宣公。太祖元嘉九年,配食高祖 可致祭墓所,以申永懷。」 念勤惟績, 廟

瘡痂常以給 年。」邕所至嗜食瘡痂,以爲味似鰒魚。 相,素輕邕。 並於國主稱臣,去任 書曰:「劉邕向顧 盃酒乎。」 飲之因數孫皓歌答之曰:「昔爲汝作臣, 穆之三子,長子慮之嗣,仕至員外散騎常侍卒。子邕嗣。 靈休大驚。 膳。 後飲之與邕俱豫元會,並坐。邕性嗜酒,謂飲之曰:「卿昔嘗見臣,今不能見勸 卒,子肜嗣。 見噉、遂舉體流血。」南康國東二百許人,「也」不問有罪 答曰:「性之所嗜。」靈休瘡痂未落者,悉褫取 便止。 至世祖孝建中,始革此制,爲下官致敬。 大明四年,坐刀斫妻,奪爵土,以弟彪紹封。 嘗詣孟靈休, 今與汝比肩。 靈休先患灸 以飴邕。 先是郡縣爲封國者,內史、相 瘡, 旣不勸汝酒,亦 河東王歆之嘗爲南 瘡痂落牀上,因 邕旣 無罪,遞互 去,靈休 齊受禪、降爲南 與 與何 不 鞭, 願 取 鞭 勗 食 汝 康

康縣侯,食邑千戶。

偷邪 辯覆。 軍、 王子勛稱僞號,以爲 日恭侯。 太子右率,左衞將軍,吳郡太守。卒,追贈征虜將軍。 宣城淮南二郡太守。 穆之中子式之字延叔,通易好士。 式之召從事謂曰:「治所還白使君,劉式之於國家粗有微分, 吏民及文書不可得。」從事還具白弘, 長子敳,世祖 中護軍。 初,黃門侍郎。 在任贓貨狼藉, 事敗伏誅。 **澂弟衍,大明末,** 累遷相國中兵參軍,太子中舍人,黃門侍郎,寧朔將 揚州 弘曰:「劉式之辯如此奔」亦由 刺史王弘遣從事檢校。 從征 以爲黃門郎, 關、洛有功,封德陽縣五等侯, 偷數百萬錢 出爲豫章內史。 從事 呼攝 此 得停。 吏民, 何有、況 晉安 還爲 欲 加

致使 珥忽 不倒 所遇 甚厚,深言密事,皆與參之。」瑀乃折節事邁,深布情款,家內婦女間事,言語 人 顧 寫備說。 爲亂,爲之盡力,與簡俱死。 衍 無不知。 左右索單衣幘,邁問其所以,瑀曰:「公以家人待卿, 弟珥字茂琳,少有才氣,爲太祖 瑀性陵物護前,不欲人居己上。 邁以瑀與之款盡,深相感信。 我是公吏,何得不啓。」因而白之。濬大怒,啓太祖徙邁廣州。 所知。 時濬征北府行參軍吳郡顧 濬所言密事,悉以語瑀。 始興王濬爲南徐州,以瑀補別駕從事史,爲濬 相與言無所隱, 邁輕薄 **瑀與邁共進射堂下** 而 而卿 所不得至者,莫 有才能,潛待之 邁在廣州,值 於外宣泄,

端。 丞。 其蜀 疾已篤,聞偃亡,歡躍叫呼,於是亦卒。 時 使 得 戶 陵,值南郡王義宣爲逆,瑀陳其不可,言甚切至。 元 青州 濟帥 望何參伍 年,起爲 意。 限 尋轉右 中船舫,又有義宣故部曲潛於梁山洲外下投官軍。〔5〕除司徒左長史。 上。」因求益州。 |瑀使氣尙人,爲憲司甚得志。彈王僧達云:「廕籍高華,人品冗末。」 朝士莫不畏其筆 瑀 刺史。 以長刀引吾下席。 遷從事 吾家黑面 至江陵,與顏竣書曰:「朱脩之三世叛兵,一旦居荆州,青油幙下,作謝宣明面 東陽太守。 衞將軍。 之有」遂與偃絕。 中郎,領淮南太守。 瑀聞問, 阿秀,遂居劉安衆處,「亞朝廷不爲多士。」其年疽發背,何偃 |瑪願爲侍中,不得,謂所親曰:「人仕宦不出當入,不入當出,安能長居 世祖知其此意、許之。孝建三年、除輔國將軍、益州刺史。 明年,遷吳興太守。 即起義遺軍,幷送資實於荆州。 於吾何有,政恐匈奴輕漢耳。」其年,坐奪人妻爲妾,免官。 及爲吏部尚書,意彌憤憤。族叔秀之爲丹陽尹,瑀又 元嘉二十九年,出爲寧遠將軍、益州刺史。 諡 侍中何偃嘗案云:「參伍時望。」瑀大怒曰:「我於 日剛子。 義宣以爲丞相左司馬,俱至梁山。 子卷,南徐州別駕。 世祖卽位、召爲御史中丞。 卷弟藏,尚 明年,遷御史中 亦發背瘫 元凶弑立,以 旣行,甚不 書左丞。 八與親故 還至江 瑀猶 見向, 大明

穆之少子貞之,中書黃門侍郎,太子右衞率,寧朔將軍、江夏內史。卒官。

子裒,始興

相,以贓貨緊東治內。

穆之女適濟陽蔡祐,年老貧窮。 世祖以祐子平南參軍孫爲始安太守。

甚微。 亦由此。 時農務頓息,末役繁興,弘以爲宜建屯田,陳之曰:「近面所諮立屯田事,已具簡聖懷。 水曹參軍納之領此任,其人頗有幹能,自足了其事耳。 亦應疇量,分判番假,及給廪多少,自可一以委之本曹。 局田曹,各立典軍募吏,依冶募比例,幷聽取山湖人,此皆無損於私,有益於公者也。 以嚴威,適足令囹圄充積,而無救於事實也。 事興、時不可失,宜早督田畯,以要歲功。 小冶各一所,重其功課,一准揚州,州之求取,亦當無乏,餘者罷之,以充東作之要。 又欲二 弘少好學,以淸恬知名,與尚書僕射謝混善。 王弘字休元,琅邪臨沂人也。 愚謂若回以配農,必功利百倍矣。 弘過蒙飾擢,志輸短効,豈可相與寢默,有懷弗聞邪!至於當否,尊自當裁以遠 會祖導,晉丞相。 然軍器所須,不可都廢, 而府資役單刻,[10]控引無所,雖復厲以重勸,肅 伏見南局諸冶,募吏數百,雖資以廩贍,收入 弱冠,爲會稽王司馬道子驃騎參軍主簿。 祖洽,中領軍。 頃年以來,斯務弛廢,田蕪廩虛,實 親局所統,必當練悉,且近東曹板 今欲留銅官大冶及都邑 父珣,司 徒。 其中 南畝

列

傳

第二

王弘

拱待也。」 道子欲以爲黃門侍郎,**珣以其年少固辭**。 若所 : 啓謬允者,伏願便以時施行,庶歲有務農之勤,倉有盈廪之實, 禮節之興,可以垂

者稱焉。 議參軍,加建威將軍,領中兵, 未免喪,後將軍司馬元顯以爲諮議參軍,加寧遠將軍,知記室事,固辭不 桓玄剋京邑,收道子付廷尉,臣吏畏恐,莫敢瞻送。 珣 頗好積聚,財物布在民間。 又固辭。 珣薨,弘悉燔燒券書, 時內外多難,在喪者皆不終其哀, 弘時尚在喪,獨於道側拜,攀車涕泣,論 一不收責,餘舊業悉以委付諸弟。 就。 唯 道子復以爲諮 弘固 執得免。

北 北 中軍諮議參軍,遷大司馬右長史,轉吳國內史。 爲 ·來,穆之愧懼,發病遂卒。 而高祖還彭城,弘領彭城太守。 征,前鋒已平洛陽,而未遣九錫,弘銜使還京師,諷旨朝廷。 寧遠將軍、琅邪內史,尚書吏部郎中,豫章相。 高 祖 爲鎭軍, 召補諮議參軍。 以功封華容縣五等侯。 義熙十一年,徵爲太尉長史,轉左長史。從 盧循寇南康諸郡,弘奔尋陽。 遷琅邪王大司馬從事 時劉穆之掌留任,而旨反從 高祖復命為 中郎。 出

妾,殺興江涘,棄尸洪流。 威 專戮,致誠周書。斯典或違,刑茲無赦。世子左衞率康樂縣公謝靈運,力人桂興淫其嬖 宋國初建,遷尙書僕射領選,太守如故。 事發京畿,播聞遐邇。 奏彈謝靈運曰:「臣聞閑厥有家,垂訓大易,作 宜加重劾,肅正朝風。案世子左衞率康樂

縣公謝靈運過蒙恩獎,頻叨榮授,聞禮知禁,爲日已久。 所虧者重。臣弘忝承人乏,位副朝端,若復謹守常科,則終莫之糾正。所以不敢拱默,自同 則情法斯撓;如其不知,則尸昧已甚。豈可復預班淸階,式是國憲。 憲軌,忿殺自由。 御史中丞都亭侯王准之,四四顯居要任,邦之司直,風聲噂略,曾不彈舉。 遠舊之愆,伏須准裁。」<u>高祖令曰:「靈運</u>発官而已,餘如奏。 內臺舊體,不得用風聲舉彈,此事彰赫,曝之朝野,執憲蔑聞,羣司循舊,國典旣頹, 此而勿治,典刑將替。請以見事冤靈運所居官,上臺削爵士,收付大理治 而不能防閑閫闈,致茲紛穢,罔顧 端右肅正風軌,誠副所 請免所居官,以侯還散 若知而弗糾,

進號衞將軍、開府儀同三司。 役,百姓安之。永初元年,加散騎常侍。 十四年,遷監江州豫州之西陽新蔡二郡諸軍事、撫軍將軍、江州刺史。 以佐命功,封華容縣公,食邑二千戶。三年,入朝, 至州,省賦簡 期,豈拘常儀。

自今爲永制。」

對曰:「此所謂天命,求之不可得,推之不可去。」時人稱其簡舉。 高祖因宴集,謂羣公曰:「我布衣,始望不至此。」傅亮之徒並撰辭欲盛稱功德。 弘率爾

建安郡公,食邑千戶。上表固辭曰「臣聞趙武稱隨會夫子之家事治,言於晉國無隱情。 少帝景平二年,徐羡之等謀廢立,召弘入朝。太祖卽位,以定策安社稷,進位司空,封

列

號車 朝亦 定大策,而 千載 在明主,可用理 於下,則爲厚誣當時,永貽口實。 但無功勤,暴之四海,進闕君子勞心之謀,退微小人勞力之効,而聖朝僭賞於 盡,非 ·騎大將軍,開府、刺史如故 幸 會。認荷 唯 名編 仰塵國 干。 榮遇,雖以智能虛薄,政績蔑聞,而言無隱情,竊所庶 司 勳,功不 紀,實亦俯畏友朋。 所以敢遂愚狷,守之以死。」乃見許。 見紀,固將請不賞之罪,懸龍蛇之書,豈當稽違成 竊財之誚,比此爲輕,惟塵盛猷,虧玷爲大。 憂心彌疹,胡顏靡託。 加使持節、侍中,改監爲都督,進 且凡人之交, 幾。 向令天啓其心,預 命, 上,愚臣 尙申知己,況 微躬所惜,一 荷修 小 一苟忝

彭 \城王義康居守,入住中書下省,引隊仗出入。 司徒府權置參軍。 徐羡之等以廢弑之罪將見誅,弘旣非首謀,弟曇首又爲上所親 給班劍三十人。上西征謝晦,弘與驃騎 委,事將發, 密使

涌。 則 政 和 有失德,咎徵必顯。臣抑又聞之,台輔之職,論道讚契,上佐人主,燮理陰陽。 氣淳穆;寇竊非據,則讁見于天。是以陳平有辭,不濫主者之局,邴吉停駕,大懼牛喘 而頃陰陽隔幷,亢旱成災,秋無嚴霜,冬無積雪,疾厲之氣,彌歷四時。此豈非任失其 五. |年春,大旱,弘引咎遜位,曰:「臣聞三才雖殊,其致則一。 斯固有國之所同,天人之遠旨。 陛下聖哲御世,光隆中興,自己宜休徵表祥,醴泉毖 故世道休明, 五福攸應; 位以德授,

幸,竊懷庶幾。今履端惟始,朝慶禮畢,輒還私門,思愆家巷,庶微塞天譴,少弭謗讟。 顏,何以寧處。不遠而復,大易攸稱,小懲大戒,細人之福。近復之美,非所敢觖,懲戒之 伏之災,患纏氓庶。上缺皇朝緝熙之美,下增官謗覆折之災。伏念惶赧,五情飛散,雖曰厚 日甘一日,實亦仰佩天眷,未能自已。荏苒推遷,忽及三載。遂令負乘之釁,彰著幽明,愆 驅,志在宣力,慮不及遠。旣鯨鯢折首,西夏底定,便宜訴其本懷,避賢謝拙。 戎親戒,憂及社稷,誠是臣下致節忘身之時,當有何心,塵撓聖聽。所以僶俛從事,循牆馳 德居之,猶或難稱,矧伊陋昧,何以克任。 人,覆餗之咎。 臣以庸短,自輩凡流,謬逢嘉運,叨恩在昔。 陛下忘其不腆,又重之以今任。 |槐鼎,統理 神州,珥貂衣袞,總錄朝端,內外要重,頓萃微躬,窮極寵貴,人臣莫比。令 此之易了,不俟明識。但受命之始,屬值時艱,六 而常人偷安, 伏願

吐握。一 隨時制宜,世代盈虛,亦與之消息。夫勢之所處,非親不居。是以周之宗盟,異姓爲後。權 德昭備,上之懿弟,宗本歸源,所應推先,〔宜入秉朝政,翊贊皇猷。竟陵、衡陽春秋已長,又〕 軸之要,任歸二南,斯前代之明謨,當今之顯轍。 明公位極台鼎,四海具瞻,劬勞夙夜,義同 先是彭城王義康爲荆州刺史,鎭江陵。平陸令河南成粲與弘書曰:「僕聞軌物設教,必 而總錄百揆,兼牧畿甸,功實盛大,莫之與儔。天道福謙,宜存挹損。驃騎彭城王道

鑑其所守,卽而許之。 臨啓愧塞,不自宣盡。」

列

升降,享年與松、喬齊久,名垂萬代,豈不美歟」、弘本有退志,挾燦言,由是固自陳請,乃降 宜出據列蕃,齊光魯、衞。日司明公高枕論道,變理陰陽,則天下和平,災害不作,福慶與大宋

雖重,比此爲輕。臣實空闇,階恩踰越,俯積素餐,仰玷盛化,公私二三,無一而可。昔孫叔 徽猷淵邈,明德彌劭,敷政江漢,化被荆南,搢紳屬情,想樂當務,周旦之寄,不謀同詞,分陝 庶族庸陋浮華之臣,超踰先典,居中贊契,豈所以憲章古式,緝熙治道。 驃騎將軍臣 爲衞將軍、開府儀同三司。 未進,優孟見改,展季在下,臧文貽譏。 君,春秋所美,楚出棄疾,前史垂誡。矧乃茂親明德,道光一時,述職侯甸,朝政弗及,而以 之不德邪!深存體國,所望夤亮。驃騎親賢之寄,地均旦、奭,還入內輔,參讚機務,輒敬從 難,勳猷光茂,俾朕獲辰居垂拱,司契委成。豈容高遜總錄,固辭神州,使成務有虧,以重朕 幸。若天眷罔已,脫復遲回,請出臣表,逮聞外內,朝議輿誦,或有可擇。」詔曰:「省表,遠擬 陛下遠存至公,近鑑丹款,俯順朝野,改授親賢。豈唯下臣,獲觅大戾,凡厥衆隸,孰不慶 竊位,萬物謂何,雖曰厚顏,胡寧以處。 斯亡之懼,實疚其心。 乞解州錄,以允民望。 【經國之體,近述大易卑牧之志,三復沖旨,良用憮然。 公體道淵虛, 明識經遠, 毗翼艱 六年,弘又上表曰:「臣聞異姓爲後,宗周之明義;親不在外,有國之所先。 況道隆地昵,義兼前禮。臣於古人,無能爲役,負乘 故魯長滕 「義康」 伏願

徒宜 曷云 陰陽之患。 竭,神州任 **聖覽,仰延優旨,顧影慚** 飾,苟自貶損 充,請留 至於攝督所部,料綜文案,曹局 少無此志,進不能抗言陳辭,以死 人進賢之美,尸位固 能補,惟塵大典,虧喪 須 弘 事力,可順公雅懷,割二千人配府。 叉 職 表日 僚同 重,望實兼該,臣 伏念惟憂,疢如 . . 近 伏願 事 而 冒表聞 臣義康旣總錄百揆,毗讚盛化,忝廁下 聖察,特 寵, 已,自此 日積官謗,旋觀周行,興愧已厚。 惶,罔識 披披 已多。 何 疾首,不知 以 垂許順,不令誠訴,見其抑奪。」[1三上又詔曰:「衞 陳 人斯、寇竊不已。 外,及諸資實,一送司 更役, 所須不多, 攸厝。 愚管,實冀天鑒,體其至誠。 不悟天眷之隆, 自固,退不能 何理,可 臣忝荷要重,四載于今,旣違前史量力之誠,又微古 資儲 重繭 以自安。 爲介推遷,覆敗將及, 不 其餘 復垂恩獎, 煩事送。」 置冰,鮮食爲瘠, 徒。 文武, 但成旨已決, 況在 風, 臣受恩深 皆爲冗長。 諮憑 名器弗 而奉被還詔,未蒙酬察, 親 賢, 有所。 改, 重, 祗 朝 渙汗難 就無 野 畏天威, 蒙寵 休戚 相 內 歸 府 人事 朝 德, 反,加 是 初 如 軍 細 之愆, 舊, 建, 預, 遂復 務,庶 甫 表 公如此, 思引身, 臣 或 愚惑自 俛仰。 懦劣, 必有 徒 有未 可 無 趸 塵 虚 司

罪 之科,然每至詰 博練治體,留心庶事,斟酌 謫,輒有請訴。 時宜,每存優允。 若垂恩宥,則法廢不可行, 與八 座 丞 依事糾責, 郞 疏 曰:「同伍 則物以爲苦怨。 犯 法,無士 宜

列

傳

第

進主守偸十匹、常偸五十匹死,四十匹降以補兵。 其制 ,使得優苦之衷也。[18]又主守偸五匹,常偸四十匹,並加大辟,議者咸以爲重,宜 旣得小寬民命, 亦足以有懲也。

得知,是以罪及奴客。自是客身犯愆,非代郎主受罪也。 屋鄰居,至於士庶之際,實自天隔,舍藏之罪,無以相關。 原。當之者足以塞愆,聞之者足以鑒誡。若復雷同羣小,謫以兵役,愚謂爲苦。符伍 左丞江奧議:「士人犯盜贓不及棄市者,刑竟,自在贓汙淫盜之目,淸議終身,經赦不 如其無奴,則不應坐。」 奴客與符伍交接,有所藏蔽,可以 雌比

守五匹,降死補兵。雖大存寬惠,以紓民命,然官及二千石及失節士大夫,時有犯者,罪乃 者、蓋義存戮僕。如此,則無奴之室,豈得宴安。但旣云復士,宜令輸贖。常盜四十匹,主 譬百司居上,所以下不必躬親而後同坐。是故犯違之日,理自相關。□□○今罪其養子、典計 可戮,恐不可以補兵也。謂此制可施小人,士人自還用舊律。」 右丞孔默之議:「君子小人,旣雜爲符伍,不得不以相檢爲義。 士庶雖殊,而理有聞察,

逞之士,事接羣細,旣同符伍,故使糾之。于時行此,非唯一處。左丞議奴客與鄰伍相關, 符 . 糾之。此非士庶殊制,實使卽刑當罪耳。夫束脩之胄,與小人隔絕,防檢無方,宜及不 尚書王准之議:「昔爲山陰令,士人在伍,謂之押符。同伍有愆,得不及坐,士人有罪, 列傳第二 王弘

邪 刑 家 可 者 必 得 少。 檢察,符中有犯,使及刑坐。 乘 理 ,恐非立法當罪本旨。 則 其 君 有停者,左右 子, 違之 則 驅 小人。 **「馳,動** 右 丞 制嚴 止所 即事而求,有乖實理 議士人犯偷,不及大辟者,宥 於上, 須, 出門甚寡, 猶冒. 犯之, 典計者 0 以 其 有奴客者,類多使役,東西分散,住 宥 在 科,犯 家 補 十無其 兵。 者 雖 欲 或 弘 衆。 士,懼 奴客 使畏 一坐伍 無 法 以 濫 懲

心

一〇万

所

以

大

宥

也。

且

士庶異制

,意所不

同

附,惟 於義 過, 實 知 以 民乏貲 相 而 檢 已 謂不宜 為美。 交 押 小 殿 制之本耳。 應 之於伍 財 關 人 中 獲罪 (邪?[110]為使受檢 , 責 郞 是私 坐。 謝 盗 一,而 其 ,則是受檢於 元 制 聞察,三三則 還從其 賤 其奴 議 此 也。 按左 謂 自 則 是辯章 事 主, 以私 一丞議, 義 歸戮 於事 於小 必先正其本,口亞然後其末 小人 意 賤 有未 二本,欲使各從 士人旣終不爲兵革, 無名之人, 僕, 人邪? 為宜。 也。 然則 因。 然 [三]案左丞 則 無 無 何 者? 奴 豫公家 小人 奴 之士, 之士,未合宴安,使之輸 其 名實 有罪,士 分。 有 稱 不 幸可同寬宥之惠,不必依舊律, 實 殊章,公私 至於求之管見, 士 在此 可 之任 庶天 人 理。 無 例。 事 公私 隔,三三 本所以押士大夫於符伍者, 異令, 一,僕隸 若士 混 則 人本 淆, 贖 宜附 何 奴 土 罪,而 介於 不 名 檢 無 押符 前 事 實 弘 小 科, 非 非 令坐之。 庶 謬。 允。 之由 區 是 則 無 别 於議咸 由 小 名也, 士庶, 一科所 若以 以 人 此 所 有 而 不

問,恐有所失。 傲然於王憲,無僕者怵迫於時網,是爲恩之所霑,恒在程、卓,法之所設,必加顏、原,求之鄙 隔, 懷,竊所未 則聞察自 郞 愜。 何 難 尙 ,不宜以難知之事,定以必知之法。 謝殿中謂奴不隨主,於名分不明,誠是有理。 之議。「按孔右丞議,士人坐符伍 左丞議。」 . 爲罪,有奴罪奴, 夫有 奴不賢,無奴不必不賢。 然奴僕實與閭里相關,今都不 無 奴 輸 贖。 旣 許 **今多僮者** 土 庶緬

意同

擾,不 十數年前,亦有四族坐此被責,以時恩獲停。而王尚書云人舊無同伍坐,所未之解。 任之日,偶不值此事故邪。聖明御世,士人誠不憂至苦,然要須臨事論通,上干天聽爲紛 犯法,庶民得不知。若庶民不許不知,何許士人不知。小民自非超然簡獨,永絕塵粃者,比 相 盡 民,輒受士人之罰。 .押領,有違糾列,了無等衰,非許士人閭里之外也。 親 滴耳。 )棟,小以爲意,終自聞知,不必須日夕來往也。 弘 ·如近爲定科,使輕重有節也。 瞋 議曰:「尋律令旣不分別士庶,又士人坐同伍罹謫者,無處無之,多爲時恩所宥,故不 里 巷關接、三司相 吳及義興適有許、陸之徒,以同符合給,二千石論啓丹書。己未間,會稽士人云 於情於法,不其頗歟。且都令不及士流,士流爲輕,則小人令使徵預其 知情狀,乃當於冠帶小民。 又尋甲符制,鐲士人不傳符耳,令史復除,亦得如之。共 右丞百司之言,粗是其況。如衰陵 諸議云士庶緬絕,不相參知,則士人 今謂之士人, 便無小人之坐; 署爲 恐莅 小

明憲 於心 罰,便 不 至 五 無奴客, 在 此 匹,常偷 う致以 ,常有可愍,故欲小進匹數,寬其性命耳。 此 ,檢下防非,而親犯科律,亂法冒利,五匹乃已爲弘矣。 事至相糾,閭伍之防,亦爲不同。謂士人可不受同伍之讁耳,罪其奴客,庸何傷邪? 也。 可令輸贖,又或無奴僮爲衆所明者,官長二千石便當親臨列上,依事遣判。 四 明罰,固其宜耳,並何容復加哀矜。 近聞 [十匹,[三]謂應見優量者,實以小吏無知,臨財易昧,或由疏慢,事蹈重科,求之 之道路,聊欲共論,不呼乃爾難精。 且此 至於官長以上,荷蒙祿榮,付以局任,當正己 輩士人,可殺不可讁,有 旣 衆議糾紛,將不如其已。 士人無私相偸四十匹理,就 如諸 論,本意自 若呼不應 叉主 兪 使

務在 乎消息。 役。 **免,家人** 之公役 豐役,增 而 弘 動 考之見事,猶或未盡。 又上言:「舊制,民年十三半役,十六全役。 遠討? 十五. 有定科,循 進年齒,孤遠貧弱, 至十六,宜 胎孕不 育,巧避羅 吏隱恤,可 爲半丁 體 ', 十 憲,實 其敝 無其患,庸宰守常 有强弱,不皆稱年。 七 尤深。 爲 亦由 全 之。 丁。」三三從之。 至令依寄無所, 今皇化惟新,四方無事,役召之宜,CEO應存 ,已有勤劇,況 當以十三以上,能自營私及公,故以充 且 在家自隨,力所能堪,不 生死 値 魔告, 青 政, 豈可 身之切, 稱言。 容 過苦。 逃 乃有 竄 移 求

寢

,謂宜

集議

奏聞,決之聖旨。」太祖

韶「衞

軍議爲允。」

其後 弘 寢 疾 , 弘表屢乞骸骨, 上輒優詔不許。 九年,進位太保,領中書監,餘如故。 其

列

無已。 首,抱義懷忠,乃情同至,籌謀廟堂,竭盡智力,經綸夷險,曰己簡自股心。國恥旣雪,允膺茅 書、刺史如故。諡曰文昭公。配食高祖廟廷。 謨,比蹤齊望,其復先食邑,以酬忠勳。」又詔:「聞王太保家便已匱乏,淸約之美,同規古人。 **遵養,暨于明罰,外虞內慮,實惟艱難。 故太保華容縣公弘、故衞將軍譁、故左光祿大夫曇** 言念始終,情增悽歎。可賜錢百萬,米千斛。」 土,而並執謙挹,志不命踰,故用佇朝典,將有後命。盛業不究,相係殞落,永懷傷歎,痛恨 弘可增封千戶,華、曇首封開國縣侯,食邑各千戶。護軍將軍建昌公彦之,深誠密 時年五十四。卽贈太保、中書監,給節,加羽葆、鼓吹,增班劍爲六十人,侍中、錄尙 其年,韶曰:「乃者三逆煽禍,實繁有徒,爰初

首,行列风尚 民 史 【思茂惠。 (華容文昭公弘,德猷光劭,鑒識明遠。故散騎常侍、左光祿大夫、太子詹事豫寧文侯曇 世: 祖 大明五年,車駕遊幸,經弘墓。下詔曰:「故侍中、中書監、太保、錄尚書事、揚州刺 朕薄巡都外,瞻覽墳**整,永言想慨,良深于懷。便可遣使致祭墓**所。」 恬素,理心貞正。並綢繆先眷,契闊屯夷,內亮王道,外流徽譽。以國圖令勳,

又褊隘,人忤意者,輒面加責辱。少時嘗摴蒲公城子野舍,及後當權,有人就弘求縣,辭訴 謂爲王太保家法。 弘 明 敏 有思致,旣以民望所宗,造次必存禮法,凡動止施爲,及書翰儀體,後人皆依傲 雖歷任藩輔,[110]不營財利,薨亡之後,家無餘業。 而輕率少威儀,性

頗切。 此人嘗以蒲戲得罪,弘詰之曰:「君得錢會戲,何用祿爲」答曰:「不審公城子野何

在。」弘默然。

自位遇。 子錫嗣。 太尉江夏王義恭當朝,錫箕踞大坐,殆無推敬。卒官。子僧亮嗣。 少以宰相子,起家爲員外散騎,歷淸職,中書郞,太子左衞率,江夏內史。 齊受禪,降爵 高

弘弟虞、廷尉卿。 虞子深,有美名,官至新安太守。 虞弟抑,光祿大夫。 抑弟孺,侍中。

爲侯,食邑五百戶。弘少子僧達,別有傳。

孺弟曇首,別有傳。

仁恚之不已,太宗乃收付廷尉,賜死。 中,亦經淸職,黃門郎,臨海王子頭晉安王子勛征虜、前軍長史,左民尙書。 左長史。 弘從父弟練,晉中書令珉子也。 元嘉中,歷顯官,侍中,度支尚書。 隨司徒建安王休仁出赭圻,時居母憂,加冠軍將軍。 件犯休仁, 練子釗,世 出爲始興 太宗 初、爲 山祖大明 相。 司 徒 休

晉綱弛紊,其漸有由,孝武守文於上,化不下及,道子昏德居宗,憲章墜矣。 重

俗、此蓋文宣公之爲也。爲一代宗臣、配饗淸廟、豈徒然哉! 尊主卑臣之義,定於馬棰之間。 威令一施,內外從禁,以建武、永平之風,變太元、 隆安之 禍基東妖,難結天下,蕩蕩然王道不絕者若綖。。高祖一朝創義,事屬橫流,改亂章,布平道, 威不樹,臣道專行,國典人殊,朝綱家異,編戶之命,竭於豪門,王府之蓄,變爲 之以國寶啓亂,加之以元顯嗣虐,而祖宗之遺典,羣公之舊章,莫不葉散冰離,掃地盡矣。主 私藏。 由是

#### 校勘記

且其勢亦美 「勢」各本並作「名」,據南史、元龜七二二改。

自旦至日中 各本並脫「日」字,據南史、藝文類聚五八引、建康實錄、元龜三八八、七一八、八

五〇、御覽五九五引補。

[] 將軍尹領選如故 各本並脫「軍」字,據南史補。

〔8〕甲仗五十人入殿 各本並脫「入殿」二字,據南史補。

Ħ. 故尚書左僕射前將軍臣穆之 「前將軍」各本並作「前軍將軍」,據南史删「軍」字。孫彪宋書考

論云:「是前將軍,誤多軍字。」

· 事隔於皇朝者 各本並脫「者」字,據南史補。

- $\Box$ 南康國東二百許人「東」各本並作「史」,據南史、元龜九二八、御覽七四二引改。
- 叉有 義宣故部曲潛於梁山洲外下投官軍 「有」疑當作「與」,或文有譌奪。
- . 大 山 |劉| 遂居劉安衆處 湛 也。 湛父柳,晉時封,湛襲封安衆男爵。」按劉湛出繼伯父淡,襲封安衆縣五等男。 「劉」各本並作「留」,據兩史、元龜九四四改。 孫彪宋書考論云:留當爲劉,謂
- 而府資役單刻 各本並脱「役」字,據远龜五〇三補。 按府資單刻,謂軍府資望不足。 府資役

驃騎府不得謂資望不足,故當加「役」字。

單

刻

,謂軍府役力不足。

- 時, 本 御史中丞都亭侯王准之 準」,以宋順帝諱,改作「准 所 襄校事 據宋本殘 者又據誤本改成「王淮之」。 葉,本作「王准之」。 「王准之」三朝本、北監本、毛本、殿本、局本並作「王淮之」。 張元濟校勘記云:「當作王准之、見傳二十。」及影印百衲 今改正。 元龜五一八亦作「王准之」不誤。 「准」 按三朝 本作 本
- (1三) 光隆中興 各本並脫「中興」二字、據元龜三三二補。
- 宜入秉朝 政 翊贊 皇猷 竟陵衡陽 春 秋已長又宜出據列蕃 齊光魯衛 各本並脫 「宜入秉朝政至 春

秋已長又」共十八字,據建康實錄

補

愚惑. 自 揆 愚惑」 各本並作 「威愚」, 永樂大典卷六八三一作「感恩」, 元龜三三一作「愚惑」。

今據元龜改。

列傳第二 校勘記

- 二 吾 見其 、抑奪 「見其」各本並作「其見」、據元龜三三一改正。
- 使得優苦之衷也 「優」各本並作「憂」,據元龜六一五改。
- 理自相關 各本並脱「相」字、據远龜六一五補
- 使畏法革心 「革」各本並作「其」,據元龜六一五 改
- 事必先正其本 「事必先正」四字,宋本空格,弘治本、北監本、毛本、殿本、局本作「宜先治」三

字,今據元龜六一五補。

- 本所以押士大夫於符伍者所以檢小人邪 字、宋本殘葉空白、弘治本、北監本、毛本、殿本、局本作「而末所」三字、今據元龜六一五 「押」各本並作「探」,據远義六一五改。「伍者所」三 補。
- 為使受檢於小人邪 「爲」字,宋本殘葉空白,弘治本、北監本、毛本、殿本、局本作「可」字,元龜

六一五作「爲」字。今據沅龜補。

- 案左丞稱士庶天隔 坐奴是」五字,今據远龜六一五補 「案左丞稱」四字,宋本殘葉空白,弘治本、北監本、毛本、殿本、局本作「士
- 責其聞察 「責」各本並作「貴」,據元龜六一五改。

犯

實與里巷關接 「接」宋本殘葉空白,弘治本、北監本、毛本、殿本、局本作「通」,今據元龜六一

五

役召之宜 各本並脫「宜」字、據通典食貨典、元龜四八六補。

(中) 十七爲全丁 各本並脱「丁」字,據南史、通典食貨典、元龜四八六補。

經綸夷險 宋本殘葉作「經□□險」,弘治本、北監本、毛本、殿本、局本作「經營艱險」,元龜一

一八作「經綸夷險」。今據元龜補。

豫寧文侯曇首 「豫寧」各本並作「豫章」,據王曇首傳改正。 按州郡志、豫章郡有豫寧縣、無豫

章縣,作豫寧是。

[110] 雖歷任藩輔 「藩輔」各本作「藩翰」,據南史改。

# 宋書卷四十三

### 列傳第三

# 徐羨之 傅亮 檀道濟

共事 軍。 熙十一年,除鷹揚將軍、琅邪內史, 左司馬,掌留任,以副貳劉穆之。 ,混甚知之。 與高祖同府、深相親結。 羡之少爲王雅太子少傅主簿,劉牢之鎭北功曹,尚書祠部郎,不拜,桓脩撫軍中兵曹參 徐羨之字宗文,東海郯人也。 補琅邪王大司馬參軍,司徒左西屬,徐州別駕從事史,太尉諮議參軍 義旗建,高祖版爲鎭軍參軍,尚書庫部郎,領軍司馬。 祖寧、尚書吏部郎、江州刺史、未拜卒。父祚之、上虞令。 仍爲大司馬從事中郎,將軍如故。[1]高祖北伐,轉太尉 與謝混 義

官爲二千石,志願久充。今二方已平,拓地萬里,唯有小憲未定,而公寢食不忘。意量乖殊, 初,高祖議欲北伐,朝士多諫,唯羡之默然。 或問何獨不言,羨之曰:「吾位至二品,〔三〕

列

傳 第 三

徐

羨 之

出

入。

轉

尙

何 可 輕豫。」 劉穆之卒,高祖命以羡之爲吏部尚書、建威將軍、丹陽尹, 書僕射,將軍 · ,尹 如故。 總知留任, 甲仗二十

爲道扶姑女所告, 四 年,大司 馬府軍人 正周 朱興妻周 棄市 刑。 羡之議曰:「自然之愛, 坐息男道扶年三歲,先得癇病,周因其病發,掘地生埋 虎狼猶仁。 周之凶忍, 宜 加 顯

伏法 或肆 晦 容 書 張 彌 城 軍 侯 邵 男 僕 雍 前 者當 動樹績,弘濟艱難。 劉 王 臣 射 高 左 3 州 左 弘, 衞 鎭 以 懷 祖 將 刺 爲 愼 踐作,進號鎮 罪,而在宥者靡容。 参西中 將 軍將軍 史關 軍 散騎常侍、 軍 法律之外,故尙弘物之理。 散騎 江州刺 潘陽 中侯 郞 、丹陽尹徐羨之,監江州豫州之西陽新蔡諸軍事、撫軍將軍、江州 常侍、領太子 將軍 男 趙倫之, 劉 護軍將軍作唐男檀 軍將軍,加散騎常侍。 史宜陽 粹, 事 經始圖終,勳烈惟茂,並宜與國同休,饗茲大賚。 了、建威 使持節、 侯檀韶, 愚謂可特申之遐裔。」從之。 使持節 將軍 左衞· 南蠻 率新 、河東太守資中侯沈林子 、督北徐 使持節、 母 一校尉 道濟, 淦 之卽刑,由子明法,爲子之道,焉有自容之地。 侯 上初卽位,思佐 佷 王 克青三州諸 雍梁南北秦四州 中書令、領太子詹事傅亮, 一仲德 Щ 子 到 前 彦之, 冠軍 軍 事 |命之功,詔曰:「散騎常侍、尙 等, F、征虜: 將軍、 西中 荆州 或忠規 郞 北 之河北 將軍 司 靑 遠謀, 馬 羨之可封南昌縣 州 大北 侍中、中 南 諸 刺 軍事 史安 郡 徐 扶 相 州 讚 南 宜 刺 刺 領 (洪業; 史華 史 陽 男 後 軍 雖 南 向 侯 將 謝

並增邑爲千戶,倫之可封霄城縣侯,食邑千戶,邵可封臨沮縣伯,林子可封漢壽縣伯, 可更增邑二千五百戶,仲德可增邑二千二百戶,懷愼、彦之各進爵爲侯, 公,弘可華容縣公,道濟可改封永脩縣公,亮可建城縣公,晦可武昌縣公,食邑各二千戶,韶 粹改封建安縣侯,

六百戶。開國之制,率遵舊章。

事,安異同 起自布衣,又無術學,直以志力局度,一旦居廊廟,朝野推服,咸謂有宰臣之望。 不以憂喜見色。 羡之遷尚書令、揚州刺史,加散騎常侍。 頗工弈棊,觀戲常若未解,當世倍以此推之。傅亮、蔡廓常言:「徐公曉萬 進位司空、錄尚書事、常侍、刺史如故。 沈密寡言,

同 被 顧 高 命。 祖不豫,加班劍三十人。宮車晏駕,與中書令傅亮、領軍將軍謝晦、鎭北將軍檀道濟 少帝詔曰:「平理獄訟,政道所先。朕哀荒在疚,未堪親覽。司空、尚書令可率

衆官月一決 帝 後 失德,羨之等將謀廢立,而廬陵王義眞輕動多過,不任四海,乃先廢義眞,然後廢 獄。」

刺史 中書 檀 時 謝 道 舍 濟 晦 先朝舊將 爲 人那安泰 領軍,以府舍內屋敗應治,悉移家人出宅,聚將士於 一威服 、潘盛爲內應,其日守關。 殿省,且有兵衆,召使入朝,告之以謀。 道濟領兵居前,羨之等繼其後,由東掖門雲 府內。鎭北將軍、南兗州 事將發,道濟入宿領軍

列

破崗 出 龍門入,宿衞先受處分,莫有動者。 追者以門關擊之倒地,然後加害。 .東閣,收璽綬。 羣臣拜辭,衞送故太子宮,遷於吳郡。 侍中程道惠勸立第五皇弟義恭,羨 ,率左右唱呼引船爲樂。 遣使殺義眞於新安,殺帝於吳縣。 是夕,寢於龍舟,在天淵池。 先是帝於華林園爲列肆,親自酤賣,又開瀆聚土,以像 時爲帝築宮未成,權居金昌亭,帝突走出昌門, 兵士進殺二人,又傷帝指。 扶帝

依舊臨華林園聽訟,詔曰:「政刑多所未悉,可如先二公推訊。」 太祖卽阼,進羨之司徒,餘如故,改封南平郡公,食邑四千戶,固讓加封。 有司奏車駕

盛化。 等重奏曰:「近陳寫下情,言爲心罄,奉被還詔,鑒許未回。 構之艱,時攬萬機,躬親朝政,廣闢四聰,博詢庶業,則雍熙可臻,有生幸甚。」上未許。「羨之 屢聞,未能仰感,敢藉品物之情,謹因蒼生之志。 伏願陛下遠存周文日**昃之道,近思皇室**締 冢宰聽政,以再朞爲節。百王以降,罔或不然。陛下聖德紹興,負荷洪業,億兆顒顒,思陶 終,事盡宣翼。冕旒之道,理絕於上皇;拱己之事,不行於中古。故高宗不言,以三齡爲斷; 人無異議。何者。形風四方,實繫王德,一國之事,本之一人。雖世代不同,時殊風異,至 元嘉二年, 羡之與左光祿大夫傅亮上表歸政,曰:「臣聞元首司契,運樞成務,臣道代 而聖旨謙挹,委成羣司。自大禮告終,鑽燧三改,大明佇照,遠邇傾屬。臣等雖率誠 豈惟愚臣,秉心有在,詢之朝野,

表披 世,休 退還 姓為 業,時屯 昧旦丕 王 主運臣贊,古今一揆。未有渾心委任,而休明可期,此之非宜,布自遐邇。 待 私 陳,辭誠 心 慼 顯 第,兄子佩之及侍中程道惠、吳興太守王韶之等並謂非宜,敦勸甚苦,復奉詔攝 旦之日,豈得無爲拱己,復玄古之風,逡巡虛挹,徇匹夫之事。 弘 國故,猶在民心。 以 ,帝王之高義。自皇宋創運,英聖有造,殷憂未闕,艱患仍纏。賴天命有底,聖明承 大業 均,情爲 俱盡,詔旨沖遠,未垂 以嗣先軌,隆聖道以增前烈。愚瞽所獻,情盡於此。」上乃許之。羨之仍遜位 《國至,豈容順默。 重披丹心,冒昧以請。」上猶辭。 泰山之安,未易可保,昏明隆替,繫在聖躬。 |聽納,三復屏營,伏增憂歎。臣聞克隆先構,幹蠱之盛業, 羨之等又固 伏願以宗廟爲重,百 斯誠周詩夙興之辰, 臣等荷遇二 陳曰:「比 任。

遠,徽 譬。 者乎。 凶 末 其 極 因 心 虐,茶 永初 懼 力,送往 風 徐羨 年 禍 夙播,魯衞 Ė 之季 以建大 酷 月, 之、傅亮 備 無復言之節,事居闕忠貞之効,將順 一天禍 詔曰 加,顚沛 、策,而逞其悖 之寄,朝野屬情。 横流。 、謝晦,階因緣之才,荷恩在昔,擢 「民生於三,事 皁隸 大明傾不 之手,告盡逆旅 心,不畏不義。播遷之始,謀肆酖毒,至 曜,四海遏密,實受顧 之如 羡之等暴蔑求專,忌賢畏逼,造構 一,愛敬同極,豈惟名敎,況乃施侔造物,義在 之館, 靡記,匡救蔑聞,懷 都鄙 自無聞,超居要重,卵翼而長,未足以 託,任 哀愕, 同 行路 負圖。 飮 寵 涕 止 而 貝 取容,順成 未 不 、錦,成 故 幾,顯行 能 廬陵 竭其股肱,盡 此無端 失德。 王英秀明 怨殺,窮 加 罔 隆 雖

列

鄭人致 劉粹 中領 即宜 酌民心,近聽輿訟,雖欲討亂,慮或難圖,故忍戚含哀,懷恥累載。 可得而 展,何嘗不顧影慟心,伏枕泣血。 威三靈,怨結 軍到彥之卽日電發,征北將軍檀道濟絡驛繼路,符衞軍府州以時收翦。 一誅殛,告謝存亡。 斷其走伏。 上,橫加流屏,矯誣朝旨,致茲禍害。寄以國命,而翦爲仇讎,旬月之間,再肆酖毒,痛 討 雪,便命司 ,宋肥無辜,蕩澤爲戮。 人鬼。 罪止元凶,餘無所問。 寇,肅明典刑。 自書契以來,棄常安忍,反易天明,未有如斯之甚者也。 而于時大事甫爾,異同紛結,匡國之勳實著,莫大之罪未彰。 今逆臣之釁,彰暴遐邇,君子悲情,義徒思奮,家讎 晦據有上流,或不卽罪,朕當親率六師,爲其遏防。 況逆亂倍於往釁,情痛深於國家,此而 感惟永往,心情崩絕。 氛霧旣袪,庶幾治道。」 每念人生實難, 可容,孰 已命征虜將軍 昔子家從 不 情事未 是以遠 國恥, 可忍。 可遭

尸付廷尉。 年六十三。 處分。」亮馳報羨之。羨之回還西州,乘內人問訊車出郭,步走至新林,入陶竈中自剄死,時 爾 日詔召羨之。 子喬之,尚高祖第六女富陽公主,官至竟陵王文學。喬之及弟乞奴從誅。 羡之初不應召,上遣中領軍到彦之、右衞將軍王華追討。 行至西明門外,時謝晦弟嚼子肯反為黃門郎,正直,報亮云:「殿內有異 羡之死,野人以告,載

相,而有大厄,可以錢二十八文埋宅四角,可以免災。過此可位極人臣。」後羨之隨親之縣, 初,羡之年少時,嘗有一人來,謂之曰:「我是汝祖。」羨之因起拜之。 此人曰:「汝有貴

之爲 住 在 室,守關將入,彗星晨見危南。 一縣內,嘗暫出,而賊自後破縣,縣內 臨海樂安縣,嘗行經山 中,見黑龍長 又當拜時,雙鸛集太極東鴟尾鳴喚。四 人無免者,雞犬亦盡,唯羨之在外獲全。 丈餘,頭 有角,前兩足皆 具,無後足,曳尾而 隨從兄履 行。 及

耳。」佩之等乃止。羨之旣誅,太祖特宥佩之,免官而已。其年冬,佩之又結 之。亮答以爲:「己等三人,同受顧命,豈可相殘戮。 秉權,頗豫政事。 百餘人,殺牛犒賜,條牒時人,並相署置,期明年正會,於殿中作亂。 反,并告前寧州刺史應襲,以亨爲兗州,襲爲豫州。 不堪見客。佩之等疑其託疾有異圖,與韶之、道惠同載詣傅亮,稱羨之意, 兄子佩之,輕薄好利,高祖以其姻戚,累加寵任,爲丹陽尹,吳郡太守。 與王韶之、程道惠、中書舍人邢安泰、潘盛相結黨與。 亨密 若諸君果行 以聞,襲亦告司 此事,便當角 未及數日,收斬之。 時 徒王 謝晦 景平初,以羡之 弘。 欲令亮作詔誅 殿中監茅亨謀 巾 **外病**,連灸, 步 佩之聚黨 出 掖 門

守。 瑗與都 傅亮字季友,北地靈州人也。高祖咸, 四司隸校尉。父瑗, 超善,超嘗造暖,暖見其二子迪及亮。 亮年四五歲, 超令人解亮衣, 使左右持 以學業知名,位至安成太

列傳

長猷,亦儒學,官至五兵尚書。 去,初無吝色。 超謂瑗曰:「卿小兒才名位宦,當遠踰於兄。 永初二年卒,追贈太常。 然保家傳祚,終在大者。」迪字

結本心,乞歸天宇,不樂外出。」高祖笑曰:「謂卿之須祿耳,若能如此,甚協所望。」會西討司 亮。 轉中書黃門侍郞,直西省如故。 采,選爲秘書郎,欲令整正秘閣,未及拜而」以敗。 母憂,服闋,爲劉毅撫軍記室參軍,又補領軍司馬。七年,遷散騎侍郎,復代演直西省。 元年,除員外散騎侍郎,直西省,典掌詔命。 亮不答,即馳見高祖曰:「伏聞恩旨,賜擬東陽,家貧忝祿,私計爲幸。 亮博涉經史,尤善文詞。 初爲建威參軍,桓謙中軍行參軍。 高祖以其久直勤勞,欲以爲東陽郡,先以語迪,迪大喜告 轉領軍長史,以中書郞滕演代之。 義旗初,丹陽尹孟昶以爲建威參軍。 桓玄篡位,聞其博學有文 但憑廕之願,實 亮未拜,遭 義熙 仍

馬休之,以爲太尉從事中郎,掌記室。以太尉參軍洋徽爲中書郎,代直西省。 晚坐散,亮還外,乃悟旨,而宮門已閉,亮於是叩扉請見,高祖卽開門見之。 亮入便曰:「臣 命已移,我首唱大義,復興皇室,南征北伐,平定四海,功成業著,遂荷九錫。今年將衰暮,崇 子如故。從還壽陽。高祖有受禪意,而難於發言,乃集朝臣宴飲,從容言曰:「桓玄暴篡,鼎 極 如 ,此,物戒盛滿,非可久安。 今欲奉還爵位,歸老京師。」羣臣唯盛稱功德,莫曉此意。 **亮從征關、洛,還至彭城。** 宋國初建,令書除侍中,領世子中庶子。徙中書令,領中庶

便奉 暫宜還都。」高祖達解此意,無復他言,直云:「須幾人自送。」亮曰:「須數十人便足。」於是卽 辭 院旣出,已夜,見長星竟天。 院拊髀曰:「我常不信天文,今始驗矣。」至都,即徵高

入輔

詹事 演字彥將,南陽西鄂人,官至黃門郎,祕書監。義熙八年卒。二年,亮轉尚書僕射,中書令、 文筆皆是記室參軍滕演,北征廣固,悉委長史王誕,自此後至于受命,表策文誥,皆亮辭也。 旭 專典詔命。 如故。 永初元年,遷太子詹事,中書令如故。 明年,高祖不豫,與徐羨之、謝晦並受顧命,給班劍二十人。 以亮任總國權,聽於省見客。 以佐命功,封建城縣公,食邑二千戶。入直中書 神虎門外,每旦車常數百兩。高祖登庸之始,

加散 者莫 爵始興郡 迎 太祖 太祖 騎 能 少帝卽位,進爲中書監,尙書令。景平二年,領護軍將軍。少帝廢,亮率行臺至江陵奉 常侍、 仰 旣至,立行門於江陵城南,題曰「大司馬門」。率行臺百僚詣門拜表,威儀禮容甚 將下,引見亮,哭慟甚,哀動左右。 視 公,食邑四 左 亮流汗沾背,不能答。 一光祿 千戶,固 大夫、開府儀同三司,本官悉如故。 讓 進 封 於是布腹心於到彥之、王華等,深自結納。 旣而問義眞及少帝薨廢本末,悲號 司空府文武卽爲左光祿府。 嗚咽,侍側 太祖登阼,

元嘉三年,太祖 欲誅亮,先呼入見,省內密有報之者,亮辭以嫂病篤,求暫還家。

列

傳

報 初 徐羡之, 至 一廣莫門,上遣中書舍人以詔書示亮,幷謂曰:「以公江陵之誠,當使諸子無恙。」 因 乘 車出郭門,騎馬奔兄迪墓。 屯騎校尉郭泓收付廷尉, 伏誅。 時年五十三。

初,亮見世路屯險,著論名曰演愼,曰:

著愼 茅,何咎之有。」愼之至也。 公身之譽,周廟 道有言,愼終如始,則無敗事矣。 銘陛坐之側。 文王小心,大雅詠其多福,仲由 因斯以談,所以保身 湯曰:「括囊無咎。」愼不害也。 全德,其莫尙於愼乎。 好勇,馮河貽其苦箴。 又曰:「藉之用 (虞

以庶 貴。 以身輕 然而 安,行險而 夫 於物 四道 徇 也。 好 欲厚生者,忽而 **〔謙,三材忌滿,祥萃虛室,** 徼幸,於是有顚墜覆亡之禍,殘生夭命之釁。 不戒;知進忘退者, 鬼瞰 高屋, 曾莫 之懲。 豐屋有蔀家之災,鼎食無百年之 前車已摧,後鑾不息, 其故何哉? 流溺忘 反,而 乘 危

涓 而 後謀 涓 故 ,合拱挫於纖檗,介焉是式, 通 昔之君子,同名爵於香餌,故傾危不及,思憂患而 一、患結 而 後 思 復云 爾 而 色斯 已哉 而 故詩曰:「 舉 悟高 鳥 「愼爾侯度,用戒不虞。」言防 以 風 逝, 豫防,則針石 鑑 禮酒 而 投紱 無用。 洪流 萌 夫豈 也 敝 壅於 著

胸 心,巖牆絕於四體 夫單 以營內喪表,張 夫然,故形神偕全, 以治外失中,齊、秦有守一之敗, 表裏寧一, 營魄內澄, 偏恃 無兼 百骸外固, 濟之功, 冰 邪氣不能 炭 滌 於

襲,憂患不能及,然可以語至而言極矣。

鄙之分旣明,全喪之實又顯。非知之難,愼之惟艱,愼也者,言行之樞管乎。 或振褐高棲,揭竿獨往,或保約違豐,安于卑位。故漆園外楚,忌在龜犧,商洛遐遯, 畏此駟馬。 厚味於甘耽,□□ 徒以忽防於鍾、呂,肆言於禹、湯,禍機發於豪端,逸翩鎩於垂舉。 夫以<br />
嵇子之抗心希古,<br />
絕羈獨放,<br />
五難之根旣拔, 平仲辭邑,殷鑒於崔、慶,張臨挹滿,灼戒乎桑、霍。 ]□其懼患也,若無轡而乘奔,其愼禍也,猶履冰而 立生之道無累,人患殆乎盡矣。 若君子覽茲二塗,則賢 觀夫貽書良友,則匹 臨谷。

梁,傾側成於俄頃,性命哀而莫救。 嗚呼 故詩曰:「不敢暴虎,不敢馮河。」愼微之謂也。故庖子涉族,忧然爲戒,差之一毫,弊猶 曰 如此。況乎觸害犯機,自投死地。禍福之具,內充外斥,陵九折於邛僰,泛衝波於呂 .是何傷,禍之門爾。 言愼而已矣。 夫據圖揮刃,愚夫弗爲,臨淵登峭,莫不惴慄。何則?害交故慮篤,患切而懼深。 !嗚呼!故語有之曰,誠能愼之,福之根也。

亮 布衣儒生,僥幸際會,旣居宰輔,兼總重權,少帝失德,內懷憂懼,作感物賦以寄意

焉。其辭曰:

余 以 暮秋之月,述職內禁,夜淸務隙,遊目藝苑。于時風霜初戒,蟄類尙繁,飛蛾

有

·懷,感物興思,遂賦

之云

爾。

翔 生 異鵲之事, 羽 翩翾滿室,赴軒幌,集明燭者, 與彼同迷而 忘反鑒之道 必以燋滅爲度。 此先師所以鄙智, 雖則微物, 及齊客所以難日論也 矜懷者久之。 退感莊 悵

遺蹤 辭 霜 史,訪 以 存 澧 遐念,若循環之無終。 造 麗 在 心 而 墳 而 西 跡於汙隆。 被墉。 素 成之暮晷, 去穢,旨旣 《香以 難暨, 憐鳴蜩之應節,惜落景之懷東。嗟勞人之萃感,何夕永而 雅 肅皇命於禁中。 豊 夷 而 九流 能 阻 詠倚相之遺矩,希董生之方融。 通。 紛其 之在 雖源 八異封。 運,將 流之深浩,且揚搉 聆蜻蛚於前廡,鑒朗月於房櫳。 領三百於無邪, 貫五千於 有 全喪之由躬。 遊翰 而 發蒙 林之彪 鑽光燈而散表, 炳,嘉美手於 宗。 風蕭瑟以 考 慮充。 舊聞 溫聖哲之 良工。 、陵幌, 眇今 於前

本, 軌 予 悟 比 之克明。 雕 之旣 靈 或 陵 習 耽 稟清 覆, 習 於 莊 欲 飛 忘改轍 納飄 氏, 曠 豈知反之徒爾,喟投翰以增情。 而 志 辺 幾鑒 授 生。 飄纖 於後 氣 濁 碎 蠅,緣幌求 乘。 而迷清。 修緣督 隨侯 匪微物之足悼,悵永 於 微 而 仰前 舒,捐 隙 爲 經。 ,望爓思陵。 修 之懿軌 所 照安危 重 而 要 於心 念而 糜蘭 知吾跡之未幷。 輕。 術, 捬 膏而 矧 膺。 昆 鏡纖 無悔,赴朗燭而 蟲之所 彼 兆 人道之爲貴, 於 雖宋元之外占,曷在 昧, 未 形。 在 智士 未 有 参二 懲。 徇 其 末 , 猶嬰。 儀 瞻前 mi 拾 而

曲。 帶佩嘉謀。 軌 離 不以幣,贈言重琳球。 疎董頓夕朝。 忠誥豈假 初,奉迎大駕,道路賦詩三首,其一篇有悔懼之辭,曰:「夙櫂發皇邑, 有人祖我舟。 迷寵非予志**,** 知,式微發直謳。」亮自知傾覆, 東隅誠已謝,西景逝不留。 知止道攸貴, 厚德良未酬。 懷祿義所尤。 撫躬愧疲朽,三省慚爵浮。 求退無由,又作辛有、穆生、董仲道讚, 性命安可圖, 四牡倦長路, 懷此作 君轡可 前 重明照蓬艾,萬品 修。 以 敷衽銘篤 收。 張 邴結 誨 稱其 同 率 引 餞 晨

長 子演,祕書郎, 先亮卒。 演弟悝、湛逃亡,湛弟都,徙建安郡, 世祖孝建之中, 並還

京師。

見微之美。

檀道濟,高平金鄉人,左將軍韶少弟也。少孤,居喪備禮。 祖創義,道濟從入京城,參高祖建武軍事,轉征西。 討平魯山,禽桓振,除輔國參軍、 奉姊事兄,以和謹致稱。

高

南陽 揚武 太守。 、將軍、天門太守討平之。 以建義勳,封吳興縣五等侯。 又從劉道規討桓謙、荀林等,率厲文武,身先士卒,所向摧破。 盧循寇逆、羣盜互起、郭寄生等聚作唐,以道濟爲

及徐 道覆來逼,道規親出拒戰,道濟戰功居多。 遷安遠護軍、武陵內史。 復爲太尉參軍,拜

列 傳 第 Ξ 檀 道 濟

議 中 參 書 侍 重 郎 豫章 ,轉寧朔將軍 公世子爲征虜將軍鎭京口,道濟爲司馬、 ,參太尉 軍事。 以前後功封作唐縣男, 臨淮太守。 食邑四 百 又爲世子西中郎司馬、 戶。 補 太尉 主簿、諮

梁國內史。復爲世子征虜將軍司馬,加冠軍將軍。

持 共 偽 南 伐罪 破 節 將 寧 姚紹 南蠻 朔 軍 義 弔 陳 將 熙十二年,高祖北伐, 民 留 軍 一校尉。 É 潁 長安 公姚洸 在今日。」皆釋 川太守姚坦,日 旣 叉 平,以爲 歸順。云 /加征 房將 征 凡拔 而遣之。 以道濟爲前鋒出淮、肥,所至諸城戍望風降服。 軍。 虜將軍、琅邪內史。 世子當鎭江陵,復以道 及大將楊業。 以城破壘,俘四千餘人。 遷 宋國侍 於是戎夷感悅,相率歸之者甚衆。 一,領世 至成皐,爲兗州刺史韋華降。逕進洛陽,爲平 o 子中庶子,兗州 議者謂應悉戮以爲京觀。 大中 進據 濟爲 莀 潼關 西中郎司馬、 進剋許昌, ,與諸軍 道濟曰: 獲

公,食邑二千戶。 高 祖 受命, 轉護 徙爲丹陽 軍, 加散 尹 ノ,護軍 騎常侍,領 如 故。 石 高 頭戍 祖 不豫,給 事 聽直 班 入殿省。 劍二十人。 以佐命功, 改封永脩縣

營,焚攻 些 夔 於 出 東 監 具 陽 南徐克 遁走。 城, 夔告 之江 將追之,城 急。 北 淮 加 南 道濟使持 諸 內無食, 郡 軍 事 乃開窖取 節、 鎭 北將軍 監 征 人穀,窖深數丈,出穀作米,已經再宿,虜去 討 、南兗州 諸 軍事, 與王 刺 史。 一仲德救 景平元 東陽。 年,虜圍靑州 未 及 至, 刺史 虜燒

已遠,不復可追,乃止。

還鎭廣陵。

眠,道濟就寢便熟,晦以此服之。 立, 騎常侍, 諷道濟 徐羨之將廢廬陵王義眞,以告道濟, 給 鼓吹一 入 朝,旣至, 部。 進封武陵郡公, 食邑四千戶。 以謀告之。 太祖未至,道濟入守朝堂。 將廢 之夜,道濟入領軍府就謝晦宿。 道濟意不同, 固辭進封。 屢陳不可, 不見納。 上卽位, 又增督青州、徐州之淮陽 進號征北 晦其夕竦動 羨之等謀欲廢 將軍 , 加散 不 得

下邳 琅 邪 東莞五 謝 晦 ,道濟率軍繼到彥之。 |郡諸軍事。[元] 彦之戰敗, 退保隱圻,會道濟至。 晦本謂道濟與羨之

及討

八

年

晉熙四 等同 誅,忽聞來 郡 諸 軍事 上,人情兇懼,遂不戰自潰。 、征南大將軍、開府儀同三司、江州刺史,(10)持節、常侍 事平,遷都督江 |州荆州之江夏豫州之西陽新蔡 如 故。 增封千 户。

尋復

失之,金墉、虎牢並沒,虜逼滑臺。

加道

濟都

後邀 德、 督征 二十餘 · 驍騎 元 諸軍 嘉 H 將軍 道濟 一, 前 事 後數十交, 段宏奮擊,大破之。 分遣段宏及臺隊主沈虔之等奇兵擊之, , 到彥之伐索虜,已平河南, 率衆北 討。 **虜衆盛,遂陷滑臺。** 軍至 轉戰 東平 壽 至高梁亭,虜寧南將軍、濟州刺 張 縣, 道濟於歷城全軍 値 虜安平公乙旃眷。 即斬 悉頗庫結。 ·而反。 進位司 道濟 史壽昌公悉頻庫 道濟 率寧朔 進至濟上, 空,持節 將 軍 、常侍、 王仲 連戦 結 前

道濟立功前 朝,威名甚重,左右腹心,並經百戰,諸子又有才氣, 朝廷疑畏之。 太祖寢

列

都督、刺

史

並

如

故。

還鎭

尋陽

斯之甚。 剽猾,逋逃必至,實繁彌廣,日夜伺隙,希冀非望。 萬分,乃空懷疑貳,履霜日久。元嘉以來,猜阻滋結,不 收付廷尉。 疾累年, 郎植、司徒從事中郎粲、太子舍人隰、征北主簿承伯、秘書郎遵等八人, 心。 以其位居台鉉,豫班河岳,彌縫容養,庶或能革。 之民聽,彰於遐邇。 寇,召道濟 ,道濟見收,脫幘投地曰:「乃復壞汝萬里之長城」<br />
邕子孺乃被宥,世祖世,爲奉朝請。 八邕、演及司空參軍高進之誅之。 空參軍薛彤,自己付建康伏法。 前南蠻行參軍龐延祖具悉奸狀,密以啓聞。 屢經 便可收付廷尉,肅正刑書。 入朝。 詔曰:「檀道濟階緣時幸,荷恩在昔,寵靈優渥,莫與爲比。 危殆 ,彭城王義康 旣至,上間。 謝靈運志凶辭醜,不臣顯著, 十三年春,將遣道濟還鎮, 慮宮車晏駕,道濟不可復制。十二年, 又遣尚書庫部郞顧仲文、建武將軍 事止元惡,餘無所問。」於是收道濟及其子給事 薛彤、進之並道濟腹 而長惡不悛,凶慝遂遘, 納受邪說,每相容隱。 夫君親無將, 鎮軍將軍仲德往年 義 不昵之心,附下問上之事,固 已下船矣、會上疾動、召入祖道 心, 有勇· 刑茲問 力, 上疾篤, 赦。 曾不 茅亭至尋陽,收道濟 並 入朝,屢陳此 時以 又潛散金貨,招 因 於廷尉 感佩殊遇,思答 **朕寢疾**, 況罪釁深重,若 比 張飛 會索虜爲邊 伏 誅。 陽羽 規肆 迹。 黄門侍 已暴 朕 禍 誘 叉

初

無燕刺之釁, 御蔽身災,使桐宮有卒迫之痛,淮王非中霧之疾。 跪承顧託,若使死而可再,固以赴蹈爲期也。 **平**臨岐。 史臣曰:夫彈冠出里,結組登朝,道申於夷路,運艱於險轍,是以古人裴回於出處,交戰 若其任重於身,恩結自主,雖復據鼎承劍,悠然不以存歿爲懷。當二公受言西殿, 而有楚英之戮。 若使一昆延曆,亦未知定終所在也。 及逢權定之機,當震主之地,甫欲攘抑後禍, 若以社稷爲存亡,則義異於此。 謝晦言不以賊遺君父, 但彭城

#### 校勘記

豈徒言哉。

將軍 ·如故 各本並脱「軍」字、孫彪朱書考論云:「將下當有軍字。」按孫說是,今補正。

吾位至二品 尉 左司馬。據西官志,無一官在二品者,而鷹揚之號及內史並第五品,疑二品是五品之誤。」 張森楷校勘記云:「案羨之時以鷹揚將軍、琅邪內史,仍爲大司馬從事中郎,轉太

== 西中郎司馬南郡相宜陽侯張邵 各本並脱「相」字。 孫彪宋書考論云:「南郡下脫相字。」按張

邵傳,邵曾爲南郡相。孫說是,今補正。

24 雙鸛集太極 東鴟尾 心嗚喚 鸛」各本並作「鶴」,據五行志改正。

Ŧ. 高 祖 咸 各 本 並脫 「高」字、孫彪朱書考論云:「南史,傅亮晉司隸校尉咸之玄孫也,此當脫『高』

列傳第三 校勘記

字。 傅隆生 (傳 日 高 祖咸,又曰族弟亮。」按孫說是,今補正。

及齊客所以難 H 論 也 張森楷校勘記云:「日疑當作目。」孫彪宋書考論云:「當作目論。 齊使者

對越王,目見豪毛而不自見睫。」

ш Ш 爲平南將軍陳留公姚洸歸順 獲偽寧朔將軍潁川太守姚坦 「姚坦」通鑑晉安帝義熙十二年作「姚垣」。 姚 洸」各本並作「姚沈」,據王鎭惡傳及晉書載記改。

, . 76 U , , , 又增督青州徐州之淮陽下邳琅邪東莞五郡諸軍事 计二史考異云:「文云五郡而實四郡,當有

脫誤。」

遷都督江州荆州之江夏豫州之西陽新蔡晉熙四郡諸軍事征南大將軍開府儀同三司江州 史 各本並脱「荆州」二字、據錢氏考異說補。 廿二史考異云:「江州下當有荆州二字。 是時江 刺

夏屬荆州。」

又收司空參軍薛彤 「薛彤」南史作「薛肜」。

# 宋書卷四十四

### 列傳第四

#### 謝晦

謝晦字宣明,陳郡陽夏人也。 祖朗,東陽太守。 父重,會稽王道子驃騎長史。 兄絢,高

祖鎭軍長史,蚤卒。

晦前 晦, 州治中從事。 簿。 促便下。 即命 抱持 從征 晦 初爲孟昶建威府中兵參軍。昶死,高祖問劉穆之:「孟昶參佐,誰堪入我府。」穆之舉 爲太尉參軍。 高 司馬 相 祖 府多事,獄繫殷積,晦隨問酬辯,曾無違謬。 休之。 高 義熙八年,土斷僑流郡縣,使晦分判揚、豫民戶,以平允見稱。入爲太尉主 祖 曰:「我斬卿」」晦曰:「天下可無晦,不可無公,晦死何有」會胡藩已得 時徐逵之戰敗見殺,高祖怒, 高祖嘗訊囚,其旦刑獄參軍有疾,札晦代之,於車中一覽訊牒,[1]催 將自被甲登岸, 高祖奇之,即日署刑獄賊曹,轉豫 諸將諫,不從,怒愈甚。

列

僔

第

四

謝

廝

登岸,賊退走, ガ 止

莫及。 還時不 晦 。一高祖 從征 美 風姿,善言笑,眉目分明,鬢髮如點漆。涉獵文義,朗贍多通。 關 欲以爲從事中郎,以訪穆之,堅執不與。 、洛,內外要任悉委之。 劉穆之遣使陳事,晦往往措異同,穆之怒曰:「公復有 終穆之世不遷。 高祖深加愛賞,羣僚 穆之喪問至,高祖

哭之甚 警備,遷中 宋臺 |初建,爲右衞將軍,尋加侍中。 領 晦時正直,喜甚,自入閤內參審穆之死問。其日教出,轉晦從事中郞。 軍 ,侍中如故。 以佐 命功,封武昌縣公,食邑二千戶。二年,坐行璽封鎭西司 高祖受命,於石頭登壇,備法駕入宮。 晦領游軍為

慟

馬、南郡太守王華大封,而誤封北海太守球,版発晦侍中。

悉 軍 朝 給 新 亭,顧 ・、領 政。 班劍二十人,與徐羨之、傅亮、檀道濟並侍醫藥。 以配之,器仗軍 **尋轉領軍將軍** 護南蠻校尉、荆州 少帝 望石 既廢, 頭 成,喜曰:「今得脫矣。」尋進號衞將軍,加散騎常侍,進封建平郡公,食邑四 ·資甚盛。 司空徐羨之錄詔 、散騎常侍,依晉中軍羊祜故事,入直殿省,總統宿衞。三月,高祖不豫, 刺 史,欲令居外爲援,慮太祖至或別用人,故遽有此授。精兵舊將, 太祖 即位,加 命,以晦行都督荆湘雍益寧南北秦七州諸軍事、撫軍將 使持節,依本位除授。 少帝即位,加領中書令,與羨之,亮共輔 晦慮不得去,甚憂惶,及發

千戶,固讓進封。

叉給鼓吹一

部。

五。」 [三] 澹笑曰:「昔荀中郞年二十七爲北府都督,〔三] 卿比之,己爲老矣。」 晦有愧色。 初爲荆州,甚有自矜之色,將之鎭,詣從叔光祿大夫澹別。 灣問晦年,晦答曰:「三十

討晦。 晦又謂承天曰:「幼宗尚未至,若復二三日無消息,便是不復來邪。」承天答曰:「詔使本無 定,幼宗豈有上理。」晦尚謂虚妄,使承天豫立答詔啓草,言伐虜宜須明年。〔吾江夏內史程 來理,如程所說,其事已判,豈容復疑。」 道惠得尋陽人書,言「朝廷將有大處分,其事已審」,使其輔國府中兵參軍樂問封以示晦。 書,曰:「計幼宗一二日必至,傅公慮我好事,故先遣此書。」承天曰:「外間所聞,咸謂西討已 其謀頗泄。三年正月,晦弟黃門侍郎皭馳使告晦,晦猶謂不然,呼諮議參軍何承天,示以亮 之慮,憂懼者多。」又言:「朝士多諫北征,上當遣外監萬幼宗往相諮訪。」時朝廷處分異常, 妻曹及長子世休送女還京邑。先是景平中,索虜爲寇,覆沒河南。至是上欲誅羡之等,幷 至江陵,深結侍中王華,冀以免禍。二女當配彭城王義康、新野侯義賓,元嘉二年,遣 聲言北伐,又言拜京陵, [四]治裝舟艦。傅亮與晦書曰:「薄伐河朔,事猶未已,朝野

不敢受此旨。」晦仍問諸佐:「戰士三千,足守城不?」南蠻司馬周超對曰:「非徒守城而已,若 自 晦 欲屈 欲焚南蠻兵籍,率見力決戰。 卿 以三千人守城,備禦劉粹。」登之曰:「下官親老在都,又素無旅,〔云情計二三, 士人多勸發兵,乃立幡戒嚴,謂司馬庾登之曰:「今當

外寇,可 以立 勳。」登之乃曰:「超必能辦,下官請解司馬、南郡以授。」卽於坐命超爲司馬、

威 將軍 、南義陽太守,轉登之爲長史,南郡 如故。

配 遣 ]衣軍 使 得精兵三萬人。 告晦 太祖 旅 · 「徐、傅二公及瞻等並已誅。」晦先舉羨之、亮哀,次發子弟凶問。 誅羨之等及晦子新除祕書郎世休,收暇、嚼子世平、兄子著作佐郎紹等。 數從高祖征討,備覩經略,至是指麾處分,莫不曲盡其宜。二三日中,四遠投 乃奉表 旣而自出射堂, 樂冏又

送往 主,孤 己,援 征 命之勳,膺河 赤心已亮於天 犯上,自 立帝清館, 祀 將 事 臣 背天日,豈復虛館七旬 登聖朝,惟新皇祚。 居 軍 階緣幸會,蒙武 貽 ,誠貫幽顯。 臣道濟等,並升御牀,跪受遺詔,載貽話言,託以後事。臣雖凡淺,感恩自厲, 非 臣節之所司。 山之賞。及先帝不豫,導揚末命,臣與故司徒臣羨之、左光祿大夫臣亮、 命。 鑒, 天 遠近萬邦咸達於聖旨。 / 祚明 皇帝殊常之眷,外聞政事,內謀帷幄,經綸夷險,毗贊王業,預佐 速營陽 德,屬當 耿弇不以賊遺君父,臣亦何負於宋室邪? 陛下 ,仰望鸞旗者哉? 失德,自絕宗廟,朝野岌岌,憂及禍難,忠謀協 馳傳乘流,曾不 昌運,不有所 若臣等志欲專權, 故 惟 廢 疑, ,將何以 廬陵王於營陽之世 臨朝 興。成人之美,春秋之高義, 殷懃,增崇封爵。 不 顧 國 况釁結閱牆,禍成 一、屢被猜 典, 便當 契,徇 此 嫌 協 則 積 國忘 翼幼 臣等 怨

畏逼,天下耳目,豈伊可誣。

華猜 推 怨 夷 侍殿省。 而讒 之道,義盡於斯。 者哉 滅 理 之誅。 卽 臣亮管司喉舌,恪虔夙夜,恭謹一心,守死善道。此皆皇宋之宗臣,社稷之鎮衞, 忌忍害,規弄威權,先除執政,以逞其欲。天下之人,知與不知,孰不爲之痛心憤 人傾覆,妄生國釁,天威震怒,加以極刑,幷及臣門,同被孥戮。 臣忝 事, 陛下聿遵先志,申以婚姻,童稚之目,猥荷齒召,薦女遷子,合門相送。 居蕃任,乃誠匪懈,爲政小大,必先啓聞。 不容獨存。 陛下春秋方富,始覽萬機,民之情僞,未能鑒悉。 臣羨之總錄百揆,翼亮三世,年耆乞退,屢抗表疏,優旨綢繆,未垂順 先帝顧託元臣翼命之佐,勦於佞邪之手,忠貞匪躬之輔,不免 糾剔羣蠻、清夷境內,分留弟姪,並 王弘兄弟,輕躁昧進,王 雖未知臣道濟問, 事君

愚臣 隙 義均休戚,任居分陝,豈可顚而不扶,以負先帝遺旨。 非 已成,必有今日之事。 先帝謬於知 見襲。 臣等見任先帝,垂二十載,小心謹愼,無纖介之愆,伏事甫爾,而嬰若斯之罪。 到彦之、蕭欣等在近路。 人,則爲陛下未察愚款。 臣推 誠 仰期,問有二心,不圖姦 昔白公稱亂,諸梁嬰胄,惡人在朝,趙鞅 臣去歲末使反,得朝士及殿省諸將書, 輒率將士,繕治舟甲,須其自送, 2回潛 **「遘,理順難恃,忠賢隕朝,** 入伐。 並言嫌 臣

列

僔

四

謝

晦

搜 理 袂 寃 恥 撲 ,謝 討 罪闕庭,雖伏鑕赴鑊,無恨於心。 若天祚大宋,卜世靈長,義師克振,中流淸蕩,便當浮舟東下,戮此三豎,申 伏願 陛下遠尋永初託付之旨,近存元嘉奉

戴 之誠 則 微臣丹款,猶有可察。 臨表哽慨,言不自盡

太祖 時 已戒嚴,諸軍相次進路。 尚書符荆州 日

忍鴆 難 旣 息 禍 擒 電電 圖 不 其 殺, 至 禍 斷 獸 二,晦 也。 福 困 之初,並即 獲罪: 無門,逆順 則 故智計之士,審敗以立功,守正之臣,臨難以全節。 噬,是以爰整其旅 之室屬,縲仆獄戶 於天,名敎所極,政刑 大憲。 有數,天道微於影響,人事鑒於前圖, 復王室之讎,摅義夫之憤,國典澄明,人神感悅。 一用爲 (所取, 已遠暴四海, 宣於聖詔。 .明所怨,孤根易拔,以順討逆,雖厚必崩。 過防。京師之衆,天下雲集,士練兵精,大號響震。 未有蹈義而福不延,從惡而 徐羨之、傅亮、謝晦、安 羡之父子、亮及晦 然歸死

軍 ][[ 陵,直至鄢郢。 言繼 事 使持 發,干帆 使 (F) 持 征 節 節 北 、散騎常侍、都督南徐 俱 中 將軍、南兗州 舉,萬棹遄征 又命征虜將軍、雍州刺史劉粹控河陰之師,衝其巢窟。 領 軍 佷 Щ 縣 刺 開 史、永脩 散騎常侍、驍騎 國 兗 侯 之江北 到彦之率羽林選士果勁二萬, 縣 開 淮南 國 公檀道 將軍 青州 段宏鐵馬二千, 濟統 徐州之淮 勁銳 陽 武卒三萬,戈船蔽江,星 下邳 雲旍首路, 風 琅邪東莞 驅 湘州刺史張邵 電擊,步自 七郡 組 甲曜 諸 竟

下 辜。 提 衞 亂 授 Ľ 兵 後 湘 羨之 宜 之役 變 是用 誰 JII 翻 之衆,直 御 輿 諸 然 劾 姪 背 分 駕 置 加 亂, 咸 前 · 六軍 軍 以 據 西 無 麾 則 要害。 相 所染。 一。宣示 土之人,咸沐皇澤,東吳將士,懷 魚 鵬 率 潰, 翔 歸 朝旨。 巴、蜀 朝 警 嬰城 況 彼 蹕 頃 則 府 前 杜荆門之險, 大 符 為散 州 臨,五牛整 刑 到,其即 文武 所加 其勢然矣。 並 , 共 洪 旆 列 秦、梁絕 收 恩曠 王 擒 雖 職 晦 洽, 以 聖 本首丘, 荷 身, 丹圻之逕, 英布之氣,彭寵之資 Ŀ 傅亮三息,特蒙 或 輕 慇 榮 舟 懃 任, 護送。 必 哀 愍, 雲網 身雖 不自陷 若已 其 四合, 在 罪 罪 全 外 宥 猖 由 人之黨,橫 登陴 走 乃 胸 蹶 晦 一, 士 ì 伏 先 同 辰 路 無 產 民 事 極 以 阻 何

萬, 資。 爲 爲 建 勤  $\overline{C}$ 王 威 竟 時 一之師 陵 益 發 將 自 內 軍 州 \_! 江 史殷道 刺 南平 陵, 史蕭 領 舟艦 太守 灣常未 摹之、 湘 州刺 列 之郡, 劉粹 巴西 自 史,以 江 以爲 太守劉 若 津 張邵 至 至, 于 諮 周超 道 爲 破冢 議 產 輔 參 能 被 國 ٠, 軍 破 旍 ်ဝ 將 徴 之者,即 旂 軍 還 以 一。 相 弟 始始 照 遯 不 至 爲 以 受 蔽 江 爲 冠軍 陵, 命 奪 龍 日 一、竟陵 驤 晦 光。 將 並 繋繋 軍 內史, 脢 乃 雍 歎 州 沒 總 日 刺 其 留 史。 財貨, 任 恨 · 兄 不 晦 得 以 子 桽 世 以 充 猷 此 軍

夫

轉

禍

貴

速,後機

則

区

遂使王

師

臨

郊

雷

電皆至,噬

臍

之恨,亦

將

何

及

,

晦檄京邑日

室 多 故 禍難 荐臻。營陽失德, 自絕宗廟。廬陵王構鬩 有 本, 屢被 猜 嫌 且 居 喪失

列

之徒, 憤,規 常不自安。 華及到彥之謀反,不謂無之。城內東將,數日之內,操戈相待。華說數爲秋當所譖,任己 先帝常見訪逮,庶有一分可取,而華禀性凶猜,多所忍害,曩者縱人入城,託疾辭事,此 [嘉之讓,自謂任遇浮淺,進誣先皇委誠之寄,退長嫌隙異同之端。 騎大將軍王弘、侍中王曇首,謬蒙時私,叨竊權要。 又令見咨,云:「欲自攬政事,求離任還都,幷令曇首具述此意。」又惠觀道人說,外人告 都 今上起居,不能光揚令德,彰於朝聽,其言多誣,故不具說。 禮 而 育飲 士庶,咸所聞知。以其所啓及上手答示宗叔獻,又令宣告徐、傅二公。及周糾使下, ,遐邇所具,積怨犯上,自**貽非道**。 總威權,不顧國典。 孰不 是恣。 慷慨。 凡此諸事,豈有忠誠冥契若此者邪。自以父亡道側,情事異人,外絕酒體, 靦貌□□□□ 遂矯違詔旨, 遣到彦之、蕭欣之輕舟見襲。 保祐皇家者,罹屠戮之誅,效勤社稷者,致殲夷之禍。 □□□凡厥士庶,誰不側目。 又常歎宰相頓有數人,是何憤 羣后釋位,爰登聖明,亂之未义,職有所係。 弘於永初之始,實荷不世之恩,元 王華賊亡之餘,賞擢之次, 即日監利左尉露檄衆軍 曇首往因使下,訪以 按車 搢紳

瘁之哀,蒼生深橫流之懼。 雖 以不武,忝荷蕃任,國家艱難,悲憤兼集。若使小人得志,君子道消,凡百有殄 輒糾勒義徒,繕治舟甲,舳艫亘川,駟介蔽野,武夫鷙勇,人

H

至揚子。

千,西 昭弘宗 軍竟 道。 軍、長寧太守竇 參軍 司 百 I其誠。 馬、 陵 事 南 田 振 內史河 蠻 、宣威將 參軍 雁 武 三參軍 今遣南蠻司馬寧遠將軍庾登之統參軍事建武將軍建平太守安泰、 塞 將軍胡崇之精悍 ·事宣 東太守 同 應期步騎五 軍 振 討 陳珍虎 一威將軍王紹之等,精 威 劉粹,並 謝遯、 將軍 旅二千、參軍事、建威將軍、 郭 千,直 趨 卓鐵騎二千, 建威 襄陽。 萬、二〇北出 將 出義陽。 軍南 奇兵尚速,指景齊奮。 銳 平太守謝世猷驍勇一萬, 一萬,前鋒致討。 高陽, 水步齊舉。 司馬、建威 長兼行 新興太守賀愔甲卒三千, 將軍、行南 大軍三萬,駱驛 :參軍、 南蠻參軍、振武將軍 諸賢 寧遠將軍朱澹之步騎五 並 義 陽 留守江陵。 同 太守周 電邁。 或 恩,情兼 行 宣威 超之統 分 冠 相 魏 義烈, 命 將 軍 係 像 軍 參 將 軍 取 統

貯茅 之日 數千斛,縣於 晦 彼 至 此 江 口 共 ,到彥之已到彭 有雨耳,檀征 颿 檣,云可 北 以焚艦 城 尋 至, 洲 東軍 庾登之據巴陵, 用 火 方强,唯宜 八宜須 睛, 以緩戰期。 速戰。」登之恇怯,使小 畏懦 不 敢進。 晦然之,遂停軍十五 會霖 酮 連日, 將陳祐 参軍 作 日。 :大囊, 劉 乃 和

今誠

志士忘身之日,義夫著績

之秋,見機

而動,

望風

而

不待

勗。

攻 於 是大 蕭 欣 敗 於 彭 城洲 延 秀又攻洲口栅陷之,彦之退保隱圻。 中兵參軍孔延秀率三千人進戰,甚力。 欣於陳後擁備自衛,又委軍還船,

晦又上表曰:

列傳第四 謝晦

蕭欣 邸龍 左光祿大夫臣亮橫被酷害,幷及臣門。雖未知征北將軍臣道濟存亡,不容獨免。 威權,興造禍亂,遂與弟華內外影響,同惡相成,忌害忠賢,圖希非望。 亂,漢祚 權 任總文武,位班三事,道濟職惟上將,扞城是司,皆受遇先朝,棟梁一代。臣昔因時幸, 奉成旨,俯竭股肱,忠貞不效,期之以死。但營陽悖德,自絕於天,社稷之危,憂在託 傳之無窮。 過蒙先眷,內聞政事,外經戎旅,與羨之、亮等同被齒盼。旣經啓王基,協濟大業,爰自 政、罔一專輒、尊上之心,足貫幽顯。 以侍臺省。 付,不有 輿, 暨于揖讓, 誠積雖微, 仍見紀錄, 並蒙丹書之誓, 各受山河之賞, 欲使與宋升降, 、到彥之等輕舟見襲,姦僞之甚,一至於斯。羨之及亮,或宿德元臣,姻姬皇極,或 臣 消非 .聞凶邪敗國,先代成患,讒豎亂朝,異世齊禍。 , 臣 伊覆。 所 廢,將焉以興。乃遠稽殷、漢,用升聖德。陛下順流乘傳,不聽張武之疑,入 ·俟宋昌之議,斯乃主臣相信,天人合契,九五當陽,化形四海。 與道濟,分翰于外,普天之下,孰曰不宜。遂蒙寵授,來鎭此方,分留弟姪, 及聖體不預,穆卜無吉,召臣等四人,同升御牀,顧命領遺,委以家國。 到任以來,首尾三載,雖形在遠外,心係本朝,事無大小,動皆咨啓,八州之 雖哲王宰世,大明照臨,未能使其漸弗興,茲害不作。 陛下遠述先旨,申以婚姻,大息世休,復蒙引召, 故趙高矯逼, 秦氏 姦臣王弘等竊弄 故司徒臣 用傾, 羡之及亮,內 董卓階 一羡之、 遂遣 仰

列傳第四 謝晦

誅,臣 自謂 當以營陽 從磐時,規自封殖。 是 以去年送女遣兒、闔家俱下,血誠如此、未知所愧。 勢擅狐鼠,理隔熏掘。 受外伐,顧省諸懷,不識 爲言,廬陵爲罪。 不除臣等,罔得專權,所以交結讒慝,成是亂階。 又以陛下富於春秋,始覽政事,欲馮陵恩幸,闚 又以臣等位高功同,內外膠固。 前何罪? 天聽遐邈,陳訴 靡由。 而凶狡無端,妄生釁禍,羨之內 陛下信其厚貌,忘厥左道, 弘等既蒙寵任,得侍左右, 又惟弘等所構, 望國權,親

至下機,能不

·暫惑。

愷悌 遘 主。 臣等奉 之罰,旣制之有 有流言 令,誰敢非之。 發自營陽 所 移 君子,無信讒言。」陛下躬覽篇籍,硏覈是非,釁兆之萌,宜應深察。 若令臣等頗欲執權,不專爲國,初廢營陽,陛下在遠,武皇之子,尚有童幼,擁以 伏自尋省,廢昏立明,事非爲己。 少勢回 之謗,伯奇 ·事先朝,十有 實非 Щ 岳,況乃精誠微淺,而望求信者哉。 國禍。 而泝流三千,虛館三月,奉迎鑾駕,以遵下武,血心若斯,易爲可 主,臣何預焉。 至孝,不免譖愬之禍。 七年,並居顯要,世稱恭謹,不圖一旦致茲釁罰。 至於羨之、亮等, 然廬 陵爲性輕 廬陵之事,不由傍人,內積蕭牆之釁,外行叔段 周旋同體, 慈父非無情於仁子, 明君豈有志於貞臣。 險,悌順不足,武皇臨崩,亦 詩不云 心腹 內外,政欲戮力皇家, 乎:「讒 人罔極,交亂四國 夫周公大賢,尚 臣竊懼王室小 有 口 詔 鑒。 盡忠報 L", 比 雖 號 且

職,人愧博陸,廁奉遺旨。 國,趙鞅入誅。況今凶禍滔天,辰極危逼,台輔孥戮,岳牧傾陷。 風奔进。 臣誠短劣,在國忘身,仰憑社稷之靈,俯厲義勇之氣,將長驅電掃,直入石頭, 。國難旣深,家痛亦切。 輒簡徒繕甲,軍次巴陵,蕭欣窘懾,望 臣才非絳侯,安漢是

梟翦元凶,誅夷首惡,弔二公之寃魂,寫私門之禍痛。然後分歸司寇,甘赴鼎鑊,雖死

之日,猶生之年。

電之威,梟四凶於廟庭,懸三監於絳闕,申二台之匪辜,明兩蕃之無罪,上謝祖宗,下告 百姓,遣一乘之使,賜咫尺之書,臣便勒衆旋旗,還保所任。須次近路,尋復表聞。 伏惟陛下德合乾元,道侔玄極,鑒凶禍之無端,察貞亮之有本,回日月之照,發霜

授之以衆,委之西討。晦聞羡之等死,謂道濟必不獨全,及聞率衆來上,惶懼無計。 廷,羡之、 亮於中秉權, 可得持久。 及太祖將行誅, 王華之徒咸云:「道濟不可信。」太祖曰: 「道濟止於脅從,本非事主。殺害之事,又所不關。吾召而問之,必異。」於是詔道濟入朝, 初,晦與徐羨之、傅亮謀爲自全之計,晦據上流,而檀道濟鎭廣陵,各有强兵,以制持朝

帆上,前後連咽,西人離阻,無復鬭心。臺軍至忌置洲尾,列艦過江,晦大軍一時潰散。晦 道濟旣至,與彥之軍合,牽艦緣岸。曰曰晦始見艦數不多,輕之,不卽出戰。至晚,因風

肥壯 夜出, 陵,至沙橋,周超率萬餘 超 而 已。 不能 投巴陵,得小船還江陵。 騎 超 其夜舍軍單舸詣到彦之降。 馬,晦毎待之,行不得速。 人與戰,大破之。 初,雍州刺史劉粹遣弟竟陵太守道濟與臺軍主沈敞之襲江 至安陸 衆散略盡,乃攜其弟遯、兄子 俄 而 延頭,爲戍主光順之所執。 晦敗問至。 晦至江 陵, 世基等七 無它處分, 順之, 騎 晦故 唯 北 走。 愧 東也。 謝 周 遯

凶 流 放,實招 而 遠源。 悲 人道兮,悲人道之實難。 禍 樹文德於庭戶,立操學於衡門。 加 作愆 哀人道之多險,傷人道之寡安。 應積善之餘祐,當履 福之所延。 懿華宗之冠胄,固清 何小

送京

師,於路作悲人道,其詞

劣其 存亡。 道 諒 氣, 入 之方 關 主 必 無節 拿 言 值革變之大運, 祉 於 康 謂 面 稷 、帷房。 民 繼 實懷 之淪 晏 體 ,信卜祚之無疆。 其 此 喪。 分河 嗣 而不忘。 業 遭一顧於聖皇。 矧 Щ 之珪 吾 能 | 儕 增 荷隆遇於先主, 之體 輝 組,繼文武 於前 國旣危而 國 光。 實 參謀猷於創物, 之龜章。 啓處而 居遏密之未 重構, 欲報 匪 家已衰而 之於後 禀顧 遑。 幾, 命 贊帝制於宏綱。 藉 玉。 於 億 越 載昌。 西殿,受遺寄於 兆 禮 憂託 之 度 而 獲扶 付 志, 湎 之無効 荒。 顚 固 出治 而休否,冀世 昏 御 普 極 戎於禁衛, 懼 牀 天 加 壤 愧 明彰 伊 而 言 殞 於 懦

鎭, 甫逾歷其三稔,實周回其未再。 豈有慮於內口 而靡貸。哀弱息之從禍,悲發中而心痗。 響文武之桓桓。 朝 褒 功 以疏爵, 厲薄弱以爲政,實忘食於日旰。 祗命服於西蕃。 奏簫管之嘈囋, ]其云裁。痛夾輔之二宰,並加辟 **豈申甫之敢慕**, 擁朱旄之赫煌。<br />
<br />
三臨八方以作 庶惟宋之屛翰。

恨矢石之未竭,遂摧師而覆陳。誠得喪之所遭,固當之其無吝。 克,彼繼奔其躡塵。乏智勇之奇正,忽孟明而是遵。苟成敗其有數, 隻輪。氣有捷而益壯,威旣肅而 咸荷戈而競臻。 亦何忤於天地,備艱危而是丁。 何辜,實吾咎之所嬰。 罹之殃釁。 魂之雪怨,反涇、渭於彝倫。齊輕舟於江曲,殄銳敵其皆凐。勒陸徒於白水,寇無反於 伊荆漢之良彦,逮文武之子民。見忠貞而弗亮,覩理屈而莫申。 智未 浮舳艫之弈弈,陳車騎之轔轔。觀人和與師整,謂茲兵其誰陳。 窮而 事傾,力未極而莫振。誓同盡於鋒鏑,我怯劣而愆信。愍弟姪之 謂九夷其可處,思致免以全生。 **一彌振。嗟時哉之不與,迕風雨以踰旬。** 嗟性命之難遂,乃窘紲於邊亭。 痛同懷之弱子,橫遭 **豈怨天而尤人。** 皆義概而同憤, 我謀戰而不 庶亡

終下蕃而靡鞠。 我聞 之於昔誥,功彌高而 雖明德之大賢,亦不免於殘戮。 身蹙。 霍芒刺而幸免, 卒傾宗而滅族。 懷今憚而忍人,忘向惠而莫復。 周嘆貴於獄吏, 績無

素, 於 賞 季叔 |而震主,[1三將何方以自牧。 忽盛滿 能安親 而 傾 滅。 而 揚名,諒見稱於先哲。 惟烝嘗 與灑掃, 非砏石之圜照,孰違禍以取福。 痛 保歸 朝而 全而終孝,傷在余而皆缺。 永絕。 問其誰而爲之, 著殷鑑於自古、豈獨嘆 實孤人之險戾。 辱歷世之平

罪

有

踰

於丘

Щ

· ,雖 百

死其何雪。

爲 盡 盡 覩 一兮爲 世道 則 兮斧斤, 羈 恥, 兮艱 角 偃兮衡閭,親朋交兮平義。 嗟厚顏兮靡置。 談。 理命兮同得。 規 志局兮功名,每謂之兮爲易。 世安彼兮非此, 長揖兮數子,謝爾兮明智。 雖履尙兮不一,隆分好兮情寄。 豈曉分兮辨惑。 今定諡兮闔棺,慚明 百齡兮浮促, 御莊生之達言,請承風以 終焉兮斟克。 智兮昔議。 俱憚耕兮從祿 雖待 臥

之。 險,斯路信 壯矣垂天 期、蔣虔 先緊嚼等, 周 超 、嚴千 旣 翼。 難 降,到彦之以參府事,劉粹遣參軍沈敞之告彦之沙橋之敗,事由周超,彦之乃執 一一一一一 斯 猶未 旦失 等並伏誅。四世基, 晦 死時,年三十七。 即戮,於是與 風 水, 翻 爲螻蟻 晦、遯、兄子 食。」晦續之日:「功遂侔昔 絢 庾登之、殷道 之子 也, 世 基、 有才氣。 鸞、何承天並皆原免 世猷及同黨孔延秀、 臨死 爲 人,保退無智 連句詩 周超 曰:「偉哉横 力。 費愔、 既涉太行 海鱗, 竇應

初,河東 人商 玄石爲晦參軍,晦爲逆,玄石密欲推西人庾田夫及到彥之從弟爲主,田夫

等不敢許。 之,以其子懷福爲衡陽王義季右軍參軍督護。 玄石知獨謀不立,口思遂爲晦領幢。 晦走,左右皆棄之,唯有延陵蓋追隨不舍。 事旣平, 恨本心之不遂, 投水死。 太祖嘉

太祖嘉之,後以蓋爲長沙王義欣鎭軍功曹督護。

稍違,網以疏行,法爲恩息,妨德害美,抑此之由。降及大明,傾詖愈甚,自非訐竊深私,陵 徽簡日用於朝,雖貴臣細故,不以任隆弛法,至乎下肅上尊,用此道也。 施,事行重釁,左黜或用,義止輕愆。輕愆,物之所輕,重釁,人之所重。 由 犯密諱,則左降之科,不行於權戚。若有身觸盛旨,釁非國刑,免書裁至,弔客固望其門矣。 是律 史臣曰:謝晦坐璽封違謬,遂免侍中,斯有以見高祖之識治,宰臣之稱職也。 無恒條, 上多弛行,綱維不舉,而網目隨之。所以吉人防著在微,愼大由小,蓋爲 自太祖臨務,茲典 故斧鉞希行 夫拏戮所 於世,

#### 校勘記

此

云。

於車 中一 覽訊牒 「覽」 各本並作「鑑」,據南史、元龜七九九、御覽六三一引、通鑑晉安帝義熙

- 引 晦答曰三十五 、元龜 四五一作「三十五」。按晦死時年三十七,其爲荆州刺史在死前二年,則作三十五爲是。 三朝本、北監本、毛本、局本作「三十三」。殿本、南史、建康實錄、御覽四 九一
- . \_ 昔荀中郎年二十七爲北府都督 「二十七」晉書荀羨傳作「二十八」。
- 又言拜京陵 「京陵」各本並作「景陵」,據南史、通鑑改。 胡三省通鑑注曰:「京陵、興寧陵也。」
- Ŧī 言伐虜宜 |須明年 各本並脫「言」字,據通鑑宋文帝元嘉三年補
- ベン 又素 無 旅 孫彪宋書考論云:「旅上脫部字。 通鑑云素無部衆,情計二三。」
- -都督南 徐兗之江北淮南青州徐州之淮陽下邳琅邪東莞七郡諸軍事 廿二史考異云:「實四郡,

七字 誤

- , Ш 脢 率 衆 二萬 各本並脫「衆」字、據南史補。
- . ℋ ℳ 蔡廓 華說 傳子 數 爲 興宗附傳、 秋 當 所譖 舊本宋書張茂度傳、舊本宋書張敷傳、舊本南史張邵傳子敷附傳並作 宋本、弘治本、毛本作「秋當」,北監本、殿本、局本作「狄當」。按舊本宋書 狄
- 史恩倖傳並作「 」。新本幷已校正。 秋當」。 南史蔡廓傳子興宗附傳、 據廣韻、一秋,又姓,宋中書舍人秋當 南齊書陸慧曉傳、南史陸慧曉傳、南齊書倖臣傳、南 胡三省通鑑注云:「秋當,人姓

當

- 名。 <br/>
  <br/> ,秋姓,秋胡之後。」則 作秋當者是 ,作「狄當」者誤。 今並校正
- 司 馬 建威將軍 行 南義陽太守周超之統軍司馬振武將軍胡崇之精悍一 萬 「周超之」 即前後文

之周超 ,南北朝人名後之一之」字,有時可省去。 此檄文則仍存「之」字。

牽艦緣岸 艦 」各本並作一盤」,據通鑑宋文帝元嘉三年改。

擁朱旄之赫煌 張森楷校勘記云:「煌字與上『蕃』,下『桓』、『旰』、『翰』等不叶韻,疑當作烜。廣

}韻 `短`光明也。」孫彪宋書考論云:「煌字非韻、蓋烜字誤也。」

績無賞而震主 「績」各本並作「續」。 張森楷校勘記云:「續疑當作績。」按作「續」不可通,張校

是,今改正。

各本並 Ę, 於是與晦遯兄子世基世猷及同黨孔延秀周超費愔竇應期蔣虔嚴千斯等並伏誅 實未誅 叉 張森楷校勘記云:「費悟、當即前之賀悟、作『費』者蓋形似之譌。」 也。」按錢氏考異說是。 有「庾登之」三字。廿二史考異云:「案下文云庾登之、殷道鸞、何承天幷皆原免,則登之 庾登之宋書有傳,云「晦敗,登之以無任免罪,禁錮還家」。 今訂 「孔延秀」上,

二吾 玄石知獨謀不立 「玄石知」各本並作「知玄石」,孫彪宋書考論云:「當云玄石知獨謀不立。」按

孫說是,今訂正。

## 宋書卷四十五

## 列傳第五

# 王鎭惡 檀韶 向靖 劉懷愼 劉粹

王鎭惡,北海劇人也。 祖猛,字景略,苻堅僭號關中,猛爲將相,有文武才,北土重之。

父休, 偽河東太守。

曜歸晉,客居荆州。 相報。」方答曰:「君丞相孫,人才如此,何患不富貴。 崤、澠之間。 惡月生而相齊,是兒亦將興吾門矣。」故名之爲鎭惡。 **鎭惡以五月五日生,家人以俗忌,欲令出繼疎宗。** 嘗寄食澠池人李方家,方善遇之。 頗讀諸子兵書,論軍國大事,騎乘非所長,關弓亦甚弱,而意略縱橫,果 謂方曰:「若遭遇英雄主,要取萬戶侯,當厚 至時願見用爲本縣令足矣。」後隨叔父 年十三而苻氏敗亡,關中擾亂,流 猛見奇之,曰:「此非常兒,昔孟嘗君 寓

決能

斷。

留 中 軍 宿 大太尉 廣 明 固 旦謂 之役、 軍事,署前部賊曹。 諸佐曰:「鎭惡 、或薦鎭惡於高祖,時鎭惡爲天門臨澧令,卽遣召之。 王猛 拒盧循 之孫, 於查浦,屢戰有功,封博陸縣五等子。 所謂將門有將也。」卽以爲靑州治中從事史, 旣至與語,甚異焉。 行 因

餘 遣 祖 且 軍 夜 主 從 浮 至 弟兗州 姑孰 一,亦當 籴 無所 舸 高 水側 行 祖 於鵲洲 問。 謀 少 遺鎭惡率龍驤將 刺 討劉毅 日耳。 以待 若贼 史藩 、尋陽 吾至。 都不 爲副貳,高祖僞許之。 ,鎭惡曰:「公若有事西楚,請賜給百舸爲前驅。」義熙八年,劉毅有疾, 政當岸 知消息,未有備 河口、巴陵守風凡四 慰勞百姓,宣揚詔旨幷赦文、及吾與衞 上作軍、未辦便下船也。 軍蒯恩百舸前發,其月二十九日也。 防,可襲便襲。 九月、大軍西討、轉鎭惡參軍事 日,日 十月二十二日,至豫章口 卿至彼,深 今去,但云劉兗州 軍 加籌量,可 戒之曰:「若賊知吾上, 府 文武 事,加振: 書。 上。 "擊,便 一、去江 鎭惡受命,便 罪 武 止一 燒其船 將軍。 上陵城二 人, 比 求 其 高

問 便 在 長 者 前 嚴 頻惡 自 但云劉兗州至。」津戍及百姓皆言劉藩實上,晏然不疑。 鎭 令 惡進路,揚聲劉兗州上,毅謂爲信然,不知 次之。 如 後 有 大軍 舸 留 狀。 二二人  $\exists$ 叉分 對 舸 隊 岸 在後, 上豎六七旗,下輒安 令燒江 津 見襲。 船 艦 鎭惡 \_\_\_ 鎭惡 鼓。 自豫章 逕前襲城,語前軍:「若有 語 断留 口捨船步 入三計 我 上,蒯 將 至城 恩軍

未 至城五六里,逢毅要將朱顯之,與十許騎,步從者數十,欲出江津。 問是何人,答云:

入; 鎭惡 望見江 戦。 間,於 鬭 毅 軍,似從下上,垂已至城,江津船悉被火燒矣。」行令閉諸城門。 高 江 詔 東門,便北 左右三百許 劉 至中 金城 祖 及 門猶未及下關,因得開大城東門。 · 克州至。」顯之馳前問藩在所,答云:「在後。」顯之旣見軍不見藩,而見軍人擔彭排戰具, 鎭惡 自來 赦文幷高祖 慮 金城 一十 |津船艦已被燒,烟焰張天,而鼓嚴之聲甚盛,知非藩上,便躍馬馳去告毅:「外有大 內東從舊將,猶有六隊千餘人,回西將及能細直吏快手, 闇 ·晡,西人退散及歸降略盡。 ,人情離懈。 軍人與毅東來將士,回或有是父兄子弟中表親親者,鎭惡令且關且 夜 斬桓 東門北三十步鑿城作一穴,桓便先衆入穴,鎮惡自後繼之,隨者稍多,因短 !回擊射堂,前攻金城東門。|鎭惡入東門,便直擊金城西門。 人開 自 相 謙,爲高祖 北門突出。 手書凡三函示毅,毅皆燒不視。金城內亦未信高祖自來。 傷 犯,乃引 更許,聽 所賞拔,常在 軍出,繞金城,開其南 初,毅常所乘馬在城外不得入,倉卒無馬,毅便就子肅民取馬, 事前 鎮惡入城,便因風放火,燒大城南門及東門。又遣人以 大城內,毅凡有八隊,帶甲千餘,已得戒嚴。 陣散潰,斬毅勇將趙蔡。 左右。求還西迎家,至是率十餘人助鎭惡戰。 面,以爲退路。 毅左 毅慮 鎭惡亦馳進,軍人緣城得 復有二千餘人。食時就 右 南 兵猶 有伏兵,三更中,率 軍分攻金城南門。 閉 有王桓者,家在 東 共語,衆並知 西閣 蒯恩入 !拒戰, 兵接 下晡

列

政 値鎭惡軍 民 自縊死。 與。 ,衝之不得去,回衝蒯恩軍,軍人鬭已一日,疲倦,毅得從大城東門出奔牛牧佛 朱顯之謂曰:「人取汝父,而惜馬不與,汝今自走,欲何之。」奪馬以授毅。 鎮惡身被五箭,射鎮惡手所執稍,於手中破折。 江陵平後二十日,大軍方 初出,

奔 抄 抵 無憂矣。」高祖尋登城喚鎭惡,鎭惡爲人强辯,有口機,隨宜酬應,高祖 以竹籠盛 將朱襄領 襄陽 掠 賊 根 據 諸 表 署中兵,出爲安遠護軍、武陵內史。以討劉毅功,封漢壽縣子,食邑五百戶。 **蠻,不時反。及至江陵,休之已平,高祖怒,** 阮頭,屢爲凶暴,鎭惡討平之。初行,告刺史司馬休之,求遣軍以爲聲援, 鎭惡統 裏受敵,吾事 一石,堙塞水道,襄軍下,夾岸擊之,斬寒首,殺千餘人。 衆助鎭惡。 蒯恩諸軍水路追之,休之等奔羌,鎭惡追躡,盡境 ,敗矣。」乃率軍夜下,江水迅急,倏忽行數百里,直據都尉治。 會高祖西討休之,鎭惡乃告諸將曰:「百姓皆知官軍已上,朱襄等復 不時見之。 鎭惡 鎮惡笑曰:「但令我 而還。 性貪,旣破襄, 乃釋。 除游 擊將 休之及魯宗之 **蠻**帥向 休之遣 軍 旣至,乃 因停軍 見公, 是 其

關 見鎭 中,想勉建大功,勿 惡於積弩堂,謂之曰:一公愍此遺黎, 二年,高 祖 將北伐,轉鎭惡爲 孤此授。」鎭惡曰:「不剋咸陽,誓不 諮議 **參軍,行龍** 志蕩 通逆。 驤 昔晉文王委伐蜀於鄧艾, 將軍,領 復 濟江 前 而 鋒。 還 也 將發, 前 今亦 將 軍 委卿以 劉 穆之

鎮惡入賊境,戰無不捷,邵陵、許昌,望風奔散,破虎牢及栢谷塢,斬賊帥趙玄。 軍次洛

關。 陽,偽陳留公姚洸歸順。 遣司 偽大 八將軍 馬 毛 ·姚紹率大衆拒嶮,深溝高壘以自固。 德祖攻偽 弘農太守尹雅於蠡城,生擒 進次澠池,造故人李方家,升堂見母,厚加酬賚,即版授方爲澠 鎭惡懸軍遠入,轉輸不充,與賊 之。 仍行 弘農 太守。 方軌 長驅,徑據潼 相持久, 池

陽,須大軍至,未可輕前。 之曰:「我語令勿進,而輕佻深入。岸上如此,何由得遣軍?」與惡旣得義租,紹又病死,偽撫 求遣糧援。時高祖沿河,索虜屯據河岸,軍不得 將士乏食,乃親到弘農督上民租,百姓競送義粟,軍食復 既而鎮惡等逕向潼關,爲紹所拒不得進,而軍又乏食,馳告高祖, 前。 高祖 振。 呼所遣人開舫北戶,指河上虜示 初,高祖 與鎭惡等期,若剋洛

軍姚讚代紹守險,衆力猶盛。

高祖至湖城,讚引退。

遣 慰士卒曰:「卿諸人並家在江南,此是長安城北門外,去家萬里,而舫乘衣糧,並已逐流去, 船登岸。 外不見有乘行船人,北土素無舟檝,至莫不驚惋,咸謂爲神。 復 毛德祖擊破之,直至渭橋。 有求生之計邪!唯宜死戰,可以立大功,不然,則無遺類矣。」乃身先士卒,衆亦知無復 ,莫不騰踊爭先,泓衆一時奔潰,卽陷長安城。 大軍次潼關,謀進取之計,鎭惡請率水軍自河入渭。 渭水流急,倏忽間,諸艦悉逐流去。時姚泓屯軍在長安城下,猶數萬人。鎭惡撫 鎮惡所乘皆蒙衝小艦,行船者悉在艦內,羌見艦泝渭而進,艦 泓挺身逃走,明日,率妻子歸降。 偽鎮北將軍姚强屯兵涇上,鎮惡 鎭惡旣至,令將士食畢,便棄 城內

列

倳

第

五

夷、晉六萬餘戶 ``,鎭惡宣揚國恩,撫慰初附,號令嚴肅,百姓安堵。

殷積 惡 白 明 高祖 悉剔 公之威,諸將之力,鎭惡何功之有焉」。高祖笑曰:「卿欲學馮異也。」是時關中豐全, ,鎭惡極意收斂,子女玉帛,不可勝計。 高 以 祖 取,而棄輦於垣側。 鎭惡旣克長安,藏姚泓偽輦,爲有異志。 |將至,鎭惡於||獨上奉迎, |高祖勞之曰:「成吾霸業者, 眞卿也。」鎭惡再拜謝曰:「此 高祖 聞之,乃安 高祖以其功大,不問也。 高祖密遣人覘輦所在,泓輦飾以金銀,鎭 進號征虜將軍。 倉庫 時 有

怒。 盛,田子 至 馬 各思竭力,而 一長安, 馮翊 高 人常 祖 田 佛佛 屯 太守,委以扞禦之任。 子 留第二子桂陽公義眞爲安西將軍、雍秦二州刺史,鎭長安。 劉 有 又於鎭惡營內,殺鎭惡兄基、弟鴻、遵、淵及從弟昭、朗、弘,凡七人。是歲,十 擁 畏憚不敢動。 回 相 兵不進,寇虜何由 堡,遣使還報鎮惡。 圖志,彼此 及大軍 毎相防疑。 時西虜佛佛强盛,姚興世侵擾北邊,破軍殺將非 .得平。」使還,具說 東還,便寇逼 鎭惡對田子使,謂長史王脩曰:「公以十歲兒付吾等,當 鎭惡率軍出 北 地。 北 鎭惡言, 地,爲 義眞遣中兵參軍沈田子距之。 田子所殺, 田子素與鎮惡 鎭惡以本號領安西司 事 在序標。 不協 一。高祖 至是益 時年 虜 激 匹 甚 旣 四

高祖表曰:「故安西司馬、征虜將軍王鎭惡,志節亮直,機略明舉。 自策名州府,屢著誠

年正月十五

H

也

霧散。 績。 受命,追封龍陽縣侯,食邑千五百戶,諡曰壯侯。 勳參前 禍 軍,曜威撲討。 俘執偽后,克成之効,莫與爲疇,實扞城所寄,國之方邵也。近北虜遊魂,寇掠渭北,統率衆 不圖 ·烈,殊績未酬,宜蒙追寵,願敕有司,議其褒贈。」於是追贈左將軍、<u>青</u>州刺史。 ·,痛惜兼至,惋悼無已,伏惟聖懷,爲之傷惻。 及王師西伐,有事 賊旣還奔,還次徑上,故龍驤將軍沈田子忽發狂易,奄加刃害,忠勳未究,受 中原,長驅洛陽,肅清湖 陜。 鎭惡輕舟先邁,神兵電臨,旰食之虞,一 田子狂悖,卽已備憲。 入渭之捷,指麾無前 鎭惡誠著 遂廓定咸陽 艱難 朝

子 靈 福嗣,位至南平王鑠右軍諮議參軍。 靈福卒,子述祖嗣。 述祖卒,子叡嗣。

配食高祖

蘭廷。

禪,

徒,得 及幷州乞活一 以 高 康 祖 爲 鎭惡 板 百許 爲 相 弟康、留關中,及高祖北伐、鎭惡爲前鋒,康逃匿田舍。 彭 國 人, 行 城 千餘 參 公前 驅 率邑 軍。 戶屯 將軍 郭 求還洛陽 城 行 僑 診軍。 南 戶七百 視 迎亡命司馬文榮爲主。 餘 母,尋值關、陝不守,康與長安徙民張 鎭惡被害,康逃藏得免,攜家出 家,共保金墉城,爲守戰之備。 又有亡命司馬道恭自東垣率三千人 洛陽,到彭城,歸高 鎭惡次潼關,康將家奔之, 時 有一 FT 醜、劉 人邵 平,率 雲等唱 祖 集 部 義 刨 曲

列

傳

第

卒金墉,時年四十九,葬於偃師城西。 縣男,食邑三百戶,進號龍驤將軍。 寧朔將軍、河東太守。 之屯柏谷塢,索虜野坂戍主黑硝公遊騎在芒上,「云攻逼交至,康堅守六旬。 太祖元嘉二十七年,隨劉康祖伐索虜敗沒,子懷祖嗣。 屯城西,亡命司 馬順明五千人屯陵雲臺。 遣龍驤將軍姜□率軍救之,諸亡命並各奔散。 迎康家還京邑。勸課農桑,百姓甚親賴之。 追贈輔國將軍。 順明遣刺殺文榮,平復推順明爲主。 無子,以兄河西太守基子天祐嗣。當 高祖嘉康節,封西 宋臺建,除 叉有司 永初元年 馬楚 康 平

遠將 朔 建義,韶及弟祗、道濟等從平京城,行參高祖 丘縣侯, 將軍 軍、東海 檀韶字令孫,高平金鄉人也。 食邑五 太守 百戶。 進號建武 復參車騎將軍事,加龍驤將軍,遷驍 將軍,遷龍 世居京口。 驤將軍、秦郡太守,北陳留 建武將軍 初辟本州從事,西曹主簿,輔國司馬。 事。 騎將軍,公 都邑旣平,爲鎭軍參軍,日 內史。 中 ·軍諮議參軍,加寧 以平桓玄功,封 高祖 加 寧

分, 降號橫野將軍。 從 征 一廣固, 率向 城陷之日,韶率所領先登,領北琅邪太守,進號寧朔將軍、琅邪內史。 彌 胡藩等五 十人攻臨朐城, 克之。 及圍 一廣固, 慕容 超夜燒樓當韶圍

其合門從義,弟道濟又有大功,故特見寵授。永初二年,卒於京邑,時年五十六。追贈安南 有罪,免官。高祖受命,以佐命功,增八百戶,幷前千五百戶。韶嗜酒貪橫,所莅無績,上嘉 軍,領本州大中正。十二年,遷督江州豫州之西陽新蔡二郡諸軍事、江州刺史,將軍如故 丁 戶之半二百五十戶,賜祗子臻。坐六門內乘輿,白衣領職。義熙七年,號輔國將軍。 從討盧循於左里,又有戰功,幷論廣固功,更封宜陽縣侯,食邑七百戶,降先封一等爲伯,減 母憂,起爲冠軍將軍。明年,復爲琅邪內史,淮南太守,將軍如故。 鎭姑孰。 尋進號左將 八年,

|緒嗣。 緒卒,無子,國除。祗子臻。臻卒,子遐嗣,齊受禪,國除。祗、弟道濟並別 將軍,加散騎常侍。

高祖 武 羣寇互 浴將軍 少舊。 向靖字奉仁,小字彌,河內山陽人也。 、秦郡太守,北陳留內史,戍堂邑。 起,彌與劉藩、孟龍符征破桓歆、桓石康、石綏於白茅,攻壽陽剋之。 從平京城,參建武軍事。 進平京邑,板參鎭軍軍事,加寧遠將軍。 以平京城功,封山陽縣五等侯。 名與高祖祖諱同,[弘改稱小字。世居京口,與 義熙三年,遷建 京邑雖平,而

守,領石頭戍事。 陽。 進討,破賜,收其輜重。 卽 擊將軍,尋督馬頭淮西諸郡軍事、龍驤將軍、鎭蠻護軍、安豐汝陰二郡太守、梁國 陵、雷池、左里三戰,[10]並大捷。 刺史,攻逼姑孰。 五十九。追贈前將軍。彌治身儉約,不營室字,無園田商貨之業,時人稱之。 受命,以佐命功,封曲江縣侯,食邑千戶。遷太子左衞率,加散騎常侍。二年,卒官。 本號侍從,留戍碻磝,進屯石門、栢谷。 時潰陷,斬其牙旗,賊遂奔走。攻拔廣固,彌又先登。盧循 以平廣固、盧循功,封安南縣男,食邑五百戶。十年,遷冠軍將軍、高陽內史,臨淮 從 征 鮮卑, 大戦 高祖西伐司馬休之,以彌爲吳興太守,將軍如故。 彌率譙國內史趙恢討之。時輔國將軍毛脩之戍姑孰,告急續至, 於臨朐,累月不決。 除中軍諮議參軍,將軍如故。 軍還,除太尉諮議參軍、下邳太守,將軍 遷督北靑州諸軍事、北靑州刺史,將軍如故。 彌與檀韶等分軍自間道攻臨朐城。 盧循退走,高祖南征,爾爲前鋒,於南 屯據蔡洲 明年,高祖 以親黨阮賜 如故。 彌擐甲先登, 北伐,一 一丙史,成 八年,轉游 彌 為豫州 彌 高 兼 以 太 祖 行

子植嗣,多過失,不受母訓,奪爵。更以植次弟楨紹封,又坐殺人,國除。

逆,召柳至尋陽,與之俱下。質敗歸降,下獄死。 湛之、東揚州刺史顏竣皆與友善。 植 弟柳,字玄季,有學義才能,立身方雅,無所推先,諸盛流並容之。太尉袁淑、司空徐 歷始興王濬征北中兵參軍,始興內史,南康相。 臧質爲

墓所殺亮及爾妾幷奴婢七八人,匿不聞官,爲有司所奏,詔無所問。元嘉初,卒於義興太守 彌 弟劭、永初中、爲宣城太守。 砌弟子亮,以私忿殺彌妻施氏,託云奴客所殺,砌 輒於

其 謹 北將 班於宗族、自己家無餘財。 度支尚書,加散騎常侍。 固、盧循功,封南城縣男,食邑五百戶。十三年,高祖北伐,以爲中領軍、征虜將軍,衞**輦**穀 坐府中相殺,発官。 軍、彭城內史。 以亡命入廣陵城,降號征虜將軍。 軍。 退類如此。 爲政嚴猛,境內震肅。 ,屢戰克捷, 劉 懷 愼, 徵爲五兵尚書,加散騎常侍,光祿大夫。 彭城人, 從征 宋臺立、召爲五兵尚書,仍督江北淮南諸軍、前將軍、南靑州刺史。 加 雖名位轉優,而恭恪愈至,每所之造位任不踰己者,皆束帶門 輔國將軍 鮮卑,每戰必身先士卒,及克廣固,懷慎 左將軍懷肅弟也。 高祖遷都壽春,留懷愼督北徐兗靑淮北諸軍事、中軍將軍、徐州刺 二年卒,時年六十一。追贈撫軍,諡曰肅侯。 九年,亡命王靈秀爲寇,討平之。十一年,進北 o 義熙八年,以本號監北徐州諸軍 永初元年,以佐命功,進爵爲侯,增邑千戶。 少謹愼質直。 景平元年,遷護軍將軍,常侍如故。 始參高祖鎭軍將軍事、行己振威 率所領先登。 ·事,鎭彭 中郎 從高 城 將。 尋加 祖 距 外下車, 進號 以平廣 徐 盧 復徵爲 祿賜 州 循 至 刺 將 於

列傳第五 劉懷愼

甚悅, 殷墓 朱衣、執轡進止、甚有容狀。永光中、爲廷尉、與柳元景厚善。元景敗、下獄誅。 過,其精 善御車,嘗立 淚。」|志時新喪愛姬,答曰:「我爾日自哭亡妾耳。」〔11三|志滑稽善爲諧謔,上亦 士。 後復 子 以爲豫州刺史。 德 謂德願曰:「卿哭貴妃若悲,當加厚賞。」德願應聲便號 如 為秦郡 願 此。 嗣。 兩柱,使其中劣通車軸,乃於百餘步上振轡長 世祖聞其能,江巴為之乘畫輪車,幸太宰江夏王義恭第。 太守。 世祖 大明初,為游擊將軍,領石頭戍事。 又令醫術人羊志哭殷氏, 德願性粗 率,爲 世 祖 所狎侮。 志亦 鴻咽。 上寵 驅,未至數尺,打牛奔從柱間 姬殷貴妃薨, 坐受賈客韓佛智貨, 慟, 他日 撫膺辦 有問 志「卿那 葬畢, 德願岸著籠冠,短 踴,涕 愛狎之。 數 泗 下 交流。 ~與羣 得此副急 獄, 德 臣 奪爵 至 願

鎧 太尉 成令。日初高祖北伐,轉鎭西中兵參軍,寧遠將軍。 旭 以授之。 宣令三軍,不得輒射賊,榮祖不勝憤怒,冒禁射之,所中應弦而倒,帝益奇焉。 軍事。 懷 [愼庶長子榮祖,少好騎射,爲高祖所知。[1三及盧循攻逼,時賊乘小艦,入淮拔栅。 樂祖 從討司馬休之,彭城內史徐逵之敗沒,諸將意沮,榮祖請戰愈厲,高祖乃解所著 率所領陷陣,身被數創,會賊破走。 水軍入河,與朱超石大破索虜於半城,又 加振威將軍,尋參世子征虜軍事,領逐 以戰功參

轉爲 攻劉 |祖 德 旭 道濟等攻營破之,斬首擒馘,不可稱計。 義,善撫將 祖 還 固 都,為 陷 太 度壘克之。 一辭獲 沒,榮祖 尉 中兵參軍 趸。 士,然性偏 世 . 子 時居父艱, 中兵參軍。 及晦出鎭開楚,欲請爲南蠻校尉,榮祖又固止之。 高祖大饗戰士,謂榮祖曰:「卿以寡克衆,攻無堅城,雖古名將,何以過 ,加建威將軍。 險編隘,頗失士君子之心。 起為輔國將軍 永初元年,除越騎校尉,尋轉右軍將軍。 旣破 長安,姚泓女婿徐衆率其餘衆連營叛走, 十四年,除彭城內史,又補相國參軍。 追論 半城之功,賜爵都鄉侯。 領軍將軍謝晦深接待之,廢立 其年冬卒。 索虜 南寇,司州刺 榮祖為人輕財 德願弟興祖 一之際,要榮 其年 榮祖 遣 此 史 與 檀

州

刺

史。

合仙 還官。 順陽 無不 禽 藥。 縣 道 太宗 球 愼 侯, 所 至益 弟懷默,冠軍將軍、江夏內皮,太中大夫。 弟孫登, 一般以干 食邑六百戶。 嘉之,下 州 泰豫元 數。 武 陵 詔 褒 太宗 內史。 美。 年藥始成 歷黃門郎、梁、溢二州刺史。 泰始 亮 孫登 在 初, 梁州 子亮,世祖 ,而未出火毒。 爲巴陵 忽服命 王休若鎮 大明 食修道,欲致長生。 中,爲武康令。 孫不聽亮服,亮苦欲服、 懷默子道球,巴東、建平二郡太守 東中兵參軍,北伐南 在 任 廉 儉, 不營財貨,所餘 時境 迎 武 當 內多 哥, ,平旦開 Щ 道 | 盜鑄錢, | 亮掩討 功冠 士 孫 公祿,悉以 城門取 諸將,封 道胤 井

列

傳

第

五

明,此乃道家所謂尸解者也。

華 水服,至食鼓後,心動如刺,中間便絕。 後人逢見,乘白馬,將數十人,出關西行, 共語分

追贈冠軍將軍、諡曰

剛侯。

加龍 戶,委以腹心之任。泰始初,爲太宗盡力,遷左衞將軍,日也中護軍,尋賜死,事在建安王休 中,歷黃門侍郎,除、青、冀三州刺史。 驤將軍。 孫登弟道隆,元嘉二十二年,爲廬江太守。世祖舉義,棄郡來奔,以補南中郎參軍事, 時世祖分麾下以爲三幢, 前廢帝景和中,以爲右衞將軍, 道隆與中兵參軍王謙之、馬文恭各領其一。 永昌縣侯, 食邑五百 大明

殺,事在鄧琬傳,追贈侍中。 丞,吳興太守。以南下之功,封石陽縣子,食邑五百戶。|大明三年卒,贈前 子應之嗣。大明末,爲衡陽內史。晉安王子勛反,應之起義拒湘州行事何慧文,爲慧文所 王謙之字休光,琅邪臨沂人。晉司州刺史胡之會孫也。 應之弟雲之,順帝昇明中貴 (達。 世祖初,歷驍騎將軍,御史中 將軍、諡 日肅

馬文恭,扶風人也。亦以功封泉陵縣子,食邑五百戶。 世祖卽位,爲游擊將軍。 頃之

守,又 等侯。 初 劉 領 爲 粹 軍 下邳 州 還 字道沖 從 太守。 轉 事,高祖克京城,參建 中 , 沛郡蕭人也。 軍 諮議 復 爲 車騎 參 軍。 中軍參軍。 盧循 祖恢,持節 武 軍 逼京邑,京口任重,太祖時年四歲,高祖使粹奉太祖鎮 事。 從征 、監河中軍 從平京邑,轉參鎭軍事 廣固 ,戰功居多。 ·事,征虜將軍。 以 建義功 尋加建武將軍 粹家在 7日公封西安 京口 · 、 |沛 少 郡 有 縣 志 太

轉游

擊

將

軍

京城。 守。 封 國 母 並 建 將 憂 疑 三年, 安 去 粹 軍 遷 鎭壽陽 縣侯,食邑千戶。 遷 在 建 職 夏 威 相 以本號督 俄 口 將 治 國 高 軍、江 而 右司 有 高祖討 祖 政績 夏相。 馬、侍中、中軍司 愈信之。 豫 司 二年,以役 司馬休之, 雅幷四 衛將軍毅,粹族兄也,粹盡心高祖 及大 州 起粹 軍 南 使 至,粹竭其誠力。 馬、冠軍將軍、遷左衞將軍。 豫州之梁郡弋陽馬 監 爲寧朔將軍、竟陵太守,統水軍入河。 吏, 発官。 尋督 事平,封攝陽縣男,日記食邑五百戶 江北 頭三郡諸軍 ,不與毅同。 淮 南 永初元 郡 事、 事 水、豫州 征虜 年,以佐命功, 高祖欲謀毅,衆 刺史,領梁郡 將軍、廣陵太 明 年,進號輔 改

謀等村 口,收付作 少帝景 粹遣 平 將苑縱 部。 二年 粹坐貶號為寧朔將軍 譙郡 夫 討 流 叛 離 戶不 六十餘家 及 囡 誅 叛沒虜,趙炅 殺 時索虜南寇, 謀等三十家,男 、秦剛等六家悔倍還投陳留襄邑縣,頓 粹遣將軍李元德襲許昌, Ţ 百三十七 人,女弱 殺 一百六十 偽潁 JII

庾龍 ,於是陳留人董邈自稱小黃盟主,斬偽征虜將軍、廣州刺史司馬世賢,傳首京都。

無所 將軍、持節、本官如故 敗,士衆傷 餘 道 事 向江 、征虜將 人,以補 顧 太祖 陵。 太祖 即位 ::府史。 軍、領寧蠻校尉、雍州刺史、襄陽新野二郡 死者過半,降 粹以道濟行 以 此嘉之。 遷使持節、 元嘉三年 竟陵內史,與敞之及南陽太守沈道興步騎至沙橋,爲晦司馬周 號寧朔將軍。 晦遣送曠之還粹,亦不害也。 討謝晦,遣粹弟車騎從事中郎道濟、龍驤 督雍梁南北秦四州荆州之南陽 初,晦與粹厚善,以粹子曠之爲參軍,粹受命南討, 太守。 明年,粹卒,時年五十三。 竟陵順陽襄陽新野隨六郡 在任簡役愛民,罷諸沙門二千 將軍沈敞之就粹,自陸 追贈安北 超 諸 所

書駕部郞。 曠 之嗣,官至晉熙太守。 粹庶長子懷之,爲臨川內史,與臧質 曠之卒,子琛嗣。 同逆、 踩卒,無子,國除。 、伏誅。 踩弟亮,順帝昇明末,尚

武 害民,民皆 有此,必宜改之。 將 軍 粹 大益州 弟道濟,尚書起部郎,王弘 怨毒。 刺 史。 太祖 比傳人情不甚緝諧,CIOJ當以法御下,深思自警,以副本望。」道濟雖奉此 長史費謙 聞之,與道濟詔,戒 、別駕 車騎從事中郎,江夏王義恭撫軍 張熙、參軍楊德 (之日:「 聞卿 年等,並聚斂興利 在任,未盡清省 ·司馬, 一、又頗 ·; 而 河東 道 爲 濟 太守, 殖 委任 貨,若萬 之, 仍 傷 遷 政 振

矣。 有作財 亂 萬。 杜 軍 所 及 因 商 道 綿 兵三十六營以 趙 聚 玄 拒 殺 人 因 起 之, 廣 黨 府 多 遣 因 ,崩動 有 相率 作言 等 至 又立冶,一斷民私鼓鑄,三三而貴賣 軍擊飛龍斬之。 贼 盜 爲 司 逐寧 戦 於 盜 岡 馬 唱 不 敗 從 羣 是逕 賊。 飛龍 司 曰:「官禁殺牛,而村 止 土 太守 失利 之, 小,得千餘人,破巴興縣,殺 馬 一資貨,或有直 者,一旦 爲 殿下 得 向 者,自稱晉之宗室,晉末走仇池。 平 其年七月,道濟遺羅習爲 馮 涪城, 民,分立 數 遷 懷 千 獪 聞涪 業 一發露,則 初, 人, 在 及司 巴西 陽泉 一宋興、宋寧二郡,又招集商賈及発道俗奴僮 一數百萬者, 城 復 道濟以五 馬、 不 人唐 向 山 爲 守, 中公違法禁,脫使羅令白 廣漢 中,若能 南漢 禍不測 頻 並 城 聚衆應之, |謙等限布絲綿各不得過五十斤,馬無善惡,限||蜀錢 委 中 道 人帛氐奴、梁顯爲參軍 郡 令王貞之。 太守 共 、鐵器,商旅吁嗟,百姓咸欲爲 五城令,氐奴等謀曰:「羅令是使 濟 出 宜 建大 遣參 奔。 幸處伯 結 要誓, 寧遠 事 軍 蜀 元嘉 了,則 程 土 進 並 浴將軍 展會、治 僑 功名 共 攻陰平,陰平太守沈法興焚城遁走。 九年,聞道濟綏撫失和,遂自仇池 棄 舊 使 相禁檢。」乃殺牛盟誓。 城 ·、巴西 「象 可 君 走。 立,不 ,疑吾徒 ·督護, 中 然 一梓潼 李抗 涪陵 並 ·然,立 反。 費謙固 之五 太 更欲 亂。 郡 東西 守 道 滅 太守王 君 阮惠 百 氏奴 濟 作 執不 勝 不 腹 人 惶懼 贼, 兵可 人。 、擊之, 江陽 心 旣 懷 俄 則 懷 。, 乃 而 業 有 衆 無 而 : 恚忿, 遠方 四千 発吳 並 餘 旣 卿 太 氐 再 樂 類 奴 猶

列

人。賊衆數萬屯城西及城北,道濟嬰城自守。

斬頭 帛氏 牧,建號泰始元年,備置百官。 十餘萬,四 云 迎飛龍。 奴征虜將軍,梁顯鎭北將軍,同黨大帥張寧秦州刺史,嚴遐前將軍。 趙 廣 道養惶怖許諾。 本以譎詐聚兵,頓兵城下,不見飛龍,各欲分散。 面圍城。 至陽泉寺中,謂道人程道養曰:「但自言是飛龍,則坐享富貴;若不從,即 就道濟索費謙、張熙,曰:「但送此人來,我等自不 道養,枹罕人也。 以道養弟道助爲驃騎將軍、長沙王, 廣改名爲龍興,號爲蜀王、車騎大將軍 廣懼,乃將三千人及羽儀, 鎭涪城。 復作賊。」 奉道養還成都,衆 廣 子、益梁一 自 號鎭 詐其 三州 日 便

孟子交言,因投書曉以 戰,破賊營,焚其積聚。 與孟子幷力自固 爲任,克期討 軍敗,及孟子並死 道濟遣中兵參軍裴方明、任浪之各將千餘人出西門戰,皆失利。 賊。 趙廣 廣遣 禍福,要使入城。 知其謀,孟子懼,將所領奔晉原。 賊黨江陽 同黨袁玄子攻晉原,爲仲興所殺。 人楊孟子領千餘人屯城南,道濟參軍梁儁之統南樓,屢與 孟子許諾,入見道濟,道濟大喜,即板爲 晉原太守文仲興 廣又遣帛氐奴攻之,連戰, 十一月, 拾合得二千餘人, 方明等復出 主簿 仲興

擊城東大營,殺千餘人,斬爲僕射蔡滔。 方明復出東門,破賊三營,斬首數百級。 時天大霧,方明等復揚聲出東門,而潛自北門出攻 **賊雖敗,已復還合。** 方明復僞出北門,仍 回 軍

城 北 城 西諸營,賊衆大潰, 於是奔散。 道養收合得七千人還廣漢, 趙廣以別卒五千餘 人還

沼切

答籤疏 亡者 不然 方明 募: 濟卒, 來取 聽 有 食,饐不能飡,唯泣 勢旣衰,臺兵 千人出城求食,爲賊所敗,匹馬獨還。 同 歸 、敗矣。」 家 異。 喪。」城中大恐。 初, 梁儁 不不 |傳相告語,城內乃安,由是應募者 休息,喚復還。」給使旣出, 人。 別駕張熙說道濟令糶太倉穀,賊以九月末圍城,至十二月末,廪糧 今軍 ·異常 之與方明等,及 道濟從之,卽喚左右三十餘人告之曰:「吾疾 時城中或 垂至,但令卿還,何憂於賊。」即減 師 日,故雖 屢敗,妖寇未殄,若一旦不虞, . 涕而已。 道濟夜 傳道濟已亡,莫有至者。 母妻,不 其 列炬 故舊門生數人,共埋尸於後齋。 道濟時有疾已篤,自力慰 知 火,方明 其父兄皆問:「使君亡來幾日 也。 賊因追之,衆復大 自出, 日千餘人。 左右數十人配 梁儁之說道濟曰:「將 則 衆見之乃安。 危禍立 勉 十年 之日 久, 集。 至。 正月,賊衆大至,攻逼成都。 汝等扶侍疲勞。 1. 卵 之。 方明 使書與道濟相似者爲教命 宜稱 ?」子弟皆言:「君 道濟悉出財 賊城 非大 夜 小 軍氣 於城 損 丈 外云:「方明 夫, 聽 息 西縋上,道濟 便盡。 物於北 綿綿,而 左 今旣 小敗 右 漸 給 方明將二 何苦。 小損, 射 差,誰 使暫 已死 外論 爲設 賊 各 令 可 道 互

一月,道養於毁金橋升壇郊天,方就柴燎,方明將三千人出擊之。 賊列陣營前死戰, 日

還 連營 與戰 擒 城 夕乃 率 並 隊 潼二 奔散 郫 義 僞 四月十日,發道濟喪。五月,方明 い斬其 驃 縣 百百 主王盱等幷力追討。 一郡太守,率平西參軍費淡 涪 數,處處屯結。 騎 將 廣等又移營屯箭竿橋 梁州 、蜀皆平。 軍 雍秦 刺 、將軍、巴東太守周籍之卽本號督巴西梓潼宕渠遂寧巴郡五 史杜承 二州 俄而 籍之與方明及費淡等攻郫, 等百餘級 刺史司 張尋攻破 張尋自涪城率衆二萬來 ,方明等破其六營, 馬龍 龍 陰平,復 驤將軍羅猛二千人援成都。 進軍 伸斬 之。 向涪城。自己張尋、唐頻渡水拒戰,方明擊破之,生 與道養合。 龍伸,道助也。 助廣等,方明 剋之。 乘勝追 帛氐奴攻廣漢,費淡督將軍种松等 廣等退據 奔,逕至廣漢。 州吏嚴道度 、淡斬竹開 廣等屯據廣漢, 郡 城,傍竹自固。 逕邀之,戰 廣等走還涪及 一郡諸 斬嚴遐首, 軍事 分守 敗、退 郭川 廣 巴西 羅 等 五

餘 家 逃于 九月 益 州 其餘羣 刺 史甄 法崇至成都,誅費 賊,亦各擁 戶 藏竄 謙之,三三道濟喪及方明等並東反。 出 爲寇盜不 絕 道養等領二千

燕 輔 國 歸 將 降 軍 王道恩斬道養,送首,餘黨悉平。 年六月,太祖 汪 之 學破 道養,道養還 遣 寧朔將 入 軍 || | | | | | | | 蕭汪 之統 + 遷趙廣、張尋等於京師。 四 軍 年 討 之。 四 月, 軍次 趙廣 郪口, 帛氐奴斬偽衞 張 尋 、梁顯 十六年,廣、尋復與國 各 郊 部 將 曲 軍 歸 司 降 馬飛

山令司馬敬琳謀反,伏誅。

州

刺

史。

郎 將,仍爲 先 是, 道濟振 義慶平西 武 中兵參軍、龍驤將軍、洄東太守。 司馬、蜀郡太守任薈之雖不任軍 事,事 費淡、太子屯騎校尉。 寧,以 爲 正 員 郎。 周 裴 籍之後 方 明虎 資中 益

光 太祖 嘗 禄 應 召。 遣 大夫 粹 揚 族弟 常謂 徴 不就。 損,字子騫,衞將軍毅從父弟 中 毅「汝必破 沈演之東 元嘉二年,年 入賑 我 家。」 卹 以以 毅 九十餘, 甚 損綏 帽之, 也。 撫 卒 有方,稱爲 於 毎 父鎭之字仲德,以毅貴,歷顯位,閑居京口 家。 還京,行門 損, 良守。 元嘉 未嘗敢以羽 中 官至吳郡 歷 職 義 儀 興 太守,追 人從 、太守。 入鎭之門。 贈 東 太常 土 一殘饑, 左

衣 成 有 功濟 非 而 史 藉 務, 臣 德 民 未 譽 尊 」,義 足 出 帝 也 權 王 無 受命,自 道 曹公英傑之響,又 是故 雖 復 王 非以功靜亂,以德 負 謐 展 以內懼 南 面 流 闕 此 晉氏 奔,王綏以 號 軒 輔 濟 |犧, 民, 魏 之基, 外侮 則 莫不 其道莫· 成釁,若非樹奇 自 且 謝 驅 由也。 王 鳥 風 合 不不 自三 率 由 崇 功 代以 霸 於 朝 德。 難 而 來 立, 制 高 醇 或 震大威於 祖 命 風 崛 稍 功 起 布 雖

列

傅

簛

受朔。 黄屋朱戶,爲襄晉之貞臣乎。 獨克之舉,振古難稱。 四海,則不能承配天之業,一異同之心。義熙以後,大功仍建,自桓溫旍旆所臨, 鎭惡推鋒直指,前無强陳,爲宋方叔,壯矣哉! 及金墉請吏,元勳將舉,九命之禮旣行,代終之符已及,方復觀兵函、渭, 若使閉門反政,置兵散地,後敗責其前功,一眚虧其盛業,豈復得以 及其靈威薄震,重關莫守,故知英算所苞,先勝而後戰也。 用師天險, 莫不獻珍

#### 校勘記

於鵲 洲 尋陽 河口巴陵守風凡四日 「河口」,元龜四二〇作「江口」。 孫膨朱書考論云:「河疑沔

譌。

ハミ 令如 後 有大軍狀 各本並脫「如」字,據御覽三一六引、元龜四二〇補。 通鑑晉安帝義熙八年

ᆵ 軍分攻金 城南門毅金城內東從舊將猶有六隊千餘人 各本並脫「南門毅金城」五字,今據御覽

三一六引補。

|Z9| 典、御覽三一六引訂補。 鎭 惡軍人 與 毅 東 來 將士 「東來將士」各本並作「東將」二字,南史作「下將」二字,今據通典兵

- 35. 北土素無舟檝 「土」各本並作「土」,據南史、建康實錄、元龜三四四改。
- 當作黑。 索虜野坂戍主黑弰公遊騎在芒上 黑弰公于栗磾也。 栗磾爲河內鎭將, 「黑」各本並作「異」,據远龜七六一改。 廿二史考異云:「異 好操黑矟,宋武帝與之書,題曰黑矟公麾下,
- 因拜爲黑矟將軍。 弰、矟聲相近,亦卽槊字。」
- 爲鎭軍參軍 軍,不當云爲鎭軍將軍也。依史例,當云轉鎭軍參軍。此傳寫之譌,非史本文之誤。」 「參軍」各本並作「將軍」,廿二史考異云:「是時宋武帝爲鎭軍將軍, 韶爲其府參
- 軍。」按孫說是,今改正。 遷驍騎將軍 各本並作「遷騎將」, 不可通。 孫彪宋書考論云:「騎將二字脫誤,當云 驍騎將
- 名與高祖祖諱同 名與高 祖祖諱同。」 各本並脫「祖諱」二字,據南史補。廿二史考異云:「宋武帝王父名靖, 當云
- 於南陵雷池左里三戰 「雷池」各本並作「電池」,據元龜三四四改。
- 始參高祖鎭軍將軍事 「鎭軍」下各本並有「騎」字,據远龜三四四删。
- 祿賜班於宗族 「祿」各本並作「特」,據南史、元龜四〇六、八一二改。
- 四 我爾日自哭亡妾耳 八三引 作「爾日」。 爾 今據南史、御覽改正。 日」三朝本作「爾白 北監本、毛本、殿本、局本作「爾時」,南史、御覽

列傳第五 校勘記

- 世 鮮 舉諡法 祖聞其能 世 [祖]各本並作「孝武」,據元龜八四五改。 按宋書於宋有廟號諸帝,多稱廟
- 二吾 爲高 祖 所知 「高祖」各本並作「武帝」,據远龜八八六改。 下「高祖宣令三軍」,各本亦並作「武

帝」,

並據元龜

改。

- 領逐成令 孫彪宋書考論云:「遂成屬廣州蒼梧郡, 不得遠領此縣。 南徐州南彭城 蕃縣, 志云
- 義旗 史,榮祖以府僚帶本州令祿 初, **免軍戶立遂誠縣**, 也。 永初元年改從舊名。 是晉末徐州有遂誠縣,世子時爲徐、兗二州刺
- 二古 遷左衞將軍 各本並脱「左」字,據南史補。
- 以建 義 功 各本並脱「建」字,據元龜三七九補
- 封躡! 陽 縣 男 各本並脫「陽」字,據徐羨之傳補正。 廿二史考異云: 「灄下脫陽字。 宋州郡志,
- 江夏 郡 有攝陽縣。 徐羨之傳作攝陽縣男。」
- 比傳人情不甚緝諧 「甚」各本並作「政」,據远龜一九六改。
- 一斷民私鼓鑄 「民私」各本並作「私民」,據元龜六九七改。
- 方明進軍 向涪城 各本並脱「明」字,據通鑑宋文帝元嘉十年補
- 急 誅費 謙之 「費謙 之」卽上文之「費謙」,南北朝人名下之「之」字,有 時 可 省去。
- 每還京 南史「京」下有「口」字。 按上文云鎭之居京口,則似以作「京口」爲是。

## 宋書卷四十六

### 列傳第六日

## 趙倫之 到彥之 闕 王懿 張邵

子出 帝卽位,徵拜護軍。 軍 功封閬中縣五等侯,累遷雍州刺史。 · 嶢柳,大破姚泓於藍田。及武帝受命,以佐命功,封霄城縣侯,安北將軍,鎮襄陽。 趙倫之字幼成,下邳僮人也。 元嘉三年,拜鎭軍將軍,尋遷左光祿大夫,領軍將軍。 孝穆皇后之弟。〔三幼孤貧,事母以孝稱。 武帝北伐,倫之遣順陽太守傅弘之、扶風太守沈田 武帝起兵,以

不言汝資 入爲護軍,資力不稱,以爲見貶。 倫之雖外戚貴盛,而以儉素自處。 地所任,要是外戚高秩次第所至耳。」倫之大喜,每載酒肴詣泰。 光祿大夫范泰好戲謂曰:「司徒公缺,必用汝老奴。 性野拙,人情世務,多所不解。 **外居方伯,頗覺富** 五年,卒。 子伯 我

符嗣。

陽尹。 尚文帝第四女海鹽公主。初,始興王濬以潘妃之寵,故得出入後宮,遂與公主私通。及適 相統攝者,自有別詔,至此始統領焉。二十一年,轉豫州刺史。 若豺虎,然而寇盜遠竄,無敢犯境。一一嘉十八年,徵爲領軍將軍。 身貫甲胄,助郡縣赴討,武帝甚嘉之。文帝卽位,累遷徐、兗二州刺史,爲政苛暴,吏人畏之 討,悉破之,由是有將帥之稱。 伯符字潤遠。少好弓馬。 在郡嚴酷,吏人苦之,或至委叛被錄赴水而死。典筆吏取筆不 後爲寧遠將軍,總領義徒,以居宮城北,每有火起及賊盜,輒 倫之在襄陽,伯符爲竟陵太守。時竟陵蠻屢爲寇,伯符征 明年,爲護軍將軍,復爲丹 先是,外監不隸領軍,宜 ·如意,鞭五十。 子倩,

王懿字仲德、至太原那人。自言漢司徒允弟幽州刺史懋七世孫也。祖宏,事石季龍,

情,情入宮而怒,肆詈搏擊,引絕帳帶。事上聞,有詔離婚,殺主所生蔣美人,伯符慚懼發病

諡曰肅。

傳國至孫勗,齊受禪,國除。

**父苗,事苻堅,皆爲二千石。** 

仲德少沈審,有意略,通陰陽,解聲律。苻氏之敗,仲德年十七,與兄叡同起義兵,與慕

叡 容 潦 牛行,見 暴 相 垂 至 及。 ,敗,仲德被 莫知 |仲德,問曰:「食未。」|仲德告飢。 渡 河 所 至滑臺,復爲翟 如。 重創走,與家屬相失。 有一白 狼至前,仰天 遼所留 一使爲 而 兒去,頃之復 路經大澤,不能前,困臥林中。 號,號訖銜仲德衣 將 帥。 積 年, 來, 仲德欲南歸, 牆食 ,因渡水,仲德隨之, (與之。 仲德 乃奔泰山, 忽有靑衣童 食畢欲 遼遣騎 獲濟, 行, **見騎** 追 水 與

之

急,夜行,忽

有

炬

火前導,仲德隨之,行

百

許

里,乃発。

謂 愉 之骨 在 江 晉 言及 太元 南 肉 有遠來相投者, 是太原 末 世 事 ,徙居彭城。 仲德 入, 日二 乃往依之, 莫不竭 兄弟· 自古革命 名犯 愉 力營贍, 禮 就 晉宣、元二帝諱,並 之甚 非 若不 薄, 一族,然今之起 因 ·至者,以爲 至 姑孰投桓玄。 以字稱。 者,恐不足以成 不義,不爲 叡字元德。 値 玄篡, 鄉 里所 大事 見 容。 北 輔 土重 仲德 或 將 同姓, 聞 張 王

與 下 元 仲 德 之 事 德 爲 元 六不 德 相 玄 所 果敢 對 可 誅 號 不 仲 泣 有智略 密, 追 德 應機務 奔竄 贈 武帝 元 德 速,不 給 會 甚 事 知 義 中 在 軍 之,告以 ·, 封 巧 剋建業, 遲。 安復 義 玄 縣侯, 舉,使 仲德 毎 冒 抱元 以 於 夜 仲德爲 出 都 德子 入 下 襲玄。 **今若圖** 方回 中兵 出 一多軍 仲德 之,正 候 武 聞 帝 其謀, 須 帝 夫 於馬 謂 力耳。」事 元德 上抱方回

北 伐始還, 武 帝 伐 士卒創 廣 固 仲德 痍 ,堪戰者可 爲 前 鋒 一大小 數千人。 二十餘 財衆十萬,舳艫百里, 戰, 每 戦 輒 剋。 及 盧循寇 奔敗 而 逼 歸 者, 敗 劉毅 咸稱 於 其雄。 桑落,帝

列

傳

第

六

王

懿

其舟艦,收其散卒,功冠諸將,封新淦縣侯。 南走,遣仲德追之。 突,乘我 議 義 並欲遷都 士英豪,當自求其主爾。 遠征 ,仲德正色曰:「今天子當陽而治,明公命世作輔,新建大功,威震六合。 ,至旣聞凱入,將自奔散。 賊留親黨范崇民五千人,高艦百餘,城南陵。 此謀若行,請自此辭矣。」帝悅之,以仲德屯越城。 今自投草間,則同之匹夫, 匹夫號令, 何以 仲德攻之,大破崇民,焚 及賊自蔡洲 威 妖賊豕 物?

半城, 驤將 軍,進據潼關。 軍王 |義熙十二年北伐,進仲德征虜將軍,加冀州刺史,爲前鋒諸軍事。 咸受統於仲德。 鎮惡向洛陽,寧朔將軍劉遵考、建武將軍沈林子出石門,寧朔將軍 長安平,以仲德為太尉諮議參軍 仲德率龍驤將軍朱牧、寧遠將軍竺靈秀、嚴綱等開運野 冠軍將軍檀道濟、龍 朱 超石 入河,乃總衆 胡藩 向

武帝受命,累遷徐州刺 歸 心,固當以建業爲王 武帝欲遷都洛陽,衆議咸以爲宜。 史,加都督。 基,俟文軌大同, 仲德 然後議之可也。」帝深納之,使衞送姚泓先還彭城 曰「非常之事,常人所駭。 今暴師日久,

冰冬合,豈不能爲三軍之憂。」十月,虜於委粟津渡河,進逼金墉,虎牢、洛陽諸軍,相繼奔 咸喜,仲德獨有憂色,曰:「胡虜雖仁義不足,而 元嘉三年,進號安北將軍,與到彥之北伐,大破虜軍。 凶狡有餘,今斂戈 諸軍進屯靈昌津。 北歸,并 力完 司、 | 完 既 聚,若河 定,

回 軍 我 沿濟南歷城步上,焚舟棄甲,還至彭城。 千里,滑臺猶有强兵,若便舍舟 彦之聞二城不守,欲焚舟步走,仲德曰:「洛陽旣陷,則虎牢不能獨全,勢使然也。 奔走,士卒必散。 仲德與彦之並免官。 且當 入濟至馬耳谷口 尋與檀道濟教滑臺 ,更詳所宜。」 今賊 乃

盡

而

歸

城, 諡 日桓侯。 立佛寺作白狼、童子像於塔中,以河北 九 年, 又爲 亦於廟立白狼、童子壇,每祭必祠之。 鎭北將軍、徐州刺史。 明年, 所遇也。 加領兗州刺史。 子正 十三年,進號鎭北 |脩嗣,爲家僮所殺。 仲德三臨徐州, 大將軍 威德著於彭 五. 年,卒,

廣 州 親故 張 邵字茂宗,公 咸 離棄之,惟邵 會稽太守裕之弟也。 情意 彌 謹,流涕追 初爲晉琅邪內史王誕龍驤 送。 時 變 亂 饑 饉,又饋 泛送其 府 、妻子。 功 曹,桓玄徙誕於

帝 何 煩 主 大 說, 多問 簿 桓玄 命署其 劉 篡位,父敞先爲尚書,以答 毅 劉 爲 穆 門日 亞相 之 聞 : ,愛才 以白 「有犯 好 帝益親之,轉太尉參軍 張 士,當世莫不 廷尉 者,以軍 事微謬, 輻 法 「湊,獨 降 論 爲 廷 ,署長流賊曹 邵 後 尉 不往。 以 卿 敞 o 爲吳郡太守。 及 或問 《武帝 之,邵日 盧循 討 这, 寇迫京師, 二、主 王謐 邵 白 敞 公 爲 命世 表獻 揚 使邵守南 州 談談外, 人傑, 召邵

城, 時百 姓臨水望賊,帝怪而問邵,邵曰:「若節鉞未反,奔散之不暇, 亦何能觀望。 今當無

復恐耳。」尋補州主簿。

軍,遷諮議參軍,領記室。 主簿處分。」帝曰:「張邵可謂同我憂慮矣。」九年,世子始開征虜府, 各修舟船 邵悉 心政事,精力絕人。及誅劉藩,邵時在西州直廬,卽夜誠衆曹曰:「大軍當大討,可 倉庫,及曉取辦。」旦日,帝求諸簿署,應時卽 至, 怪問其速, 補邵錄事參軍,轉號 諸曹答曰:「昨夜受張

若疑狀發露,恐生大變。宜且遣慰勞,以觀其意。」旣而賦果不動。及穆之卒,朝廷恇懼,便 中結聚亡命,日三祗率衆掩之、劉穆之恐以爲變、將發軍。 尊業如此,苟有不諱,事將如何。」帝曰:「此自委穆之及卿耳。」 青州刺史檀祗鎭廣陵,時滁 反,方使世子出命曰:「朝廷及大府事,悉咨徐司馬,其餘啓還。」武帝重其臨事不撓,有大臣 欲發詔以司馬徐羨之代之,邵對曰:「今誠急病,任終在除,且世子無專命,宜須北咨。」信 十四年,以世子鎭荆州,邵諫曰:「儲貳之重,四海所繫,不宜處外,敢以死請。」從之。 十二年,武帝北伐,邵請見,曰:「人生危脆, 必當遠慮。 邵曰:「檀韶據中流,道濟爲軍首, 穆之若邂逅不幸,誰可代之?

功,封臨沮伯。 文帝爲中郎將、荆州刺史,以邵爲司馬,領南郡相, 分荆州立湘州,以邵爲刺史。 將署府,邵以爲長沙內地,非用武之國,置署 衆事悉決於邵。 武帝受命,以佐命

妨 人,乖爲政要。 帝從之。 謝晦反,遺書要邵,邵不發函,馳使呈帝

羣 因大會誅之,悉掩其徒黨。 襄陽,築長圍,修立隄堰,開田數千頃,郡人賴之富贍。丹、淅二川蠻屢爲寇,云邵誘其帥, 要,親舊爲之危心。 蠻伺欲取之。會蠕蠕國遣使朝貢,賊以爲敷,遂執之,邵坐降號揚烈將軍 元嘉五年,轉征 邵曰:「子陵方弘至公,必不以私讎害正義。」是任也, 虜將軍,領寧蠻校尉、雍州刺史,加都督。 旣失信羣蠻,所在並起,水陸斷絕。子敷至襄陽定省 初, 王 |華與邵有隙,及華參 華實舉之。 當還都, 及至

遺命祭以菜果,葦蓆爲轜車,諸子從焉。子敷、演、敬,有名於世。 百 四十五萬,下廷尉,覓官,削爵土。後爲吳興太守,卒,追復爵邑,諡曰簡伯。 江夏王義恭鎭江陵,以邵爲撫軍長史,持節、南蠻校尉。 坐在雍州營私蓄聚,因 邵臨終,

中軍 尾 風 而 韻 散 歎 日一 端 施 敷 雅,好玄言,善屬文。初,父邵使與南陽宗少文談繫象,往復數番,少文每 已盡,唯得一扇,乃緘錄之。 字景胤。 吾道· ,數見接 ]東矣。」於是名價日 生而母亡,年數歲,問知之,雖童蒙,便有感慕之色。 引。 累遷江 夏王義恭撫軍記室參軍 重。 每至 感思, 輙開 笥流涕。 武帝聞其美,召見奇之,曰:「眞千里駒也 o 義恭就文帝求一學義沙門,會敷赴 見從母,悲威嗚咽。 至十歲許,求母遺物, 一。」以爲 `欲屈,握麈 性整貴, 世子

列

可 員 比 中 江 書郞。 |陂,入辭,文帝令以後車載沙門往,謂曰:「道中可得言晤。」<br/>數不奉詔,上甚不說。 敷 小名查,父邵小名梨,文帝戲之曰:「查何如梨。」數曰:「梨爲百果之宗, 查何 遷正

執 敷 如 手 呼 勿 曰:「念相聞。」餘響久之不絕。 左右曰:「 往。」當曰:「吾等並已員外郎矣,何憂不得共坐。」 敷先設二牀,去壁三四尺,二客就席, 中 書舍人秋當、周赳並管要務,日日以數同省名家,欲詣之。 移我遠客!赴等失色而 張氏後進皆慕之,其源起自敷 去。其自標遇如 此。善持音儀、盡詳緩之致、與人別、 赳曰:「彼恐不相容接,不 也。

所居 漿, 「我比止汝,而乃益甚。」自是不復往,未朞年而卒。〔三〕孝武卽位,旌其孝道,追贈侍中,改其 葬畢, 爲孝張 遷黃門侍郎、始興王濬後將軍 不進鹽菜, 遂毁瘠成疾。 里 司徒左長史。 伯父茂度每譬止之,敷益更感慟,絕而 未拜,父在吳興亡,成服凡十餘日,方進水 復續。 茂度曰:

奔,墜淮死。 敷 弟柬,襲父封,位通直郎。 子烒嗣。 陳有勇力,手格猛獸,元凶以爲輔國將軍。 孝武至新亭,

柬

出

暢字少微,邵兄偉之子也。 偉少有操行,爲晉琅邪王國郎中令,從王至洛,還京都,武

帝封藥酒一甖付偉,令密加鴆毒,受命於道自飲而卒。

奔赴, 嘗,枚因此乃食,由是遂愈。累遷太子中庶子。 暢 制服盡哀,時論美之。 少與從兄敷、演、敬齊名,爲後進之秀。 弟|枚嘗爲獅犬所傷,醫者云食蝦蟇可療,|枚難之。 起家爲太守徐佩之主簿,佩之被誅,暢馳出 暢含笑先

讚。今城內乏食,人無固心,但以關扃嚴密,不獲走耳。若一搖動,則潰然奔散,雖欲至所 翼,奉二王及妃媛直趨歷城,分城兵配護軍將軍蕭思話留守。 下官請以頸血汙君馬跡」。孝武聞暢議,謂義恭曰:「張長史言,不可違也。」義恭乃止 奔鬱洲,自海道還都。二議未決,更集羣僚議之。 計議彌日不定。時歷城衆少食多,安北中兵參軍沈慶之議欲以車營爲函箱陣,精 義恭統諸軍出鎭彭城。 在,其可得乎!今食雖寡,然朝夕未至窘乏,豈可捨萬全之術,而卽危亡之道。此計必行, 孝武鎭彭城,暢爲安北長史、沛郡太守。元嘉二十七年,魏主托跋燾南征,太尉江夏王 廣衆近城數十里,彭城衆力雖多,而軍食不足,義恭欲棄彭城南歸, 暢曰:「若歷城、鬱洲可至,下官敢不高 。太尉長史何勗不同,欲席卷 兵爲

馬臺,復遣使至小市門,求與孝武相見,遣送駱駝,幷致雜物,使於南門受之。 市門,致意求甘蔗及酒。孝武遣送酒二器,甘蔗百挺。求駱駝。 魏主旣至,登城南亞父塚,於戲馬臺立氈屋。先是,隊主蒯應見執,其日晡時,遣送應 明日,魏主又自上戲 暢於城上與

滿,刮 患彼此不盡,Clind故不復遣。」又云:「魏主恨向所送馬殊不稱意,安北若須大馬,當送之,脫 我儀貌,察我爲人。」暢又宣旨答曰:「魏主形狀才力,久爲來往所見。李尚書親自銜命,不 四種,並不中食。胡豉亦中噉。」又求黃甘,幷云:「魏主致意太尉、安北,何不遣人來問,觀 魏主又遣送氈及九種鹽幷胡豉,云:「此諸鹽,各有宜。 號白賊也。」孝伯笑曰:「今之白賊,亦不異黃巾、赤眉,但不在江南耳。」又求博具,俄送與。 「此中間道甚多,亦不須煩覷。」孝伯曰:「亦知有水路,似爲白賊所斷。」暢曰:「君著白衣,故 門餉物。 「以隣國之臣耳。」孝伯又言:「太尉、鎭軍,久闕南信,殊當憂邑。 有詔借博具。」暢曰:「博具當爲申致,有詔之言,正可施於彼國,何得施之於此?」孝伯曰: 取六銖,以酒服之。 魏主又求酒及甘橘,孝武又致螺盃雜物,南土所珍。魏主復令孝伯傳語曰:「魏主 胡鹽療目痛。 。柔鹽不用食,療馬脊創。 白鹽是魏主所食。日日黑者療腹脹氣 若遺信,當爲護送。」暢曰: 赤鹽、駮鹽、臭鹽、馬齒鹽

|孝伯又曰:「君南土膏粱,何爲著屩。君且如此,將士云何。」|暢曰:「膏粱之言,誠以爲愧。

亦致錦一匹。又曰:「知更須黃甘,若給彼軍,卽不能足,若供魏主,未當乏絕,故不復致。」

須蜀馬,亦有佳者。」暢曰:「安北不乏良駟,送在彼意,此非所求。」義恭又送炬燭十挺,孝武

伯足詞 但以 不武,受命統軍,戎陣之間,不容緩服。」魏主又遣就二王借箜篌、琵琶等器及棊子。 辯, 亦北土之美。 暢隨宜 應答,甚爲 敏捷,音韻 詳 雅 魏 人美之。

之日,卽便舉兵。 時魏 聲云當 出襄陽,故以暢 暢爲元佐,舉哀畢,改服著黃袴褶,出 爲南 譙王 義宣司空長史、南郡 射堂簡 人, 太守。 音儀容止, 元凶弑逆, 衆皆矚目,見 義宣發哀

者皆爲盡命。

事平,徵爲

吏部

尚書,封夷道縣侯。

請殺之,隊主張世救之得免。日思執送都下,付廷尉,見原。 掠,衣服都盡。 別立軍部,以收人望。 死保之。 會義宣起兵,津路斷絕,遂不得前。 丞 相 及義宣 長 史。 靈寶還白義宣,云暢必不可 有異圖 暢 遇右將軍王玄謨乘輿出營,暢已得敗衣,遂排玄謨上輿,玄謨甚不悅。 遣 門 ,蔡超等以暢 生荀僧寶下都,自己因顏竣陳義宣 暢雖署文檄, 人望,勸義宣留之,乃解南蠻校尉以授暢,加冠軍將軍, 義宣將爲逆, 飲酒常醉,不省 回,請殺 以徇衆,賴丞相司馬竺超民 使嬖 以其事。 人翟 一釁狀。 靈寶告暢,暢 及義宣敗於梁山 僧寶有私貨,止 得免。 陳 必 , 無 巴 暢 陵 進 此 爲 號 理 不 軍 一,請以 ·時下。 撫 諸將 人所 領

宣作賊,而卒無咎。 苦。」初,尚之爲元凶司空,及義師至新林門,人皆逃,尚之父子共洗黃閤,故暢以此譏之。 起爲都官尚書, 轉侍中。 苟非奇才,安能致此!腸曰:「太初之時,誰黃其閣?」帝曰:「何 孝武宴朝賢,暢亦在坐。 何偃因 醉曰:「張暢信奇才也, 事相 與義

建 二年, 出爲 會稽太守, 卒,諡 日宣。 暢愛弟子輯,自己臨終遺 命 與 輯 合 墳, 時 議

非之。

陽太守。 泰始六年,明帝於巴郡置三巴校尉,以悅補之,加持節、輔師將軍,領巴郡 拜為吏部尚書,與鄧琬 暢子 弟悦,亦有美稱,歷侍中、臨海王子項前將軍長史、南郡太守。 浩,官至義陽王 逼郡吏燒臂照佛,百姓有罪,使禮佛贖刑,動至數千拜。 共輔僞政。 **昶征北諮議參軍**。 及事敗,脫殺腕歸降,復爲太子 浩弟淹,黄門郎 ,封廣晉縣子,太子左衞率,東  $\dot{\dagger}$ ·庶子。 晉安王 太守。 後拜 子勛建偽號、召 雍州 未拜,卒。 刺史。

魏 爲 虜。 臣 |穆等案高氏 今帝稱 帝 小业史, 號, 魏稱魏主 趙倫之傳下有到意之傳, 與南史體同,而傳末又無史臣 而此 書獨 闕。 論,疑非約 約之史法 门諸帝? 書。 然其辭差與南 稱 廟 而 謂

與晉安王

一子勛同逆,軍敗見殺焉。

発官禁錮

起爲光祿勳,

校勘記

史異、故特

存焉。

列傳第六 崇文總目:「此一卷闕。」 按宋書此卷北宋初已闕失,後人以南史及高氏小史補之,

說見卷後鄭穆校語。今一仍其舊。

ヘニコ 孝穆皇后之弟 孝 穆」各: 本 並作 武穆」,據后妃傳及南史趙倫之傳改。 按此謂武帝母孝穆皇

后,不當簡稱「武穆皇后」。

= 王懿字仲德 通鑑考異 云:「宋書仲德傳闕。」是此篇亦爲後人所補。

29 見 輔國 將 軍 張 暢 孫獻宋書考論 云 一此別一 張暢,非張邵兄子也。 劉懷肅傳有江夏相張暢之,

蓋其人。」

[五] 乘我遠征 「征」各本作「往」,據南史、元龜七一七改。

ベロ 張邵字茂宗 李慈銘宋書札記云:「宋書張邵傳本亡,後人雜取南史等書補之,故邵子敷,兄子

暢、皆別有傳、而此卷邵傳後復重出數傳。」

. . -1: ' 時滁中結聚亡命 滁中」各本 並 作「滁州」,據南史改。 按時無「滁州」,當作「滁中」。

丹淅二 川 蠻屢爲寇 川」各本並作「州」,按時無丹州及淅州,有丹水、淅冰,「州」 當作「川」,今

訂正。

八九山 坐在雍州營私蓄聚 「聚:」各本並作「取」。 「蓄取」義不可通,今據通鑑宋文帝元嘉 八年改。

中書舍人秋當周赳並管要務 「秋當」各本並作「狄當」,據廣韻改正,說見本書卷四 十四 \*謝晦

, 傳校勘記第九條。

列傳第六 校勘記

- 未朞年而卒 「未」各本並譌「來」,據本書卷六十二張數傳及南史改正。
- 白鹽是魏主所食 魏書李孝伯傳於「白鹽」下尙有「食鹽」二字,正合九種鹽之數。 此處「白鹽」

下似脱「食鹽」二字。又下「柔鹽」,魏書李孝伯傳作「戎鹽」。

不患彼此不盡 「患」各本並作「忍」,據本書卷五十九張暢傳及南史改正。

暢遣門生荀僧寶下都 「荀僧寶」,南史、元龜七一九同。 本書卷五十九張暢傳作「苟僧寶」。

〇三 除主張世教之得免 異…即張興世也,本單名世。」南齊書張融傳:「欣時父興世,宋世討南郡王義宣,官軍欲殺融父 「張世」各本並作「張榮」,據本書卷五十九張暢傳及南史改正。廿二史考

暢,興世以袍覆暢而坐之,以此得免。」卽言其事。

暢愛弟子輯 各本並脫「子」字,據本書卷五十九張暢傳補

### 宋書卷四十七

### 列傳第七

# 劉懷肅 孟懷玉 弟龍符 劉敬宣 檀祗

來奔。 肅與江夏相張暢之攻澹之於西塞,破之。僞鎭東將軍馮該戍夏口東岸,孟山圖據魯山 擊破之。 仙客守偃月壘,皆連壁相望。 義熙 初爲 劉懷肅,彭城人,高祖從母兄也。 荆州 京邑平定,振武將軍道規追桓玄,以懷肅爲司馬。 潁川太守劉統平,除高平太守。 劉敬宣寧朔府司馬,東征孫恩,有戰功,又爲龍驤司馬、 元年正月,振敗走,道規遣懷肅平石城,斬馮該及其子山靖。 刺 史 司 馬休之出奔,懷肅自雲杜馳赴,日夜兼行,七日 懷肅與道規攻之,躬擐甲胄,陷二城,馮該走石城,生擒仙 家世貧窶,而躬耕好學。 玄旣死,從子振大破義軍於楊林,義軍退尋陽。懷 玄留何澹之、郭銓等戍桑落洲 費令。 而至。 聞高祖起義, 三月,桓振復襲江 振勒兵三萬,旗幟 棄縣 進

列傳

第

七

劉

懷繭

將軍符嗣、馬孫、偽龍驤將軍金符青、樂志等屯結江夏,懷肅又討之, 卒爭先,臨陣斬 蔽 野 躍 馬横矛 小躬自 振首。 1突陳。 江陵既平,休之反鎮,執 流矢傷懷肅 額,衆懼欲奔,懷肅瞋目奮戰, 懷 肅 手曰 "「微子之力,吾無 梟樂志等。 士氣 所歸 益壯。 矣。」 道規 僞 於是士 加懷 輔 國

肅督江夏九郡,權鎭夏口。

以義 卒,時年四十一。追贈左將軍。 步騎討破之。 功封東興縣侯,食邑千戶。 除通 直郎,仍爲輔國將軍、淮南歷陽二郡太守。 江淮間羣蠻及桓氏餘黨爲亂,自請出討,旣行失旨,毅上表免懷肅官。 無子,弟懷愼以子蔚祖嗣封,官至江 其冬,桓石綏、司馬國璠、 二年,又領劉毅撫軍司馬,軍、郡 陳襲於胡桃山聚衆爲寇, 夏內 史。 懷肅率 如 故。

新亭,道存出奔,元凶殺其母以徇。 蔚祖卒,子道存嗣。太祖元嘉末,爲太尉江夏王義恭諮議參軍。 前廢帝景和中,爲義恭太宰從事中郎, 世祖伐元凶, 義恭敗, 以黨與 義軍至

獄死。

至 會稽太守,尚書,金紫光祿大夫。 高 祖 懷 肅 次弟懷敬、澀訥無才能。 高 祖 從母 生懷敬、未暮、乃斷懷敬乳,而自養高祖。 初。高祖產而皇妣殂,孝皇帝貧薄,無由得乳人, 高祖以舊恩,懷敬累見寵授, 議欲不

演之 流 稱 親執板築,塘旣還立,縣邑獲全。 於後 上 又翦蕩凶非,屢能 懷 表 敬子眞道,爲錢唐令。 日一字邑敷政,必以簡惠成 竊見錢唐令劉眞道、餘杭 擒獲。災水之初,餘杭高堤崩潰,洪流迅激, 元嘉十三年,東土饑,上遣揚州治中從事史沈 风能, 莅 个劉道錫,皆奉公卹民,恪勤 經歷諸縣,訪覈名實,並爲二邦之首最,治民之良宰。」 職闡治,務以利民著績。 匪 勢不 故王 懈 了 百 可量, 奐 [姓稱] 見紀 演 之巡行 道錫 詠, 於 前 訟 躬先吏 在所 訴 叔卿

常侍 偽 干 和 繼 將 難 上嘉 坙 騎 當 丞 其 叉 太子積弩將軍 軍 遣 苻 寇 相 就 後 劉 之,各賜穀千斛,以眞道爲步兵校尉。 + 楊 盗猶不已,太祖 和 德 弘 僧秀、綏遠將軍馬洗、振武 四 方明 義 祖 萬 方 年,出爲梁、南秦二州刺史。十八年,氐賊楊難當侵寇漢中,眞道率軍討破之。 言壽等 助 明 、啖元等固守蘭皐,鎭 戦,康 進 叉 擊, 劉康祖、後軍參軍梁坦、陳彌、裴肅之、安西參軍段叔文、魯尚期、始興王 率諸 時 祖 大破 歸降。 遣龍驤將軍裴方明率禁兵五千,受真道節度。十九年,方明至武 將攻之,和 叉 大 之於 破之, 難當 濁水, 第三息虎先戍陰平,難當既走,虎逃竄 北將軍苻德義於外爲游軍,回 將軍王奐之等,進次潭谷,去蘭皐數里。日 敗走,追至赤亭, 和 退保脩城。 斬 弘 旭 并三千餘級。 難當遣 難 當 建忠將軍楊林、振 席 卷奔 遣 康 叛。 難當 祖 追之,過蘭皐二千餘里 方明 子撫軍 民間,生禽 造康 威將軍 難當 大將 祖 直 軍和 姚憲領二 遣 趣百頃, 其 、 建 節 重兵 國 而

列

傳

第

七

劉

懷

肅

都,斬于建康市。

徙。 都太守,憲補 致效,隕命寇手。 近者協贊義奮,乃心無替。 建忠將 俛首者衆。 刺 史,方明 前討仇池、志輸誠力、即戎著效、臨財 秦州 可符雍、梁二州, 可贈給事中,賜錢十萬。」「悉」道盛注古文尚書,行於 軍呂訓 刺史胡崇之西鎭百頃,行至濁水,爲索虜所邀擊,敗沒。 輔 其長史楊萬壽、建節 員外散騎侍郎 國將軍、梁南 衛倉儲以候王師。 並事著屯險,感于予懷,宜蒙旌敍,榮慰存亡。 厚 加 贈卹。」呂訓 秦二州刺史。 ,訓駙馬都尉、奉朝請, 略陽苻昭,回誠係本朝,亦同斯舉,俘擒偽將,獨克武 將軍姚憲,情不 寧朔將軍姜檀果烈懇到,志在宣力,濁水之捷,厥庸 , 能清。 略陽氐人呂先子也。 方明 一一一一一一 達順, 近先登濁水,殞身鋒鏑,誠節俱亮,矜悼于 拜。 檀征 屢進矢言。 詔 世 西大將軍司馬、 曰:「往年氐豎楊難當 [H] 叉詔曰:「故晉壽太守姜道 可贈萬壽龍 以真道為建威將軍 及凶醜宵 仇池太守, 遁, 驤 將 造 闔 軍, 興, [境崩] 爲 宜 工雅州 類然, 叛亂 推 並 昭 擾, 武 內

各有差。

方明

,河東人,爲劉道濟振武中兵參軍,立功蜀土,歷潁川南平昌太守,皆坐贓私

眞道

方明並坐破

仇池

斷割金銀諸雜寶貨,

又藏難當

一善馬,

下

· 獄 死。

劉

康祖

等繁発

,

孟 懷玉,平昌安丘人也。 高祖珩,晉河南尹。 祖淵,右光祿大夫。 **父綽,義旗後爲給事** 

中,光祿勳,追贈金紫光祿大夫。世居京口。

食邑千戶。 高祖 東伐孫恩,以懷玉爲建 高祖鎭京口 ,以懷玉爲鎭軍參軍、下邳 武司馬。 豫義旗,從平京城,進定京邑。 太守。 義熙三年,出爲寧朔將軍、西陽太 以功封鄱陽縣侯。

元卒, 懷玉 岸,畏懷玉不敢上。 守,中大夫。 州之松滋六郡諸軍 議參軍,征虜將軍。 之,身當矢石,旬月乃陷。 守、新蔡內史,除中書侍郎,轉輔國將軍,領丹陽府兵,戍石頭。 陳弟仙客出繼,喪主唯己,乃見聽。 此任以防之。十一年,加持節。 盧循逼京邑, 無子, 國除。 事、南中郎將,刺史如故。〔智〕時荆州刺史司馬休之居上流,有異志,故授 懷玉於石頭岸連戰有功, 及循南走,懷玉與衆軍追躡,直至嶺表。 懷玉別封陽豐男,子慧熙嗣,坐廢祭祀奪爵。 八年,遷江州刺史,尋督江州豫州之西陽新蔡汝南潁川司州之恒農揚 仍南追循,循平,又封陽豐縣男,食邑二百五十戶。 丁父艱,懷玉有孝性,因抱篤疾, 未去任,其年卒官。時年三十一。 爲中軍諮議參軍。 徐道覆屯結始興, 賊帥徐道覆屢欲以精銳登 慧熙子宗嗣,公 竟陵太 ,上表陳解,不許。 追贈平南將軍。子 復爲太尉諮 懷玉 攻 軍

子,加 索虜斛 城 蘢 寧遠 了, 以 符 蘭、索度眞侵邊,彭、沛騷擾,高祖遣龍符、建威將軍道憐北討,一戰破之。 治將軍 龍 玉弟也。 符為建武參軍 、淮陵太守。 驍果有膽氣,幹力絕人。 與劉藩、向 江乘、羅落、覆舟三戰, 彌 征桓歆、桓石康、破斬之。除建威將軍、東海 少好游俠,結客於閭 並有 功。 參鎭軍軍事,封平昌縣五 里。 早爲高祖 追斛蘭至 所知 太守 旣 等 o

水

溝

邊

被被

創

奔

走。

封 遁 衆 事 高 賊 胴 数千 臨沅 一,依 軍。 `, 宜 先。 祖 與 深 高 一蒙甄 賊 險 騎 于時 祖 縣男,食邑五百戶。 及 加 爭水,龍 鳥聚, 圍繞 西劋 痛 伐廣固 表, 逆 悼,追贈 徒 以顯 攻之,龍符 大軍 桓 歆, 實 符單騎衝 ,以<br />
龍符為車騎參軍,<br />
[4] 加龍驤將軍、<br />
廣川太守,統步騎為前鋒。 (繁) 控 《貞節, 因 北 青州 勢 珍索虜 方 弦 刺 奮稍接戰 聖恩嘉悼,寵贈 突,應 軌 掩 史。 無子,弟仙客以子微生嗣 ",朝議 澤,龍 長 手 叉 驅 表目 每一 ·破散,即據 符 質賞, 未及 考其庸績,豫參 匹馬電躍 「故龍 合輒 方州 殺數 水源,賊遂退走。 **~施行。** 驤將軍 一,所向 龍符 (人)衆寡不敵,遂見害,時年三十三。[10] 投袂 封 濟不,竊謂 一、廣川 推靡, 會今北伐,復統前 義 太祖元嘉中, 初, 太守孟龍符,忠勇果毅,隕 奮戈深 宜 龍符 前 班 驅效命, 入, 爵 乘勝 士, 有罪奪爵, 知 旅 奔逐, 以 死 臨 推 佛容。 褒 胸 鋒 勳 之戦 後騎不及, 三捷,每 烈。 徙廣州 贼 軍達 氣氣 乃追 身 超 奔 冠

以微生弟彥祖子佛護襲爵。齊受禪,國除。

身入陳,所殺狼籍,遂見殺。詔書追贈潁川郡太守。 入隸 羽林,為殿中將軍。 孝武 大明 初,諸流徙者悉聽還本,微生已死,子係祖歸京都,有筋榦異力,能儋負數人。 二年,索廣寇青、冀,世祖遣軍援之,係祖自占求行。 戰於杜梁,挺

孝子,必爲國之忠臣。」起家爲王恭前軍參軍,又參會稽世子元顯征虜軍事 衆人灌佛,乃下頭上金鏡以爲母灌,因悲泣不自勝。序歎息,謂牢之曰:「卿此兒旣爲家之 八 歲 要母, 晝夜號泣, 中表異之。 劉 一一敬宣字萬壽,彭城人,漢楚元王交後也。 輔國將軍桓序鎭蕪湖,牢之參序軍事。 祖建,征虜將軍。父牢之,鎭北將軍。 四月八日,敬宣見

穆宰相與不。 先帝殊恩,今居伯舅之重,義心未彰,唯兵是縱。 吾不能審<<br />
恭事捷之日,必能奉戴天子,緝 爲前鋒。太傅會稽王道子與牢之書,備言禍福,使以兵反恭。牢之呼敬宣謂曰:「王恭昔蒙 軍、晉陵太守,置佐領兵。而恭以豪戚自居,甚相陵忽,牢之心不能平。及恭此舉,使牢之 隆安二年,王恭起兵於京口,以誅司馬尚之兄弟爲名。牢之時爲恭前 今欲奉國威靈,以明逆順,汝以爲何如。]敬宣曰:「朝廷雖無成、康之隆,未有 軍 ·司馬、 輔 或 將

一四〇九

列

協。 桓 出 |城耀軍 靈 今日討之,於情何有。」字之至竹里,斬恭大將顏延,遣敬宣 之亂 ,馳騎橫擊之,一時散潰。 而 恭怙 亂阻 一兵,志陵京邑。 元顯進號後 大人與恭親無骨肉,分非 將軍,以敬宣爲諮議 率高雅之等還京襲恭,恭方 君臣 |參軍,加寧朔 ·, 雖 共 事 少 、時,意 將 軍 好不

趣 五 年,孫恩又入浹口,高祖戍句章,賊頻攻不能拔,敬宣請往爲援,賊恩於是退遠 其後,吳賊畏馬,又懼首尾受敵,遂大敗。進平會稽。 三年,孫恩爲亂,東土騷擾,牢之自表東討,軍次虎疁。 尋加臨淮太守, 賊皆死戰,敬宣請以騎 遷後軍從事 入海 傍南 中郎 Щ

敬宣 相 憑 結 毎 是 一時四 預 ,情好甚隆。 燕會、未嘗飲酒、調戲之來、無所酬答、元顯甚不說。 方雲擾, 朝廷微弱,敬宣每慮艱難未已。高祖旣累破妖賊,功名日盛,故敬宣深 元顯進號驃騎,敬宣仍隨府轉,軍、郡 如故。 尋進 元顯 號輔國將軍,餘如 驕淫縱肆,羣下化之,

餞 今。」牢之怒日 姬文之德 亂 行 方今 元 政方 興元 遇 或 實 始 公 家 年,牢之南討桓玄,元顯爲征討大都督,日夜昏酣,牢之驟詣門,不得 坐 假 爲 亂 參分 而 「吾豈不知今日取玄如反覆手, 擾 手於玄,誅除 已。 一,四海 之形。 桓玄 鼎沸,天下之重,在大人 旣至溧洲 一朝縱之,使陵 、執政, 然後 ,遺信說牢之,牢之以道子昏闇,元顯 乘 朝廷,威 玄之隙,可 與玄。 但平玄之後, 望 旣 以 成, 玄 得志於天下,將許玄降。 藉 則 先父之基,據荆 難 令我那 驃騎 何。」遣敬宣爲 圖 也。 董卓 淫 之變,將 凶,慮平玄之 南 之勢, 相見、帝出 敬 雖 生於 無

任,四五板爲其府諮議參軍。

江就 宣、雅之等共據山陽破之,不剋。 **令關東募** 以 明 司馬休之、高雅之等,俱奔洛陽,往來長安,各以子弟爲質,求救於姚興。 玄旣 旦。 而 敬宣還京口 兵,得數千人,復還至
 城間,收聚義故。 値 得志,害元顯,廢道子, 爾 日 大霧,府門晚開,日 迎家,牢之尋求不得,謂已爲玄所擒,乃自縊 以牢之爲征東將軍、會稽 又進昌平澗,戰不利,衆各離散,乃俱奔鮮卑慕容德 旰,敬宣不至,牢之謂所謀已泄, 玄遣孫無終討冀州刺史劉軌, 太守。 死。 牢之與敬宣謀共襲玄, 敬宣 率部 奔喪, 曲 向 白洲 興 哭畢, 與之符信 軌 要敬 欲奔廣 卽 渡 期

卽便馳還。 泗間,會高祖平京口,手書召敬宣,左右疑其詐,敬宣曰:「吾固知其然矣。 志,必不動,不可告也。」雅之以爲不然,遂告鹹 矣,吾復本土乎。」乃結青州大姓諸崔、封,曰三并要鮮卑大帥免逵,謀滅德,推休之爲主,剋 日垂發。 敬宣素曉天文,知必有興復晉室者。 時劉軌爲德司空,大被委任,雅之又欲要軌, 既至京師,以敬宣爲輔國將軍、晉陵太守,襲封武岡縣男。 尋夢丸土服之,旣覺,喜曰:「丸者<u>椢也</u>,桓 敬宣曰:「此公年老,吾觀其有安齊 謀頗泄,相與殺軌而去。 是歲,安帝元興三 下邳 不誘 我也。」 至淮 既吞

桓 歆 率 氏賊楊秋寇歷陽,敬宣與建威將軍諸葛長民大破之, 歆單騎走渡淮, 斬楊秋於

列

傳

年

也。

練固 亮自號江州刺史,寇豫章,亮又遣苻宏寇廬陵,敬宣並討破之。 舟乘,軍戎要用,常有儲擬。 遇寵,賢二弟位任尚卑,一朝先之,必貽朝野之責。」不許。 身草澤,以終餘年。 而 還。 遷建威 將軍、江州刺史。 恩遇 不遺,口意遂復僶俛, 故西征諸軍雖失利退據,自己因之每卽振復。 敬宣固辭、言於高祖曰「讎恥旣雪,四海清 卽目所 忝,(同)已為優 敬宣旣至江 渥。 州 且. 盤龍、 課集軍糧, 其年,桓玄兄子 蕩,所 無忌猶未 搜召 願 反

國旣 别 駭 欲 上 惋。」敬宣愈不自安。 相 取 有 禍 與游 昧,今又不豫義始。 調度,豈得便謂此君爲人豪邪?其性外寬而內忌,自伐而尙人,若一旦遭逢,亦當以陵 申起者、論資語事,正可爲員外常侍耳。聞已授其郡,實爲過優,尋知復爲江州,尤所 初, 耳。」毅聞之,深以爲恨。及在江陵,知敬宣還,乃使人言於高祖曰:「劉敬宣父子,忠 劉毅之少也,爲敬宣寧朔參軍。時人或以雄傑許之,敬宣曰:「夫非常之才,八八當 !宴,恩款周洽,所賜錢帛車馬及器服玩好,莫與比焉 安帝反正,自表解職。於是散徹,賜給宅宇,月給錢三十萬。 猛將勞臣,方須敍報,如敬宣之比,宜令在後。 若使君不忘平生,

調 巧, 尋除冠軍 造作器物,敬宣到郡,悉罷私屯,唯伐竹木,治府舍而已。 將軍 、宣城內史、襄城太守。 宣城多山縣,郡舊立屯以供府郡費用,前人多發 亡叛多首出,遂得三千

餘

戶。

平,六 俱 諫 高 泰 祖 高 合宜 頃五 祖 日言 方大相寵任,欲先令立功,義熙三年, <del>\_</del>, 自 穀 義 非爲 轉豐,民 旗 之建,所征 不 爾也。 無饑苦,劫盜之患,亦爲弭息, 古人有言, 天時不如 無不必克,此可謂天人交助,信順 表遣敬宣率衆五千伐蜀。 地 利,地利 此誠 漸足無事,宜 不 如 之徵也。 人 和。 大寧治本。 今往伐蜀 今大難已夷, 或 子博士周 萬 蜀 有餘 祗 君 賊 臣 宜

里,泝

流

天

險,

動經

時

歲。

若此

軍直指成都,徑

禽譙氏者,

復

是

將

帥奮威,一

快

之舉

耳。

然

計, 以 頃 人,亦 勢 益 不 運 疑 往 得 狂 漕 挫 也 艱 愚情 狡 荒 死 不 衄 險 必 爲 繼 賊 彼 殘, 不 無千 竊 雨 以一 恨 息 此 必 雖 所 野 雪方降,驅三州三吳之人,投之三巴三蜀 不守窮城,將決 未安。 人一心 誅 無 韓、白之將,何 劉 匹 疑 戮 青草,成都 敬 一夫,而 也。 相 宣 闕門之外,非所宜豫,苟其有心,不覺披盡。」不 , 繼 蒙 有前 且 一、未 能 生 千里 致 存 可 之內,殆 無退 力戰。 今日 以 之 一饋糧 謂 成 恩, 人 矣。 之事 功。 和 士 亦宜 無孑遺。 今我往 也。 爲治 `, 若 此三 有 饑 性 天 衆 勞困 疑 色。 命 險 力 也。 仰 計 如 先定 離 報 得 況今泝險萬 彼 彼來甚逸。 散, ٠, 今云 彼 未 今將 其 之土, 利, 亦 內 可 可 何 與 軍 而 謂 征 以 八今行 其 欲 理 里,所 地 者皆云 若忽 至 一中疾 其 驅 利 此。 二死 外, 軍之費,不 也。 使 在 病 從。 先安 官 無儲 之甘 師 死亡, 毛 所遣 行 脩 心 其 彼 不 之家 豊 可 ·利,人 足相 近 若 兵 親 而忘國家之重 皆 而 離 連 讎不 鳥 稱 懷 兵 衆 補 情 其 合 叛 不 也 · 雪, 不 波 遠。 受募 解 談,大 一愚謂 此 而 自 之 應 今

餘日,大小十餘戰,賊固守不敢出。 卒,轉戰 聲 有司 **譙縱送毛璩** 外水,自率益州刺史鮑陋 所奏, 冤官, 削封三分之一。 假 敬宣節 im 前 ,達遂寧郡之黃虎,去成都五百里。 門諸喪,其妻女、文處茂母何,幷諸士人喪柩,浮之中流,敬宣皆拯接致歸。爲 ,監征蜀諸軍事,郡如故。 輔國將軍文處茂、龍驤將軍時延祖 敬宣不得進,食糧盡,軍中多疾疫,死者太半,引軍還。 旣入峽,分遣振武將軍、巴東 偽輔| 國將軍譙道福等悉衆距險,相持六十 由墊江 太守溫祚以二千人揚 而 進。 敬宣 率 先 士

規 與兗州刺史劉藩等奮擊,大破之。 五. 年,高祖伐鮮卑,除中軍諮議參軍,加冠軍將軍。 龍驤將軍孟龍符戰沒, 從至臨朐, 敬宣幷領其衆, 慕容超 出軍 圍 一廣固, 距 戰, 敬宣

西諸軍郡事、鎭蠻護軍、淮南安豐二郡太守、梁國內史,將軍如故。 轉左衞將軍,加散騎常侍。 盧循 逼京師,敬宜分領鮮卑虎班突騎,置陣甚整,循等望而畏之。 循旣走,仍從高祖 遷使持節 、督馬頭淮

納,與敬宣相遇,便盡禮著歡。 「人之相知,豈可以一塗限,孔文舉禮太史子義,夫豈有非之者邪」」 敬宣寬厚善待士,多伎藝, 或問混曰:「卿未嘗輕交於 弓馬音律,無事不善。 時尚書僕射謝混自負才 人,而傾蓋於萬壽,何也。」混曰: 地, 少所交

西任 平安,必無過慮。」出爲使持節、督北青州軍郡事 可孤 私 **憾傷至公,若必文致爲戮,己當入朝以** 一、欲屈 初,敬宣 光武悔之於龐萌、曹公失之於孟卓、公宜深慮之。」 卿爲長史、南蠻,豈有見輔意乎。」敬宣懼 回 師於蜀, 劉毅欲以重法 繩之,高祖旣相 廷議 決之。 、征虜將軍、北靑州 禍 毅 及,以告高祖 雖 任待,又何無忌 止,猶 毅出 謂 爲 高 刺史,領淸河太守,尋領 荆 祖 高祖笑曰:「但令老兄 州 明言於毅,謂 曰:「夫生平之舊,豈 謂敬宣曰:「吾忝 不宜以

夷滅, 民書,高祖謂王誕曰:「阿壽故爲不負我也。」十一年正月,進號右將軍 遂忝三州七郡。 時高祖 異端將盡,世路方夷,富貴之事,相與共之。」敬宣報曰:「下官自義熙以來,首尾十載 西討劉毅、豫州 今此杖節,常懼福過 刺史諸葛長民監太尉軍事,貽敬宣書曰:「盤龍狼 一禍生,實思避盈居損,富貴之旨,非所敢當。」遣使呈長 戾 專恣, 自取

冀州刺史。

辟閭 時年四十五。 有 應休之。 放 一隻芒屬於坐中,自己墜敬宣食槃上,長三尺五寸,已經人著,耳鼻間 道秀及左右小將王猛子等謀反。 司 道賜者,晉宗室之賤屬也,爲敬宜參軍。至高祖西征司馬休之,道賜乃陰結同府 敬宣召道秀有所論,因屛人,左右悉出戶,猛子逡巡在後,取敬宣備身刀殺敬宣 文武佐吏卽討道賜、猛子等,皆斬之。先是敬宣未死,嘗夜與僚佐宴集,空中 道賜自號齊王,以道秀爲青州刺史,規據 並欲壞。 廣固, 頃之而 舉兵

列

敗。喪至,高祖臨哭甚哀。子祖嗣。四四宋受禪,國除。

湘東。 龍驤將軍、秦郡太守、北陳留內史,又爲寧朔將軍、竟陵太守,不拜。 <u>| 玄,如即每戰克捷。江陵平定,道規遣臧征潰、沔亡命桓道兒、張靖、苻嗣等,皆悉平之。</u> 之後,仍以憑之所領兵配祗。 孫恩,屢有戰功。 檀祗字恭叔 武陵內史庾悅疾病,道規以祗代悅,加寧朔將軍,封西昌縣侯, ,高平金鄉人,左將軍韶第二弟也。〔三〕少爲孫無終輔國參軍, 復爲王誕 龍 京邑旣平,參鎭軍事,加振武將軍,隸振武大將軍 驤參軍。 從高祖克京城,參建武軍事。 破桓亮於長沙,苻宏於 食邑千戶。 至羅落, 道規追討桓 檀憑之戰沒 隨無終東征 五年,入

疾停。 盧循逼京邑,加輔國將軍,領兵屯西明門外。 八年,遷右衞將軍,出爲輔國將軍、宣城內史,卽本號督江北淮南軍郡事、靑州刺史、 循退走,祗率所領,步道援江陵,未發,遇

爲中書侍郎

廣陵相。 進號征虜將軍,加節

陵城得入,叫喚直上聽事。 祗驚起,出門將處分,賊射之,傷股,乃入。 祗語左右:「賊乘闇 十年,亡命司馬國璠兄弟自北徐州界聚衆數百,潛得過淮,因天夜陰闇,率百許人緣廣

得 文, 祗降 欲掩我不備。 號 建武 將軍。 但打五鼓,懼曉,必走矣。」賊聞鼓鳴,謂爲曉,於是奔散,追討殺百餘 十一年,進號右將軍。日三十二年,高祖北伐,而亡命司馬 ]寇涂中

秦郡太守劉 基求救,分軍掩討,即破斬之。

治,其年卒廣陵,時年五十一。 可爲宋領軍將軍,加散騎常侍。」祗性矜豪, 十四四 年,宋國 初建,天子詔曰:「宋國始立,內外草創, 贈散騎常侍、撫軍 樂在外放恣, 將軍、諡 不 日 禁旅王要,總司須才。 一威侯。 願內遷, 甚不得志。 右將軍祗 發疾 不自

子 激嗣,元熙中卒,無子,祗次子朗紹封。 朗卒,子宣明 嗣。 宣明卒,子逸嗣。 齊 受 禪,

國除。

或爽。 史臣曰 隆 ·赫之任,義止於人存,飾終之數,無聞於身後,恩禮之有厚薄者,將有 劉敬宣 |與高祖恩結龍潛,義分早合,雖興復之始,事隔逢 迎,而深 以乎。 期久要,未之

#### 校勘記

三月 列 傅 桓 第 振 七 復 襲 檀 江 砿 陵 校 「三月桓振」各本並作「子月神振」、據远龜三四四、七二四改。 勘 記

- 去蘭 阜敷 里 「蘭皐」各本並作「皐蘭」,據氐傳改正。 南齊書高帝紀謂「武興西北有蘭皐戍、去
- 仇 池 二百里」。元豐九域志 階州 將利縣 有蘭皐鎭。」下出「皐蘭」,並改正。
- 難當 弘 祖」、「苻德義」各本作「符德義」, 遣其建節 將軍苻弘 祖啖元等固守蘭阜 今並改正。 鎭北將軍苻德義於外爲游軍 通鑑胡三省注云:「符恐當作苻。 「苻弘祖」各本作「符 楊氏、苻氏、皆
- 略陽 族 聚 苻昭 居之地,今改正。 「略陽」各本並作「洛陽」。 叉「苻昭」各本 並作「符昭」,亦改正。 張森楷校勘記云:「洛陽當作略陽。」按張說是,略陽爲氐

迅

種

也。

- 光 呂 訓 。」按呂光 略陽 氐 為後涼 人呂先子也 主。 各本 並脫「陽」字, 張森楷校勘記云:「略下當有陽字。 呂先當是呂
- 八六〕賜錢十萬 「十萬」各本並作「千萬」,據齋史改。
- 州 葬 之」五字,據錢氏考異說補。 ,不屬司州, 督江州 豫州之西陽新蔡汝南潁 蓋 有脫文也。」又云:「傳文當云司州之恒農、揚州 廿二史考異云:「庾悅傳亦云六郡,今數之, 川司州之恒農揚 州之松滋六郡諸軍 之松滋,今本 事 止五 各本並脫 脫 郡 且. 去 五. 松 「恒農揚州 字耳。」 滋 郡屬揚
- , 、 人 凵 ж Ш 以龍符為車騎參軍 慧熙子宗嗣 「子」各本作「己」。孫彪宋書考論云:「己字誤,蓋子字或弟字。」今改作子。 「參軍」各本及南史並作「將軍」,孫彪宋書考論云:「當是爲車騎參軍。」按

孫說是,今改正。

時年三十三 張森楷校勘記云:「龍符是懷玉弟,懷玉以義熙十一年卒, 年三十一。 龍符 卒於

伐南燕,則更在前六年,不應年三十三,疑當是二十三之譌。

[11] 遣敬宣爲任 「遣」各本並作「遺」,據南史改。

乃結青州大姓諸崔封 「崔」各本並作「省」,據远龜七五八改。 按青州大姓有崔氏、 封氏, 無

省氏。

□□〕恩遇不遺 「遺」各本並作「遺」、據元龜四○八改。

卽目所忝 三朝本、毛本作「卽目」,殿本、局本作「卽日」。 張元濟校勘記云:「卽目見唐書,不

誤。」

二吾 故西征諸軍雖失利退據 各本「西」字並空闕,據远龜六九六補。

夫非常之才 「夫」各本並作「人」、據通鑑晉安帝義熙元年改。

[1七] 若連兵不解 各本並脫「連」字、據建康實錄補。

[15] 今云可征者皆云 各本並脫「皆」字,據建康實錄補。

二 空中 · 有 放 隻芒屩於 坐中 「放」南史、御覽六八九、八八五引作「投」。

[10] 子祖嗣 「祖」南史作「光祖」,疑宋書脱「光」字。

校 勘 記

列

傳

第

七

〔三〕 左將軍韶第二弟也 「韶」各本並作「歆」,據檀韶傳改。

 $\subseteq$ 加振武將軍隸振武大將軍道規追討桓玄 按臨川烈武王道規傳, 道規但為振武將軍, 此云振

武大將軍,疑有誤。

進號右將軍 「右」字下,各本並衍「衞」字。 孫彪宋書考論云:「右衞非號,衞字衍也。 下文右

將軍祗可證。」按孫說是,今訂正。

# 宋書卷四十八

## 列傳第八

# 朱齡石 弟超石 毛脩之 傅弘之

與溫 騎軍事、西陽廣平太守。 棺戮尸,溫怒,將斬之,溫弟沖苦請得免。 爲 西中郎袁眞將佐,憲爲梁國內史,斌爲汝南內史。 潛通,並殺之。 朱齡石字伯兒,沛郡沛人也。家世將帥。 齡石父綽逃走歸溫,攻戰常居先,不避矢石。 及沖薨,綽歐血死。 綽爲人忠烈,受沖更生之恩,事沖如父。 沖諸子遇齡石如兄弟。 祖騰、建威將軍、吳國內史。伯父憲及斌、並 大司馬桓溫伐眞於壽陽,眞以憲兄弟 壽陽平,眞已死,綽輒 參沖車 發

剪紙 石,終不敢動。 方一寸,帖著舅枕,自以刀 岛 石 少好武事,頗輕佻,不治崖檢。 舅頭有大瘤,齡石伺舅眠,密往割之,舅卽死。 、子懸擲之,相去八九尺,百擲 舅淮 南蔣氏, 人才傳劣,齡石使舅臥於聽事一 百中。 舅雖危懼戰慄,爲畏齡 頭

列

軍 義 而 許 從 初 之。 至 爲 江 殿 事定,以爲鎭 乘 中 , 將戰 將 軍 • ,齡石言於高 常追隨 軍參軍,引 桓脩兄弟, 祖 日「世受桓氏厚恩 遷武康令,加寧遠 爲脩撫軍參軍, 將軍 ,不容以 在 京口。 兵刃相 高 祖克京城 向 . , 乞在 軍後。」高 以 爲建 武 參

備,莫· 縣, 石 潛結腹 偽 喪 有得 與 亂 係 心, 之後,武 祖 舉手者,悉斬係祖 親 知 其 厚,召爲參軍 居處塗徑,三 康 人姚係祖 兄弟,殺數十人,自 招聚亡命,專爲 係祖 乃要係祖 恃 其 兄弟徒 宴會, 劫盜, 黨强 是 肥 左右 郡 盛,謂 所居: 得 斬之。 清 險阻 齡石 乃 , 必 郡縣畏憚不能 率 不 吏人馳 敢 圖 己, 至 乃 其 出 家, 應 掩其 齡石 召 齡 至

步稍 甚 固 從 親 平 江陵 - ,復爲 委之。 過 祖 淮 叉召為 擊之。 参軍 盧循 参軍 平, 盧循 率厲 以爲寧遠將軍、 一補徐 至石 將士,皆殊死 頭 州 主簿 領 中 一、遷尙 戰, 軍。 寧蠻護軍 殺數 書都官 循選敢死 百 人,贼 、西陽太守。 郎, 之士 尋復爲 乃退。 數 千人上 參 龄 義 軍 石 熙八年,高祖 o 旣 南 從征 有 岸, 武 鮮卑,坐事 幹又 高 祖 西伐劉毅 遺齡 練 吏 発官。 石 領 高 鮮 卑

守蒯恩 高祖 九 年 與齡石密謀進取,曰「劉敬宣往年出黃虎,無功而退。 下邳 造諸 太守 軍 伐蜀 劉鍾 令齡石 龍驤將 爲 軍 元帥 朱林等,這 以爲 建威 凡二萬 將 軍 、益 州 發 刺 自江 史, 賊謂我今應從外水往,而 陵。 率 寧 朔 尋 將 加 軍 節 臧熹 益 州 河間太 料

目:「, 我 衆 當 軍 以 全 衆 出 功 大 封 倍 軍 衆 其 付 不 悉 自 道 齡 意, 外水 從 兼 石 外水取 行, **猶從內水來** 取 (回)署 譙縦 成都 成都、臧熹、朱林於中水取廣漢、使羸 果備 函 疑 邊曰:「至白帝 兵出 也。 內水,使其 內水, 如 此, 此制敵 必 大將譙道福以重兵 乃開。」諸軍 以重兵守涪城,以備 之奇 也。」而 雖進, 、戍涪城, 慮此聲先馳, 未知 弱 乘 內道。 高 處分 艦十餘, 遣其前將軍秦州 所 若向黃虎,正陊其計 由 賊審 由 內水 至 虚 白帝 實 向 黄虎。」 別有函 刺 史侯

時 鍾 雖 散 寇 蒯 潰 在 恩 北, 年 等攻城 六月, 凡 今屠 斬 大 齡 南 將 詰 石 城 十 朝 ",不足 至彭模、諸將 戦 Ħ. 至 級,諸 以破北 日 營守 昃 ^,焚其 以 芸盡! 以次 賊 、樓櫓, 水 、土崩、 銳 北 以 城險阻 几 拔 衆 北 面 軍 量,南 並 衆多,咸 乃舍船 登, 斬 城 步進 不 侯 欲 輝 麾 先攻其南 而 | 譙| 詵 自散 了仍回 也。 城, 齡石曰:「不然 軍 七月,齡 以麾,南 石 率劉 城 卽

輝

尙

書

僕

射

蜀

郡

太守

譙詵

等率衆萬餘屯彭模,夾水爲

城

杜瑤 師。 大 將 縛 道 龍 譙 送之,公 撫 驤 福 聞 將 彭 譙 軍 模 臧 縦 斬 不 聞 熹 守 于 諸 至 軍 廣 處 率 漢 菛。 盡 精 で病 敗, 銳 桓 卒。 五 謙 奔 一千銀 弟恬 于涪 朱林 行來 隨 城 至 謙 廣 赴, 巴西 入 漢, 蜀 聞 爲 人王志 復 縱 破 寧蜀 已走 譙 斬送。 道 太守, 道 福 福 į 別 至 僞 衆 是 亦 尙 軍 散 書 乘船 亦 斬 令馬 乃逃于 焉 陷 躭 牛脾城,至 封 獠 府 中 庫 巴 以 斬 待 西 王 民 其

高 祖 之伐 蜀 也 將 謀元 帥 而難其 人,乃舉齡石 衆咸謂自古平蜀,皆雄 傑 重 將 , 齡石資

名尚 敬皇后弟[也。 輕,慮不 克辦、日源者甚衆、高祖不從。 資位在齡石之右,亦令受其節度。 乃分大軍之半, 猛將勁卒, 悉以配之。 是行亦不淹時, 戰克捷, 衆」咸服高祖 臧熹

之知人,公又美齡石之善於其事。

蜀,所戮止縱一祖之後,產德事起,多所連結,乃窮加誅剪,死者甚衆。 監梁州之巴西梓潼宕渠南漢中、秦州之安固懷寧六郡諸軍事,以平蜀功,封豐城縣侯,食邑 齡石遣司馬沈叔任戍涪,蜀人侯產德作亂,攻涪城,叔任擊破之,斬產德。 進號輔 國 初, 將 軍 齡石 工,尋進 平

力,守衞殿省,劉穆之甚加信仗,內外諸事,皆與謀焉。 十一年,徵爲太尉諮議參軍,加冠軍將軍。十二年北伐,遷左將軍,本號如故,配以兵

奔走。 督關中諸軍事、右將軍、雍州刺史。敕齡石,若關右必不可守,可與義眞俱歸。 高祖還彭城,以齡石爲相國右司馬。十四年,安西將軍桂陽公義眞被徵,以齡石持節 龍驤將軍王敬先戍曹公壘,齡石自潼關率餘衆就敬先,虜斷其水道,衆渴不能戰,城 齡石 亦舉 城

弟隆紹封。齊受禪,國除。 子景符嗣。 景符卒,子祖宣嗣,坐輒之封,八年不反,及不分姑國秩,奪爵。 更以祖宣

陷,廣執齡石及敬先還長安,見殺,時年四十。

舟 軍 入 乘 又參何無忌 齡 單 石 舸 弟超石, 亦果銳善騎乘, 雖 走歸高祖 輔國右軍軍事 ,高祖甚喜之,以爲 o 徐道覆破無忌,得超石 出自 徐州主簿。 將家, 兄弟並閑 超石 , 以爲 收迎桓謙身首, 尺牘。 参 桓謙 軍。 爲衞 至石頭 躬營殯葬。 將軍 超石 ٠, 以 補 說 其 行參 同

騎 |参軍 事,尚書都官郎,尋復補中兵參軍、寧朔將 劉毅,使超石 軍 、沛郡太守。 司馬休之, 遣冠軍將軍檀道濟及

石 軍 出大薄, 魯宗之聞超石且至,自率軍逆之,未戰而江陵平。 從至襄陽,領新野太

追宗之至南陽 而還。

西伐

率步騎出江陵,

未至

而毅平。

及討

略。 千騎 赴之,三三弁 州 白 刺 於河 線河 人步 遺 史安平公乙旃眷、襄州 院計二年北伐,超石爲前鋒入河,[E]索虜托跋嗣,姚興之壻也,遣弟黃門郎鵞青、冀 軍 北岸上,去水百 裁 牽 隨 齎 車 過岸,虜便 大軍進止。時軍 大 Ŀ, /弩百 不 解 張 退走,軍還,即 其 , \_\_\_ 餘 意, 步 車 刺 ブ,爲 益 並 史托跋道生、青州 人緣 却 二十人,設彭排於轅上。 未 動。 月 河 陣,一 南岸,牽百丈,河流迅急,有漂渡北岸者,輒爲 復 高祖 東 兩 來。 頭 先命 抱河,車 高祖 刺 超 史阿 石〔戒 乃遣白 置 <u>|</u>薄干,[10]步騎十萬,屯河北,常有數 七仗 **虜見營陣旣** 嚴二千 直 士, 隊 主丁 人。 事 華, 1 立 白 使 一,乃進 毦 率七 竪一 旣 舉 百人,及 圍 白毦。 營, 超 石 超石先 虜 馳 車 虜 所 殺 往 見 百

列

傳

薄干首,虜退還半城。[11]超石率胡藩、劉榮祖等追之,復爲虜所圍,奮擊盡日,殺虜千計 敗退走,數日乃及大軍 至悉奔走。 乃退走。 張 於是百弩俱發,又選善射者叢箭射之,虜衆旣多,弩不能制。曰三超石初行,別齎大鎚幷千餘 以 稍 軟 弓小箭 ,乃斷矟長三四尺,以鎚鎚之,一矟輒洞貫三四虜。 高祖又遣振武將軍徐猗之五千人向越騎 大軍進克蒲坂,以超石爲河東太守,戍守之。 射虜,虜以衆少兵弱,四面俱至。 嗣又遣南平公托跋嵩三萬騎至,遂肉薄攻營。 以城,虜圍猗之,以長戟結陣,超石赴之,未 **房衆不** 賊以超石衆少,復還 ·能當,一時奔潰, 攻城,超石戰 臨 陣 斬 虜 [30]

沒, 高 祖 爲佛佛所殺,時年三十七。 遣 高 超石 祖 自長安東還,超石常令人水道至彭城,除中書侍郎,封興平縣五等侯。 慰勞河、洛。 始至蒲坂 ,值齡石自長安東走至曹公壘,超石濟河就之,與齡石俱 關中 擾 亂,

後軍、太尉、相國參軍。 脩之有 毛脩 之字 大 /志,頗 敬文,祭陽陽武 讀 史籍。 解音律,能騎射,玄甚遇之。 荆州 人 也。 刺 史殷仲堪以爲寧遠參軍 祖虎生,伯父璩,並益州 及篡位,以爲屯騎校尉。 刺 桓玄 史。 克荆州, 父瑾,梁、秦二<u>州</u> 仍爲玄佐, 隨玄西奔,玄 刺 歷

敗於崢嶸洲,復還江陵,人情離散,議欲西奔漢川 ,脩之誘令入蜀,馮遷斬玄於枚回洲,脩之

力也。

馮遷率 害申 乘之機 巴州 之情 樂期及文處茂、時延祖等西 爵。CIED及父瑾為譙縱所殺,高祖表為龍驤將軍,配給 旬月, 刺史。 (讎逆。 丹,楚莊 地 撫影窮號,泣望西路。 荆州刺史道規又遣奮武將軍原導之領千人,受脩之節度。 晉安帝 時益州刺史鮑陋不肯進討,脩之下都上表曰:「臣聞在生所 遷右衞 宜踐,投袂之會屢愆。 ,生途已竭,所以未淪於泉壤,借命於朝露者,以日月貞照, 兵來會,討承祖斬之。 脩之退還白帝, 自提戈西赴,備嘗時難,遂使齊斧停柯,狡豎假息。 反正於江陵, 除驍騎將軍。 有遺履之憤,況忘家殉國,尠有臣門,節冠風霜,人所矜悼。 將軍。日四既有斬玄之謀, 益州刺史陋始以四月二十九日達巴東,頓白帝,以俟 討。 承祖自下攻之,不拔。 臣雖効死寇庭,而理絕救援,是以束骸載馳,訴寃象魏。 時文處茂猶在巴郡,脩之遣振武將軍張季仁五百兵係處茂 脩之至宕渠,榮期爲參軍楊承祖 又伯、父 下至京師,高祖以爲鎭軍諮議參軍, 並在蜀 脩之使參軍嚴綱等收合兵衆,漢嘉 兵力,遣 土, 高祖 令奔赴。 誠由經路有暨,亦緣 脩之遣原導之與季仁俱進。 以重生,實有生理 所殺,承祖 有兼映之輝, 庶憑天威, 欲引 爲 又遺益州 伍員 外 自 助, 加 [稱鎭 不虧君義,而 寧朔將軍。 故 可保。 刺 廟略 軍 史司 頻 制不自 ·將軍 昔宋 太守 加榮 馬 臣 可

列

非所繼,但以方仗威靈,要須綜攝,乞解金紫寵私之榮,賜以鷹揚折衝之號。 眷 西 一以灑 涙 也。 公私懷恥,仰望洪恩,豈宜遂享名器,比肩人伍。 求情旣所不容, 臣之於國, 即實 理 又

無虛 醜,以攄莫大之釁。 自臣涉道,情慮荒越,疹毒交纏,常慮性命隕越,要當躬先士卒,身馳賊庭,手斬凶 然後就死之日,卽化如歸,闔門靈爽,豈不謝先帝於 、玄宮。」

高祖哀其情事,乃命冠軍將軍劉敬宣率文處茂、時延祖諸軍伐蜀。 軍次黃虎, 無功而

退。 由此送脩之父、伯及中表喪,口累並得俱還。

逼京邑,脩之服未除,起爲輔國將軍,尋加宣城內史,戍姑孰。 爲循黨阮賜 所攻,

陵,以爲衞軍司馬、輔國將軍、南郡太守。 擊破之。 循走,劉毅還姑孰,脩之領毅後軍司馬,坐長置吏僮, 免將軍、內史官。 脩之雖爲毅將佐,而深自結高祖。 高祖討毅,先 毅西鎮江

遣王鎭惡襲江陵,脩之與諮議參軍任集之等並力戰,高祖宥之。

當以死自固,故不許。 時遣朱齡石伐蜀,脩之固求行,高祖慮脩之至蜀,必多所誅殘,土人旣與毛氏有嫌,亦 還都,除黃門侍郎,復爲右衞將 軍

馬休之,以爲諮議參軍、冠軍將軍、領南郡相 脩之不信鬼神,所至必焚除房廟。 時蔣山廟中有佳牛好馬,脩之並奪取之。 高祖討司

衞 眞 軍 包 將軍 一發長安,爲佛佛虜所邀,軍敗。 高祖旣至,案行善之,賜衣服玩好,當時計直二千萬。先是,劉敬宣女嫁,高祖 人叛走,已上岅,嘗爲脩之所罰者,以戟擲之,傷額,因墜岅,遂爲佛佛所擒。 ,雜綵千匹,時人並以爲厚賜。 高 祖 ·如故。 將伐羌,先遣脩之復芍陂,起田數千頃。 時洛陽已平,卽本號爲河南、河內二郡太守,行 脩之與義眞相失,走將觅矣。 王鎭惡死,脩之代爲安西司馬,將軍如故。 及至彭城,又使營立府舍,轉相 司州事、江江戍洛陽 始登一岅,岅甚 値 性陽 「高峻,右 佛佛死, 賜錢三 國右司 修 公義 治 城

其子赫連昌爲索虜托跋燾所獲,脩之幷沒。

不復 遂爲 之嘗 得還,四公具相 「賢子元矯 得 甚 我 一歡。 及 尙 初 爲羊羹,以薦虜尚書,尚書以爲絕味,獻之於燾,燾大喜,以脩之爲太官令。 得 。二吉初 書、光祿 脩之在洛,敬事嵩高山寇道士,道士 歸 脩之問 一。甚能 罪之日, 申 荒 大夫、南郡公、太官令、尚書如故。 理 南 自 人去來,言脩之勸 [處,爲 國當權者爲誰?朱脩之答云:「殷景仁。」脩之笑曰:「吾昔在南,殷尚幼 便應巾 上 意 時 乃釋。 講 到 門 邪 人所稱。」脩之悲不 脩之在虜中, 誘燾侵邊,幷教 」經年不忍問家消息,久之乃訊訪,脩之具答,幷云: 得言,直視良 多畜妻妾,男女甚多 其後朱脩之沒虜,亦爲燾所寵。 燾 以 中 國 久,乃長歎曰:「嗚呼」」自 禮 制,太祖 元嘉二十三年,死於 甚疑 責之。 稍被親 脩之相 脩之後 此一 脩

列

傅

虜中,時年七十二。 元矯歷宛陵、江乘、溧陽令。

陽、富平二縣,靈州廢不立,故傅氏悉屬泥陽。 傅弘之字仲度,北地泥陽人。傅氏舊屬靈州,漢末郡境爲虜所侵,失土寄寓馮翊,置泥 晉武帝太康三年,復立靈州縣,傅氏還屬靈

州。 弘之高祖晉司徒祗,後封靈州公,不欲封本縣,故祗一門還復泥陽。 曾祖暢,秘書丞,

沒胡,生子洪,晉穆帝永和中,胡亂得還。 少倜儻有大志,爲本州主簿,舉秀才,不行。 洪生韶,江立梁州刺史,散騎常侍。 桓玄將篡,新野人庾仄起兵於南陽,襲雍 韶生弘之。

彬從弟宏知其謀,以告石康,石康收彬殺之,繫弘之於獄。 州 刺史馮該,該走。 弘之時在江陵,與仄兄子彬謀殺荆州刺史桓石康,以荆州刺史應仄。 桓玄以弘之非造謀,又白衣無兵

等,並斬之。除太尉行參軍。 自 號荆州刺史,四四徵陽令王天恩自號梁州刺史,四三襲西城。 義旗建,輔國將軍道規以爲參軍、寧遠將軍、魏興太守。 從征司馬休之,署後部賊曹,仍爲建威將軍、順陽 盧循作亂,桓石綏自上洛甲口 時韶爲梁州,遺 太守。 弘之討石綏

高祖北伐,弘之與扶風太守沈田子等七軍自武關入,偽上洛太守脫身奔走,行三進據藍

安,弘之於姚泓馳道內,緩服戲馬,或馳或驟,往反二十里中,甚有姿制, 田、招懷戎、晉。晉人龐斌之、戴養、胡人康橫等各率部落歸化。弘之素善騎乘,高祖至長 並驚惋歎息。 初上馬,以馬鞭柄策,挽致兩股內,及下馬,柄孔猶存 羌胡聚觀者數千

降,弘之不爲屈,時天寒,裸弘之,弘之叫駡見殺。 時年四十二。 之討平之。 真東歸,至即佛佛傾國追躡,於靑泥大戰,弘之身貫甲胄,氣冠三軍。 大破之,殺傷甚衆。 進爲桂陽公義眞雍州治中從事史,除西戎司馬、寧朔將軍。 高祖 歸後,佛佛僞太子赫連讓率衆三萬襲長安,自己弘之又領步騎五千,於池 壞又抄掠渭南,弘之又於寡婦人渡破壞,獲賊三百,掠七千餘 略陽太守徐師高反叛,弘 軍敗陷沒,佛佛逼令 口 及議

晉鼎,自非兵屈霸上,[三戰國防頭,則光宅之運,中年允集。 深,優劣已遠。晉室播遷,來宅揚、越,關、朔遙阻,隴、汧遐荒,區甸分其內外,山河判其表 以書軌,班以王規。若負其岨遠,屈强邊垂,則距險閉關,禦其寇暴。桓溫一世英人,志移 裏,而羌、成雜合,久絕聲敎,固宜待以荒服,羈縻而已也。 史臣曰:三代之隆,畿服有品,東漸西被,無遺遐荒。 及漢氏關土,通譯四方,風敎淺 若其懷道畏威,奉王受職,則 高祖無周世累仁之基,欲力征 通

列傳

第八

傅

弘之

川不足供養,百二難以傳後哉 以 人,地未關於東晉,威獨振於江南,然後可以變國情,愜民志, 君 [四海 • 實須外積武功,以收天下人望。 • 至舉咸陽而棄之,非失算也。 止欲挂旆龍門,折衝冀、趙,跨功桓氏,取高昔 撫歸運而膺寶策。 此四將藉歸衆難固之情, **豈不知秦** 

#### 校勘記

至於俱陷,爲不幸矣。

- [一] 以爲鎭軍參軍 各本並脫「爲」字,據南史補
- 〔三〕知其居處塗徑 「處」各本並作「北」,據元義七○五改。
- 作「蘭陵」,似是。「朱林」南史朱齡石傳作「朱枚」,本書及南史王懿傳作「朱牧」,林枚牧字形相 率寧朔將軍臧熹河間太守蒯恩下邳太守劉鍾龍驤將軍朱林等 「河間」, 蒯恩傳、元龜一九九

似,未知孰是。

- 四日 全封付齡石 各本並脫「付」字,據南史、通典兵典、通鑑晉安帝義熙八年、御覽二八七引補。
- ベリ 五. 巴西民杜瑤縛送之 別軍乘船陷牛牌城 「杜瑤」晉書譙縱傳作「杜瑾 通鑑晉安帝義熙九年胡三省注 曰:「『牛脾』當作『牛鞞』。」
- <del>-</del> 慮不克辨 「克辦」各本並作「辦克」,據远龜二〇四乙正。

- 臧熹敬皇后弟也資位在齡石之右亦令受其節度是行亦不淹時一戰克捷衆咸服高祖之知人 各
- 本 並 脫「也資位至 戰克捷衆」二十五字,據元龜二〇四
- 八九 超石 爲前 鋒入河 各本並脫「爲」字,據元龜三四 四補
- 遣弟黃門郎鷺青冀州刺史安平公乙旃眷襄州刺史托跋道生青州刺史阿薄干 按 「鵞靑」 **※魏**

襄州 作「娥青」,又青非明元帝之弟。 ,或是相州之誤,然此時任相州刺史者爲尉古眞,尉古眞之前爲長孫嵩,嵩時鎭半城, 乙旃眷卽魏書之叔孫建。 托跋道生卽魏書之長孫道 長孫 時無

生。

道生 雖豫此役、未嘗爲相州 刺史。 蓋鄰國傳聞之詞,不可爲準

- 高祖先命超石戒嚴二千人白毦旣舉超石馳往赴之 按下云一車盆二十人,合之正二千人。 各本並脫 「戒嚴二千人白毦旣舉超石」十
- 弩不能制 各本並脫「弩」字,據南史、通典兵典、御覽三一八引補。

一字,據通典兵典、元龜七二四、御覽三一八引補。

- **虜退還半城** 畔城,在今山東聊城縣界。時長孫嵩大軍駐畔城 「半城」各本並作「平城」,今從局本。 通鑑晉安帝義熙十三年作「畔城」,半城卽
- 遷右衞將軍 各本並脫「衞」字,據南史補。按下文云「復爲右衞將軍」,則此脫「衞」字無疑。
- 故頻加榮爵 「榮爵」各本並作「策爵」,據南史改。
- 行司 州 事 司司 州」各本並作「西州」,據南史、通鑑晉安帝義熙十二年改。

列

- 子二 自 此一不復及 「及」各本並作「反」,據南史、元龜九〇九改。
- 脩之後 得還 張燴讀史舉正云:「脩之上當有『朱』字。」按張說是。 無「朱」字, 易使人誤解是毛
- 二型 洪生韶 「韶」南史作「歆」、晉書桓石綏傳亦言石綏爲傳歆之所殺。「歆」卽「歆之」之省略

脩之。

桓石綏自上洛甲口自號荆 州刺史 各本並脫「上」字,據元龜三四四 補。 按漢書地理志,

縣,甲水出秦嶺山東南,至錫入沔。

徵陽令王天恩自號梁州 微陽縣屬上庸 郡。 沈約 刺史 曰:魏立建始縣,晉武帝改曰微陽。」 通鑑晉安帝義熙六年胡三省注曰:「徵陽當作微陽。 晉地理志,

至三 偽上洛 太守脫身奔 走 各本並作「僞上洛太守□脫奔走」。 據元龜三四四 訂

佛佛爲太子赫連瓌率衆三萬襲長安 「赫連瓖」魏書作「赫連璝」。 通鑑從魏書。

及義眞東歸 「及」各本並作「又」,據南史、御覽三一二引改

呈 自非兵屈霸上 誤,今據南史改。 「霸上」各本並作「西湖」,蓋「霸」訛爲「西湖」二字,而又脫「上」字,當爲傳刻之 按桓溫伐前秦,兵至霸上,以糧盡退軍,見晉書桓溫傳。

# 宋書卷四十九

## 列傳第九

#### 孫處 蒯恩 劉鍾 虞丘進

里奔 等,輕舟奔始興。 高 以海 義樂隨,高祖平定京邑,以爲振武將軍,封新夷縣五等侯。 《其巢窟,令奔走之日,無所歸投,非卿莫能濟事。」遣季高率衆三千,汎海襲番禺。初,賊不 先焚舟艦,悉力登岸,會天大霧,四面陵城,卽日克拔。循父嘏、長史孫建之、司馬虞匹夫 走,而 道爲防,季高至東衝,去城十餘里,城內猶未知。 盧循之難,於石頭扞栅,戍越城、查浦,破賊於新亭。 孫處字季高,會稽永興人也。 衆力猶盛,自嶺道還襲廣州。 即分遣振武將軍沈田子等討平始興、南康、臨賀、始安嶺表諸郡。循 籍注季高,故字行於世。 季高距戰二十餘日,循乃破走,所殺萬餘人, 循守戰士猶有數千人,城池甚固。季 高祖謂季高曰:「此賊行破。 廣固之役,先登有功。 少任氣。 高祖東征孫恩,季高 追奔 於左 應先

傾

列

至鬱林,會病,不得窮討,循遂得走向交州。

宜更贈 子欽公嗣。 依,輕舟遠迸。 稔惡一紀,據有全域。[1] 若令根本未拔,投奔有所,招合餘燼,猶能爲虞,縣師遠討,方勤 食邑千戶。 而季高汎海萬里,投命洪流,波激電邁,指日遄至,遂奄定南海,覆其巢窟,使循進退靡 義熙七年四月,季高卒於晉康,時年五十三。 一州,卽其本號,庶令忠勳不湮,勞臣增厲。」重贈交州刺史,將軍如故。 九年,高祖念季高之功,乃表曰:「孫季高嶺南之勳,已蒙褒贈。 欽公卒,子彥祖嗣。 曾不旬月,妖凶殲殄。 齊受禪,國除。 蕩滌之功,實庸爲大。<br />
〔三〕往年所贈,猶爲未優。 追贈龍驤將軍、南海太守,封候官縣侯, 臣更思惟盧循 子宗世卒,

束,兼倍餘人,每捨芻於地,歎曰:「大丈夫彎弓三石,柰何充馬士」」高祖聞之,卽給器仗,恩 蒯 恩字道恩,蘭陵承人也。 自征妖賊,常爲先登,多斬首級。 高祖征孫恩,縣差爲征民,充乙士,使伐馬芻。 既習戰陣,膽力過人,誠心忠謹,未嘗有過失,甚見 恩常負大

從平京城,進定京邑,以寧遠將軍領幢。 隨振武將軍道規西討,虜桓仙客,克偃月壘,

於婁縣戰,箭中左目

叉領 逼京 遂平江陵。 邑,恩戰于查浦, 千餘人隨劉藩追徐道覆於始興,斬之。 義熙二年,賊張堅據應城反,恩擊破之,封都鄉侯。 賊退走。 與王 仲德等追 遷龍驤將軍 破循別將范崇民 、蘭陵太守。 於南陵。 從伐廣固,又有戰功。 循旣走還廣州 盧循 恩

高 祖 西 征 劉毅, 恩與王鎮惡輕軍 襲江陵, 事在鎭惡傳。 以本官爲太尉長兼行參軍,領

魯軌 走。 將士、置陣堅嚴。 軍徐逵之前進。 衆二千,隨盆 進平成都, 於石城。 州 刺史朱齡石伐蜀。 擢爲行參軍, 達之敗沒,恩陳于隄下,宗之子鹹乘勝擊恩,矢下 改封北至縣五等男。 至彭模,恩所領居前,大戰,自朝至日昃,勇氣益奮,賊 高祖 高祖伐司馬休之及魯宗之,恩與 善其能將軍 如 一持重。 雨, 呼聲震地 乃還。 江陵平定,復追 , 建 恩整厲 威 將 破

參軍 高祖 淮陵太守。 呼官位,包 錄其前後功勞,封新寧縣男,食邑五百戶。 ,隨府轉中兵參軍。 恩自從征討,每有危急,輒率先諸將,常陷 而自稱爲鄙人。 世子開府,又爲從事中郎,轉司馬,將軍、太守 高祖北伐,留恩侍衞世子,命朝士與之交。 撫待士卒,甚有紀綱,衆咸親附之。 堅破陣, 高祖 世子爲征虜將軍,恩以大府佐領 不避艱嶮。 如故 遷諮議參軍,轉輔國 恩益自謙 凡 百餘戰, 流損, 與 身被 人語常 旧將軍 重創 中兵

入 關迎桂陽 公義眞。 義眞還至青埿,爲佛佛虜所追,恩斷後, 力戰 連日 義眞前軍奔

列

散, 恩軍 人 /亦盡 一,爲虜所執, 死於虜中。 子國才嗣。 國才卒,子慧度嗣。 慧度卒,

國除。

功。 貧 賤。 爲劉 劉 鍾字世之,彭城彭城人也。少孤,依鄉人中山太守劉回共居。幼有志力,常慷慨於 隆安四年,高祖伐孫恩,鍾願從餘姚、浹口攻句章、海鹽、婁縣, 牢之鎭北參軍督護。 高祖 每有戎事,鍾不辭艱劇,專心盡力,甚見愛信。 皆摧堅陷陣,每有戰

範之屯 进。 轉 部 人 車 下 赴義者,並可依劉主簿。」於是立爲義隊,恒在左右,連戰皆捷。 遣 除南 稍 騎 義 鍾 旗 往 覆舟山西,高祖疑賊有伏兵,顧 宿據 史,圖 齊國 撲之。」鍾應聲馳進, 將建,高祖版鍾爲郡主簿。 東府, 内史, 兼行參 轉鎭 封安丘 軍。 (軍參) 縣五等侯。 司馬叔璠 軍督護。 果有伏兵數百,一時奔走。 明日,從入京城。將向京邑,高祖命曰:「預是彭沛鄉 視左 與彭城劉謐 桓歆寇歷陽,遣鍾 自陳 |右,正見踵,謂之曰:「此山 .情事,改葬父祖及親屬 、劉懷玉等自蕃城攻鄒山,魯郡太守徐邕 助豫州刺史魏詠 桓玄 西奔,其夕,高祖 明日,桓謙屯于東陵,卞 一一要, 下當有伏兵,卿可率 高祖 之討之, 厚 止桓 加資 歌即奔 謙 一給。 故

失守,鍾率軍討平之。

岸。 仲德 領 入。 廣 攻 Ш 鍾 從 循 / 崇民 自 太 征 南 廣固 守。 行 走, 胡 崇民 贼,天 盧循 0 鍾 孟 與 敗走 輔 龍符陷沒,鍾率左右直入,取其尸而反。 逼 霧 京 或 邑,徐赤特 鍾 賊 將 鉤 軍 追 討 Ė 得 一仲德: 其 百 里 舸 軍 追之。 達處 燒 鍾 其 因 船 率 分,敗于南岸,鍾 循先留別 左 乘 右 攻 叉 艦 隨 帥 劉 戶 范崇民 藩 , 率麾 追 除振武將軍、中兵參軍 徐 賊 以精兵高 道 遽 下距 覆 閉 於始 棚, 戶 距 身被 艦據 興,斬 之, 鍾 南 重 之。 功 陵 創 徐 還 代 賊 補 夾 太 龍 屯 不 與 得 尉 兩 符

寧

朔

消將軍

下下邳

太守。

代

孟

懷

玉領

石頭

戍

事

H 來 銳 出 所 情 不 模 其不 進 力 攻 委, 恇 能 去成 攻, 之, 撓 距 行 高 卿 意 祖 我 都 陷 齡 其 必 意謂 討 其二 勢 蜀 不 石 劉 乃詣 百 必 人 久 何 毅, 人 、安,且 城 已破 克。 里。 \_? 情 鍾 鍾 鍾 斬其 旣 鼓行 膽 謀 率 偽 日「不 安, 欲 日... 軍 矣。 冠 大將侯輝、譙詵,逕平成都。 養銳 繼 良 軍 丽 將 進, 賊 征 王 今天時 然。 息 討 鎭 今阻 叉 成 兵, 集, 惡 督 前 都 盛 兵 護 以 揚聲言 此 必 (守險, 熱 伺 譙亢等 江 不 求 其 而 陵 戰 能 隙。 平定 大 守 是 贼 不 兩岸 衆 矣。 嚴 獲 其 仍 隙 向 懼 兵 連 軍 内水 而 今若 固 隨朱 不 營 乘之, 食無資,當爲獨子虜耳。 險 敢 , 緩 戰, 斷 層 攻之未 譙 石伐蜀 兵 樓 乃可 非 道 相 重 能 福 守 栅 捷 持 必 不 , 事 彼 可 敢 久 爲 衆 拔,祇 堅守 舍涪 將 前 號 然 知 鋒, 決 也。 城 人 萬。 增 機 虛 由 齡石從之。 疲 兩 外水 實 因 今 |鍾 困 陳 其 重 涪 兇懼 至 軍 軍 公 計 時 卒至 忽 于彭 本 脚 其 幷 明 疾 盡 有

旭 高 男,以先有 距 石 撃破 祖 北 頭 悉以 伐,復 戍 以 之。 事 廣 賜 固 封爵 留鎭居守, 時大 功 鍾三子。 高 祖 ,封永新縣男,食邑五百戶。 ,滅戶以賜次子敬順高昌縣男,食邑百戶。 (軍外討,京邑擾懼,)鍾以不能鎭遏, 降號建威將軍。 平蜀功, 討 司馬休之,前軍將軍道憐留鎭東府,領屯兵。 十四年,遷右衞 增其兵力, 又命府置佐史。 將軍 ·, 龍 遷給事中、太尉參軍事、龍驤將軍、高陽 驤將 荆州刺 軍如故。 ·史道憐獻名馬三匹,幷精麗乘具, 尋復本號龍驤將軍。十二年,<u>高</u> 元熙元年卒,時年四十三。 冶亭羣盜數百夜襲鍾壘, 應封四百戶 內史,領

卒 子國須嗣。 子 敬義 嗣。 須卒,無子,國除。 敬義 官官 至馬頭太守, 卒。 子國 重 嗣,齊受禪,國除。 鍾 次子高昌男敬順,

孫恩 功。 及婁縣。 元 ,成句章城 虞丘進字豫之, 東海郯 興 元年, 於蒲 濤 其年,又至臨松穴破賊,追至永嘉千江,又至安固,累戰皆有功。 又從 被圍 П 與 高祖 孫恩 數十日 東征 水 人也。 戰、又被 , 無日 臨 海 不 少時隨謝玄討苻堅,有功,封關 於石步 重 戰 創。 身被數創 固與盧循 追恩至鬱洲 至餘 相守 叉 姚 二十餘 至石 阿浦 鹿頭 破 日 內侯。 0 賊 還 二年, 張 海 隆安中、從高 驃,追至海 鹽 叉 大柱,頻 從高祖 鹽 故 戰 祖 至 東 治 有 征

陽,

破徐道覆。

高祖 東道 爲鄱陽太守,據郡,進從餘干步道趣鄱陽,敏之退走,追破之,斬首數百。 面 折 出 昶等,高祖 伐廣固,於 三年,從平京城,定京邑,除燕國內史。 鄱陽,至五畝嶠。 甚嘉之。 臨朐破賊。 循遣將英糾爲上饒令,千餘人守故城,進攻破之。 獻計伐樹,樹棚石頭。 盧循逼京邑,孟昶、諸葛長民等建議奉天子過江,進廷議不可, 義熙二年,除龍驤將軍,封龍川縣五等侯。 除鄱陽太守,將軍如故。 統馬步十八隊,於 復隨劉藩至始興, 循又遺童敏之 從

討斬徐道覆。

宋王令書以爲高祖第四子義康右將軍司馬。永初二年,遷太子右衞率。 威將軍。 軍還,除輔國將軍、山陽太守。宋臺令書除秦郡太守,督陳留郡事,將軍 八年,除寧蠻護軍、尋陽太守,領文武二千從征劉毅。「も」事平,補太尉行參軍, 追論討司馬休之功,進爵爲子,增邑三百戶。 九年,以前後功封望蔡縣男,食邑五百戶,加龍驤將軍。 討司馬休之,又有戰功。 一如故。 明年,卒官,時年 元熙二年, 尋加振

子耕嗣。耕卒,子襲祖嗣。襲祖卒,世寶嗣。齊受禪,國除。

史臣曰:詩云,「無言不酬,無德不報」。此諸將並起自豎夫,出於阜隸芻牧之下,徒以心 列 九 庾 丘 進 校 勘 記

乎主,故能奮其鱗翼。 至於推鋒轉戰,百死而不顧一生,蓋由其心一也。遂饗封侯之報,

詩人之言信矣。

### 校勘記

[ ] 據有全域 「域」三朝本作「成」,元鑑一三七作「城」,北監本、毛本、殿本、局本作「域」。 嚴可均

全宋文云:「疑當作越。」

[二] 實庸爲大 「庸」元龜一三七作「此」,義更明確。

與人語常呼官位 「官位」各本並作「位官」,據远龜八六四、御覽四二三引改。

图〕轉車騎長史 各本並脫「車」字)據晉書譙縱傳補。

五 鍾 因率 左右攻艦戶 「攻艦戶」各本並作「艦攻戶」,據通鑑晉安帝義熙六年、元龜三四四改。

胡三省注曰:「艦戶、今舟人謂之馬門。」

. . . . . . **涪軍忽**幷來力距我 「幷來」通鑑晉安帝義熙九年作「來幷」,義更明確。

-6 領文武二千從征劉毅 「二千」各本並作「二年」,按上有「八年」,下有九年,此不得云二年。孫彪

宋書考論云:「二年誤,疑是二千。」孫說是,今改正。

## 宋書卷五十

## 列傳第十

# 胡藩 劉康祖 垣護之 張興世

名。」 軍事。 羅 企生曰:「倒戈授人,必至之禍。 「桓玄意趣不常, 企生爲仲堪參軍,藩請假還,過江陵省企生。 州府辟召,不就。 藩 **胡藩字道序,豫章南昌人也。** 仲堪 少孤 敗, ,居喪以毀稱。 企生果以 每怏怏於失職。 須二弟冠婚畢,乃參都恢征虜軍事。 附從 太守韓伯見之,四謂藩 及禍。 若不早規去就,後悔 節下崇待太過,非將來之計也。」仲堪 祖隨,散騎常侍。 |藩轉參太尉、大將軍、相 仲堪要藩相 叔尚書少廣 父仲任,治書侍御史。 無及。」玄自夏口襲仲堪, 見,接待甚厚。 國 時殷仲堪為 軍 日「卿此 事。三 色不悅。 荆州 藩 姪 當 刺 因 藩參玄後 史,藩 說 以 藩 仲堪 義 退 烈成 外兄 而 謂

義旗起,玄戰敗將出 奔,藩於南掖門捉玄馬控,曰「今羽林射 手猶有 八百,皆是義故西

列

傳

第

+

胡潘

藩,喜謂張 三十許步, 旦捨 須無曰:「卿州故爲多士,今乃復見王叔治。」桑落之戰,藩艦被燒,全鎧入水潛 此,欲歸 方得登岸。 可復得乎。」玄直以馬鞭指天而已,於是奔散相 義軍旣迫,不復得西,乃還家。 高祖素聞藩直言於殷氏,又爲玄盡 失。 追及 玄於蕪湖,玄見

節,召爲員外散騎侍郎,參鎭軍軍

事

愕,以爲不祥。[li] 藩起賀曰:「蒼黑者,胡虜之色,胡虜歸我,大吉之祥也。」明旦,攻城,陷 休之,復爲 走,還保廣固累月。將拔之夜,佐史並集,忽有鳥大如鵝,蒼黑色,飛入高祖帳裏,衆皆駭 旗 左 之者稍多。 而 右 一般,此韓信所以克趙也。」高祖乃遣檀韶與藩等潛往,旣至,即克其城。 江津岸峭,壁立數丈,休之臨岸置陣,無由可登。 從討盧循於左里,頻戰有功,封吳平縣五等子,除正員郞。 錄 從征 從伐劉毅。 |藩勸於坐殺毅,高祖不從。 來,欲斬之。 |鮮卑,賊屯聚臨朐,藩言於|高祖曰:「賊屯軍城外,留守必寡, 参軍 旣得登岸,殊死戰,賊不能當,引退。因而乘之,一時奔散。 ·,加建武將軍,領游軍於江津。 |毅初當之||州,表求東道還原辭墓,去都數十里,不過拜闕。 藩不受命,顧曰:「藩寧前死耳」以刀頭穿岸,劣容脚指,於是徑上,隨 至是謂藩曰:「昔從卿倪塘之謀,無今舉也。」又從征司馬 徐逵之敗沒,高祖怒甚,即日於馬頭岸渡江, 高祖 呼旛令上,旛有疑色,高祖奮怒,命 尋轉寧遠將軍、鄱陽太守。 今往取其城, 賊見城陷,一時奔 高祖出倪塘 而斬: 其

得 高 此 祖 艦 伐羌,假藩 取 其器 物。 寧朔將軍,參太尉 藩 氣 厲 心憤, 軍事,統別 率左右十二人, 軍 o 至 乘小船逕往 河 東 ,暴風漂藩 河 北 重艦渡北岸, 賊 騎 五 六百 見 藩

敢 破 來, 及 之。 朱超石 並笑之。 叉 與 等追索房於 超石等擊姚業於蒲坂 藩 素善射 半城 ,登岸射 ,虜騎數 城賊 應弦 重,藩及超 超石 而倒者十許人, · 失利退還,藩收超石所 石所領皆割配新軍,不盈五 賊皆奔退, 捨資 悉收所 實, 芋, 徐行 失 率厲 而 反。 而 反, 力戦 叉遣 藩

刺 其 史長 休 職 諡 之 高 日 及 沙 元 旭 壯 王 嘉 廣 還彭城,參相 侯 義 四 固 功 欣 年 · 公 対影 進 據 彭 遷 國 Щ 城, 建 軍事。 縣男,食邑五 武 藩 將 出成 軍、江夏 時盧循餘黨與蘇淫賊大相聚結,三以爲始興 廣陵,行府 一百戶。 內 史。 少帝景平 州 七 事 年 o ٠, 徴 轉 元年, 太子 為游擊將 左 坐守 衞 軍 率 東府,開掖門,觅官,尋復 0 到 + 彦 年,卒,時 之北 相。 伐,南 年 論 六十 兗 平 州 司

殺 州 四 太守 以 子 他 遵 子 桓 世 隆 事 一,爲 隆 收 世 之、令諸葛 嗣 殺 臧 之。 官 質 寧遠 至 西陽 和 參 四年 太守。 軍 , 去 欲奉 藩 職還 隆世 第十六子 庶 家, 人義康。 卒, 與 子 孔 誕 乾 熙先 世 秀嗣。 値 交州刺史檀和之至豫章 第 同 逆謀 + 藩 七 庶子 大祖 子茂世 六十人, 以藩 一率羣 功臣 從 多不 不不 白 討 遵 餘 欲 平之。 法 顯 人 度。 攻 其 破 事 誕世 藩 郡 使江 第 縣, 兄

列

車 ·騎參軍新興太守景世、景世弟寶世,詣廷尉歸罪,並徙遠州。 乾秀奪國。 世祖初,徙者並

得還

|興。 聚徒衆,率以赴高祖。簡之歷官至通直常侍,少府,太尉諮議參軍。 旣不得共語,汝可試往見之。」旣至,高祖已克京城,虔之卽便投義。 晉紀二十卷,義熙末,爲始興相。東海人徐道期流寓廣州,無士行,爲僑舊所陵侮。 才力之士,嘗再造簡之,值有賓客。 理 日 超石步騎出襄陽,虔之時爲江夏相,率府郡兵力出溳城,屯三連,立橋聚糧以待。 大夫。虔之誕節,不營產業,輕財好施。 謝欣死,合率羣不逞之徒作亂,攻沒州城,殺士庶素憾者百餘,傾府庫,招集亡命,出攻始 不 無不克。 至,爲宗之子軌所襲,衆寡不敵。 謙之破走之,進平<u>廣州,</u>誅其黨與,仍行州事。 劉 康 祖 ,彭城呂人。世居京口。 如其不幸,命也。」戰敗見殺,追贈梁、秦二州刺史,封新康縣男,食邑五百戶。 簡之悟其意,謂弟虔之曰:「劉 伯父簡之,有志榦,爲高祖所知。 參軍孫長庸流涕勸退軍,虔之厲色曰:「我仗順伐罪, 高祖西征司馬休之、魯宗之等,遺參軍檀道濟、朱 即以爲振威將軍、廣州刺史。後爲太中 下邳 簡之弟謙之,好學,撰 簡之聞之,殺耕牛,會 高祖將謀 ·頻再 來, 必當 興復,收集 道濟等積 因刺 有意 史

家,爲 在閭 職。 俄 .里不治士業,以浮蕩蒱酒爲事 康祖 有司所圍守,康祖突圍而去,並莫敢追。 而 建康移書錄之,府州執事者並證康祖其夕在京口,遂見無恙。前後屢被糾劾,太祖 ,虔之子 也,襲封,爲長沙王義欣鎭軍參軍 0 毎犯 法,爲郡縣 因夜還京口,半夕便 丁,轉員 所 錄, 、外散騎侍 至, 郞 明 ,莫之能 便弓馬,膂 旦,守門詣 力絕人, 府 夜 入人 州 要

世 祖 爲 **外之,遷南平王鱳安蠻府司馬。** 轉 豫州 太子左積弩將軍,隨射聲校尉裴方明西征仇池,與方明同下廷尉,康祖免官。 刺史,鎭歷陽 ,以康祖爲征虜中兵參軍,旣被委任,折節自修。 轉太子翊軍校 頃之,

以勳臣子

,每原貸之。

爲員

(外郞十年,再坐摴蒱戲兒。

年,上 **阗**,去 入河, 圍,召 旭 軍 相 (新蔡,與虜戰,俱前百餘里,濟融水。 及 元嘉二十七年春,索虜托拔燾親率大衆攻圍汝南,太祖遣諸軍救援,康祖總統爲前驅 以河 康 縣 康 於 瓠 祖 祖 尉 速反。 北 四十里,燾燒營退走。 率 武 義 豫 徒 州 康祖 康 並起,若頓兵一周,沮向義之志,不許。其年秋,蕭斌、王玄謨、沈慶之等 軍 旭 出 凡有 回軍 許、 八千人,軍副胡盛之欲附山依險,間行 ,未至壽陽數十里,會虜永昌王庫仁眞以長安之衆八萬騎,與康 洛。 玄謨 轉左軍將軍。 等敗歸,虜引 虜衆 大至, 太祖欲大舉北伐,康祖以歲月已晚,請待明 大衆南度。 奮擊破之, 南平王鑠在壽陽,上慮 取 斬偽殿中尚書任城公乞地 至。 康祖 怒曰:「吾受命 爲 所

列

傳

第

本朝 數十里,援軍尋至,亦何患乎。」乃結車營而進。 頸死,於是大敗,舉營淪覆,爲虜所殺盡,自觅者裁數十人。虜傳康祖首示彭城,面 分衆爲三,且休且戰,以騎負草燒車營。康祖率厲將士,無不一當百,虜死者太半。 ,淸蕩河洛。 寇今自送,不復遠勞王師,犬羊雖多, 虜四面來攻,大戰一日一夜,殺虜塡 實易摧滅。 吾兵精器 練, 去壽陽裁 如生。 會矢中 虜

護,討劫譙郡,縣西劫有馬步七十,逃隱深榛,盛之挺身獨進,手斬五十八級。 胡盛之爲虜生禽,托跋燾寵之,常在左右。盛之有勇力,初爲長沙王義欣鎭軍參軍督

沒世徇節,良可嘉悼。 二十八年,詔曰:「康祖班師尉武,戎律靡忒。對衆以寡,殲殄太半。 宜加甄寵,以旌忠烈。 可贈益州刺史,諡曰壯男。」傳國至濟受 猛氣雲騰,志申力

禪,國除。

廣固 爲車 一。遵、苗 騎長 護之少倜儻,不拘小節,形狀短陋,而氣榦强果。 垣 護之字彥宗,略陽桓道人也。祖敞,仕苻氏,爲長樂國郎中令。慕容德入靑州,以敞 史。 踰 **德兄子超襲爲位,伯父遵、父苗復見委任。** 城歸降,並以爲太尉 行參軍。 太祖 元嘉中,遵爲員外散騎常侍,苗屯騎校尉。 從高祖征司馬休之,爲世子中軍府長 遵爲 尚書,苗京兆太守。高祖 童

之爲 行參 戰 喪 固 猶 史,兼行參軍。 克復。 守, 成業,豈是朝廷受任之旨。」彥之不納, 張 軍、北 書諫曰:「外聞節 膽爭前,莫肯輕退。 節 下大軍進擬河北,則库、洛遊 方當 高 平太守。 長驅朔漠,窮掃遺 永初 中,補奉朝請。 下欲 以載禁物繫尚方, 況今靑州豐穰,濟 回師反旆,竊所不 一醜,況乃自送, 元嘉初,爲殿中將軍。 魂,「引自然奔退。 散敗而 **外之蒙宥。** 漕流通, 同。 無假遠勞。 歸。 何者? 士馬飽逸,威 太祖 又補衡陽王義季征北長流參軍,遷宣 殘虜畏威,望風奔迸,八載侵地,不 且. 聞而 隨到彥之北伐,彥之將回師, 昔人有連年攻戰,失衆乏糧者, 宜使竺靈秀速進滑臺助朱脩之 善之,以補江夏王 力無損。 若空棄滑臺,坐 義恭征 北

斧 艚 傷 及 · 斷之。 《虜救 連 疲, 隨 願 以 至,又馳 王 。房不 以屠 鐵 一玄謨入河,玄謨攻滑臺,護之百舸爲前鋒,進據 鏁 能 城爲急。」不從。 = 書勸 重 禁。 斷 唯 玄謨急攻,曰:「昔武 河 欲 失一 以絕護之還路。 舸, 玄謨敗退, 餘 舸 並 全。 不暇 皇攻廣固  $\Xi$ 留 戍 河 報護 摩溝 水迅急, 死沒 之。 城 護 護之中 石濟。 者 之聞 亦 衆 知 流 o 石濟在滑臺西南 況 而 而 下, 事 虜 殊 悉已牽 毎 襲 至 日 鐵 岢 玄謨 、鏁,以 百二十里。 得 水 計 長 軍 士 衆 柯 大

威

※將軍

、鍾離太守

永 攻碻 還 磝 爲 江 先據 . 夏 至 委粟 義 恭 津。 驃 騎 虜|杜 戶 曹 道 参 儁與 僞 尚 書 伏 連 來 援 碻 破 軍 ·, 戍 淮 陰。 加 建 武 將 軍 領 (亞護之拒之, 濟北 太守。 率二千 賊 因 引軍東去 復 隨張

列

傅

世祖 意,即 蕭 數 千 思 話遣 ·, 賊 入討,率所領馳赴,上嘉之,以爲督冀州青州之濟南樂安太原三郡諸軍事、寧遠將軍、 分遣 乃退。 護之 白 ļ 迎軍至梁山,僞尚書韓元興率精騎卒至,護之依險拒戰,斬其都 思話 思話復令度河戍乞活堡以防追軍。[10]三十年春, 將引還,誑護之云:「沈慶之救軍垂 至, 可急於 、濟口立橋。」 護之揣知其 太祖 崩,還屯 軍長史,甲首 歷 下。 聞

逆。 破其別戍。 護之馳使以聞。 孝 建 元 未至湖陸六十里,遺實焚城西走 年,南郡王義宣反,兗州刺史徐遺寶,護之妻弟也,遠相連結,與護之書,勸使同 遺寶時戍湖陸,護之留子恭祖守歷城, 自率步騎襲遺寶。 道經鄒山,

冀州

刺史

[[]]

之。 盛,遣司馬管法濟求救甚急。上遣元景等進據南州,護之水軍先發。賊遣將龐法起率衆襲 以火平之。」卽使隊主張談等燒賊艦,風猛水急,賊軍以此奔散。 不守,唯餘東城,衆寡相懸,請退還姑熟,更議進取。」元景不許,將悉衆赴救,護之勸分軍援 |姑孰,適值||護之、鄭琨等至,奮擊,大破之,斬獲及投水死略盡。 王玄謨相持。 元景然其計,乃以精兵配護之赴梁山。 兗 土旣定,徵爲游擊將軍。 柳元景率護之及護之弟詢之、柳叔仁、鄭琨等諸軍,出鎭新亭。 隨沈慶之等擊魯爽, 及戰,護之見賊舟艦累沓,三三謂玄謨曰:「今當 加輔國將軍。 梁山平,護之率軍追討,會 玄謨馳信告元景曰:「西城 義宣率大衆至梁山 玄謨見賊强 '; 與

朱脩 之已平江陵,至 尋陽而還。 遷督徐克二州豫州之梁郡諸軍事、寧朔將軍、徐州刺史,封

益陽縣侯,食邑千戶。

Щ 斫 論 軍 一之役 之, 事 隸 `, |東 柬。 弟詢 殺 力戰 色動, 其 詢 之,驍敢 僕 之 為流 於牀 **詢之覺之**,即 規殺之,慮 矢所 有 因 氣 與 力, 中,死, 柬 柬 南 元凶夙聞其名, 共定 不同,二回東宿 奔。 追 贈冀州刺 謀,遺信 東溺 淮 召 死 史。 有此 以 超。 詢 副輔 之得至。 志,又 超 國將軍張 疑之不至,改 未 測 時 詢之同否,CIED互 世 柬。 祖 宿 已 時張超首行大逆、二三亦 他 刨 所。 位,以爲積弩將 詢之不 相 觀察。 知 其移 會 超 巡 來 領 梁

護之 太守。 略 軍 一,進 也。 日 督 年 未 北 徐州 青州 護 拜 叉 近 復 之 之東莞 北 河 坐 督 歸 有 青冀 論 河、濟 東 順 功 安 挾 者 私, 易,近 州 叉 郡 諸 多 **発官**。 軍 軍 陂澤 息民 事 事 (del), ··, 非 寧遠 恵。遠 復爲游 房所 世 將 祖 申 軍 擊 向 王 以 一、青冀 將 威 歷 軍。 ,安邊之上 毎 下 來 三州 要 俄遷· 害 寇掠,必 刺 大司 欲 史, 計 移 也 由 鎭 青 馬,公司的輔 10 歷 州 歷 由 城 幷 城 是遂 鎭 明 國 州 歷 定 將 城, 年 幷 , 軍 鎭 士, 領 議 進 號 此 者 經 寧 南 多 遠之 朔 東 異 將 海

騎 司 大 州 將 大 諸 軍 明 沈 軍 年 慶 事 ·, 徴 之 、輔 節 爲 或 度。 將 右 軍 衞 事 將 豫州 平 軍 ٠, 轉 刺史、淮南太守。 還 西陽 於 王 道 子 聞 尙 司 撫 空 軍 竟 復 司 陵 隸沈慶之伐西陽蠻。 馬 王 臨 誕 淮 於 太守。 廣 陵 反叛, 明 年 護 護之所莅 出 之 爲 卽 使 率 持 部 多聚斂 節 曲 、督豫 受 車

賄貨充積。 七年,坐下獄,発官。 明年,復起爲太中大夫,未拜,其年卒,時年七十,諡 目

前廢帝永光元年,追贈冠軍將軍、豫州 刺史。

始初,以軍功爲梁、南秦二州刺史。 子承祖嗣。 承祖卒, 子顯宗嗣。 齊受禪, 國除。 護之次子恭祖、勇果有父風。

**閎共殺曇洛等五人**,詣官歸罪,見原。 竟陵王 遵子膭,元嘉中,爲員外散騎侍郞。 誕所殺。 追贈征虜將軍,刺史如故。 **閬,大明三年,自義興太守爲寧朔將軍、兗州刺史,爲** 母墓爲東阿寺道人曇洛等所發, **閬與弟殿中將軍** 

**閎,順帝昇明末,右衞將軍。** 

輒有 竟陵郡,興世依之爲客。 禽獲,玄謨舊部曲諸將不及也,甚奇之。 張興世字文德,竟陵竟陵 竟陵舊置軍府,以補參軍督護,不就。 人也。 本單名世,太宗益爲興世。 還都,白太祖,稱其膽力。 白衣隨王玄謨伐蠻,每戰, 少時家貧,南郡宗珍之爲

軍,領從隊。 後 隨世祖鎭尋陽,以補南中郎參軍督護。 南郡王義宣反,又隨玄謨出梁山,有戰功。 入討元凶,隸柳元景爲前鋒,事定,轉員外將 除建平王宏中軍行參軍,領長刀。

叉 隸 西 平 主 子尚 爲直 衞。 坐從 子尚 入臺, 棄仗 游 走 下下 獄 発官。 復以白衣充 直 衞

遭 遣 據 有 沮 游 興 有 壽 中,中 段 意 興 餘 世 佛 外 據 111: 陽 號 大 而 流 赭 樂 救 興 龍 同 明 制 且 等 之, 圻 世 逆,四為 末 驤 以 梗 敵 援 率 將 江 問 除 不 南 龍 軍 勔 糧 足。 西 沈 賊 員 領 驤將 運 外 餌 攸 屯 劉 自 之。 **今若** 散 鵲 水 軍佼長 勔 艱 尾 騎 軍 所 攸之 ·, 距 侍郎 以兵數千, 攻 相 制 流若捷 介南 賊 持 生 南 日 之奇,莫過 久不 董 賊 仍 賊遣 於 除 孟 凱之攻 潛出 決。 赭 宣 虯 龐 圻。 威 蟻 不 孟 其 興世 將 憂 於 克 寇 虯 上, 築 軍 不 此。 率 建議 城 必 隨郡 殄 軍 因 城 無 沈 險 助 於 因 日 能 興 攸 太守。 琰 自 擊慶 湖 之 爲。 世 固 劉 口 賊 之行 吳喜 隨宜 慶戦 ,二亞僞 勔 遣 據 未行 遣 别 上 並 斷 信 是安 流, 將 大 截, 龍 求 贊 太宗 馬 敗,投 兵强 其 驤 援 危 步 使其 谌 計 將 大 數 卽 急。 水 機, 千, 地 軍 位, 首 陳 時 勝 死 尾 豫 足 者 慶 必 建 四 周 安 不 以 州 數 領 方 我 遑 可 相 Ŧ. 刺 今 千 舸 反 進 休 制 史 雖 叛 人 於 殷 退 相 前 若 琰 欲 疑 持 時 進

集。 不 五. 干 爲 留 之 乃 興 備 戍 分 世 戰 |肝 欲 劉 士 胎 率 胡 七 所 餘 千 聞 領 衆 直 興 配 二萬 興世 世 取 欲 大 人 雷 上,笑之曰:「我尚 , 悉 興 , 世 遣 而 乃 南 軍 令 旅 討 輕 未 集, Щ 舸 泝 陽 不 不 流 叉 敢越 足 尋 而 分 平 上 、徴 彼 張 旋 下取 復 阮 會薛 回 佃 揚州, 還 夫 索 所 兒 領 平 張 諸 定, 興 日 軍 世 中 ,悉還南 何 , 物 輒 人, 使 復 張 如 伐 欲 永 此 輕 衆 以 據 步 使 軍 我 騎 賊 大

集。 回 江 住景江 而 而氣 一有洄 一」興世 下 賊 來 盛 疑之。 停 斬 浦宿, **矢驟**, 級 狀,船下必來泊,岸有橫浦, 轉近,舫 宿 謂攸之等曰:「上流唯有錢谿 數 百,投水者甚衆,胡收軍而 其夜四更, 驟旣 劉 賊亦不進。 胡 入 洄 力 自領水步二十六軍平旦來 洑, 盡,盛亦易衰,此曹劌 値 興世 夜潛遣黃道標領七十 風, 乃命 仍舉 壽寂之、任農夫率壯士數百擊之,衆軍相繼進,胡於是敗 颿 可 直前。 以藏 下。 可據,地旣險要,江又甚狹,去大衆不遠, 之所以 船舸, 攻。 賊亦遣胡靈秀諸軍,於東岸相翼而 舸,徑據錢谿,營立城柴。 二三爲宜。」乃夜渡湖口 破齊也。」令將 將士欲迎擊之,興世禁曰: 士不得妄動,治城 明 一至鵲 旦, [三] 賊來尚 興世 上。 頭,公三因 應赴無難 如故。 與軍 興世 復 俄 齊 夕

攻興世 突過。 世 佼 玉 千人至貴口擊之,與仲玉相值。 又遏 長 領千人步取 生 時 興世 其 行至 劉 糧道,尋陽遣運至南陵,不敢下,賊衆漸饑。 未至錢谿數十里,袁顗以濃湖之急遽追之,錢溪城柴由此得立。 靈遺等以皮艦二十,攻賊濃湖,苦戰 城壘未固,司徒建安王休仁慮賊幷力更攻錢谿,欲分其形勢, 貴 门,不 南陵,迎接糧運。 敢進,遣間 信報胡,令遣 仲玉至南陵,領米三十萬斛,錢布數十舫,豎榜爲城,規欲 交戰盡日,仲玉走還顕營,悉虜其資實,賊衆大敗,胡棄軍 重軍援接。 連日,斬獲千數。 劉胡 興世、壽寂之、任農夫、李安民等三 乃遣顗安北府司馬、偽右軍沈仲 是日,劉胡果率衆軍,欲更 命沈攸之、吳喜 賊連戰轉敗, 興

州之梁郡諸軍事、三四封作唐縣侯、食邑千戶。

當 故。 虜 軍 叉 將 鎭 以 將 廣 順 軍 軍 本 徵 官 爲 陵,興世 帝 雍 廢帝 游 昇 領 州 (驍騎 明 擊 刺 將 元徽 二年,卒,時年五 史,尋加寧蠻校尉。 權 軍 將軍,與左 兼領 ်ဝ 三年,徵爲 海道 軍。 北 衛將 泰豫 伐,假輔 通 十九。 軍沈 直散騎常侍、左 元 年,爲持節、督雍梁南北秦郢州 桂陽 國 攸之參員置。 追 路軍 贈 王 休 本 士,加節 一 官 範反,興世 衞 置佐, 將 五. 軍。 年, 遣 無功而還。 五 轉左 軍 年,以 赴 衞將軍。 朝 廷, 之竟陵隨二 疾病徙光 四 未發而 年, 六年, 禄 遷太子右衞率, 事 郡 大 中 平, 夫,常侍 諸 頧 軍事 進 軍 號 劉 、冠 勔 如 征

世 送 給 前 欲 水 事 拜 部 中 中 興 興 世 中華(三)。 世 墓 ,行 居臨沔水,沔水自襄陽 子欣業, 仲 田 日 忽 子 時 謂 吹 生洲 欲 (三公當) 之。 日:「; 將 年年 往 興世 汝 嗣 襄 衞 、 陽 一愛 漸大, 封 · 素 從 會齊受禪 恭 太 蓮 多 及 以下 戀 畏 鄉 至 先 ,至于九江 法 興世 里 人 國際。 憲 不不 必 爲 肯去。 當 譬之日 方伯 驚怖。」 **一** 嘗謂 一此 而 一千里 興世 洲 興世 是天 Ł 中, 减 逐 撤 先 子 + 我 而後行 鼓 無洲 餘 難田 角, 頃 嶼。 非 舍 父 老 田 仲子, 興 舍 公,樂聞 世 老 初 公所吹。」 由 生, 興 鼓角 當 世 致 其 位 興 門 口

者, 半歲矣。 建斾垂組,豈徒然哉! 史臣曰:兵固詭道,勝在用奇。 蓋乃趙壁拔幟之機, 官渡婚師之日,江北至於鵲浦投戈,實興世用奇之力也。 當二帝爭雄,天人之分未決,南北連兵,相阨而不得進

## 校勘記

- [1] 太守韓伯見之 各本並脫「之」字、據南史補。
- 藩轉參太尉大將軍相國軍事 大將軍。 「大將軍」各本並作「將軍」,脫「大」字,據南史補。 按玄時自加
- 衆皆駭愕以爲不祥 各本並脫「衆」字,據元龜七一六、御覽九一九引補。
- 29 暴風漂藩重艦渡北岸 「藩」各本及沅龜七二四同,沅龜三四四作「輜」,疑是。
- 五 時盧循 餘黨與蘇淫賊大相聚結 「蘇淫」元龜六七一作「蘇溪」。
- 六 山 嘉四年,今補「元嘉」二字。 元嘉四年 各本並脫「元嘉」二字,按上有少帝景平元年,下有七年,景平無四年,當爲文帝元
- つも 則牢洛遊魂 三朝本作「牢洛」,北監本、毛本、殿本、局本作「牢落」。 按三朝本是。 牢調虎牢,

洛謂洛陽。「牢洛」本書屢見。

欲以絕護之還路 各本並脫「還」字,據南史、藝文類聚七一引、御覽七七〇引、元龜四一四、通

鑑宋文帝元嘉二十七年補。

八 九 凵 **虜杜道儁與僞尚書伏連來援碻磝** 「杜」各本並作「壯」,據元龜三六三改。 孫彪宋書考論云:

「壯當作杜。魏平南將軍南康公杜道雋也。」

[10] 以防追軍 「追」各本並作「衆」,據元龜三六三改。

以爲督冀州青州之濟南樂安太原三郡諸軍事寧遠將軍冀州刺史 各本並無「青州」二字。 **}**#

之。 二史考異云:「是時冀州寄治歷城。 張永、申恬傳並云『督冀州青州之濟南樂安太原三郡諸軍事 而濟南、樂安、太原三郡,乃在青州管內,常 、冀州刺史」,可證也。 以冀州 刺 此冀州 史兼督

下,當有『靑州』二字。」按錢說是,今據補。

護之見賊舟艦累沓 「累沓」各本並作「累水」,據元龜三六三改。

時張超首行 大逆 「張超」二凶傳作「張超之」。 南北朝 人名後之「之」字,有時可省去。

慮柬不同 各本並脫「東不同」三字,據南史、元龜三七 補。

〔三〕又未測詢之同否 各本並脫「未」字,據远龜三七一補。

俄遷大司馬 计二史考異云:「大司馬下,當有脫文,是時江夏王義恭以大司馬領南徐州刺史,

列

傳

第

除護之爲大司馬僚佐兼郡守,非遷大司馬也。」

進督徐州之東莞東安二郡軍事 各本「東安」二字並空白, 據錢氏考異說補。 廿二史考異云:

「時垣護之以青、冀二州刺史鎭歷城。 故事, 青州刺史常兼督徐州之東安、東莞二郡,則此闕

文,當爲『東安』二字。」孫彪宋書考論亦云:「闕處是『東安』二字,杜驥、顏師伯傳可證。

還都白太祖稱其膽力 「還都」上,各本並有「興世」二字,據远龜七二四删。 張森楷校勘記云:

「興世二字衍文。此言王玄謨稱興世膽力於文帝之前也。」

築二城於湖口 按下文云興世攻克二城,則此二城乃非興世所築。 孫彪宋書考論云:「築上當

云賊。鄧琬傳曰,孫冲之等於湖白口築二城。」

時豫州刺史殷琰據壽陽同逆 「殷琰」下各本並衍「之」字,今删去。

□□ 上流若捷 「捷」各本並作「據」,據元鑑四○三改。

[三] 至鵲頭 「鵲頭」各本並作「散頭」,據元龜二一六改。

興 世 禁日 禁」字下,元龜二一六、通鑑宋明帝泰始二年有「之」字,是。

尋爲督豫司二州南豫州之梁郡諸軍事 「之梁」二字, 各本並作「六」一字。 孫彪宋書考論云

「六字當作之梁二字。 據殷琰及山陽王休祐傳, 豫州刺史必帶督南豫州之梁郡。 梁郡卽壽春,

爲豫州治,而又屬南豫不屬豫州故也。」按孫說是,今改正。

宣告 由興世致位給事中 各本並脫「中」字,據南史、御覽五一一引補。

興世子 華見南齊書 欣業 張欣泰傳。」按張 張增讀史舉正 興世諸子,欣業見此,欣華、欣泰、欣時見南齊書及南史。疑有欣業 云:「欣業當從南史作欣泰。」張森楷校勘記云:「欣業當作欣華,欣

其人,不必改欣華、欣泰。

三七 官渡婚師之日 爲婚。」孔穎達疏云:「言軍師之敗,若火滅然。」 說是,今改正。 婚師,即 「熸師」各本並作「潛師」,張元濟校勘記云: 殲師。 左傳襄公二十六年,「王夷師熸」。 「潛師當作熸師,見三國志。」 杜預注:「吳、楚之間,謂火滅 按張

## 宋書卷五十

## 列傳第十一

## 宗室

長沙景王道憐 臨川烈武王道規 營浦侯遵考

京城,進平京邑,道憐常留家侍慰太后。桓玄走,大將軍武陵王遵承制,除員外散騎侍 長沙景王道憐,自高祖中弟也。 初爲國子學生。 謝琰爲徐州,命爲從事史。 高祖克 郎。

孫全聚衆應之。 尋遷建威將軍、南彭城內史。 義熙元年,索虜托跋開遣偽豫州刺史索度眞、大將軍斛斯蘭寇徐州, 時北青州刺史劉該反,引索虜爲援,淸河、陽平二郡太守 攻相

斬全。 縣,執鉅鹿太守賀申,進圍寧朔將軍羊穆之於彭城,穆之告急,道憐率衆救之。 進至彭城,眞、蘭退走。 道憐率寧遠將軍孟龍符、龍驤將軍孔隆及穆之等追,引真 軍次陵栅

蘭走奔相城,又追躡至光水溝,斬劉該,虜衆見殺及赴水死略盡 列 僔 第十 宗 室

縣五 事 丁,率冠 鎭 軍將軍 京口 四年,代諸葛長民爲幷州刺史、義昌太守,將軍、內史如故,猶戍 ,進道憐號龍驤將軍,又領堂邑太守,戍石頭。 劉敬宣等伐譙縱,而文處茂、溫祚據險不得進,故不果行。 明年, 加使持節、 石頭 以義 動封新興 監征蜀諸

北徐州刺史,移鎭彭城 及城陷、慕容超將親兵突圍走,道憐所部獲之。加使持節,進號左將軍。 義昌太守如故。以破索度眞功,封新渝縣男, [三]食邑五百戶。 修創,朝議以彭城縣遠,使鎭山陽。 時鮮卑侵逼,自彭城以南,民皆保聚,山陽、淮陰諸戍,並不復立。 進號征虜將軍、督淮北軍郡事、北東海太守,幷州刺史、 從高祖征 道憐請據彭城,以漸 七年,解幷州,加 廣固,常爲軍鋒。

甚,畜聚財貨,常若不足,去鎭之日,府庫爲之空虚。 年討司馬休之,道憐監留府事,甲仗百人入殿。江陵平,以爲都督荆湘益秦寧梁雍七州諸 滅先封戶邑之半,以賜次子義宗。十年,[三進號中軍將軍,加散騎常侍,給鼓吹一部。明 將軍、太守如故、還鎭京口。九年,甲仗五十人入殿。以廣固功,改封寬陵縣公,食邑千戶。 悉配之。 事、驃騎將軍、開府儀同三司、領護南蠻校尉、荆州刺史,「尽」持節、常侍如故。 八年,高祖伐劉毅,徵爲都督兗靑二州晉陵京口淮南諸郡軍事、兗靑州刺史,四持節、 道憐素無才能,言音甚楚,舉止施爲,多諸鄙拙。 高祖雖遣將軍佐輔之,而貪縱過 北府文武

豊當 省。 書令、徐兗 命,進位 寄奴於道 先是, 不 高 祖 如 太 汝 平定三秦,方思外略,徵道憐還爲侍中、都督徐兗青三州揚州之晉陵諸軍事 | 憐豈 尉 廬陵 十歲 ",封長: 一州刺史,持節、將軍 有 王 見邪 所惜。 義 沙王,食邑五千戶 眞 ?]上曰:「 為揚州 揚州 根本所 刺 車士 如 史, 故。 一雖爲 寄,事 **^**,持節、侍中、都督 太后謂 元熙元年 刺 史,事無大小 務至多 上曰:「道憐汝布 -,解尚 了,非道 『刺史 書令,進位司空,出鎭京口。 ,悉由寄奴。 憐所了。」太后曰:「道憐年出 如故。 衣兄弟,故宜爲揚州 永初二年朝正,入住 道憐年長,不親其事, 上上 高 で、守尚 五. 祖 受

吹, 史 命, 五. 如 月,宮 率數十人入京城, 故 三年春, 班 車晏駕,道憐疾 祭禮 劍 百 高祖 依 人。 不 豫 仲元撃斬 患不 加 班劍三 堪 之。 臨 喪。 一十人。 先是,府 六月,薨,年五 時道 史陳苑 燐 入朝, 告 十五。 左纛,輼輬,挽歌 彌有 留司馬陸仲元居守, 異謀,至是賜錢二 追贈太傅 ,持節 二部,前後 、侍中、都督 一十萬分 刁逵子彌爲亡 部 除縣 羽葆、鼓 命。 刺

於

聽望不

足。」太后

乃

無

言。

車士,義眞

小字

也

庸 **崇其文**,王 於 鼎 太祖 彝 元嘉 猷 配 船 旣 九年 昭, 祀 於清 , 幽 韶曰:「古者明王經 顯 廟 咸 ō 秩。 是 以 先皇經緯天地, 從 饗先王,義 國 司 存 勳 撥亂受終, 有 商 誥 典,平章以馭德 祭於 駿命爰集, 大 蒸 禮著 刑, 光宅區 班瑞 周 典。 以 字, 疇功烈, 自 漢迄 雖 聖 銘 明 徽 世

列

美長世,茂績遠猷,永傳不朽。」 **尙闕,鑒寐欽屬,永言深懷。** 侔蹤姬旦,方執伊、邵者矣。朕以寡德,纂戎鴻緒,每惟道勳,思遵令典,而大常未銘,從祀 邈,或雅量高劭,風鑒明遠,或識唯知正,才略開邁,咸文德以熙帝載,武功以隆景業,固 史永脩縣開國公道濟,[刊]故左將軍、靑州刺史龍陽縣開國侯鎭惡,[八]或履道廣流,秉德沖 節、散騎常侍、都督江州豫州西陽新蔡晉熙四郡軍事、征南大將軍、開府儀同三司、江州刺 南康文宣公穆之,侍中、衞將軍、開府儀同三司、錄尚書事、揚州刺史華容縣開國公弘,使持 之晉陵京口諸軍事、太傅、南徐克二州刺史長沙景王,故侍中、 運,三靈允協,抑亦股肱翼亮之勤,祈父宣力之効。 故使持節、 便宜敬是前式,憲茲嘉禮,勒功天府,配祭廟庭,俾示徽章,垂 侍中、 大司 馬臨川烈武王,故 都督南徐克二州揚州 司徒

道憐六子:義欣、義慶、義融、義宗、義賓、義綦。

彦之率大衆入河,義欣進彭城,爲衆軍聲援。<br />
彦之退敗,青、齊搔擾,將佐慮寇大至,勸義欣 故,成石頭。元嘉元年,進號後將軍,加散騎常侍。三年,以本號爲南兗州刺史。七年,到 委鎭還都,義欣堅志不動。 義欣嗣,爲員外散騎侍郎,不拜。 遷使持節、監豫同瘫幷四州諸軍事、豫州刺史,日 將軍如故。 歷中領軍,征虜將軍、青州刺史、魏郡太守,將軍 如

給鼓吹一部。鎭壽陽。

治。」 常侍、 立 渒水 將 南 城 吏,悉敍勞人武夫,多無政術。 彫 討 軍 殷 芍陂 弊,於 一進監 實 誅 入 于 征 之制 猶 陂,不治 時 西 土境荒毁,人民彫散,城郭頹敗,盜賊公行。 良田萬 今爲甚。 將 或簡能,況賓接荒垂,而可輯柔頓闕。[10]願勑選部,必使任得其人, 爲 軍、開 都 境內畏服,道不拾遺,城府庫藏,並皆完實, 督。 積久,樹木榛塞。 餘 府儀 頃,堤場久壤,秋夏常苦旱。 綏牧之宜,必俟良吏。 十 一 同三司,持節 年夏,入朝,太祖 義欣陳之曰:「江淮左右,土瘠民疎,頃年以來,荐饑相襲,百 肅伐木開榛,水得通注, 都督、刺 厚加 勞人武 恩禮。 史 義欣遣諮議參軍殷肅循行修理。 如如 、夫,不經政術,統內官長,多非才授。 故。 義欣綱維補緝,隨宜 十六年,薨,時年三十六。 諡 早患由 遂爲盛藩强鎭。 日 成  $\Xi$ 是得除。 十年, |經理,劫盜 時淮西、江北 庶得不 進號 有舊 追贈散騎 所經 · 勞而 鎭 溝 引 東 長 軍

侍。 子 子 悼王 粲 、早天, 瑾 字彦瑜 **桑弟纂字元績** ,官至 一太子 嗣 ,官至步 屯騎 校尉, 兵 校尉。 三十 -年,爲 順帝 昇明 元凶 三年薨,會齊受禪 所殺。 世 祖 即位, 國除 追贈散騎常

職 世 瑾 弟 祖 祗 詔 字 日 彦 期 昔 一大明 三王 兩 中爲 謝, 中書郎。 倶 至崇禮, 太宰江 自今三臺 夏王 義 五省, 恭 領 悉同此例。」太宗 中 書 監 服 親 不 初 得 相 爲 臨 南 兗州 表 求 刺 解

都官尚

書,謀

應晉安王

子勛

爲逆,伏誅

|祗弟||楷祕書郎,爲元||丛所殺,追贈通直郎。

楷弟瞻,晉安太守,與子勛同逆,伏誅

玩。 鄙,以有宣城之勳,特爲太宗所寵。在湘州及雍州,使善畫者圖其出行鹵簿羽儀,常自披 侍中,領右衞將軍。改領左衞將軍、散騎常侍、中領軍。 州,南兗州刺史,吳興太守。侍中,領左軍將軍。又改領驍騎將軍,撫軍將軍,雍州刺史。 牧守,莫不同逆,唯韞棄郡赴朝廷,太宗嘉其誠,以爲黃門郎,太子中庶子,侍中,加荆、湘 嘗以此圖示征西將軍蔡興宗,興宗戲之,陽若不解畫者,指韞形像問曰:「此何人而在 **瞻弟韞字彦文,步兵校尉,宣城太守。** 子勛爲亂,大衆屯據鵲尾,攻逼宣城。 昇明元年,謀反伏誅。[二]韞人才凡 于時四方

弟鑒,員外散騎侍郎,蚤卒。

鑑弟勰字彥龢,侍中,吳興太守,後廢帝元徽元年卒。

願弟述,東陽太守,黃門郎,與從弟康同逆,事敗走白山,追禽伏誅。 勰弟顥字彥明,侍中、左衞將軍,冠軍將軍、吳興太守,未拜,元徽四年卒,追贈右將軍。

侍中,左衞將軍, [三]領太子中庶子,五兵尚書,領軍。 義慶弟義融,永初元年,封桂陽縣侯,食邑千戶。 凡王子爲侯者,食邑皆千戶。 有質榦,善於用短楯。 義融歷

卒,追贈車騎將軍,諡曰恭侯。

以子晃繼封。 子孝侯覬嗣,官至太子翊軍校尉,爲元凶所殺。 昇明二年,與員外散騎侍郎安成戢仁祖、荒人王武連、羽林副彭元儁等謀反, 世祖卽位,追贈散騎常侍。 無子,弟襲

國除。

郢州 臨澧縣侯。 太宗嘉之,以爲郢州刺史,封建陵縣侯,食邑五百戶。 襲字茂德,太子舍人,安成太守。晉安王子勛爲逆,襲據郡距之,子勛遣軍攻圍不能 暑月露輝上聽事,綱紀正伏閤,怪之,訪問,乃知是襲。三三子旻嗣,昇明二年,改封康 泰始六年,卒於中護軍。 追贈護軍將軍,加散騎常侍,諡曰忠侯。 建陵縣屬蒼梧郡,以道遠,改封 襲亦庸鄙,在

昌縣侯,與兄晃俱伏誅。

襲弟彪,秘書郎,弟寔,太子舍人,並蚤卒。 寔弟爽,海陵太守。

列

首,乘流遵歸渚篇是也。 侍 靈 雅 郞 年,卒,追贈散騎常侍、平北將軍,諡曰惠侯。 沒有姿色,爲義宗所愛寵,本會稽郡吏。 ,太子左衞率。元嘉 融 弟義宗,幼爲高祖所愛,字曰伯奴,賜爵新渝 八年,坐門生杜德靈放橫打人, 又爲侍中、太子詹事,加散騎常侍、征虜將軍、南兗州刺史。 謝方明爲郡,方明子惠連 愛士樂施,兼好文籍,世以此稱 縣男。 還第 永初元 内 藏 愛幸之,爲之賦詩十餘 年,進爵 義宗隱蔽之,発官。 爲 之。 侯, 歷黃門 德

粲、褚淵分日入直決機事。 兵, 郢 南 侍 朝 頻 州 中 徙 徐 野 自 左 尋領 ,守秘書監,領太子詹事。 未拜,遷使持節、都督南徐徐<u></u>院豫青冀六州諸軍事、後將軍、 之譽,故爲太宗所委。 刺 州 秉 子 隨 懷侯 衞 刺 字彥節 史,持節 入殿。 衞 史,加散騎常侍。 將軍,丹陽尹,太子詹事,吏部尚書。時宗室雖多,材能甚寡。 · 玠嗣,琅邪、秦郡太守。 尉 辭 ,初爲著作郎,歷羽林監,越騎校尉,中書、黃門侍郎。 二年, 、常侍 不 ·拜。 加散騎常侍、丹陽 ?如故。 桂陽王休範爲逆,中領 五年,出爲前將軍、淮南宣城二郡太守,不拜,還復本任。 四年,遷中書令,加撫軍將軍,常侍、尹如故。 後廢帝即位,改都督郢州豫州之西陽司州之義陽二郡諸軍事、 未拜,留爲尚書左僕射,參選。 爲元凶所殺,追贈散騎常侍。 尹,解 吏部。 軍劉 動出守石頭,秉權兼領 封當陽縣侯, 元徽 元年,領吏部,加兵五百 無子,弟秉以子承繼封。 食邑千戶。與齊王、袁 太宗泰始初,爲侍中, 順帝即位,轉尚書 秉少自砥束,甚得 軍將軍,所給加

令、中領軍,將軍如故。

收 直 旣 客邪。」「秉不 朝 走,於領檐湖見擒,口即與二子承、俁並死。 素恇怯騷動,擾不自安,再餔後,便自丹陽郡車載婦女,盡室奔石頭,部曲 兵反,齊王入屯朝堂,桑潛與康及諸大將黃回等謀欲作 鰮。 廷 「在省內,與直閤將軍ト伯興謀,其夜共攻齊王。 會秉去事覺,齊王夜使驍騎將軍王敬則 至見粲,粲鶩曰:「何遽便來,事今敗矣。」、秉曰:「今得見公,萬死亦何恨。」從弟中領軍韞 危殆,妻常懼禍敗,每謂<br />
秉曰:「君富貴已足,故應爲兒子作計。 時 齊王 韞 已戒嚴,敬則率壯士直前,韞左右皆披靡,因殺之,伯興亦伏誅。、粲敗,秉踰城出 能從。 輔政,四海屬心,秉知鼎命有在,密懷異圖。 秉時年四十五。 亂。 袁粲鎭石頭,不識天命, 秉妻蕭氏,思話女也。 本期夜會石頭 年垂五十, 殘生何足 數百,赫奕滿道。 ,旦乃舉兵。 沈攸之舉 元徽中,

秉弟謨,奉朝請。

對 宗世、歷黃 病 貧 卒,未 客日 謨 弟遐字彥道,亦奉朝請、員外散騎侍郎。 大殮 孝武 門侍郎,都官尚書,吳郡 **一**, 鼻流血,疑遐潛加 無道,枉我殺 母。」其頑騃若此。 毒害 太守。 ,爲有司 兄秉旣死,齊王遣 所糾。 秉當權,遐累求方伯 與嫡母殷養女雲敷私通,殷每禁之。 世祖徙之始安郡。 談之。 退人才 ,康日:「我 遊凡,自諱名,常 永 光 中得還。太 在,用汝作 殷暴

列

州 於聽望不足。」遐曰:「富貴時則云不可相關,從坐之日,爲得免不。」至是果死焉。

書監,左衞將軍,位至輔國將軍、徐州刺史。二十五年,卒,追贈後將軍,諡曰肅侯。 義宗弟義寶、元嘉二年,封新野縣侯。 大年,以新野荒敝, 改封興安縣侯。 黄門郎,秘

子惠侯綜嗣。 卒,子憲嗣。 昇明三年,齊受禪,國除。 綜弟琨,晉平太守。

見苦。」 謂義綦 侯。 義賓弟義綦, (日:「) 其庸塞可笑類若此。 陸士衡詩云『營道無烈心。』其何意苦阿父如 元嘉六年,封營道縣侯。 歷 右衛將軍 , 湘州刺史。 凡鄙無識知,每爲始興王濬兄弟所戲 孝建二年,卒,贈平南將軍 此。」義綦日 下官初 不 一。諡 弄。 識 何忽 日|僖 濬嘗

子 長猷嗣,官至步兵校尉。 昇平三年,卒,齊受禪,國除

弘鎭廣陵, 臨 ]]] 烈武 以爲征虜中兵參軍。 王 道規,字道則,高祖 高祖克京城, 少弟也。 少倜儻有 道規亦以其日與劉毅、孟昶共斬弘, 大志 高祖 奇 之, 與謀誅桓玄。 收衆濟 時桓

江。 進平京邑,玄敗走,晉大將軍武陵王遵承制,以道規爲振武將軍、義昌太守

皆以 於崢 何澹 距之。 懼 彼 以 不在此舫,雖 實 恇 衆 勁 而 少制 我寡 · 嶸洲 Ż 兵攻之,必可 郭銓與玄單 怯,加已 薄之,破之必矣。」道規喜曰:「此名計也。」因往彼攻之,卽禽此舫。 與 劉 澹之空設羽儀旗幟於一 多 賊徒及義軍並 毅 ,强弱異勢。 道規等兵不滿萬人,而玄戰士數萬, 、何無忌追玄。 經奔敗, 得無益 共所聞也。 舸走,江陵 禽也。 也。」無忌 衆無固 今若畏懦不進, 山以為: 禽之之日,彼必以爲失其軍主, 今雖才 玄 不復能守,欲入蜀,爲馮遷 然。 ij 曰:「澹之不在此舫,固 西走江陵,留 舫,而別在它船,無忌欲攻羽儀所在,衆悉不同,曰:「澹之必 決機 因縱兵,賊衆奔敗,即克盆 必爲所乘,雖至尋陽,豈能自固。 兩 陳,將雄者克。 郭銓、何澹之等固守盆口 衆並憚之, 不須言也。 所 斬 我徒咸謂已得 昔光武昆陽之戰, 口,進平尋陽。 欲退還尋陽。 旣不 ?[三義軍 在此, 賊 因 玄雖 帥, . 鼓譟倡曰:「已斬 道規 曹操 因 則戰 竊 復 我 旣至,賊 官渡 日:「不可 土 名 馳進,遇玄 勇 雄豪,內 而 必弱,我 之師 彼懼 列艦

於 龍洲 義 小皆爲竭力,振勇冠三軍,難與爭勝。 軍 皆破之。 一遇風不 進,桓謙、 無忌欲乘 勝直 桓振復據江陵,毅留巴陵,道規與無忌 造江 陵,道規 且可頓兵養銳,日日徐以計策縻之,不憂不克 曰:「兵法屈申有 時,不可苟進。 俱進攻桓謐於馬頭,桓蔚 諸桓 世 居 兀

列

傳

推毅爲元功,無忌爲次功,自居其末。 振大破<u>宗之</u>而歸,聞城已陷,亦走。 至紀南,振自往距之,使桓謙留守。 規、無忌攻偃月,並克之,生禽仙客、山圖。 如 口 二州,奉歸晉帝,不許。 東岸, 。」無忌 揚武 不 ·從,果爲振所敗。 將軍孟 山圖據魯山 會南陽太守魯宗之起義攻襄陽,偽雍州刺史桓蔚走江陵。宗之進 乃退還 城, 時繳、道規已次馬頭,馳往襲,謙奔走,即日克江陵城。 無忌翼衞天子還京師,道規留夏口。 輔國 一尋陽,繕治舟甲,復進軍夏口 進號輔國將軍、督淮北諸軍事、幷州刺史,義昌太守 [將軍桓仙客守偃月壘。 其夕,該遁走,進平巴陵。 於是毅攻魯山城,口也道 0 謙、振遣使求割荆、江 偽鎭 江陵之平也,道 軍 將軍馮該戍夏

容縣 理, 荆 隨 州 郡 士民莫不畏而愛之。 刺 公,食邑三千戶。 義陽綏安、豫州之西陽汝南潁川新蔡九郡諸軍事,隨宜剪撲,皆悉平之。 時 ·荆州、湘、江、豫猶多桓氏餘燼,往往屯結。復以本官進督江州之武昌、荆州之江夏 史,口心將軍如故。 遷使持節、都督荆寧秦梁雍六州司州之河南諸軍事、領護南蠻校尉、 劉敬宣征蜀不克,道規以督統降爲建威將軍。 辭南蠻以授殷叔文。叔文被誅,乃復還領。 善於爲治,刑政明 以義勳封華

至 尋 陽,爲賊黨首林所破。日也循即以林爲南蠻校尉,分兵配之,使乘勝伐江陵,揚聲云徐道 盧循寇逼京邑,道規遣司馬王鎭之及揚武將軍檀道濟、廣武 將軍到彥之等赴援朝廷,

江陵 異 覆已克京邑。 ,正與林會。 道規乃會將士,告之曰:「桓謙今在近畿,聞者頗有去就之計。「同己吾東來文武,足以 而桓謙自長安入蜀,譙縱以謙爲荆州刺史,厚加資給,與其大將譙道福 林屯江津,謙軍枝江,二寇交逼, ,分絕都邑之問。 荆楚旣桓氏義 並懷 俱寇

濟事

若欲去者,本不相禁。」因夜開城門,達曉不閉,衆咸憚服,莫有

法者。

率軍 守,委以腹心,率諸軍攻謙。諸將佐皆固諫曰:「今遠出討謙,其勝難必。 荀林近在江津,伺 **謙敗則林破膽,豈暇得來。** 林愚豎,無它奇計,以吾去未遠,必不敢向城。 人動靜。若來攻城,宗之未必能固,脫有差跌,大事去矣。」道規曰:「諸君不識兵機耳。 更相首尾。人懷危懼,莫有固心,成敗之機,在此一舉。非吾自行,其事不決。」乃使宗之居 江西, 追林,至巴陵,斬之。 [參軍曹仲宗檢得之,道規悉焚不視,衆於是大安。 馳往攻謙,水陸齊進,謙大敗,單舸走,欲下就林,追斬之。還至浦口,林又奔散。 衆議欲使檀道濟、到彥之與宗之共擊,道規曰:「盧循擁隔中流,扇張同異,桓謙、荀林 雍州刺史魯宗之率衆數千自襄陽來赴。或謂宗之未可測, 道規乃單馬迎之, 宗之感 ; 出 .擊義陽郡,與盧循相連結,循使蔡猛助之。 初,謙至枝江,江陵士庶皆與謙書,言城內虛實,咸欲謀爲內應。 且宗之獨守,何爲不支數日。」解南蠻校尉印以授諮議參軍劉 吾今取謙,往至便克,沈疑之間,已自還反。 進號征西將軍。先是,桓歆子道兒 道規遣參軍劉基破道兒於大薄,臨

列

陳斬猛。

殆盡, 道覆單舸走還盆口。 師 ,遣道覆上爲刺史,江漢士庶感焚書之恩,無復貳志。 徐道 前驅失利,道規壯氣愈厲,激揚三軍,遵自外橫擊,大破之。 覆率衆三萬,奄至破冢,魯宗之已還襄陽,追召不及,人情大震。 初使選爲游軍,衆咸云:「今强敵在前,唯患衆少,不應割削見 道規使劉遵爲游軍,自距 斬首萬餘級, 或傳循已平京 道覆 赴水死者 於豫

熙十年,卒,追贈撫軍將軍。追封監利縣侯,食邑七百戶。 遵字慧明,臨淮海西人,道規從母兄蕭氏舅也。官至右將軍、宣城內史、淮南太守。 力,置無用之地。」及破道覆,果得游軍之力,衆乃服焉。

州揚州之宣城淮南廬江歷陽安豐堂邑六郡諸軍事、豫州刺史,持節、常侍、將軍如故。 子,以長沙景王第二子義慶爲嗣 平桓謙功,進封南郡公,邑五千戶。高祖受命,贈大司馬,追封臨川王,食邑如先。道規無 不拜。八年閏月,薨于京師,時年四十三。追贈侍中、司徒。 道規進號征西大將軍、開府儀同三司,加散騎常侍,固辭。 加班劍二十人。諡曰烈武公。 俄而寢疾,改授都督豫江二 以疾

慶爲荆州,廟主當隨往江陵,太祖詔曰:「褒崇道勳,經國之盛典,尊親追遠,因心之所隆。 初,太祖少爲道規所養,高祖命紹焉,咸以禮無二繼,太祖還本,而定義慶爲後。曰三義

實班劍百人。 九旒 臨 獻者矣。 贊景業;陵威 故 祏,初祀 運,靈武 Ш 侍 太妃曹氏後薨,祭皆給鸞輅九旒,黃屋左纛,輼輬車,挽歌一部,前後部羽葆、鼓吹,虎 ,黃屋左纛,給節鉞、前後部羽葆、鼓吹、虎賁班劍百人,侍中如故。」及長沙太妃檀氏 中、大司 西夏,思崇嘉禮,式備徽章,庶以昭宣風度,允副幽顯。 宏發,輯寧內 **朕幼蒙殊愛,德廕特隆,豐恩慈訓,義深情戚,永惟仁範,感慕纒懷。** (致討 馬臨川烈 則克剪梟鯨 外,誅覆羣 武 王,體道欽明,至德淵邈,叡哲自天,孝友光備。 ·凶,固已化被江漢,勳高微管,遠猷侔於二南,英雄邁 逮妖逆交侵, 方難孔棘,勢踰 累棊,人無固志。 其追崇丞相, 爱始協規, 加殊禮, 今當擁移寢 王神 於兩 謨獨 則翼

熙十二年,從伐長安,還拜輔國將軍、北青州刺史,自己未之任,徙督豫州諸軍事、豫州刺 嘉元年,轉散騎常侍,秘書監,徙度支尚書,遷<u>丹</u>陽 史,行三沒督淮北諸軍事,豫州刺史、將軍並如故。 義 慶幼爲高祖所知,常曰:「此我家豐城也。」年十三,襲封南郡公。除給事,不拜。 尹,加輔 永初元年,襲封 國將軍、常侍 臨川王。 並 如 徴爲侍 元

遇 市 朝,鬭不反兵。 時 有民黃初妻趙殺子婦,遇赦應徙送避孫讎,義慶曰:「案周禮父母之仇,避之海 蓋 一以莫大之冤,理不可奪,含戚枕戈,義許必報。 至於親 戚爲戮,骨肉 外,雖

此 趙之縱暴,本由於酒,論心卽實,事盡荒耄。豈得以荒耄之王母,曰曰等行路之深讎。臣謂 相 ·孫忍愧銜悲,不違子義,共天同域,無虧孝道。 · 碊,故道乖常憲,記無定准,求之法外,裁以人情。 且禮有過失之宥,律無讎祖之文。況

邪。旣非遠者之事,又不知吉凶定所,若在都則有不測,去此必保利貞者,豈敢苟違天邪。」 內外之任,本以維城,表裏經之,盛衰此懷,實有由來之事。設若天必降災,寧可千里逃避 晉孝武初有此異,彼庸主耳,猶竟無他。天道輔仁福善,謂不足橫生憂懼。兄與後軍,各受 言之,益無懼也。鄭僕射亡後,左執法嘗有變,王光祿至今平安。日蝕三朝,天下之至忌, 義慶固求解僕射,乃許之,加中書令,進號前將軍,常侍、尹如故。 曰:「玄象茫昧,旣難可了。且史家諸占,各有異同,兵星王時,有所干犯,乃主當誅。以此 六年,加尚書左僕射。八年,太白星犯右執法,義慶懼有災禍,乞求外鎮。 太祖詔譬之

宗室令美,故特有此授。 史。[三]荆州居上流之重,地廣兵强,資實兵甲,居朝廷之半,故高祖使諸子居之。 在 京 尹九年,出爲使持節、都督荆雍益寧梁南北秦七州諸軍事、平西將軍、荆州刺 性謙虛,始至及去鎭,迎送物並不受。 義慶以

幽遐。 十二年,普使內外羣官舉士,義慶上表曰:「詔書疇咨羣司,延及連牧,旌賢仄陋,拔善 伏惟陛下惠哲光宣,經緯明遠,皇階藻曜,風猷日昇,而猶詢衢室之令典,遵明臺之

[号] 業 伏 弘 素 行 叡 軍 何 均 一、潛 爲 遠 訓 見 事 爲 成 典敍 之有 井 閨 前 衛 江 ,降淵慮於管庫, 居 州 庭 臨 渫 將 研 多孝 沮 軍、江 志 志 以述皇代 亦 義 令 固 著隣黨 有 慶留 新 耽情墳 冰霜。 此 州 野 制。 心 庾 刺 之美。 足 寔,秉眞 紆 撫物,州 籍,亦足鎭 史,写过持節 臣 在 以敦化率民,齊教軌俗。 聖思乎版築,故以道邈往載,德高 往 州 十六年, 年 八 ·辟爲 統 履 年, 息 約,愛敬淳 內官 如 爲 州 頹 故。 改 長 祭酒,未汙 競,獎勗 西 )授散 土 親 老,不 所 七 深。 騎常 安。 年,即本號都督 浮 昔在 隨 其 動。 侍、 前 撰 慮。 在官舍者,年 徴 徐州先賢傳十卷,奏 處士 都督江 母 奉 憂,毀瘠 若 朝 朝 南 請 前 州 命 郡 南竞徐兗青冀幽 武 玉。 豫州 遠暨, 師覺, 聽遣 陵龔祈, 過 禮,今罹 臣敢竭虛闍 之西陽晉熙 五. 玉 才 吏餉 帛 學 上之。 恬 明 遐 父疚 和 家。江巴先是,王 臻, 敏, 平 六 新 泣 叉 簡 州諸 祗 異 操 蔡 擬 人 介清修, m 承 貞潔 班 明旨 間 軍 有 郡 固 出 聞 [典 純

鮑 必 唯 照等 至。 晚 節 爲 太尉 奉 性 並 養 簡 爲 袁 沙 素 辭 淑 門 寡 章 嗜欲 文冠 頗 之美,引爲 致 當 ",爱好 費 時, 損 義 佐 文 少 (義),才 慶 史 善 在 國 騎 江州 臣。 乘 詞 雖 請 及長 太祖 不 爲 多 以 與 一,然 衞 義慶 世 軍 路 足爲宗室之表。 誻 書 艱 議 難 一,常 參 不不 軍 加 一,其餘 復跨 意 斟 馬。 酌 吳郡 受任 招 一歷藩, 陸 聚文學 展 東 無 之士 浮 海 何 淫 近遠 長 之過 瑜

南兗

州

刺

史

。[三]

加

開

府

儀

同

三司

鮑照字 明 遠, 文 解 贍逸,嘗 爲古樂府, 文甚遒 麗。 元嘉 <sup>东</sup>中, 河 濟 俱清,當時 以 爲美瑞

列

照為河淸頌,其序甚工。其辭曰:

盈眥,而美溢金石,詩人於是不作,頌聲爲之而寢,庸非惑歟 岳,彫篆素,昭德垂勳,可謂多矣。 「於昭于天」。 臣聞善談天者,必徵象於人,工言古者,先考績於今。 素狐玄玉,聿彰符命,朴牛大螾,爰定祥曆,魚鳥動色,禾雉興讓,皆物 而史編唐堯之功,載「格于上下」,樂登文王之操,稱 鴻、犧以降,退哉邈乎,鏤山

國,漁 間開 野廬 樂。 鐵 之臣、號令不嚴而自肅、無辱鳳舉之使、靈怪不召而 秩禮,罷露臺之金; 紓國振民, 成,上下含熙;文同軌通,表裏禔福。 光曩代,事華前德矣。 而已哉。 有 物色異人,優游據正。 自我皇宋之承天命也,仰符應龍之精,俯協河龜之靈,君圖帝寶,粲爛瑰英,固業 邊城偃标。 鹽杞梓之利, 盈,歌吹無絕。 是以嘉祥累仍,福應尤盛,青丘之狐,丹穴之鳥,栖阿閣,遊禁園。金芝九 冀馬南金,塡委內府, 傍贍荒遐。 聖上天飛踐極,迄茲二十四載。 朱輪疊轍,華冕重肩。 顯不失心, 傾鉅橋之粟。 士民殷富, 五陵旣有慚德, 宮宇宏麗, 三川莫之能比。 燿德中區,黎庶知讓,觀英遐表,夷貉懷惠。 幽無怨氣。 馴象西爵, 充羅外囿。 約違迫脅,奢去泰甚。 豈徒世無窮人, 民獲休息,朝 精炤 自彰。 日月,事 道化周流,玄澤汪濊。 萬里神行,飆塵不起。 阿紈綦組之饒,衣覆宗 洞天情。 燕無留飲,畋不盤 故不勞杖斧 呼韓、罷酤 地 農商 卹勤 平天

是 而 以琬 聖上 一,木禾六刃,秀鲖池,發膏畝。[云]宜以協調律呂,謁薦郊廟,煙霏霧集,不可勝紀。 碑鏐檢, 猶 昧旦夙 盛典蕪而 興,若有望而未至,閎規遠圖,如 不治,朝神省方,大化 抑 有追而莫及,神明之貺,推 而 未許。 崇文協律之士,蘊儛頌於 而 弗居也 然

外

坐朝

以陪宴之臣,懷揄揚於內,三靈佇眷,九壤注

心,旣有

日

矣。

屬, 容 鳴 生, 傳 美 厥 昭 曰:「千載一 源被 <sup>八</sup>之所 日:一 鳥 應 啓皇明 施 國富刑 與三 躍 如 歲宮 金 傳 彼 魚 俟河之淸,人壽幾何」皆傷不可見也。 歌 羈 代 者也。 . 乾維,月躔蒼陸,長河巨濟 者 於後。〔三〕絕景揚光,清埃繼路,班固 頌。 滌 清,鴻德也。 同 聖,是旦暮 近, 唯天爲大,堯實則之,皇哉唐哉,疇 穢河渠,至祥也。 風。 察之上代,則奚斯、吉甫之徒 道之所感者深, 語曰:「影從表,瑞從德。」 由是言之,斯迺臣子舊職, 也。」「三〇〇豈不大哉。 制 禮 裁樂,惇 大寶 則慶之所流 、異源 鴻德,文教 風遷俗,文教也。 此 同淸,澄波 い 鳴 玉 者遠。 夫四皇六帝, 其効 武 國家通義,不可輟 稱 與 然 漢成 爲 功,其崇如 則古人所不見者,今彈 焉。 鑾於前 是以 譲。 萬 之世 宣尼 誅箠 一壑,潔瀾千里。 豐 抑叉 樹聲長 功韙 , ·稱「鳳鳥不至, 視之中 此 奏御 逋 聞 羯, 命, 之, 幽 者千 世, 也 束 古, 明 潤 勢之所 協贊, 顙 大寶 色縢 臣 有 則 斯誠曠世偉觀, 徐闕, 見之矣。 餘篇 雖不敏, 相 河不 也。 策 **覃者淺** 民 如 武 主 祇 文章之 盛 澤 出 功也。 與 一衰之 一德形 浸羣 孟 圖 則 軻

一四八〇

勉乎。

殺。

照才 世 祖 以照為 盡,實不然也。 中書舍人。 臨海王子頊爲荆州,照爲前軍參軍,掌書記之任。子頊敗,爲亂兵所 上好爲文章,自謂物莫能及,照悟其旨,爲文多鄙言累句,當時咸謂

還朝。二十一年,薨於京邑,時年四十二。追贈侍中、司空,諡曰康王。 義慶在廣陵,有疾,而白虹貫城,野麕入府,心甚惡之,固陳求還。 太祖許解州,以本號

步兵校尉。昇明三年反,伏誅,國除。綽弟綰,早卒。 子哀王燁字景舒嗣,官至通直郎,爲元凶所殺。追贈散騎常侍。 子綽字子流嗣,官至

燁弟衍,太子舍人。衍弟鏡,宣城太守。鏡弟穎,前將軍。 穎弟倩,南新蔡太守。

遵考,高祖族弟也。曾祖淳,皇曾祖武原令混之弟,官至正員郎。 祖巖,海西令。

子,彭城內史。

高祖諸子並弱,宗室唯有遵考。 遵考始爲將軍振武參軍,預討盧循,封鄉侯。自建威將軍、彭城內史隨高祖北伐。 長安平定,以督幷州司州之北河東北平陽北雍州之新平安

考服屬 定 軍,遷冠 五 郡 之親, 諸 軍 軍事 將 軍 國戚 、輔 國將 晉帝遜位 未遠,宗室無多,宜蒙寵 軍、幷州 居秣陵宮,遵考領兵 刺史、气三領 河東 爵。 防衛 太守,鎭蒲坂。 可封營浦縣侯, 高 祖 初卽 關中失守,南還, 大位 食邑五百戶。」以本號爲彭 一, 下 推恩之詔, 除 百.广 游擊將 遵

城、沛二郡太守

<u></u>
拌四州南豫州之梁郡弋陽馬頭荆州之義陽四郡諸軍事、前將軍、豫州刺史,領南梁郡太守。 書,遷吳興太守,秩中二千石。 事、前將軍、徐克二州刺史。未之鎭,留爲侍中,領左衞 北淮南諸軍事 年,爲有司所糾,上不問,赦還都。七年,除太子右衞率,加給 事、征虜將軍 二十一年,坐統內旱,百姓饑, 九 軍 ,年,遷右衞將軍,加散騎常侍。 ,入直殿省。 十五年,又領徐州大中正、太子中庶子,本官如故。其年,監徐克二州豫州之梁郡諸 景平元年,遷右 、寧蠻校尉、雍州 、征虜將軍、南兗州 出為 使持節、督雍梁南北 衞將軍。 元嘉二年,出爲征虜將軍 詔加賑給,而遵考不奉符旨,免官。 二十五年,徵爲領軍。 刺史,襄陽新野二郡太守。〔三〕遵考爲政嚴暴,聚斂 十二年,坐厲疾不待對,免常侍,以侯領右衞。 刺史,領廣陵太守。又徵爲侍中,領後軍將軍,徙太常。 秦四州荆州之南陽竟陵順陽襄陽新 二十七年,索虜南至瓜步,率軍出江 將軍。 、淮南太守。 事中。 明年,出爲使持節、監豫同雍 起爲散騎常侍、五兵尚 明年,轉使持節 明年,督南徐兗州之江 野隨六郡諸 明年,復本 無節。 領 五. 軍 護

## 上,假節蓋。〔一言〕

失明。 府儀 太守。 杖。 <u>崇憲太后崩,太僕解,餘如故。泰始五年,賜几杖,太官四時賜珍味,疾病太醫給藥,固辭几</u> 軍 前 紫光祿大夫,常侍如故。 書右僕射,領太子右衞率。 步承候世祖,又坐免官。孝建元年,魯爽、臧質反,起爲征虜將軍,率衆屯臨沂縣,仍除吳興 旭 、南豫州刺史。太宗卽位,以爲侍中、特進、右光祿大夫,領崇憲太僕。給親侍三十人。 廢帝卽位,遷特進、右光祿大夫,常侍、太僕如故。 防守之。 同三司,侍中如故。諡曰元公。 後廢帝卽位,進左光祿大夫,餘如故。元徽元年卒,時年八十二。追贈左光祿大夫、開 三十年,復出爲使持節、監豫州刺史。 明年,徵爲湘州刺史,未行,遷尙書左僕射。 遵考斬安期等,起義兵應南譙王義宣,義宣加遵考鎭西將軍。 明年,轉左僕射,常侍如故。 明年,又除領軍將軍,加散騎常侍。五年,復遷尚書右僕射、金 遵考無才能,直以宗室不遠,故歷朝顯遇。 元凶弑立,進號安西將軍,遣外監徐安期、仰捷 三年,轉丹陽尹,加散騎常侍。復爲尚 景和元年,出督南豫州諸軍事、安西將 又領徐州刺史、大中正、崇憲太僕。 夏侯獻率衆至瓜 年老有疾

子澄之,順帝昇明末貴達。

燈之弟琨之,爲竟陵王誕司空主簿,誕作亂,以爲中兵參軍,不就,絷繫數十日,終不

受,乃殺之。追贈黃門郎。詔吏部尚書謝莊爲之誄

州。 遵考從弟思考,亦被遇,歷朝官,極淸顯,爲豫章、會稽太守,益、徐州刺史,凡經十郡三 泰始元年,卒於散騎常侍、金紫光祿大夫,至司時年七十五。追贈特進,常侍、光祿如

故。

業始終,惜矣哉! 知。 則 城 (壞壓境, 上流之難方結。 烈武王覽羣才,揚盛策,一舉磔勍寇,非曰天時,抑亦人謀也。 史臣曰:餘妖內侮,偏衆西臨,尚、桓交逼,荆楚之勢危矣。必使上略未盡,一算或遺, 敵資三分有二之形,北向而爭天下,則我全勝之道,未可或 降年不永,遂不得與大

#### 校勘記

長沙景王道憐 祖諱 道鄰字道鄰, 按嚴可均輯全宋文收錄宋故散騎常侍護軍將軍臨澧侯劉使君墓誌云:「曾祖宋 侍中、 太傅、長沙景王。」 是道憐本作道鄰。 顏師古匡謬正 俗俗 亦云:

列傳第十一 校勘記

宋高

祖

弟

道鄰,

史牒誤爲憐字,讀者就而

呼之,莫有知其本實。

余家嘗得宋高祖集十卷,是宋

元嘉時祕閣官書,所載道鄰字,始知道憐者是錯。」

<u>\_</u> 道憐率寧遠將軍孟龍符龍驤將軍孔隆及穆之等追 「寧遠將軍孟龍符」七字,各本並作「寧孟」

洪頤煊諸史考異云:「寧孟文有脫誤。 當云率寧遠將軍孟龍符,因涉下文而譌。」孫虨宋

書考論 云:「孟當爲孟龍符,時龍符方由寧遠將軍遷建威將軍,寧當爲寧遠將軍,史文脫耳。」按

洪、孫說是,今訂正。

**ハ**ミ 封新渝 縣男 北監本、毛本、殿本、局本、文文程、行新渝」,三朝本作「新淦」,下文道憐子義宗亦

爵 新 渝 縣侯,則作新渝 為是。 按州郡志、江州豫章 郡 有新淦縣,安成郡有新喻縣,新渝 即新喻。

元 和 郡 縣志 新喻縣, 吳孫皓分宜春縣 置 新 渝 縣 以渝 水爲名。 今 曰 新喻 因聲變也 本書

新喻、新渝互見,彭城王義康傳作新喻侯義宗。

四 徵 元 為都 濟校 勘 督竞青二州晉陵京 記云:「當 作諸 郡 口 軍事,各本並譌。」按張校是,今乙正。 淮 南諸 郡軍 事竞青州 刺 史 「諸郡 軍事」各本並作 又「兗青州 刺史」, 「諸軍郡事」,張 孫彪宋書考

論云:「此青字涉上文衍。是年青州刺史命檀祗。」

五 討 + 司 年 馬 休 各 之在 本 並 義熙十 作「十一年」, 年 則 孫彪 前 宋書考論 年當作十年,孫說 云:「下 文『明年計司 是一个改正 馬休之』,十一年當爲十年。」按

ベレ 以爲都督荆湘益秦寧梁雍七州諸軍事驃騎將軍開府儀同三司領護南蠻校尉荆州 刺 史 「諸軍

事」之「事」字、各本並脫、據元龜四五五、通鑑晉安帝義熙十一年補。 「領」各本並作 鎭」, 今改

正

<del>-</del>L: 使持 節散騎常侍都督江州豫州西陽新蔡晉熙四郡軍事征南大將軍開府儀同 三司 江 州 刺 史永

脩 縣 開 國 公道 濟 三郡 而 云 四 郡,當有 誤。

九九山 遷使持節監 故左將軍青州刺史龍陽 豫司雍幷四 縣開 州諸軍事豫 國侯鎭惡 州 刺 史 各本 ·並脫「左」字,據王鎭惡傳 各本 並脫「事」字,據远龜二七八補。

 $\begin{bmatrix} 0 \end{bmatrix}$ 而可 輯 柔 頓 闕 「柔」各本並作「粲」,據远龜二七三改。

昇明 元 年謀 反伏誅 「元年」各本並作「二年」,據順帝紀改

義融 歷 侍中左 一衞將軍 各本並脱「將」字、今補。

訪問 乃 知 是 襲 各本並脫「是」字,據南史補

於額 檐 湖 見 擒 額檐湖」南齊書作「雒檐湖

二吾 留郭 銓 何澹之等固守盆口 郭銓」各本並 作 「郭鈐」,據本書劉懷肅傳及晉書桓玄傳、通鑑改

說 見 本 書卷 一校 勘 記 第十五 條。

且 可 頓 兵養 銳 各 本原 作「頓」 兵銳」,文不可通,今據通鑑晉安帝元興三年補「養」字。

二二 揚 武 將 軍 孟 Щ 圖 據 魯 Щ 城至於是毅攻魯山 城 魯山 .城」各本並作「魯城」,據本書劉懷肅傳、通

}鑑 晉安帝元興三年訂正。

遷使持節都督荆寧秦梁雍六州司州之河南諸軍事領護南蠻校尉荆州刺史 按用剂、

雍只 五. 州 ,尚缺一 州,疑有脫譌。

二凸 爲賊黨荀 7林所破 本 ·書武帝紀、南史、 元龜三六三、四六一作「荀林」。晉書姚興載記、 通鑑作

荷林」。

聞者頗有去就之計 「者」御覽二七九引、远龜四二二、四三一作「諸君」,通典兵典作「諸軍」,

建康 實錄 作「爾等」,通鑑作「諸長者」。

 $\subseteq$ 

太祖

還本

而定義慶爲後

各本並脫「義慶爲後」四字,據南史補。

 $\subseteq$ 還拜 輔 國 將軍北青州刺 史 各本並脱「拜」字,據远龜二七八補。

徙督 豫 州 諸軍 事 豫 州 刺 史 各本並脫「事」字,據元鑑二七八補

분 得 以荒耄之王 母 各本並脫「豈得以荒耄」五字、據南史、元龜六一五補。

宣告 出 爲 使 持節 都 督荆 雍 益 寧梁南 北秦七州諸軍事平西將軍荆 州 刺 史 各本 並脱「事」 字,據元龜

二七 八

**全** 年聽 遣 五. 吏餉 家 「五吏」、元龜六七五 同。 南史作「三吏」。

宝艺 改授散騎常侍都督江州豫州之西陽晉熙新蔡三郡諸軍事衞將軍江州刺史 各本並脫 「豫州」

錢大昕廿二史考異云: 「當云豫州之西陽、 晉熙、 新蔡、 史脫豫州二字。」 按錢說是,今

補正。

即本號都督南兗徐兗青冀幽六州諸軍事南兗州刺史 「南党」下各本並行「州」字、張森楷校勘

記云:「州字衍文。」按張校是,今删正。

金芝九莖木禾六刃秀銅池發膏畝 鮑照集作「金芝九莖、木禾九秀、銅池發、膏畝腴」。

[MO] 孟軻曰千載一聖是旦暮也 按今孟子無此語。

[二] 施金羈於後 「施」鮑照集作「馳」。

以督幷州司州之北河東北平陽北雍州之新平安定五郡諸軍 事輔國將 軍幷州刺史

云:「云五郡而數之止 四郡,以廬陵王義眞傳前後文參證之,則所脫者卽河北 郡 也。

尉雍州刺史襄陽新野二郡太守 出為使持節督雍梁南北秦四州荆州之南陽竟陵順陽襄陽新野隨六郡諸 各本並脫「南陽」之「陽」字,據孫彪宋書考論說補。 軍事征虜 將 軍 又各本並 寧 蠻 校

脫「諸軍事」之「事」字,今訂補。

CMBD 假節蓋 「蓋」各本並作「置」,據远龜二七八改。

年卒,此有誤。」按思考泰始二年三月爲徐州刺史,見本書明帝紀。 泰始元年卒於散騎常侍金紫光祿大夫 孫彪宋書考論云:「思考泰始二年三月命徐州, 必非元

列傳第十一 校勘記

# 宋書卷五十二

## 列傳第十二

#### 庾倪 王誕 謝景仁 弟述 衰湛 弟豹 褚 叔度

庾悦字仲豫,潁川陽陵人也。 曾祖亮,晉太尉。 祖羲, 3 吳國? 內史。 父准,三西中

郎

將、豫州刺史。

駕從 將軍、安遠護軍 事史。 倪 少為 遷驍 衞將軍琅邪王行參軍,司馬,徙主簿,轉右長史。 丁、武陵: 騎將軍。 內 史。 玄篡位 以病 一,徙中 去 職 書侍郎。 高祖定京邑, 桓玄輔 武陵王遵承制, 政, 領 豫州, 以 悦 以 爲 悅 寧遠 爲 别

之松 從征 廣固 滋六郡諸軍 鎭軍府版諮 ,竭其誠力。 議參 事 建威將軍、 軍, 盧 循 轉車騎 逼京都,以爲督江州 江州刺史, 從 事 中 鄎。  $\equiv$ 劉毅請為撫軍 豫州 從東道出 之西 鄱 陽 司馬,不 陽。 新蔡 汝南 循遣 就。 將英糾千餘 潁 JII 遷車騎中 司 州 之恒 人斷 軍 農 司馬 五畝 揚州

列

傅

第十

庾

悅

**嶠,悅破之,進據豫章,絕循糧援。** 

先 故。 京, 亡去 得 倚 當 不 不 言之,足爲國恥。 其 必 及 逆 損 宜 子 要府 無處不可爲適,豈能以此堂見讓。」悅素豪,徑前,不答瀫語。 實 置 就 順 鵝 今氣 初 院厨饌甚盛,不以及皺。 毅旣不去,院甚不歡,俄頃亦退。四 毅又相聞曰:「身今年未 論 則 爲 一、豈能 一不避 之衝 臣 軍府,上 之備 無以 重複 州僚佐 毅家 謬 而 一力弱 荷 領 幽 救 悉 以殘炙見惠。」悅又不答。 在 增統, 之,蓋 昔胡 (急病於已危, 拯塗炭於將絕。 深 |表陳之日:「臣聞天以盈 共出東堂。 京口 自非 今江 況乃地在無軍,而軍府猶置,文武將佐,資費非一,豈所謂經國大情,揚湯 民慢,而器 寇 傷慨 出 , 貧約 縦 於 右 、財單 權 品 逸,朔馬 兼 |毅已先至,遣與悅相聞,曰:「身久躓頓,營一遊集甚難。 事, 過常, 品 懷。 運所 力竭,無以至此。 , 戶 因 夫設官分 繼。 不 藉 臨 嘗與 旣 盈 江 自桓玄 一,抗禦之宜 數十萬, 久,遂為常 (郷曲 盧循 虚爲道,治 職 士大夫往東堂共射。 平後,毅求都督江州,以江州內地, 自 以來,驅蹙殘毀,至乃男不 若不 地 軍 頃 不 훒 則。 或 我車屢駕,干戈溢境,江州 以損 踰 曲 殊 出權計。 心矜理 江州 數 用, 益 千 | 爲義。時否而 牧民以息務為 里, 而 在腹心之中,憑接揚、豫,藩 ,有所改移,則靡 以溫 衆人並避之,唯毅 統 時脫爲司 嶠 司 鱗 明達,事 次 被養,女無 大, 政不革, 徒右 未獲 武 遺 以 由 略以濟 長 減 治民為 之歎,奄焉 民凋 史, 己,猶 隅 息, 對 留射 君 一,逃 之地, 而 暫至 如 大 屛 事 事 意 而 覺 如 所 爲

費。 千兵守尋陽,建威府文武三千悉入毅府,符攝嚴峻,數相挫辱。 遏,可卽州府千兵,以助郡戍。」於是解脫都督、將軍官,以刺史移鎭豫章。 年,可有生氣。 謂 少日卒。 去 因 火者哉。 其 刺史庾悅,自臨州部,甚有恤民之誠,但綱維不革, 所利,以濟其弊者 時年三十八。追贈征虜將軍。 其州郡邊江,民戶遼落,加以郵亭嶮闊 且屬縣凋散,亦有 也。 愚謂宜解 所存,而役調送迎,不 軍府,移治豫章, 以廣固之功,追封新陽縣五等男。 一、畏阻 自非綱目 ·得休 處 風波,轉輸往還,常有 十郡之中,厲 止,亦謂 悦不得志, 疽發背, ·所理。 應隨宜幷減, 簡 尋陽接蠻, 毅以親將 惠之政, 淹 一廢,又 到豫章 趙恢領 以簡 宜 此 /非所 及 有 數 防 衆

拔, 句。 」因出本示誕。 因而用之。 誕 王 誕字茂世,琅邪臨沂人,太保弘從兄也。 少有才藻,晉孝武帝崩,從叔尚書令珣爲哀策文,久而未就,謂誕曰:「猶少序節物一 襲爵雉鄉侯,拜祕書郎,琅邪王文學,中軍功曹。 誕攬筆便益之,接其秋冬代變後云,「霜繁廣除,風回高殿」。 珣嗟歎清 祖恬,中軍將軍。父混,太常

史,領廬江太守, 隆安四年,會稽 加 鎭 王世子元顯開後軍府,又以誕補 蠻護軍。 轉龍驤將軍、 琅邪內史,長史如故。 功曹。 **尋除尚書吏部郎,仍爲後軍長** 誕結事元顯嬖 人人張法

在此 之。 **脩爲之陳請,又言脩等得觅之由,乃徙誕廣州。 | 玄,欲悉誅|桓氏,誕固陳脩等與||玄志趣不** 順,故爲元顯 私非計。 此,空移歲月。」循甚然之。時廣州刺史吳隱之亦爲循所拘留,誕又曰:「將軍今留吳公,公 無 誕久客思歸,乃說循曰:「下官流遠在此,被蒙殊眷,士感知己, 用。 孫伯符豈不欲留華子魚,但以一境不容二君耳。」於是誕及隱之並得還 素爲劉鎭軍所識,情味不淺,若得北歸,必蒙任寄,公私際會,思報厚恩,愈於停 所寵。元顯納妾,誕爲之親迎。 ·同,由此得免。 隨府轉驃騎長史,將軍、內史如故。 盧循據廣州, 脩,誕甥也。 以誕爲其平南府長 實思報答。 及玄 得志,誕將見誅, 史,甚賓禮 本非戎旅, 元顯討桓

史。 留府事,心不自安,高祖甚慮之。 甚委仗之。 去。」誕日:「長民知我蒙公垂眄,今輕身單下,必當以爲無虞,乃可以少安其意。」高祖笑曰: 同起布 · 卿勇過賁、育矣。」 於是先還 除 母憂去職。 衣,一時相推耳,今旣已喪敗,不宜復使立功。」高祖 員外散騎常侍,未拜,高祖請爲太尉諮議參軍,轉長史。 北伐廣固,領齊郡太守。 高 祖 征劉毅,起爲輔國將軍,誕固辭軍號,墨経從行。時諸葛長民行太尉 毅旣平,誕求先下 盧循自蔡洲南走,劉毅固求追討,高祖持疑未決,誕密 高祖 曰:「長民似有自疑心,卿詎宜便 從其說。 盡心歸奉,日夜不 七年,以誕爲吳國 懈, 高祖 內

九年,卒,時年三十九。以南北從征,追封作唐縣五等侯。 子翮,宋世子舍人,早卒。

謝景仁,陳郡陽夏人,衞將軍晦從叔父也。 名與高祖同諱,故稱字。 祖據,太傅安第二

弟。父允,宣城內史。

徒,皆騎馬散從,而使景仁陪輦 騎將軍。 |玄爲太尉,以補行參軍,府轉大將軍,仍參軍事。 見景仁,甚知之,謂四坐曰:「司馬庶人父子云何不敗,遂令謝景仁三十方作著作佐郎。」〔三 張 法 順,權傾一時,內外無不造門者,唯景仁不至。年三十,方爲著作佐 景仁幼時與安相及,爲安所知。始爲前軍行參軍、輔國參軍事。 景仁博聞强識,善敍前言往行,玄每與之言,不倦也。 玄建楚臺,以補黃門侍郎。 玄出行,殷仲文、卞範之之 會稽王世子元顯嬖人 郎。 及篡位, 桓玄誅元顯, 領驍

要應 景仁爲玄 是太傅安孫 有 高 方。 祖 所召。 爲桓脩撫 我 欲 及 平京邑,入鎭石頭,景仁與百僚同見高祖,高祖目之曰:「此名公孫也。」謂 與客共食,豈當不得待。」竟安坐飽食, 玄性促急,俄頃之間 軍中兵參軍,嘗詣景仁諮事,景仁與語悅之,因留高祖共 ,騎詔續至。 高祖屢求去,景仁不許,曰:「主上見待, 然後 修應召。 高祖甚感之,常謂景仁 食。 食未辨,而

列

傅

景仁 遷司 日「承 徒 左 長 史。 制 府 出爲高祖鎭軍司馬,領晉陵太守,復爲車騎司 須記室參軍,今當相屈。」以爲大將軍武陵王遵記室參軍,仍爲從事中郎, 馬。

解 部 儲 園寢,豈 鮮卑密邇疆甸,屢犯邊垂,伐罪弔民,於是乎在。 之烈,應天人之心,匡復皇祚,芟夷姦逆,雖業高 止 尚書。 副 |高祖,以爲:「苻堅侵境,謝太傅猶不自行。 職 高 義熙五年,高祖以內難旣寧,思弘外略,將伐鮮卑。 有 祖深以根本爲憂,轉景仁爲大司馬 時從兄混爲左僕射, 坐長寇虜,縱敵貽患者哉 依制不得相 」高祖納之。 臨, 左司馬,專總府任,右衛 宰相遠出,傾動根本。」景仁獨曰:「公建恒、文 振古,而德刑未孚,宜推亡固存,廣樹威略。 高祖啓依僕射王彪之、 平定之後,養銳息徒,然後觀兵洛汭,修復 及北伐,大司馬琅邪王,天子母弟, 朝議皆謂不可。 將軍,加給事 尚書 王 砂 前 例, 劉毅時鎮姑孰 中,又遷吏 屬當 固固 不

中 丞 一鄭鮮 坐選 之所糾 東部令史邢安泰爲都令史、平原太守,二官共除,安泰以令史職拜謁陵廟, ,白衣 領 職。八年,遷領軍將軍。 十一年,轉右 「僕射,仍轉左 一僕射。

爭來 追贈金紫光祿大夫,加散騎常侍。 高祖 性矜嚴 雅 整潔,居宇淨麗,每睡,轉唾左右 相重,申 以 婚 姻,廬陵王 葬日, 義眞妃,景仁女也。 高祖親臨, 哭之甚慟。 人衣,事畢,即 十二年,卒,公 聽一日澣濯 與驃騎將軍道憐書曰「謝 時年四十七。 每欲 唾,左右

之共 景仁殞逝,悲痛摧割,不能自勝。 康 時務,一旦至此,痛惜兼深。 汝聞問惋愕,亦不可 往矣柰何 1 當復柰何 堪。 \_1 其器體淹中, 情寄實重, 方欲與

子恂,鄱陽太守。恂子耀,善吹笙,官至西陽太守。

之謂 車欲還 王休若衞軍錄事參軍、山陰令,坐事誅。 軍 ·襲||毅,已至城下,時||毅疾病,佐吏皆入參承。||純參承畢,已出,聞兵至,馳還入府。 純 景仁弟純字景懋,初爲劉毅豫州別駕。 曰:「君但隨僕。」純不從,扶兩人出,火光中爲人所殺。 外解,純叱之曰:「我人吏也,逃欲何之!」乃入。及殼兵敗衆散,時已暗夜,司馬毛脩 毅鎭江陵, 以爲衞軍長史、南平相。 純孫沈,太宗泰始初,爲巴陵 王鎭惡率 左右引

岸,當須營理。 喪舫流漂,不知所在,述乘小船尋求之。經純妻庾舫過,庾遣人謂述曰:「喪舫存沒,已應有 而獲免,咸以爲精誠所致也。 在,風波如 述字景先,少有志行,隨兄純在江陵。 、此,豈可小船所冒。 小郎去必無及,寧可存亡俱盡邪。」 述 如其已致意外,述亦無心獨存。」因冒浪而進,見純喪幾沒,述號叫呼天,幸 高祖聞而嘉之,及臨豫州,日到諷中正以述爲主簿,日以甚被知 純遇害,述奉純喪還都。行至西塞,值暴風,純 號泣答曰:「若安全 至

列

傳

第

飲食,必嘗而後進,不解帶、不盥櫛者累旬,景仁深懷感愧 意,又慮高祖命之,請急不從。 景仁愛其第三弟處而憎述,嘗設饌請高祖,希命處豫坐,而高祖召述。 高祖馳遣呼述,須至乃歡。 及景仁有疾, 述盡心營視 述知非景仁夙

郎,世子中軍主簿,轉太子中舍人,出補長沙內史,有惠政 轉 ·太尉參軍,從征司馬休之,封吉陽縣五等侯。 世子征虜參 軍,轉主簿,宋臺尙書祠部

之,不俟吾言也。」義康入相,述又爲司徒左長史,轉左衞 遇之甚厚。 練,著於歷職,故以佐汝。 先是,述從兄曜爲義康長史,喪官,述代之。 人曰:「我見 元嘉二年,徵拜中書侍郞。 尚書僕射殷景仁、領軍將軍劉湛並與述爲異常之交。 謝道兒,未嘗足。」道兒,述小字也。 汝始親庶務,而任 明年,出爲武陵太守,彭城王義康驃騎長史,領南郡 太祖與義康書曰 重事殷, 宜寄懷羣賢, 以盡弼諧之美, 將軍。 莅官清約,私無宅舍。 「今以謝述代曜 美風姿,善舉止, 其 湛 才 想 太守。 義康 應詳 自 得

布, 納焉。 雍州 則爲侵奪主恩, 述語 刺 史張邵 子綜 曰:「主上於邵 以贖貨下廷尉,將致大辟,述上表陳邵先朝 不可之大者也。」使寫對前焚之。 夙誠,將加 無恕, 吾所啓謬會, 故特見酬 太祖後謂邵曰:「卿之獲免, 舊勳,宜蒙優貸,太祖 高納 耳。 若此 謝述有 疏 手 迹宣 詔

述亡而湛存,吾所以得罪也。」太祖亦曰:「謝述若存,義康必不至此。」 省,爲吏民所懷。 赴,望船流涕。十七年,劉湛誅,義康外鎮,將行,歎曰:「謝述唯勸吾退,劉湛唯勸吾進,今 |述有心虛疾,性理時或乖謬。除|吳郡太守,以疾不之官。病差,補|吳興太守,在郡淸 十二年,卒,時年四十六。喪還京師, 未至數十里,殷景仁、劉湛同乘迎

緯尚 宗泰始中,至正員郎中。 太祖第五女長城公主,素爲約所憎,免死徙廣州。 三子:綜、約、緯。 綜有才藝,善隸書,爲太子中舍人,與舅范曄謀反,伏誅。 孝建中,還京師。 方雅有父風。太 約亦坐死。

湛 |袁湛字士深,陳郡陽夏人也。 祖耽,晉歷陽太守,父質,琅邪內史,並知名。 少 爲 從外 祖謝安所知,以其兄子玄之女妻之。 初為 衛軍行 :參軍,員外散騎,通直正

員 鄎 中軍 功曹,桓玄太尉參軍 事。 入爲中書黃門侍郎,出補恒脩撫 軍 長 史。

功,封 千石,莅 義旗 晉寧縣 政 建, 和 理,爲吏民所稱。 五等男。 高 祖 以爲鎭軍 出爲高祖太尉長史,遷左民尚書,徙掌吏 一諮議參 入補中書令,又出爲吳國內史,秩中二千石。 軍。 明 年,轉尙書吏部 郞 司 部。 徒左長史,侍 出 爲 吳興太守,秩 義熙十二年, 中。 以從征 中二

列

命禮 轉尙書右僕射、本州大中正。時高祖北伐,湛兼太尉,與兼司空、散騎常侍、尙書范泰奉九 物,拜授高祖 高祖 沖讓,湛等隨軍至洛陽,住柏谷塢。 

初,陳郡謝重,王胡之外孫,於諸舅禮敬多闕。 重子胸, 湛之甥也, 嘗於公座陵湛, 湛正

色謂曰:「汝便是兩世無潤陽之情。」絢有愧色。

湛獨至五陵致敬,時人美之。

遠。 曰「故侍 朕近巡覽千畝,遙瞻松隧,緬惟徽塵, 咸慕增結。可遣使祭, 少申永懷。」 又增守墓五戶。 左光祿大夫、開府儀同三司。〔五]諡曰敬公。 十四年,卒官,時年四十。 子淳,淳子桓卒。 中、左光祿大夫、開府儀同三司晉寧敬公,外氏尊戚,素風簡 追贈左光祿大夫,加散騎常侍。 世祖大明三年,幸籍 太祖卽位,以后父, 正,歲紀稍積,墳塋浸 田,行經湛墓。 追贈侍 下詔

徒左西屬,遷劉毅撫軍諮議參軍,領記室。 軍。 大將軍武陵王遵承制,復爲記室參軍。 湛弟<br />
豹字<br />
士蔚,亦爲謝安所知,好學博聞,多覽典籍。 毅時建議大田, 豹上 其年,丹陽尹孟昶以爲建威司馬。 初爲著作佐郎,衞軍 一議日 桓謙記室參 歲餘,轉司

國因民以爲本,民資食以爲天,修其業則敎興,崇其本則末理,實爲治之要道,致

荒 化 困 之餘 之所階也。 餧之患, 一,爭源 中間 旣 不敦其本,則末業滋章,飢寒交凑,則廉恥不立。當今接篡僞之末,值凶 多故,日不 開,彫薄彌啓,榮利蕩其正性,賦斂罄其所資,良疇無側 暱 給。 自卷甲郤馬,甫一二年,積弊之黎,難用克振,實仁懷 趾 之耦,比屋有

之所

矜恤

明教

之所

爱發也。

者顯 游者言 於 有考課 典, 賦 人 入 偽 非 者賤 用省 末 勸 私 列 迷民情之屢變。 矣。 罰 故 然 末 穀穀 也。 之條,而無豪分之益。 斯 , 
亢散者 歸,游子旣 技 則 明 業不修,有自來矣。 凡 游 稼 勸 抑 夫設位 此 課 食 而 重 數事,亦務田之端趣也。 者反 矣。 廢, 田 之令,峻糾違 畯 歸, 以崇賢,疏爵 則萊荒 本、 喜 耕 譬猶修隄以防川, 忘淵丘之改易, 膠柱 則南 耨勤 矣。 肆 墾矣。 動自勸,游食省 畝闢 居位無義從之徒,在野靡幷兼 悴,力殷收寡,工 之官,則嬾惰 司牧之官,莫或爲務,俗吏庸近,猶秉常科,依勸督之故 不悟清流在於澄源, 矣。 以命士, 器 以應用,商 分職 莅之以清心,鎭之以無欲,勗之以弗倦,翼之以 以任 上量能以審官,不 無 而 所 肆 商逸豫,用淺 一務,置 容 勤 以 衆, 通 力 止輪· 財 吏 田 則 ,勦靡麗 以周役, 有 東 曲 利深,增賈 之黨,給賜 所望,力者 作繁矣。 乎高閎,[10]患生於本,治之 取 於昔弦, 人於浮譽, 之巧,棄難 職不 密勿者 ·以無 忽宮商之乖 欣 非 販 之稅 而 可 則 惰 恩致,力役 得 任 甄 立,吏 一薄疇 者 之貨,則彫 此 異, 懼 周 道息, 調,徒 則穡 献之 必以 怠 慢 不

列

廉 謹 一,舍日計之小成,期遠致於莫歲,則澆薄自淳,心化有漸矣。

| 豹善言雅俗,每商較古今,兼以誦詠,聽者忘疲。

之、郎何邵之官,詔並贖論。 孟昶卒,劉代爲丹陽尹。 義熙七年,坐使徙上錢,降爲太尉諮 爲婦人從夫之爵,懷玉父大司農與見居列卿,妻不宜從子,奏免尙書右僕射劉柳、左丞徐羨 尋轉撫軍司馬,遷御史中丞。 鄱陽縣侯孟懷玉上母檀氏拜國太夫人,有司奏許。 豹以

從討劉毅。高祖遣益州刺史朱齡石伐蜀,使豹爲檄文,曰:

議參軍,仍轉長史。

夫順德者昌,逆德者亡,失仁與義,難以求安,馮阻負**釁,鮮克有成**。 詳觀自古,隆

替有數,故成都不世祀,華陽無興國。

煇,昭晢舊物,烟熅區宇。以庶務草創,未遑九伐,自爾以來,奄延十載。而野心不革, 何隙乘間,招聚逋叛,共相封殖,侵擾我蠻燎,搖蕩我疆垂。我是以有治洲之役,醜類 是崇是長,肆反噬於州相,播毒害於民黎,俾我西服,隔閡皇澤。 自義風電靡,天光反 盡殪,匹馬無遺,桓謙折首,譙福鳥逝,奔伏窠穴,引頸待戮。 日者王室多故,夷羿遘紛,波振塵駭,覃及遐裔。蕞爾、譙縱,編戶黔首,同惡相求,

當今北狄露晞,南寇埃掃,朝風載韙,庶績其凝,康哉之歌日熙,比屋之隆可詠。孤

朱 守 深 胄,景煥 石 職 客子,提寧州之銳,渡瀘 是經略,思一九有 劉 舟 鍾 師 江 波 源 三萬,電曜外水。 精 屬, 於濫 勇二萬,直指 華 觴,澄氛 夷百 ,眷彼禹跡,願言載懷,奉命西行,途戾荆、郢,瞻望巴、 濮 祲 成都。 分遣 雲會霧臻,以此攻戰,誰與爲敵,況又奉義而行,以順 於井絡,誅叛柔 而 入。 (輔國 龍驤將軍 神兵 将軍 〈四臨, 索懇, 臧熹, 遠, 天 今也其時。 總漢中之衆,二二 《綱宏掩,衡翼千里,金鼓萬張,組 戎卒二萬,進自 卽 命 河間 一濟自 墊江。 太守蒯恩、 劍道 益州 漢, 刺 振 史朱齡 下邳 憤慨 威 甲貝 將 而 交 動 軍

此皆益 之艱 江 自安 7,或傳首 蓋 (於庸 氾 今三陝之隘,在我境內,非有岑彭荆門之險。 土 Щ 鐵 前 、爽,劉 汌 萬里。 馬千羣,充原塞隰。 之形,抑 事 當當 禪 故知 今元龜 不 非曩 敢竄 逆 順 也 H 命 有 ,攻守難 於南 勢,難以 盛 然 如 派 廣 固 中,荆邯 盧 易,居然 循 力抗 之攻,陸無完雉 乃强 折謀 ), 斯 如容超,陵威南 百倍。 叉目 伯約 彌入其阻,平衢四達,實無鄧艾綿竹 當 前 挫銳。 , 左里之戰, 全蜀 殷鑑,深 之强, 海,跨 故知 切 著 制 成 士民 水靡 明 北 敗 者 岱,樓船萬艘,掩 有 八之富, 全舟 也 數, 非 子陽 或 可 顯 智 不能 延

者哉

死 以 梁益 澤 量 士,咸 而 待 .命寇讎之戮,혒熰豺狼之吻,豈不遡誠南凱,延首東雲,普天有來蘇之 明 王 化,雖 一驅迫 時,本非 奥主。 縱 之淫 虐,二言 日 月 增 播 刑 殺 非罪,

列

傳

祐。 一, 而 其有衿甲反接,自投軍門者,一無所問。 大信之明,皦若朝日,如其迷復姦邪,守愚不改,火燎孟諸,芝艾同爛,河決金隄, 方懷後予之怨。 王者之師,以仁爲本,舍逆取順,爰自三驅,齊斧所加,縱身而 士子百姓,列肆安堵,審擇吉凶, 自求多

淵丘 同體,雖欲悔之,亦將何及

1

有傳。 太守,行府州事。 王 一誕起 洵弟濯,揚州秀才,蚤卒。 子洵,元嘉中,歷顯官,廬陵王紹爲南中郎將、江州刺史,年少未親政,洵爲長史、尋陽 九年,卒官,時年四十一。次年,以參伐蜀之謀,追封南昌縣五等子。 義,檄洵爲前鋒,加輔 少子閱,好學善屬文,有淸譽於世。 元嘉末,爲吳郡太守。 國將軍。 濯弟淑,濯子粲,並有別傳。[1] 事平,頃之卒,追贈征虜將軍,諡曰貞子。 元凶弑立,加洵建威將軍,置佐史。 官至司徒從 事 中郎 、武陵內史、蚤卒。 會安東將軍隨 長子顗,別

褚叔度,河南陽翟 人也。 曾祖夏,晉太傅。 祖飲、秘書監。 父爽,金紫光祿 大夫。

帝后也,雖晉氏姻戚,而盡心於高祖。 長兄秀之,字長倩,歷大司馬琅邪王從事 遷侍中,出補大司馬右司馬。 中郎,黄門侍 郎、 高祖鎭 恭帝卽位,爲祠部尚 西 [長史。 秀之妹,恭

書、本州大中正。 高祖受命,徙爲太常。 元嘉元年卒官,時年四十七。

軍。 也。 後會稽郡缺,朝議欲用蔡廓,高祖曰:「彼自是蔡家佳兒,何關人事,可用佛。」佛,淡之小字 兵人乃踰垣而入,進藥於恭帝。帝不肯飲,曰:「佛教自殺者不得復人身。」乃以被掩殺之。 毒,自煮食於牀前。 人,或密加毒害,前後非一。及恭帝遜位,居秣陵宮, 乃以淡之爲會稽太守。 高祖受命,爲侍中。 秀之弟淡之,字仲源,亦歷顯官,爲高祖 高祖將殺之,日門不欲遣人入內,令淡之兄弟視楮后,褚后 淡之兄弟並盡忠事高祖,恭帝每生男,輒令方便 車騎從事 常懼見禍,與褚后共止一室,慮有耽 中郎, 尚書東部郎,廷尉卿, ?殺焉, 出別室相見, 或 左衞將 誘 賂 內

建旗 以鄮令司馬文寅爲征西大將軍,江北孫道仲爲征西長史,孫道覆爲左司馬,與公喜、法殺等 孫公喜、法殺攻永興。永興民灟恭期初與賊同,後反善就羊恂,率吏民拒戰,力少退敗。 軍,自以與孫道慶等攻沒縣邑,卽用富陽令顧粲爲令,加輔國將軍。 羊恂覺其姦謀,以告淡之,淡之不信,乃以誣人之罪,收縣職局。於是孫法亮號冠軍大將 用縣人許祖爲令,恂逃伏江唐山中,尋復爲賊所得,使還行縣事。 鳴鼓,直攻山陰。 景平二年,日五富陽縣孫氏聚合門宗,謀為逆亂,其支黨在永興縣,潛相影響。 賊逐磐據,更相樹立,遙 遣偽建威將軍孫道仲、 永興令 賊

參軍 納 史,前國子 扎 軍 淡之自假凌江將 過 甯子、左光祿大夫孔季恭子山士在艱中, 浦 博 陽江。 士 以水軍拒之,又別遣行參軍灟恭期率 孔 欣 願等戰敗, 軍,以山陰令陸邵 前員外散騎常侍謝芩之並 賊遂摧鋒而 領司 前, 馬, 去城二十餘里。 一参軍 皆起爲 加振武將軍,前 · 少軍 事 將軍。 ٠, 與邵 召行 合力。 參軍七十餘人。 遣 淡之遺陸邵 員 隊主陳願、郡 、外散騎常侍王茂之爲長 淡之率所 督帶戟 領 前 議 出 鎭 曹掾虞道 公石綝 次近郊 西 諮

之職,停吳一宿,進至富陽,分別善惡, 揚 中員 軍 恭 廣武 期等 州主簿沈嗣之爲富陽令領五百人, 建 外將 武 將 將 與 軍 陸允 軍徐卓領千人,右將軍彭城王 軍戰於琦、江公倫敗走還富陽。 於柯亭,大破之, 賊走還永興。 於吳興道東 執送願徙賊餘黨數百家於彭城、壽陽、靑州諸處。 一義康 倫因反善、殺法步 遣龍驤將軍丘 遣偽寧朔將軍 出, 並未至 顯 帥 率衆 孫倫領五百人攻錢唐, 等十餘 而 賊平。 五. 百 人,送首京都。 東討, 吳郡太守 司 空徐羡 江夷 韶遣 與縣戍 輕行 之版 殿

年,淡之卒,時年四十五。諡曰質子。

桓玄族人開山聚衆,謀掩廣州,事覺,叔度悉平之。義熙八年,盧循餘黨劉敬道窘迫,詣交 南走,高祖版行廣州刺史,仍除都督交廣二州諸軍 軍 ·諮議參軍,署中兵,加建威將軍。 叔度名與高祖同,故以字行。 初爲 從伐鮮卑,盡其誠 太宰琅邪王參軍,高祖 事 、建威 力。 將軍 盧循 車騎參軍 攻查浦, 、領平越 ·事,司 中郎將、廣州 叔度力戰 徒左西屬 有功。 刺 循

州歸降。 交州刺史杜慧度以事言統府,叔度以敬道等路窮請命, 事非款誠, 報使誅之。 叔度輒貶慧度號爲奮

揚將軍,惡不先上,爲有司所糾,詔原之。 度不加防錄,敬道招集亡命,攻破九眞,殺太守杜章民,慧度討平之。

表,可 州 遺動,則勞臣增勸,爵必疇庸,故在功咸達。叔度南北征討,常管戎要,西夏不虔,誠著嶺 司馬。 官,禁錮終身。還至都,凡諸舊及有一面之款,無不厚加贈遺。 陽 義成 ·荆州之南陽竟陵順陽義陽新野隨六郡諸軍事、征虜將軍、雍州刺史,Clab 領寧蠻校尉、襄 高祖征劉毅,叔度遣三千人過嶠,荆州平乃還。 對番禺縣男,食邑四百戶。」尋加散騎常侍。 太守。 高祖受命,爲右衞將軍。高祖以其名家,而能竭盡心力,甚嘉之,乃下詔曰:「夫賞不 在任 毎以淸簡致稱。 景平二年,卒,時年四十四。 永初三年,出爲使持節、監雍梁南北秦 在任四年,廣營賄貨,家財豐積, 尋除太尉諮議參軍、相國右 坐発 四

二子寂之,著作佐郎,早卒。 子恬之嗣,官至南琅邪太守。 子曖,尚太祖第六女琅邪貞長公主,太宰參軍,亦早卒。 恬之卒,子昭嗣。 昭卒,子瑄 嗣。 齊受禪,國除。 叔度第

高祖第五 秀之弟湛之字休玄,尚高祖第七女始安哀公主,拜駙馬都尉、著作郎。 女吳郡宣 公主。 諸尚公主者,並用世胄,不必皆有才能。 湛之謹 實有意幹,故爲 哀 公主薨,復尚

列

傳

第

追贈侍中、特進、驃騎將軍、給鼓吹一部、左僕射如故。 復爲丹陽尹,光祿如故。尋爲尚書左僕射。以南奔賜爵都鄉侯。 侍、左衞將軍,俄遷侍中,左衞如故。 宣諸子逃藏郡堺,建康令王興之、江寧令沈道源下獄,湛之発官禁錮。 始生,爲劭所殺。 世祖入伐,劭自攻新亭壘,使湛之率水師俱進。 軍,左民尚書,丹陽尹。元凶弑逆,以爲吏部尚書,復出爲輔國將軍、 太祖所知。 歷顯位,揚武將軍、南彭城沛二郡太守,太子中庶子,司徒左長史,侍中,左衞將 世祖卽位,以爲尚書右僕射。 以久疾,拜散騎常侍、光祿大夫, 孝建元年,爲中書令,丹陽 湛之因攜二息淵、 諡曰敬侯。 大明四年,卒,時年五十。 澄輕船南奔。 丹陽尹,統石頭戍 加金章紫綬。 其年, 尹。 復爲散騎常 坐南 淵 郡王義 有 頃之, 男

子淵庶生,宣公主以淵有才,表爲嫡嗣。 淵,昇明末爲司空。

不望塵請職,負羇先路,將由庇民之道邪。 史臣曰:高祖雖累葉江南,楚言未變,雅道風流,無聞焉爾。 凡此諸子,並前代名家,莫

- 祖羲 「羲」各本並作「義」,據晉書庾亮傳改。 按劉峻世說新語注:「道恩」庾羲小字。 徐廣晉
- 紀曰:『羲字叔和,亮第三子,位建威將軍、吳國內史。』」
- 父准 「准」各本並作「淮」、據晉書庾亮傳改。按晉書作「準」、宋順帝諱準、凡「準」均改作「准」。
- 以爲督江州豫州之西陽新蔡汝南潁川司州之恒農揚州之松滋六郡諸軍事建威將軍江州刺史
- 各本並脫「恒農揚州之」五字、殿本改六郡爲五 郡。錢大昕廿二史考異云:「司州下有脫文」當
- 云司 州之恒農、揚州之松滋也。 一本六郡作五郡,蓋校書者不知史有脫字,而以意改之耳。」
- 亦將散退,故下文又敍劉毅求庾悅以子鵝殘炙 見惠事。

「亦」三朝本作「亦」,北監本、毛本、殿本、局本作「不」。

按此處言俄頃庾悅等宴畢

俄頃亦退

- 五 年三十方爲著作佐郞至遂令謝景仁三十方作著作佐郎 兩「佐」字,各本並脫,據經覽二三四
- **八六** 二 十二年卒 按晉書安帝紀,義熙十年,謝裕卒。 此云十二年,又上有「十一年」,當別有據。
- [七]及臨豫州 各本並脫「及」字,據南史補。

著作佐

郞

條引

- (八) 諷中正以述爲主簿 「主簿」上兩史有「迎」字。
- 八九山 追贈侍中 左光祿大夫開府儀同三司 「左」字上,各本並衍「以」字,今删
- 止輪 由乎高閎 三朝本、北監本、毛本作「閎」、殿本、局本作「閾」。

總漢中之衆 「總」字三朝本脫,北監本、毛本、殿本、局本作「率」,元魏四一五作「總」,今據元

₹ 額 補。

縦之淫虐 「縱」各本並作「從」。 襲道耕蛛隱廬日箋稿本云:「『從』當作『縱』,謂譙縱也。」按襲

說是,今改正。

並有別傳 當作「並別有傳」。

高 祖 將 殺之 各本並脫「之」字,據南史、御覽一〇〇引補

至吾 景平二 年 孫彪宋書考論云:「本紀書此事在景平元年二月,此二年字誤。」

於是孫 法亮號 冠軍大將軍 「孫法亮」沙帝紀、元龜六九三作「孫法光」,南史作「孫法先」。

遙以 鄮 令 司 馬文寅爲征 西大將軍 「司馬文寅」南史作 「司馬文宣」。 按本書謝弘微傳 有司

文宣。

與縣戊 軍建武 將軍戰於琦 「琦」字上或「琦」字下,當有奪文。

出為 使 本 持 並 節 監 脫 雍梁 「荆州」二字,據錢大町考異說補。 南 北 秦四 州 荆 州 之南陽 竟陵順 廿二史考異云:「是時南陽六郡 陽 義陽新野 隨六郡諸軍 事 征虜 ,皆屬荆州 將 軍 雍 州 此 刺

於四 州下脫 去荆州二字。」

史

各

## 宋書卷五十三

## 列傳第十三

### 張茂度子永 庾登之 弟炳之 謝方明 江

在郡 悉委之。 經賊寇,廨宇焚燒,民物凋散,百不存一。 江州、茂度及建安太守孫蚪之並受其符書、供其調役。 尚書度支郎,**父憂不**拜。 遷於吳。 茂度郡上計吏,主簿,功曹,州命從事史,並不就。 張茂度,吳郡吳人,張良後也。名與高祖諱同,日故稱字。 周,徵爲太尉參軍,尋轉主簿、揚州 軍還,遷中書侍郎。 高祖嘉,曾祖澄,晉光祿大夫。 服闋,爲何無忌鎭南參軍。 出爲司馬休之平西司馬、 祖彭祖,廣州 治中 茂度創立城寺,弔死撫傷,收集離散,民戶 從事 史。 頃之,出補晉安太守。 刺史。 除琅邪王衞軍參軍,員外散騎侍郎, 循走,俱坐発官。 河南太守。 高祖 父敞,侍中、尚書、吳國內史。 西伐劉毅,茂度居守, 良七世孫為長沙太守,始 高祖將討休之,茂度聞 復以爲始興 盧循 爲寇,覆沒 留州 (相)郡 漸 復。 事

列

傳

第

知

度

乘輕船逃下,逢高祖於中路,以爲錄事參軍,太守如故。 仍 爲諮議參軍,太守 ,如故。 還爲 揚州別駕從事史。 高祖 江陵平,驃騎將軍道憐爲荆州, 北伐關洛,復任留州 事。 出爲

使持 茂 節 、督廣交二州諸軍 事、建武將軍、平越中郎將、廣州刺史。 綏靜百越,嶺外安之。 以

疾 求 還 う復 爲 道憐司 馬。 丁繼 母憂,服闋,除廷尉,轉尙書吏部 郞

介懷。」 六郡 駕,上以邵 平 五. 兵 而 尙 軍 諸 太祖元 對曰:「臣若不遭陛 書,徙太常。 始至白帝。 軍 事、 誠 嘉元年,出爲 節,故 冠軍 將軍、益州刺史。 不加 茂度 以脚疾出爲義興太守,加秩 罪,被代還京 與晦素善, 使持節、督益寧二州梁州之巴西梓潼宕渠南漢中秦州之懷寧安固 下之明,墓木 議者疑 師。 三年,太祖討荆州 、拱矣。」 七年,起爲廷尉, 英出 軍遲留, 中二千石。 刺史謝晦、韶 時茂度弟邵 加奉車都尉,領本 上從容謂茂度曰:「勿復以西蜀 爲湘州 益州遣 軍襲江陵,晦 刺史,起兵應大 州中 庄 入 爲

綬。 年,除會稽 茂 頃 度 之, 內足 太守。 解 職還家。 於 財, 素 有更能,在 自絕 徵為都官尚 人 事,經始本縣 那 縣,職 書, 事 加散騎常侍, 之華山 甚 理。 明年,卒官。 以 爲 固辭以疾。 居 正, 優遊 時年六十七。 就拜光祿 野 澤 如 此 大夫, 者七 諡 日 恭 年。 加金章紫 子 十八

吳郡太守。 茂度 同 那陸 自玩泊仲元,四世爲侍中,時人方之金、張二族。弟子眞,元嘉十年,爲海陵太 仲元者 了, |晉 大尉玩 曾 孫 也。 以 事 用 見 知,歷淸資, 吏部郎,右 衞 將 軍,侍中,

發民 守。 修治,子眞不許。 中書舍人秋當爲太祖所信委,四家在海陵,父死還葬,回橋路毀壞,不通 司徒彭城王義康聞而善之,召爲國子博士,司徒左西掾, 州治中,臨 喪車,縣求

海東陽太守。

度子演,太子中舍人,演弟鏡,新安太守,皆有盛名,並早卒。 鏡弟永。

律,騎 皆受則 玩 令,所居皆 一十八年,又除江 咨嗟 尚書中條制繁雜,元嘉十八年,欲加治撰,徙永爲删 |永字景雲,初爲郡主簿,州從事,轉司徒士曹參軍,出補餘姚令,入爲尚書中兵郞。 射 一,自歎 於 雜 永。 有 藝,觸類 ·稱績。 供御者了不及也。 徙爲江夏王義恭太尉中兵參軍 夏王 兼善,又 又除 義恭驃騎中兵參軍,沛郡 廣陵王誕 有巧思,益 二十三年,造華林園 北中郎錄事 爲太祖 F \ 所知。 ·參軍。 越騎校尉、 如 故 、玄武湖,並 紙及墨皆自營造,上每得永表 永涉獵書史,能爲文章,善隸 定郎,掌其任。二十二年, 振 武將軍 使永 監統。 廣陵 南沛二郡太守。 凡諸 制置 公啓,輒 書,曉音 除 建 執 康

太原 不能拔。 永 郡 旣 有 其 諸 年 才 軍 八 能, 事 、揚威 月 所在 七日 將軍 1年盡 夜、虜開門燒樓及攻車,士卒燒死及爲虜所殺甚衆,永卽夜撤圍退 、冀州刺史,督王玄謨、申坦等諸將,經略 心力, 太祖 謂 堪 爲 將。 二十九年,以永督冀州 河 南。 青州 攻碻磝城,累旬 之濟南

列

傳

第

+

Ξ

張

茂

度

收, 軍 冬,若脫 繫 於 早知諸將輩如 敢送死, 歷 城 獄 兄弟父子,自共當之耳。 太祖 此,恨不以白刃驅之,今者悔 以屢征無功, 諸將 不 言及增價,可 可 任, 責永等與 何所及。」 以示 思話詔曰:「虜旣 張永、申坦。」又與江夏王 乘 利 方向盛 一義恭

諧緝 平, 平 人 刺 司 可 謂 空南 史。 意 召爲 勃 邪 雖 三十年,元凶弑立,起永督青州徐州 與 忘 在 譙 永 、思話 江 私 縲 遣 當 王 夏王 之美, 紲, 義宣 今世故艱 司 書,勸與 馬 一義恭 而腹 崔 起義,又板永 忽此 勳 大司 心無 之、中 永 迫,義旗 蔕 坦懷。 芥, 愧矣。〔五〕 馬從事 兵 剋申舊情。 〈参軍 雲起,日 爲督冀州 又使永從兄長史張暢與永書曰:「近 中 劉則 蕭公平厚,先無嫌 郞 領 方藉羣賢,共康時難。 青州之濟南樂安太原三郡諸 之東安東莞二郡諸軍事、輔國將軍、靑州 中 公亦 軍馳 兵。 命蕭示 赴 國 難。 隙,見汝 以 疏 時蕭 達, 思話在 、翰迹, 兼令相 當 遠慕 有都信,具汝 言不 軍 彭城,義宣 報 廉 事、輔 了。 云 藺 相 傷, 在公之德,近效 共遵此旨。」事 國 何 慮二人不相 將 刑網之原 其滔 刺史。至 軍、冀州 滔 稱

年, 恋。 臧質 時將士休假,年開三番,紛紜道路。 時 使 反, 百 僚獻讜言, 遣永 輔 武 昌 永 王 以 渾 爲宜 鎭 京 立 口 諫 官, 其 永建議曰:「臣聞開兵從稼,前王以之無隙,耕戰遞 年, 開 不 出 諱 爲 之路, 揚州 講 別 駕 師旅 從 事 示安不 史。 明 ·忘危。 年, 召 入 世 爲 祖 孝 尙 建元 書 左

儲,家闕舊粟,考定利害,宜加詳改。 勞,先代以之經遠。 三番,程會旣促,裝赴在早。 當今化寧萬里,文同九服,捐金走驥,於焉自始。 故一歲之間,四馳遙路,或失遽春耜,或違要秋登,致使公替常 愚謂交代之限,以一年爲制,使征士之念,勞未及積, 伏見將士休假,多蒙

長史。 旱,塗逕不通,上大怒,免。時上寵子新安王子鸞爲南徐州刺史,割吳郡度屬徐州,八年,起 青、冀四州諸軍事,又爲使持節、都督南兗徐二州諸軍事、南兗州刺史,常侍、將軍如故。 索兒等,事在安都傳。 青冀幽幷四州諸軍事、前將軍、青冀二州刺史,統諸將討徐州刺史薛安都,累戰剋捷,破薛 拜,以將軍假節,徙爲吳郡太守,率軍東討。又爲散騎常侍、太子詹事。未拜,遷使持節、監 永爲別駕從事史。其年,召爲御史中丞。前廢帝永光元年,出爲吳興太守,遷度支尚書 廟,復兼將作大匠。轉右衞將軍。 與釋之同姓,欲使天下須無寃民。」加寧朔將軍、尚書吏部郎、司徒右長史、尋陽王子房冠 遊農之望,收功歲成。 大明元年,遷黃門侍郎,尋領虎賁中郎將、本郡中正。三年,遷廷尉。上謂之曰:「卿旣 太宗卽位,除吏部尚書。未拜,會四方反叛,復以爲吳興太守,加冠軍將軍,假節。 四年,立明堂,永以本官兼將作大匠。 斯則王度無騫,民業斯植矣。」從之。 又遷散騎常侍、鎭軍將軍、太子詹事,權領徐州刺史。又都督徐、克、 其年,世祖南巡,自宣城候道東入,使永循行水路。 事畢,遷太子右衞率。 七年,爲宣貴妃殷氏立 是歲

城 薛 安都 據 彭 招引索虜之兵旣至,士卒離散,永狼狽引軍還,爲虜所追,大敗。 城 而誠心不 ·款,太宗遣永與沈攸之以重兵迎之,加督前 鋒 復值寒雪,士卒 軍事, 進軍 彭

離散,永脚指斷落,僅以身免,失其第四子。

持節 縣侯 事 固 金紫光 如 了, 加 生。 求 自 督雍 三年,徙都督 散騎常侍 食邑千戶。 每出行。 禄 叉 貶,降號 領 大 梁南 本 夫,尋復領護軍。 常別 州中正,出爲吳郡太守,秩中二千石 北秦 左 、本州大中正。 將軍 1會稽東陽臨海永嘉新安五 在會稽 具名車好馬,號曰侍從,有事輒語左右報郎君。 四州郢州之竟陵隨二郡諸軍事 水痛 ,賓客有謝方童等,坐贓下 「悼所失之子,有兼常哀,服制雖除,猶立靈座,飲食衣服,待之 後廢帝 六年,又加護軍將軍,領石 即位,進右光祿大夫,加侍 一郡諸軍事、會稽太守,將軍如故。 ,侍中、右光 、右將軍、雍州 ·獄死,永又降號 頭戍 祿 事。 中,領安成王 如 刺 故。 以破薛索兒功,封孝昌 史。 冠 給鼓吹一 軍將軍。 未拜,停爲太子詹 以北討 部。 師,加親信二 四年,遷使 七年,遷 失律,

非常 如 不守,前鋒遂攻南掖門。 故。 元 卽 徽 永 日 少便 二年,遷使持節 命駕還都。 驅馳,志在 未 宣力,年 、都督南兗徐青冀益五 永遣人覘賊,旣返,唱云「臺城陷矣」。永衆於此潰散,永亦棄軍奔 之鎭,值 雖 桂 陽 已 老,志氣 王休範作亂, 、未衰,優遊閑任,意 州諸軍事、征 永 率所領出 北 屯白下。 將軍、南兗 甚 不樂, 休範至新亭,大桁 州刺史,[五] 及有此授, 喜悅 侍中

走,還先所住南苑。 以水舊臣不加罪,止免官削爵,永亦愧歎發病。 三年,卒,時年六十六。

順帝昇明二年,追贈侍中、右光 祿大夫。 子褒,昇明末,達官。

永弟辯, 太宗亦見任遇, 歷尙書吏部郎,廣州刺史,大司農。 辯弟岱,昇明末,

尚書。

庾登之字元龍, 潁川隔陵人也。 曾祖冰, 晉司空。 祖蘊, 廣州刺史。 父廓,[10]東陽

太守

尚書左丞。 出爲 新安太守。 熙十二年,高祖北伐,登之擊節驅馳,退告劉穆之,以母老求郡。于時士庶咸憚遠役,而登 之二三其心,高祖大怒,除吏名。 大軍發後,乃以補鎭蠻護軍、西陽太守。 入爲太子庶子, 左西曹屬。登之雖不涉學,善於世事,王弘、謝晦、江夷之徒,皆相知友。轉太尉主簿。 預討桓玄功,封曲江縣五等男。參大司馬琅邪王軍事,豫州別駕從事史,大司馬主簿,司徒 登之少以强濟自立。 初爲晉會稽王道子太傅參軍。 義旗初, 又爲高祖鎭軍參軍。

謝 晦爲撫軍將軍、荆州刺史,請爲長史、南郡太守,仍爲衞軍長史,太守如故。 登之與

晦 每入觀見,備持箱囊几席之屬,一物不具不坐。 俱曹氏壻, 名位本同,一旦爲之佐,意甚不愜。 晦常優容之。 到廳牋,唯云「卽日恭到」,初無處謝之言。 晦拒王師,欲使登之留守,登

豫章太守,便道之官。登之初至臨川,吏民咸相輕侮,豫章與臨川接境,郡又華大,儀迓光 海太守。入爲司徒右長史,尚書吏部郎,司徒左長史,南東海太守。府公彭城王義康專覽 赫,土人並驚歎焉。 無改,因其莅任贓貨,以事発官。弟炳之時爲臨川內史,登之隨弟之郡,優游自適。 政事,不欲自下厝懷,而登之性剛,每陳己意,義康甚不悅,出爲吳郡太守。州郡相臨,執意 之不許,語在晦傳。 元嘉五年,起爲衡陽王義季征虜長史。 義季年少,未親政,衆事一以委之。 十八年,遷江州刺史。疾篤,徵爲中護軍,未拜。二十年,卒,時年六十 晦敗,登之以無任免罪,禁錮還家。 尋加南東 俄而除

子沖遠,自己太宗鎭姑孰,爲衞軍長史,卒於豫章太守,追贈侍中。

即以爲贈。

拜。 之往省之。 晦時位高權重,朝士莫不加敬,炳之獨與抗禮,時論健之。 爲尚書度支郎,不 出補錢唐令,治民有績。轉彭城王義康驃騎主簿,未就,徙爲丹陽丞。 炳之字仲文,初爲秘書、太子舍人,劉粹征北長史、廣平太守。兄登之爲謝晦長史,炳 炳之旣未到府,

疑於 未接之民,必有其敬者,以旣受王命,則成君民之義故也。 一受命之日矣,其辭已成,在官無外,名器旣正,則禮亦從之。 府公禮敬,下禮官博議。 日 女在 國稱女,此其稱王后 中書侍郎裴松之議曰:「案春秋桓八年,祭公逆王后于紀。 何? 王者無外,其辭成矣。』推 吏之被勑,猶除者受拜,民不以 此 且今宰牧之官,拜不之職, 而言,則炳之爲吏之道,

未見闕其被禮,更安可以未到廢其節乎? 愚懷所見,宜執吏禮。」從之。 州,以炳之爲司馬,領長沙內史。濬不之任,除南泰山太守,自己司馬如故。 炳之爲長史、南梁郡太守,轉鎭軍長史,太守如故。出爲臨川內史。後將軍始興王濬鎭湘 將軍竟陵王義宣未親府板炳之爲諮議參軍,自己衆務悉委焉。 後將軍長沙王義欣鎭壽陽,

遷司徒左西屬。

左

参機密。 炳之銜命去來,湛不疑也。義康出藩,湛伏誅,以炳之爲尚書吏部郎,與右衞將軍沈演之俱 不得入劉氏之門,獨炳之遊二人之間,密盡忠於朝廷。 于 時領軍將軍劉湛協附大將軍彭城王義康,而與僕射殷景仁有隙,凡朝士遊殷氏者, 頃之,轉侍中,本州大中正。 遷吏部尙書,領義陽王師。 景仁稱疾不朝見者歷年,太祖常令 內外歸附,勢傾朝

衣,不得近左右。 性 好潔,士大夫造之者,去未出戶,輒令人拭席洗牀。時陳郡殷沖亦 炳之爲人强急而不耐煩,賓客干訴非理者,忿詈形於辭色。 士大夫 小不整潔,每容接之。 炳之好潔反是,三門沖 素無術學,不爲衆望所推 每以此 好淨,小史非淨浴新 護焉。 領選旣

列

校尉 不許。 於此。 啓,要欲盡其 恐不 **嘩,所少**賊 何 行,非曖昧 又密奏曰:「夫爲國爲家,何嘗不謹用前典,今苟欲通一人,慮非哲王御世之長術。 泰能彈琵琶,伯齊善歌,炳之因留停宿。 不緝衆論,又頗通貨賄。炳之請急還家,吏部令史錢泰、主客令史周伯齊出炳之宅諮事。 勳烈,自己晉之重臣,雖事業不勝,不聞有大罪,諸臣進說,便遠出之。 且景仁當時事意,豈復可蔑,朝士兩邊相推,亦復何限,縱有微誠,復何足掩其惡。今賈充 以爲治。 敢苦相侵傷,顧問之日,宜布嫌責之旨。 耳。若言炳之有誠於國,未知的是何事。政當云與殷景仁不失其舊,與劉湛亦復不疏。 爲有司所奏。上於炳之素厚,將恕之,召問尚書右僕射何尚之,尚之具陳炳之得失。 炳之身上之釁,旣自藉藉,交結朋黨,構扇是非,實足亂俗傷風。 而已,臣所聞旣非一旦,又往往眼見,事如丘山,彰彰若此,遂縱而不糾,不知復 晉武不曰明主,斷屬令事,遂能奮發,華廙見待不輕,廢錮累年,後起,止作城門 事耳。 رنار 如無可納,伏願宥其 伏願深加三思,試 觸忤之罪。 以諸聲傳,普訪諸可顧問者。羣下見陛 尚書舊制,令史諮事,不得宿停外,雖有八座命,亦 若不 如此,亦當不辯有所得失。臣意,旣有所 陛下聖叡,反更遲遲 諸惡紛紜,過於范 下顧 遇旣重, 炳之所

臣。

時

炳之自理

一、「不

諳

臺制,

令史並言停外非嫌。」

太祖以炳之信受失所,小事不足傷大

尚之又陳曰:「炳之呼二令史出宿,令史諮都令史縣宰,宰云不通,吏部曹亦咸知不可,

萬祀居左丞之局,不念相當,語駱宰云:『炳之貴要,異他尙書身,政可得無言耳。』又云:『不 癡不聾,不成姑公。』敢作此言,亦爲異也。」 領 令史具向炳之說不得停之意,炳之了不聽納。 此,江市而 謝晦望實,非今者之疇,一事錯誤,免侍中官。 況公犯憲制者邪。不審可有同王、桓白衣例不。於任使無損,兼可得以爲肅 ||誣於信受,羣情豈了,陛下不假爲之辭。 雖是令史,出乃遠虧朝典,又不得謂之小 此非爲不解,直是苟 王珣時賢小失,桓胤春蒐之謬,皆白衣 相留耳。由 外悉 知

遣還,臣令人語之,『先取人使, 意常未安, 今旣有手力, 不宜復留』。得臣此信, 方復遣耳。 炳之先與劉德願殊惡,德願自持琵琶甚精麗。遺之,便復款然。市令盛馥進數百口材助營 珍肴,未嘗有乏,其外別貢,豈可具詳。炳之門中不問大小,誅求張幼緒,幼緒轉無以堪命 迹,追以悵悵。臣與炳之周旋,俱被恩接,不宜復生厚薄。太尉昨與臣言,說炳之有諸不 可,非唯一條,遠近相崇畏,震動四海,凡短人辦得致此,更復可嘉。虞秀之門生事之,累味 不言。觀今人憂國實寡,臣復結舌,日月之明,或有所蔽。然不知臣者,豈不謂臣有爭競之 大都爲人好率懷行事,有諸紜紜,不悉可曉。臣思張遼之言,關羽雖兄弟,曹公父子,豈得 人,以元、凱丞郎幹之假疾病,炳之常取十人私使,詢處幹闕,不得時補。日心近得王師,猶不 太祖猶優游之,使尚之更陳其意。尚之乃備言炳之愆過,曰:「尚書舊有增置幹二十

傳

第十

庾

之疏,欲用德願 材,便乞材,見好燭盤,便復乞之。 來,諸將陳力百倍,今日事實好惡可問。 所選舉,悉是其意,政令太尉知耳。論虞秀之作黃門,太尉不正答和,故得停。 宅,恐人知,作虛買券。 中送甘蔗, 亦復何極, 縦不 若新發於州。 見作州西曹,炳之乃啓用爲主簿,卽語德願,德願謝太尉。 加罪,故宜出之。土庶忿疾之,非直項羽楚歌而已也。 劉道錫驟有所輸,傾南俸之半。 國吏運載樵荻,無輟於道。諸見人有物,鮮或不求,聞劉遵考有 選用不平,不可一二。太尉又云,炳之都無共事之體,凡 若赫然發憤,顯明法憲,陛下便可閑臥紫闥,無復 劉雍自謂得其力助,事之如父,夏 自從裴、劉刑罰以 前後漏泄賣恩, 太尉近與炳

古人云:『無賞罰,雖堯、舜不能爲治也。』陛下豈可坐損皇家之重,迷一凡人。事若復在可 未見一豪增輝。今曲阿在水南,恩寵無異,而協首郡之榮,乃更成其形勢,便是老王雅也。 狼恣意者,歲月滋甚。非但虧點王化,乃治亂所由。 恩,未忍窮法,爲弘之大,莫復過此。方復有尹京赫赫之授,恐悉心奉國之人,於此而息;貪 著,政未測得物之數耳。可爲蹈罪負恩,無所復少。 之直,至於侍坐仰酬,每不能盡。昨出伏復深思,祇有愚滯,今之事跡,異口同音,便是彰 太祖 一欲出炳之爲丹陽,又以問尚之,尚之答曰:「臣旣乏賈生應對之才,又謝汲公犯顏 且居官失和,未有此比。 如臣所聞天下論議,炳之常塵累日月, 陛下遲遲舊

萬數。 勝,細葛斗帳等物,不可稱數」。在尚書中,令奴酤酃酒,利其百十,亦是立臺閣所無,不審少 是所欲。』客出門,遂與相聞索之。劉道錫云是炳之所舉,就道錫索嫁女具及祠器,乃當百 主人問:『有好牛不?』云:『無。』問:『有好馬不?』又云:『無。政有佳驢耳。』炳之便答:『甚 伏願試更垂察。」 言,故是臣不能盡已之愚至耳。今蒙恩榮者不少,臣何爲獨懇懇於斯,實是尊主樂治之意。 審當復云何處之。近啓賈充遠鎭,今亦何足分,外出恐是策之良者。臣知陛下不能採臣 少明國典,粗酬四海之誚。今愆釁如山,榮任不損,炳之若復有彰大之罪,誰復敢以聞述。 舒達,自己所謂雖九死而不悔者也。 三十萬錢,庾沖遠乃當送至新林,見縛束,猶未得解手。荀萬秋嘗詣炳之,值一客姓夏侯, 如今者也。 自非殊勳異績,亦何足塞今日之尤。歷觀古今,未有衆過藉藉,受貨數百萬,更得高官厚 又曰:「臣見劉伯寵大慷慨炳之所行,[10]云有人送張幼緒,幼緒語人,吾雖得一縣,負 **猶謂不然。** 第 臣每念聖化中有此事,未嘗不痛心疾首。設令臣等數人縱橫狼藉復如此,不 選令史章龍向臣說,亦歎其受納之過,言『實得嫁女具,銅鑪四人舉乃 謝 方 明 謂炳之且外出,若能修改,在職著稱,還亦不難,而

祿

且

生,豈不慷慨流涕於聖世邪。

否之間,亦不敢苟陳穴管。

今之枉直, 明白灼然, 而叡王令王, 反更不悟, 令賈誼、劉向重

臣昔啓范曄,當時亦懼犯觸之尤,苟是愚懷所挹,政自不能不

可得

簡聖聽不。恐仰傷日月之明,臣竊爲之歎息。」

十三。太祖錄其宿誠,追復本官。二子季遠、弘遠。 太祖 乃可有司之奏,免炳之官。 是歲,元嘉二十五年也。二十七年,卒於家。 時年六

在 |會稽,謝病歸,除黃門侍郎,不就。 謝方明,陳郡陽夏人,尚書僕射景仁從祖弟也。 爲孫恩所殺,追贈散騎常侍。 祖鐵,永嘉太守。 **父**沖,中書侍郎。

明結邈門生義故得百餘人,掩討嗣之等,悉禽而手刃之。 等從者,夜入郡,見邈衆,遁,不悟。 郡,嗣之、玄達並豫其謀。 | 娜仇玄達,俱往吳興投邈,並舍之郡學,禮待甚簡。 二人並忿慍,遂與恩通謀。 縣,方明勸邈避之,不從,賊至被害,方明逃竄遂免。 方明隨伯父吳興太守邈在郡,孫恩寇會稽,東土諸郡皆響應,吳興民胡桀、郜驃破東遷 劉牢之、謝琰等討恩,恩走入海,嗣之等不得同去,方更聚合。 本欲於吳興起兵,事趣不果,乃遷於會稽。 初,邈舅子長樂馮嗣之及北方學士馮 恩嘗爲嗣之 及郜等攻 方

間, 葬送並畢,平世備禮,無以加也。頃之,孫恩重沒會稽,謝琰見害。 于時荒亂之後,吉凶禮廢,方明合門遇禍,資產無遺,而營舉凶事,盡其力用,數月之 恩購求方明甚急。

明,使 明 而 於上虞載 尙 貞 立之操,在約 書 吏 部 母 郎 l 妹奔 王騰譬說 東陽, 無改。 備至,方明 由黃蘗嶠出 元 興 完 年 終不回。 ,桓玄剋京邑, 鄱 陽, 附載還都, 桓玄聞而賞之,卽除著作佐郎,補 丹陽 寄居國子學。 尹卞範之勢傾 流離 朝 野, 險厄, 欲 司 以 女嫁 徒 屯苦備 方

悉散 史。 往 輻 無 衍 輳,不 他 之賞 造之,大 ) 伎能, 葬 聽 頃 從 Ź, 更加 兄景仁舉爲高祖中兵主簿。三〕方明 歸 與 且 家,使過 '悦,白 當與 轉 穆之相 自 晉陵 從事 然 卿 有 太守, 高 共豫章 正三 中郎 識者,唯有混、 雅 祖 韻 曰 仍 日還 復爲 或 從兄混 謝方 爲 「祿。」 屢加賞賜。 到。 驃 左 騎長 明 將 罪 方明 有 可謂 軍 應入重者 史、 重 道憐長史, 名,唯歲 名家 南郡 **都僧施** 駒。 事思忠益, 有 相 方明嚴恪, 節朝宗 高祖 三十 ,委任 、蔡廓四 直置 餘 命府內 便 如 而 人, 知無不爲。 初。 自是台鼎 人而 已。 善自居遇, 綱紀 衆 嘗年: 丹陽 事 以下 穆之甚 ,皆豁決之。 終,江 人, 尹 高祖謂之曰:「愧未 雖 ٠, 劉 無 莫不 處闇室,未嘗有 穆之權 陵縣 論 以 復 爲 疑懼 恨。 有 獄 隨 重 才 囚 府 當 用 事 方 轉 時 時, 明 無 中 晉 / 恒容。 輕 廓 朝 有瓜 陵 軍 重 郡 後 野

送故

主

簿

弘

季盛

、徐壽

之並

隨

在

西

了三週

諫

以

為二

昔人雖

有

其

事

,或是記

籍

過

言。

且

當

今

民情

僞

薄

不

可

以古

義

和許。」

一方明

不

納一

時遣

之。

囚

及

父兄皆驚喜涕泣

以以

爲

就

死

無

恨

至期

有

重罪二人不還,方明

不聽討捕。

其一人醉不能歸,

逮二日乃反,

餘

囚

十日不至,

爲宋臺尚書吏部郎

不能自歸,鄉村責讓之,率領將送,遂竟無逃亡者。遠近咸歎服焉。遭母憂,去職。服闋, 五. 官朱千期請見欲白討之,方明知爲囚事,使左右謝五官不須入,囚自當反。 囚逡巡墟里,

役十載,亦一朝從理,東土至今稱詠之。性尤愛惜,未嘗有所是非,承代前人,不易其政。 或卽以補吏。守宰不明,與奪乖舛,人事不至,必被抑塞。方明簡汰精當,各愼所宜,雖服 攝,卽時宣下,緩民期會,展其辦舉,郡縣監司,不得妄出,貴族豪士,莫敢犯禁,除比伍之 有必宜改者,則以漸移變,使無迹可尋。一元嘉三年,卒官,年四十七。 坐,判久繫之獄。前後征伐,每兵運不充,悉發倩士庶,事旣寧息,皆使還本。而屬所刻害, 俗峻刻,强弱相陵,姦吏蜂起,符書一下,文攝相續。又罪及比伍,動相連坐,一人犯吏,則 村廢業,邑里驚擾,狗吠達旦。方明深達治體,不拘文法,闊略苛細,務存綱領。州臺符 高祖受命,遷侍中。 永初三年,出爲丹陽尹,有能名。轉會稽太守。江東民戶殷盛,風

豫榮伍。尚書僕射殷景仁愛其才,因言次白太祖:「臣小兒時,便見世中有此文,而論者云 惠連先愛會稽郡吏杜德靈,及居父憂,贈以五言詩十餘首,文行於世。 子惠連,幼而聰敏,年十歲,能屬文,族兄靈運深相知賞,事在靈運傳。本州辟主簿,不 坐被徙廢塞,不

參軍。 是謝惠連,其實非也。」太祖 叉為雪賦,亦以高麗見奇。 是時義康治東府城,城塹中得古冢,爲之改葬,使惠連爲祭文,留信待成,其文甚美。 曰:「若如此,便應通之。」元嘉七年,方爲司徒彭城王義康法曹 文章並傳於世。十年,卒,時年二十七。三三旣早亡,且輕薄多尤

弟惠宣,竟陵王誕司徒從事中郎,臨川內史。

累,故官位不

顯。

無子。

伐,行己拜洛陽園陵,進至潼關。 **| 玄功, 封南郡州陵縣五等侯。** 道規長史、南郡太守,尋轉太尉諮議參軍,領錄事,遷長史,入爲侍中,大司馬,曰以從府公北 祖 板爲鎭軍行參軍,尋參大司馬琅邪王軍事,四三轉以公事免。四四頃之,復補主簿。 **夷少自藻厲,爲後進之美。州辟主簿,不就。** 江夷字茂遠,濟陽考城人也。 孟昶建威府司馬,中書侍郎,中軍太尉從事中郎,征 還領寧遠將軍、琅邪內史、本州大中正。 祖影,引到晉護軍將軍。父澂,驃騎諮議參軍。 桓玄篡位,以爲豫章王文學。 高祖命大司馬府、 義旗建,高 西 豫討桓 1大將軍

宋臺初建,爲五兵尚書。 高祖受命,轉掌度支。出爲義興太守,加秩中二千石,以疾去 琅邪國事,一以委焉。日志

州刺 丹陽 本官如故。 職。 史,加散騎常侍,未之職,病卒,時年四十八。 尹,東部尙書,加散騎常侍,遷右僕射。 尋拜吏部尙書,爲吳郡太守。 子湛,別有傳。 營陽王於吳縣見害,夷臨哭盡禮。 **夷美風儀,善舉止,歷任以和簡著稱。** 遺命薄斂蔬奠,務存儉約。 又以兄疾去官。 追贈前將軍, 出爲湘 復爲

帝,嗇夫喋喋,終不離於虎圈。 然後飾以藝能,文以禮樂,苟或難備,不若文不足而質有餘也。 而貞心雅體,廷臣所罕及。 史臣曰:爲國之道,食不如信,立人之要,先質後文。 詩云「溫溫恭人,惟德之基」,信矣。 江夷、謝方明、謝弘微、王惠、王球,學義之美,未足以成名 士君子當以體正為基,蹈義爲本, 是以小心翼翼,可祗事於上

#### 校勘記

- 名與 高 祖 諱同 「高祖」各本並作「高帝」,今改正。 張茂度名裕、與劉裕同名,故改 稱
- 中書舍人 秋當 爲太祖所信委 「秋當」各本並作「狄當」,據南齊書陸慧曉傳及倖臣傳改正。

見本書卷四十四謝晦傳校勘記第九條。

- ፷ 父死還葬 各本並脱「父」字,南史陸慧曉傳作「假還葬父」。 今據補。
- 「四」凡諸制置 「置」各本並作「署」,據南史改。
- 五 莞二郡」,殿本、局本作「樂安東萊二郡」,又各本並脫 起永督青州徐州之東安東莞二郡諸軍事輔國將軍青州刺史 「徐州」二字,今從錢大昕考異 三朝本、北監本、毛本作「東安東 (說訂 正。 }廿

一史考異云:「按東安、 東莞二郡屬徐州,不屬靑州。 當云督青州徐州之東安、東莞二郡, 史脫

徐州二字,以杜驥、顏師伯傳證之, 可知也。 一本作 『樂安、東萊』, 兩郡元在青州管內,何須更

書,此校書者以意妄改耳。」

- 「然」而腹心無愧矣 「腹」各本並作「復」、據元龜八八五改。
- 〔七〕義旗雲起 「義旗」各本並作「義氣」,據元龜八八五改。
- 兼令相報 「報」各本並作「執」、據元龜八八五改。 此言義宣亦命蕭思話 報書修好。
- / たし 元徽二年遷使持節都督南兗徐青冀益五州諸軍 接,不當受南兗州 大府所統。 本書黃回傳,元徽中,「改都督南竞徐兗青冀五州諸 事 征北將軍南兗州 刺史 按益州與南克 軍 事 、征北將 疆境不

軍、南兗州刺史」。是「益」字爲衍文,「徐」字下當有「兗」字。 疑張永所督亦爲南兗、徐、克、青、

冀五州、與黄回同。

父廓 列 傳 第 廓 + 三 」晉書作「廓之」。 校 勘 記 東晉南北朝人名後之「之」字,有時可省去。

- [11] 子沖遠「沖遠」南史作「仲遠」。
- 左將 軍竟陵王義宣未親府板炳之爲諮議參軍 疑「未親」下脫「政」字、「府」字屬下句。
- [三] 除南泰山太守 南史作「南梁太守」。

反是」。今從局本。

- 炳之好潔反是 局本作「炳之好潔反是」,三朝本、北監本、毛本作「炳之潔反是」。殿本作「炳之
- 二吾 按六朝 吏部令史錢泰主客令史周伯齊出炳之宅諮事 後人不 解此字義,遂改作「詣 人云「出都」,意卽至都。 此云「出炳之宅」,謂自省出至炳之宅。 「出」沅龜四六〇同朱書。 出字本不誤,或杜佑恐 通典職官典作「詣
- [六] 今賈充勳烈 孫膨朱書考論云:「今字疑誤。」
- [1+] 由外悉知此 「由」嚴可均全宋文改作「內」,疑是。
- 詢處幹闕 不得 時補 孫彰宋書考論云:「詢蓋當時爲尚書者名也。 北堂書鈔歲時部引元嘉起居

注有尚書郎樂詢。」

- [1元] 政自不能不舒達 下一「不」字,各本並脫,據南史補。
- 臣見劉伯寵大慷慨炳之所行 帖,劉伯龍有鬼笑營利事,未知此處當是何人。」 「劉伯龍」南史作「劉伯龍」。 張森楷校勘記云:「劉伯寵 見王僧虔

- 從兄景仁舉爲高祖中兵主簿 「中兵」獅覽六三三引作「中軍」,疑是。
- 時晉陵郡送故主簿弘季盛徐壽之並隨在西 「弘季盛」南史作「弘季咸」。
- 十年卒時年二十七 「二十七」各本並作「三十七」,據文選雲賦注引宋書改。 任 會稽郡在景平末,以元嘉三年卒官。又謝靈運傳載元嘉初何長瑜在會稽教惠連讀書, 按惠連父謝方明 則惠

連 是時當不出二十歲。至元嘉十年,惠連卒,時年當二十七歲,故稱「早亡」。

祖彩 各本並脫「彩」字,張森楷校勘記云:「祖下當脫『彩』字,晉書江彩傳可證。」按張校是,今

至 轉以 公事 発 「轉」字疑是衍文。

至

補

Ę

尋參大司馬琅邪王軍事

「參」各本並作「行」,因上文「行參軍」而譌,今改正。

- 是 入爲侍中大司馬 當是爲大司馬之僚佐長史或司馬之屬,史此處有缺文。 時琅邪王爲大司馬。
- 会 從府 公北伐 「北伐」各本 並作「北辟」、今改正。 府公謂琅邪王,時劉裕奉以北伐。
- 高祖 如 命大司馬府琅邪 祖受命,則 琅邪國早廢矣。 國事 以委焉 且下方見宋臺初建,此當去受字。」 「命」字上各本並有「受」字,據南史删。 孫彪宋書考論云:

## 宋書卷五十四

### 列傳第十四

# 孔季恭 羊玄保 沈曇慶

孔靖字季恭,會稽山陰人也。 名與高祖祖諱同,故稱字。 祖愉,晉車騎將軍。 父誾, 散

騎常侍。

禮接,贍給甚厚。高祖後討孫恩,時桓玄篡形已著,欲於山陰建義討之。季恭以爲山陰去 憂。隆安五年,於喪中被起建威將軍、山陰令,不就。 爲內史,使齎封板拜授,正與季恭相值,季恭便回舟夜還。〔〕至卽叩扉告嘯父,幷令掃拂別 京邑路遠,且玄未居極位,不如待其篡逆事彰,釁成惡稔,徐於京口圖之,不憂不剋。高祖 亦謂爲然。虞嘯父爲征東將軍、會稽內史,季恭初求爲府司馬,不得。及帝定桓玄,以季恭 季恭始察郡孝廉,功曹史,著作佐郎,太子舍人,鎭軍司馬,司徒左西掾。 高祖東征孫恩,屢至會稽,季恭曲意 未拜, 遭母

列

第十

깯

孔季恭

乃移。 齋 卽 便入郡 季恭到任,務存治實,敕止浮華, [三] 翦罰遊惰,由是寇盜衰止,境內肅 嘯父本爲桓玄所授,聞玄敗,震懼,開門請罪。 季恭慰勉,使且安所住,明旦 清。

內史。 祖北伐, 領軍將軍,加散騎常侍,本州大中正。十二年,致仕,拜金紫光祿大夫,常侍如故。 避之,季恭居聽事,竟無害也。 臺初建,令書以爲尙書令,加散騎常侍,又讓不受,乃拜侍中、特進、左光祿 爲吳興太守,加冠軍。〔三先是,吳興頻喪太守,云項羽神爲卞山王,居郡聽事,二千石至,常 歸,高祖 |永初三年,薨,時年七十六。追贈侍中、左光祿大夫、開府儀同三司。 徴 修飾學校,督課誦習。四十年,復爲尚書右僕射,加散騎常侍,又讓不拜。頃之,除 爲右衞將軍,加給事中,不拜。 一錢之戲馬臺,百僚咸賦詩以述其美。 季恭 求從,以爲太尉軍諮祭酒、後將軍。 遷尙書右僕射,固讓。 尋除侍中,領本國中正,徙琅邪王大司馬司馬。 `及受命, 從平關、洛。 加開 義熙八年,復督五郡諸軍、征虜、會稽 府儀同三司,辭讓累年,終以不 高祖爲相國,又隨府遷。 大夫。 是歲,高 辭事 尋出

山士,至歷顯位,侍中,會稽太守,坐小弟駕部郎道穰逼略良家子女,白衣領郡。 元

## 瀛二十七年,卒官。

弟<u>靈符,元嘉末,爲南譙王義宣司空長史、南郡太守,尚書吏部郎。</u> 世祖大明初,自侍

於餘姚 難具。 中為輔國將軍、郢州刺史。入爲丹陽尹。山陰縣土境褊狹,民多田少,靈符表徙無貲之家 書令柳元景、右僕射劉秀之、尚書王瓚之、顧凱之、顏師伯、嗣湘東王彧議曰:[卷]「富戶溫 者肆力,非爲無處,耕起空荒,無救災歉。又緣湖居民,魚鴨爲業,及有居肆,理無樂徙。」尙 房,無假遷業,窮身寒室,必應徙居。 國所同,土著之民,習翫日久,如京師無田,不聞徙居他縣。尋山陰豪族富室,頃畝不少,貧 ·中沈懷文、王景文、黃門侍郞劉敳、郄顒議曰:「百姓雖不親農,不無資生之路,若驅以就 ·鄭·剛三縣界,墾起湖田。上使公卿博議,太宰江夏王義恭議曰:「夫訓農修本,有 生計旣完,畬功自息,宜募亡叛通卹及與樂田者,其往經創,須粗修立,然後徙居。」 **葺宇疏臯,產粒無待,資公則公未易充,課私則私卒** 

棘,率課窮乏,其事彌難,資徙粗立,[+]徐行無晚。」上違議,從其徙民,並成良業。 微 太常王玄謨議曰:「小民貧匱,遠就荒疇,去舊即新,糧種俱闕,習之旣難,勸之未易。謂宜 田 兩 一,則 加資給,使得肆勤,明力田之賞, ,無以自資。 坐相 達奪。 謂宜適任民情,從其所樂,開宥逋亡,且令就業,若審成腴壤,然後議遷。」 且鄭等三縣,去治並遠,旣安之民,忽徙他邑,新垣未立,舊居已毀,去留 申怠惰之罰。」 光祿勳王昇之議曰:「遠廢之疇,方翦荆

侍

永興立墅,周回三十三里,水陸地二百六十五頃,含帶二山,又有果園 靈符自丹陽出爲會稽太守,尋加豫章王子尚撫軍長史。 靈符家本豐,產業甚廣,又於 九處。 爲有司所糾,

列 傅 第 + 四 孔

實有材幹,不存華飾,每所蒞官,政績修理。 詔 之。二子湛之、淵之,於都賜死。 原之,而靈符答對不實,坐以免官。 太宗卽位,追贈靈符金紫光祿大夫。 後復舊官,又爲尋陽王子房右軍長史,太守如故。 前廢帝景和中,犯忤近臣, 爲所讒搆, 遣鞭殺 慇

吳,原死補治, [弘] 有允正法。」詔如淵之議,吳発棄市。 制唯有打母,遇赦猶梟首,無駡母致死值赦之科。淵之議曰:「夫題里逆心,而仁者不入,名 補冶。[5] 江陵罵母,母以之自裁,重於傷歐。若同殺科,則疑重,用毆傷及駡科, 經死,值赦。律文,子賊殺傷毆父母,梟首,駡詈,棄市,謀殺夫之父母,亦棄市。 求之文旨,非此之謂。江陵雖值赦恩,故合梟首。婦本以義,愛非天屬,黃之所恨,情不在 且惡之,況乃人事。故毆傷呪詛,法所不原,詈之致盡,則理無可宥。 淵之大明中爲尚書比部郎。 時安陸應城縣民張江陵與妻吳共駡母黃令死,黃忿恨自 罰有從輕,蓋疑失善, 值赦, 强刑 則疑輕。

羊玄保、太山南城人也。祖楷、尚書都官郎。父綏、中書侍郎。

並不就。 玄保起家楚臺太常博士,遭母憂,服闋,右將軍何無忌、前將軍諸葛長民俱板爲參軍, 除臨安令。劉穆之舉爲高祖鎭軍參軍,庫部郎,永世令。復爲高祖太尉參軍,轉

之,謂· 主簿, 左長史庾登之、吏部尚書王准之曰:[1]]卿二賢明美朗識,會悟多通,然弘懿之望,故 丹陽 丞。 少帝景平二年,入爲尚書右丞,轉左丞,司徒右長史。[10]府公王弘甚知重

當共推羊也。」頃之,入爲黃門侍郎。

獨行一 賞、服勤無以自勸。 滋。 以謂單身逃役,便爲盡戶。 貞,懼致流弊。 叛之由,皆出於窮逼,未有足以推存 叛制,一人不禽,符伍 又能 善弈棊,棊品第三,太祖與賭郡戲,勝,以補宣城太守。先是,劉式之爲宣城,立吏民亡 郡。 禽獲叛身,類 民離憂患,其弊將甚。 昔龔遂譬民於亂繩,緩之然後可理,黃覇以寬和爲用,不以嚴刻爲先。 又尋此制 里東送州作部,若獲者賞位二階。 非謹惜,旣無堪能,坐陵勞吏,名器虛假,所妨實多,將階級不足供 今一人不測,坐者甚多,旣憚重負,各爲身計,牽挽逃竄,必致繁 施 臣忝守所職,懼難遵用,致率管穴,冒以陳聞。」由 邦而已,若其是邪,則應與天下爲一,若其非邪,亦不宜 而樂爲此者也。今立殊制,於事爲苦。 玄保以爲非宜,陳之曰:「臣伏尋亡 臣聞苦節不可 此此制 臣愚

海太守,加輔國 太守,加秩中二千石。 玄保在郡一年,爲廷尉。 I將軍。 太祖以玄保廉素寡欲,故頻授名郡。 入爲都官尚書、左衞將軍, 數月,遷尙 書吏部郎,御史中 加給 事 中, 丞, 衡陽王義季 爲政雖無幹績,而去後常見思。 丹陽 尹 **、**會稽太守。 右軍 長史、南東 又徙吳郡

列傳

第

不營財利,處家儉薄。 太祖嘗曰:「人仕宦非唯須才,然亦須運命,每有好官缺,我未嘗不先

憶羊玄保。」

甚厚。 乃解。 羣僚, 珍新,未得祠薦者,口不妄嘗。 八年,卒,時年九十四。 元凶弑立,爲吏部尚書,領國子祭酒,尋加光祿大夫。 横刀怒曰:「卿等便可去矣」。衆戰懼莫敢言,玄保容色不異,徐曰:「臣以死奉朝。」劭 大明初,進位光祿大夫。 世祖卽位, 以爲散騎常侍,領崇憲衞尉。 五年,遷散騎常侍,特進。 尋遷金紫光祿大夫。 諡曰定子。 及世祖入討, 玄保自少至老,謹於祭奠,四時 又以謹敬見知,賜賚 朝野多南奔,砌集

議時政,賜死。 一弟,太祖並賜名,曰咸,曰粲。 子戎,有才氣,而輕薄少行檢,玄保嘗云:「此兒必亡我家。」官至通直郎。 死後世祖引見玄保,玄保謝曰:「臣無日磾之明,以此上負。」上美其言。 謂玄保曰:「欲令卿二子有林下正始餘風。」 與王僧達謗 戎

柴期與臧質同逆,胤應從誅,何尚之請曰:「胤弈棊之妙,超古冠今。 父戮子宥,其例甚多。 玄保旣善棊,而何尚之亦雅好棊。 特乞與其微命,使異術不絕。」不許。 吳郡褚胤,年七歲,入高 時人痛惜之。 品。 及長,冠絕當時。 魏犨犯令, 以才獲免

|胤

玄保兄子希字泰聞,少有才氣。 大明初,為尚書左丞。時揚州刺史西陽王子尚上言: 業,一不得禁。有犯者,水土一尺以上,並計贓,依常盜律論。 第三、第四品,二頃五十畝;第五、第六品,二頃;第七、第八品,一頃五十畝;第九品及百姓, **芿,口口及陂湖江海魚梁鰌鮆場,常加功修作者,聽不追奪。官品第一、第二,聽占山三頃,** 先業,一朝頓去,易致嗟怨。<br />
今更刊革,立制五條。 絕,損益舊條,更申恒制。」有司撿壬辰詔書:「占山護澤,强盜律論,贓一丈以上,皆棄市。」 「山湖之禁,雖有舊科,民俗相因,替而不奉,熂山封水,保爲家利。 希以「壬辰之制,其禁嚴刻,事旣難遵,理與時砤。 强者兼嶺而占,貧弱者薪蘇無託,至漁採之地,亦又如茲。 一頃。皆依定格,條上貲簿。若先已占山,不得更占,先占闕少,依限占足。 而占山封水,漸染復滋,更相因仍,便成 凡是山澤,先常熂爈種養竹木雜果爲林 斯實害治之深弊,爲政 停除咸康二年壬辰之科。」 自頃以來,頹弛日甚,富 若非 (所宜去 前

謝,云聞之羊希。希坐漏泄発官。 親待,屢毀瑀於宏。會瑀出爲益州,奪士人妻爲妾,宏使羊希彈之,瑀坐発官,瑀恨希切齒。 有門生謝元伯往來希間, 瑪令訪訊被免之由。 希曰:「此奏非我意。」 瑀卽日到宏門奉牋陳 益州刺史劉瑀,先爲右衞將軍,與府司馬何季穆共事不平。 季穆爲尚書令建平王宏所

大明末,爲始安王子眞征虜司馬,黃門郎,御史中丞。泰始三年,出爲寧朔將軍、廣州

列傳第

刺史。 聞, 守。 輕薄多釁,備彰歷職。 希旣 希初請女夫鎭北中兵參軍蕭惠徽爲長史,帶南海太守,太宗不許。又請爲東莞太 到鎮,長史、南海太守陸法眞喪官,希又請惠徽補任。 徒以淸刻一介, **擢授嶺南,干上逞欲,求訴不已,可降號橫** 詔 日「希卑門寒士,累世無 野

行 將軍。」 思道,戰敗,又見殺。時龍驤將軍陳伯紹率軍伐俚,還擊思道,定之。贈希輔國將軍,惠徽 參軍鄒曼率數十人襲思道,已得入城,力不敵,又敗。 軍敗見殺。思道進攻州城,司馬鄒嗣之拒之西門,戰敗又死。浠踰城走,思道獲而殺之。府 思道違節度,失利,希遣收之。思道不受命,率所領攻州,希遣平越長史鄒琰於朝亭拒 廣州事。 初,李萬周、劉嗣祖籍略廣州,事在鄧琬傳。太宗以萬周爲步兵校尉, 希旣至,而萬周等並有異圖,希誅之。希以沛郡劉思道行晉康太守,領軍伐悝。 東莞太守蕭惠徽率郡文武千餘人攻 加寧朔將軍,權

步涉,頓伏江渚。 希子崇字伯遠,尚書主客郎。 門義以小船致之,於是進路。父葬畢,不勝哀,卒。 丁母憂,哀毁過禮。 及聞廣州亂,即日便徒跣出新亭,不 中書郎,嗣之越騎校尉

大老子耳。」世以長者稱之。

沈曇慶,吳興武康人,侍中懷文從父兄也。 父發,員外散騎侍郎,早卒,吳興太守王韶

之爲之誄焉。

祖納其言,而事不行。領本邑中正,少府,揚州治中從事史,始興王濬衞軍長史。 徒主簿,江夏王義恭太尉錄事參軍,尚書右丞。時歲有水旱,曇慶議立常平倉以救民急,太 縣令諸葛闡之公解言上。服釋,復爲主簿。 **曇慶初辟主簿,州從事,西曹主簿,長沙王義欣後軍鎭軍主簿。** 義欣又請爲鎭軍記室參軍。 遭母憂,哀毁致稱,本 出爲餘杭令,遷司 元凶弑

年五十七。追贈本官。曇慶謹實淸正,所莅有稱績。常謂子弟曰:「吾處世無才能,政圖作 世。明年,復徵爲左衞將軍,加給事中,領本州大中正。三年,遷祠部尚書。 軍裴景仁助戍彭城,本愴人,多悉戎荒事。曇慶使撰秦記十卷,敍苻氏僭僞本末,其書傳於 守,左衞將軍。 立,世祖入討,劭遣曇慶還東募人,安東將軍隨王誕收付永興縣獄,久之,被原。 世祖踐作,除東海王禕撫軍長史,入爲尚書吏部郎,江夏王義恭大司馬長史,南東海太 大明元年,督徐兗二州及梁郡諸軍事、輔國將軍、徐州刺史。 時殿· 其年,卒。 中員

外將

時

揚二州。 陽會稽而已。自晉氏遷流,迄於太元之世,百許年中,無風塵之警,區域之內,晏如也。及 熙十一年司馬休之外奔,口忌至于元嘉末,三十有九載,兵車勿用,民不外勞,役寬務簡,氓 **幷命比室,口减過半。若常平之計,興於中年,遂切扶患,或不至是。** 凶、蓋此力也。 議,行於漢世。 養生送死之具,莫不咸出於此。穰歲糶賤,糶賤則稼苦,饑年糴貴, 布帛之饒,覆衣天下。 鄠、杜之間,不能比也。 勤本業,一歲或稔,則數郡忘飢。會土帶海傍湖,良疇亦數十萬頃,膏腴上地,畝直一金, 孫恩寇亂,殲亡事極,自此以至大明之季,年踰六紀,民戶繁育,將曩時一矣。地廣野豐,民 **庶繁息,至餘糧栖畝,戶不夜扃,蓋東西之極盛也。** 民優,議屈當時,蓋由於此。 自漢氏以來,民戶彫程,荆楚四戰之地,五達之郊,井邑殘亡,萬不餘一也。自義 元嘉十三年,東土潦浸,民命棘矣。 大明之末,積旱成災,雖敝同往困,而救非昔主,所以病未半古,死已倍之, 而田家作苦,役難利薄,亘歲從務,無或一日非農,而經稅橫賦之資, 荆城跨南楚之富,揚部有全吳之沃,魚鹽杞梓之利,充仞 旣揚部分析,境極江南,考之漢域,惟丹 太祖省費减用, 開倉廩以振之, 糴貴則商倍。 若籠以平價,則官苦 八方,絲綿 常平之 病而 不

- 正與季恭相值季恭便回舟夜還 各本並脫「正與」、「回」三字、據文文補。
- 〔三〕敕止浮華 南史作「釐整浮華」。
- 加 冠軍 錢大昕廿二史考異云:「冠軍下當有將軍二字。」
- 29 修飾學校督課誦習 「督課誦習」各本作「計課調習」,據南史改。 按上句云「修飾學校」,下句

接「督課誦習」,皆言學校事,南史是。

- 五. 子山士 「山士」殿本作「坣」,各本作「''上」,不成字。 本書褚叔度傳:「孔季恭子山士。」符瑞志
- 下,元嘉二十年,吳興太守孔山士。二凶傳有吳興太守孔山士。 此山士二字,誤併成「生」。

改正。

- ベン 尚書令柳元景至嗣湘東王彧議曰 衞 尉。」 孫彪宋書考論云:「嗣字不瞭,疑衞尉字之誤。 時太宗正為
- [4] 資徒粗立 「徙」各本並作「徒」,據通典食貨典、元龜四八六改。
- [八] 発刑補治 「冶」各本並作「治」,據南史改。
- へたし 作「治」,今改回。通典刑典作「兵」,時治士亦得稱兵。 原死補冶 「冶」各本及南史作「治」,涵芬樓所據三朝本作「冶」,本不誤,後影印時又從誤本改

列傳第十四 校勘記

- 司徒右長史 各本並脫「右」字,據南史補。按下有左長史庾登之,則此當有「右」字。
- 謂左長史庾登之吏部尚書王准之曰「准之」各本並作「淮之」,據本書卷六十王准之傳改。
- 三 先常熂爈種養竹木雜果爲林芿 「雜果」通典食貨典作「薪果」。又各本並脫「芿」字,據南史補。

根草不芟,新草又生,相因仍。 · 南史 「 芿 」字 ,通典食貨典及元龜四九五作 「 仍 」 字。 列子黃帝篇:「藉芿燔林。」新唐書杜佑傳:「朱陂樊川,頗治亭觀

按仍芿古今字。「芿」,意卽草不剪。

謂陳

林芿、鑿山股泉。」

自義熙十一年司馬休之外奔 馬休之外奔在義熙十一年,今據武帝紀改正。 「義熙」各本並作「元熙」。 又「司馬休之」之「司」字,各本並脫,今據晉書譙 按晉恭帝元熙止二年,無十一年。 司

剛王遜傳玄孫休之附傳訂補。

# 宋書卷五十五

## 列傳第十五

# 臧燾 徐廣 傅隆

稱。 祖廟 <u>仲子、成風,咸稱夫人。經云『考仲子之宮』。若配食惠廟,則宮無緣別築。前漢孝文、孝昭</u> 此則二漢雖有太后、皇后之異,至於並不配食,義同陽秋。唯光武追廢呂后,故以薄后配高 母曰「敬隱皇后,順帝之母曰」恭愍皇后,曰雖不繫子爲號,亦祭於陵寢,不配章、安二帝。 太后,並繫子爲號,祭於寢園,不配於高祖、孝武之廟。後漢和帝之母曰恭懷皇后,安帝祖 晉孝武帝太元中,衞將軍謝安始立國學,徐、克二州刺史謝玄舉燾爲助教 孝武帝追崇庶祖母宣太后,議者或謂宜配食中宗。 臧燾字德仁,東莞莒人,武敬皇后兄也。少好學,善三禮。貧約自立,操行爲鄕里所 又衞后旣廢,霍光追尊李夫人爲皇后,配孝武廟,此非母以子貴之例,直以高、武一 憲議曰:「陽秋之義,母以子貴,故

列傳第十

五

臧

典,算號旣正,則罔極之情申,別建寢廟,則嚴禰之義顯,繋子爲稱,兼明母貴之所由,一舉 廟 無配故耳。 夫漢立寢於陵, 自是晉制所異。 謂宜遠准陽秋考宮之義,近摹二漢不配之

亡,居喪六年,以毁瘠著稱。服闋,除臨沂令。 頃之,去官。以母老家貧,與弟熹俱棄人事,躬耕自業,約己養親者十餘載。父母喪

而允三義,固哲王之高致也。」議者從之。

祠部。 聞,非唯志學者鮮,或是勸誘未至邪。 然荆玉含寶,要俟開瑩,幽蘭懷馨,事資扇發,獨習寡悟,義著周典。 志,回情與事染,豈可不敷崇墳籍,敦厲風尚。此境人士,子姪如林,明發搜訪,想聞令軌 日 「頃學尙廢弛,後進頹業, 義旗建、爲太學博士,參右將軍何無忌軍事,隨府轉鎭南參軍。四高祖鎭京口,與燾書 襲封高陵亭侯。四 衡門之內, 想復弘之。」參高祖中軍軍事,入補尚書度支郎,改掌 清風輟響。 良由戎車屢警,禮樂中息, 今經師不遠,而赴業無 浮夫恋

京兆 通幽感於神明,固宜詳廢興於古典,循情禮以求中者也。 營宮室,宗廟爲首。 四府君,宜在毁落,而猶列廟饗,此其徵乎。」乃上議曰:「臣聞國之大事, 時 太廟鴟尾災,燾謂著作郞徐廣曰:「昔孔子在齊,聞魯廟災,曰必桓、僖也。 古先哲王,莫不致肅恭之誠 ۱Ľ, 盡崇嚴乎祖考, 禮,天子七廟,三昭三穆,與太祖 然後能流淳化於四海 在祀 與戎,將 今征西、

繼君 傳所 外, 墠,有 殤,下及來孫,而上祀之禮,不過高祖。推隆恩於下流,替誠敬於尊屬,亦非聖人制禮之意 疎也。 屈 禮,所謂 故上及征 也。 兩 每有差降也。 明遠廟 世六世之祖。 而 太祖 禮也。 非 謂 之體 是以 · 壽然後祭之。此宗廟之次,親疏之序也。 爲 毁 若祧是文、武之廟,宜同月祭於太祖,雖推后稷以配天,由功德之所始,非尊崇之義 爲祧者,無服之祖也。又遠廟則有享嘗之禮,去祧則有壇墠之殊,明世遠者,其義彌 於卑坐, 自考廟以至祖考五廟,皆月祭之,遠廟爲祧,有二祧,享嘗乃止。 子雖齊聖,不先父食者矣。今京兆以上旣遷,太祖始得居正,議者以昭穆未足,欲 須滿七廟, 乃得居太祖也。 一, 持 廟之主,陳乎太祖,謂太祖 西,以備六世之數,宣皇雖爲太祖,尚在子孫之位,至於殷祭之日,日日未申東向之 泰始建廟,從王氏議,以禮父爲士,子爲天子諸侯,祭以天子諸侯,其尸服以士服 此則尊卑等級之典,上下殊異之文。而云天子諸侯俱祭五廟,何哉?又王祭嫡 其統 又禮有以多貴者,故傳稱德厚者流光,德薄者流卑。又云自上以下,降殺以 專去祧之言,則祧非文、武之廟矣。<br/>
文、武周之祖宗,[E] 何云去祧爲壇 臣以爲非禮典之旨。 而 不絕也 |。』豈如四府君在太祖之前乎。[<] 非繼統之主,無靈命之瑞,非 以下先君之主也。 議者又以 所謂與太祖 四府 鄭玄以爲祧者文王、武王之廟,王肅 而七,[刊]自是昭穆旣足, 君 神主宜 故白虎通云 永 同 於 二。一篇 、殷祫, 去祧爲壇, 祭遷 臣叉 太祖 廟 以爲 在六世之 者,以其 以爲五 去壇為 不然。 乎?

神, 居 然經典難詳,羣言紛錯,非臣卑淺所能折中。」時學者多從騰議,竟未施行 與 用 百世 可。 羣 世 |業之基,昔以世近而及,今則情禮已遠,而當長饗殷祫,永虛太祖之位,求之禮籍,未見其 神移則有 豈不有心於加厚,顧禮制不可踰爾。石室則藏於廟北,改築則未知所處,虞主所以依 ·廟之上,而四主禘祫不已,則大晉殷祭,長無太祖之位矣。夫理貴有中,不必過厚,禮 [,或欲瘞之兩階,或欲藏之石室,或欲爲之改築,雖所秉小異,而大歸是同。 遷,豈可順而 昔永和之初,大議斯禮,于時虞喜、范宣並以淵儒碩學, 咸謂四府君神主, 無緣永存於 **瘞埋之禮。** 不斷。故臣子之情雖篤,而靈厲之諡彌彰,追遠之懷雖切,而遷毀之禮爲 四主若饗祀宜廢,亦神之所不依也,准傍事例,宜同虞主之瘞埋。 若宣皇旣

初三年,致仕,拜光祿大夫,加金章紫綬。 命, 騎常侍。 行,除大司馬從 徵拜太常, 遷通 直 郎, 雖外戚貴顯,而 事中郎,總留府事。 高祖鎭 軍、車騎、中軍、太尉諮議參軍。 彌 自沖約 義熙十四年,除侍中。 ,茅屋蔬 其年卒, 時年七十。 冷,不改其舊,所得奉祿,與親戚 高祖北伐關、洛, 元熙元年,以脚 少帝追贈左光祿大夫,加散 疾去 大司馬琅邪王同 職。 共之。 高祖受 永

官郎,烏程令。諶之弟凝之,學涉有當世才具,與司空徐湛之爲異常之交。年少時與北地傳 長子 邃,護軍司 馬,宜都太守。 少子綽,太子 ,中舍人, 新安太守。 邃長子諶之, 尚書都

· 施俱以通家子始爲太祖所引見, 時上與何尙之論鑄錢事, 凝之便干其語, 上因 曰:「明主難再遇,便應正盡所懷。」上與往復 回 與論之。 十餘反,

尚書右丞,以徐湛之黨,爲元凶所殺。 破,見殺,追贈通直郎。 在攸之傳。 凝之詞韻銓序,兼有理證,上甚賞焉。 僧祐引凝之衣令止,凝之大言謂僧祐 左民尚書,卒官。潭之弟澄之,太子左積弩將軍。元嘉二十七年,領軍 凝之弟潭之,亦有美譽。 太宗世,歷尚書吏部郎,御史中丞。 綽子煥,順帝昇明中,爲武昌太守。沈攸之攻郢城,煥棄郡赴之,攸 子夤,尚書主客郎,沈攸之征西功曹,爲攸之盡節,事 歷隨王誕後軍記室錄事,欲以爲青州,其事不果。 ·於盱眙,爲索虜所 後廢帝元徽中,爲

之敗,伏誅 湛之黨,爲元凶所殺。 員 外散騎侍郎,妻燾女也,生僧祐,有吏才,再爲山陰令,甚有能名,末世令長莫及。亦以徐 傅僧祐,祖父弘仁,高祖外弟也。 以中表歷顯官,征虜將軍、南譙太守,太常卿。 子邵,

徐廣字野民,東莞姑幕人也。父藻,都水使者。 兄邈,太子前衞率。

家 世 好 學,至 廣 尤精,百家數術,無不研覽。 謝玄爲州,日辟廣從 事西曹。 又譙王司

馬 恬 鎭北 .參軍 晉孝武帝以廣博學,除爲祕書郎,校書秘閣,增置職僚。 轉員外散騎侍郎,

領校書如故。隆安中,尚書令王珣舉爲祠部郎。

重。 義,母以子貴,旣稱夫人,禮服從正,故成風顯夫人之號,文公服三年之喪。[10]子於父之所 生,體尊義重。 謂 李太后薨, 應 同 於爲祖母後,齊衰三年。」時從其議。曰司 且禮祖不厭孫,四固宜遂服無屈。 廣議服曰:「太皇太后名位允正,體同皇極,理制備盡,情禮彌申。 而緣情立制,若嫌明文不存,則疑斯從 陽秋之

爲愧恨焉。 時 會稽 元顯引爲中軍參軍,遷領軍長史。 王世子元顯錄尚書,欲使百僚致敬,臺內使廣立議,由是內外並執下官禮,廣常 桓玄輔政,以爲大將軍文學祭酒。

外散騎常侍,領著作郎。二年,尚書奏曰:「臣聞左史述言,右官書事,乘、志顯於晉、鄭,陽 **聖迹,條爲疇古。** 秋著乎魯史。 義熙初,高祖 自皇代有造,中興晉祀,道風帝典,煥乎史策。 臣等參詳,宜敕著作郎徐廣撰成國史。」詔曰:「先朝至德光被,未著方策, 使撰車服儀注,自己乃除鎭軍諮議參軍,領記室。 而太和以降,世歷三朝,玄風 封樂成縣五等侯。 轉員

「風雹變未必爲災,古之聖賢輒懼而修己,所以興政化而隆德教也。 六年,遷散騎常侍,自己又領徐州大中正,轉正員常侍。 時有風雹爲災,廣獻 嘗添服事,宿眷未忘, 書 高 旭

宜流

風緬代,

永貽

將來者也。

便敕撰

新,凡識所不免。要當俯順羣情,抑揚隨俗,則朝野歡泰,具瞻允康矣。言無可採,願矜其 難速,且小細煩密,羣下多懼。又穀帛豐賤,而民情不勸,禁司互設,而劫盗 愚款之志。」又轉大司農,領著作郎皆如故。十二年,晉紀成,凡四十六卷,表上之。 未易整,而望深未易炳。追思義熙之始,如有不同,何者。好安願逸,萬物之大趣, 匪懈,來蘇之化,功用若神。頃事故旣多,刑德並用,戰功殷積,報敍難盡,萬機繁湊, 思竭塵露,率誠于習。 明公初建義旗,匡復宗社,神武應運,信宿平夷。 且恭謙儉約,虛心 多有,誠 遷秘書 由 習舊駭 俗弊 固 應

逢千載嘉運,身世荷晉德,實眷戀故主。」因更歔欷。 涕 泗交流。謝晦見之,謂之曰:「徐公將無小過。」廣收淚答曰:「身與君不同。君佐命興王, 初,桓玄篡位,安帝出宫,廣陪列悲慟,哀動左右。及高祖受禪,恭帝遜位,廣又哀感,

甚厚。 衰耄,朝敬永闕,端居都邑,徒增替怠。臣墳墓在晉陵,臣又生長京口,戀舊懷遠,每感暮 息道玄謬荷朝恩,忝宰此邑,乞相隨之官,歸終桑梓,微志獲申,殞沒無恨。」許之,贈賜 永初元年,詔曰:「祕書監徐廣,學優行謹,歷位恭肅,可中散大夫。」廣上表曰:「臣年時 性好 讀 書,老猶不倦。 元嘉二年,卒,時年七十四。答禮問百餘條,用於今世。 廣兄

子豁,口吾在良吏傳。

書祠 陵王 佐三軍,首尾八年。除給事中。 員 外散騎侍郎。坐辭兼,免。復爲會稽征虜參軍。家在上虞,及東歸,便有終焉之志。歷 義眞車騎諮議參軍,出補山陰令。太祖元嘉初,除司徒右長史,遷御史中丞,當官而 部郎、丹陽丞,入爲尚書左丞。[1刊以族弟亮爲僕射,總服不得相臨,徙太子率更令,廬 隆 傅隆字伯祚,北地靈州人也。高祖咸,晉司隸校尉。曾祖晞,司徒屬。父祖早亡。 少孤,又無近屬,單貧有學行,不好交游。義熙初,年四十,始爲孟昶建威參軍,自己 尚書僕射、丹陽尹徐羨之置建威府,以爲錄事參軍,尋轉尙

創巨痛深,固 趙二千里外。隆議之曰:「原夫禮律之興,蓋本之自然,求之情理,非從天墮,非從地出也。 石碏、侘侯何得流名百代,以爲美談者哉。舊令云,『殺人父母,徙之二千里外』。不施父子 王 父子至親,分形同氣,稱之於賦,卽職之於趙,雖云三世,爲體猶一,未有能分之者也。 丽 罰,咎繇立法之本旨也。 時會稽剡縣民黃初妻趙打息載妻王死亡。遇赦, 無讎祖之義。 若稱可以殺趙,趙當何以處載。將父子孫祖,互相殘戮,懼非先 向使石厚之子、日磾之孫,砥鋒挺鍔,不與二祖同戴天日,則 王有父母及息男稱、息女葉,依法徙 稱雖

行,甚

一得司直之體。

轉司徒左長史。〇〇

許?如此,稱、趙竟不可分。 孫祖明矣。 又大通情體,因親以敎愛者也。 趙當避王朞功千里外耳。令亦云,『凡流徙者,同籍親近欲相隨者,聽之』。此 趙雖內愧終身,稱當沈痛沒齒,孫祖之義,自不得永絕,事理固 趙旣流移,載爲人子,何得不從,載從而稱不行,豈名敎所

又出爲義興太守,在郡有能名。徵拜左民尚書,坐正直受節假,對人未至,委出,白衣

領職。尋轉太常。

然也。」從之。

旣明不獨達,所見不同,或師資相傳,共枝別幹。故聞人、二戴,俱事后蒼,俄已分異,盧植、 老,搜集殘文,其體例紕繆,首尾脫落,難可詳論。幸高堂生頗識舊義,諸儒各爲章句之說, 詩之風雅,書之典誥,春秋之微婉勸懲,無不本乎禮而後立也。〔1元〕其源遠,其流廣,〔110〕其體 主以之敬讓。所謂極乎天,播乎地,窮高遠,測深厚,莫尙於禮也。其樂之五聲,易之八象, 尊,父子以之親。 用之婚冠,少長以之仁愛,夫妻以之義順。 用之鄉人, 友朋以之三益,賓 牆靡識,謬蒙詢逮,愧懼流汗。原夫禮者,三千之本,人倫之至道。故用之家國,君臣以之 鄭玄,偕學馬融,人各名家。又後之學者,未逮曩時,而問難星繁,充斥兼兩,摛文列錦,煥 大,其義精,CEID非夫叡哲大賢,孰能明乎此哉。況遭暴<u>秦焚亡,百不存一。漢興,始徵召故</u> 十四年,太祖以新撰禮論付隆使下意,隆上表曰:「臣以下愚,不涉師訓,孤陋閭閻,面

之求,實無以仰酬聖旨萬分之一。不敢廢默,謹率管穴所見五十二事上呈。蚩鄙茫浪,伏 未登、微臣竊位、所以大懼負乘、形神交惡者,無忘夙夜矣。而復猥充博採之數,與聞爰發 遠慮,以定皇代之盛禮者也。伏惟陛下欽明玄聖,同規唐、虞,疇咨四岳,興言三禮,而伯夷 爛可觀。 然而五服之本或差,哀敬之制舛雜,國典未一於四海,家法參駮於縉紳,誠宜考詳

抄書籍。二十八年,卒,時年八十三。 明年,致仕,拜光祿大夫。歸老在家,手不釋卷,博學多通,特精三禮。謹於奉公,常手

用竦赧。」

由是仕憑借譽,學非爲己,崇詭遇之巧速,鄙稅駕之遲難,士自此委笥植經,各從所務,早往 人。是故仕以學成,身由義立。自魏氏膺命,主愛雕蟲,家棄章句,人重異術。又選賢進 金。於是人厲從師之志,家競專門之術,藝重當時,所居一旦成市,黌舍暫啓,著錄或至萬 淺末,捷至之偏道。」漢世登士,閭黨爲先,崇本務學,不尙浮詭,然後可以俯拾靑組,顧蔑籝 士,不本鄉閭,銓衡之寄,任歸臺閣。以一人之耳目,究山川之險情,賢否臆斷,萬不值一。 史臣曰:選賢於野,則治身業弘;求士於朝,則飾智風起。六經奧遠,方軌之正路;百家

向琰、會稽賀道養,皆託志經書,見稱於後學。 並服膺聖哲,不爲雅俗推移,立名於世,宜矣。 後生所不嘗聞,黃髮未之前覩,亦一代之盛也。 濟濟焉,頗有前王之遺典。天子鸞旗警蹕,淸道而臨學館,儲后冕旒黼黻, 晏退,以取世資。 高祖受命,議創國學,宮車早晏,道未及行。 庠序饗校之士, 傳經聚徒之業, 自黃初至于晉末, 百餘年中, 儒教盡矣。 迄于元嘉,甫獲克就,雅風盛烈,未及**曩時,而** 蔚之略解禮記,并注賀循喪服行於世云。 潁川庾蔚之、雁門周野王、汝南周王子、河內 臧燾、徐廣、傅隆、裴松之、何承天、雷次宗, 北 面 而 禮先師,

#### 校勘記

後漢和帝之母曰恭懷皇后安帝祖母曰敬隱皇后順帝之母曰恭愍皇后 帝之母曰」九字,據元龜五七六補。 按據後漢書皇后紀及淸河孝王慶傳, 各本並脱 和帝 生母梁貴人,追 「敬隱皇后順

 $\subseteq$ 隨府轉鎭南參軍 「參軍」各本並作「將軍」,據南史改。 時何無忌為鎭南將軍。

諡恭懷皇后。

安帝祖母宋貴人,追諡敬隱皇后。

順帝生母李氏,追諡恭愍皇后。

- (川) 浮夫恣志 「恣」各本並作「近」、據元龜一九三改。
- [四] 襲封高陵亭侯 各本並脫「亭」字,據南史補
- (五)文武周之祖宗 各本並脫「文武」二字、據南史補。

列傳第十五 校勘記

- ハベン 至於殷祭之日 「殷祭」各本並作「敬祭」,據南史改。 孫膨宋書考論云:「敬祭是殷祭之誤。」
- [4] 所謂與太祖而七 各本並脫「謂」字,據南史補。
- 豊 如四 府君在太祖之前乎 各本並脫「乎」字,據元龜五七六補。
- 〔五〕謝玄爲州 據晉書徐廣傳,謝玄時爲兗州刺史。
- 故成風顯夫人之號文公服三年之喪 「文公」各本及远龜五七六作「僖公」,舊本宋書禮志、新校

本旦訂正。南史及晉書禮志作「昭公」,通典禮典作「文公」。 作僖公。 然成風之薨,不在僖公之世。且安帝於李后爲祖母, 錢大昕廿二史考異云:「昭公) 非僖公於成風之比。 竊謂當是 徐廣傳

文公之誤也。」按錢說是,今據通典改。參見本書卷十五禮志二校勘記第二六條。

- 且禮祖不厭孫 各本並脫「禮」字,據本書禮志二、南史補。
- [1三] 時從其議 「時」各本並作「服」,屬上句,今據齊史改正。
- 高祖使撰車服儀注 「車服」各本並作「軍服」,據晉書、南史廣傳、建康實錄、元龜五六四改。
- 即散騎常侍。 遷散騎常侍 「散騎常侍」,晉書、南史廣傳作「驍騎將軍」。 則此當從晉書、南史改作「驍騎將軍」爲是。 按下叉云「轉正員常侍」,正員常侍
- 廣兄子豁 廣兄子,晉太子右衞率邈之子也。史脫兄字。」 各本並脱「兄」字,據本書良吏徐豁傳補。 錢大昕廿二史考異云:「按良吏傳,豁乃

記

作參軍。」

[4] 入爲尚書左丞 各本並作「入爲尚書左右丞」、據南史刪「右」字。

轉司徒左長史 「左」各本並作「右」,據南史改。 按上文有「除司徒右長史,遷御史中丞」,此當

是轉司徒左長史,南史作「左」,是。

二空 無不本乎禮而後立也 「立也」上、元龜五七六有「成由乎禮而後」六字。

[10] 其流廣 各本並脫「其」字,據元龜五七六補。

其體大其義精 「其義精」各本作「而義精」,據远龜五七六改。

## 宋書卷五十六

### 列傳第十六

## 謝瞻 孔琳之

威長史。 撫養有恩紀,兄弟事之,同於至親。劉弟柳爲吳郡,將姊俱行,瞻不能違,解職隨從,爲柳建 石英讚、果然詩,當時才士,莫不歎異。 謝瞻字宣遠,一名檐字通遠,陳郡陽夏人,衞將軍晦第三兄也。年六歲,能屬文,爲紫 初爲桓偉安西參軍,楚臺祕書郎。瞻幼孤,叔母劉

瞻在家,驚駭謂晦曰:「汝名位未多,而人歸趣乃爾。 交遊不過親朋,而汝遂勢傾朝野,此豈門戶之福邪。」乃籬隔門庭, (El 曰:「吾不忍見此。」及 相國從事中郎。 尋爲高祖鎭軍、琅邪王大司馬參軍,轉主簿,安成相,中書侍郎,宋國中書、黃門侍郎, 弟晦時爲宋臺右衞,權遇已重,於彭城還都迎家,賓客輻輳,門巷塡咽。 吾家以素退爲業,[1]不願干豫時事,

位任顯密,福過災生,其應無遠。特乞降黜,以保衰門。」前後屢陳。高祖以瞻爲吳興郡,又 還彭城,言於高祖曰:「臣本素士,父、祖位不過二千石。 自陳請,乃爲豫章太守。 晦或以朝廷密事語膽,膽輒向親舊陳說,以爲笑戲,以絕其言。 弟年始三十,志用凡近,榮冠臺府, 晦

**遂建佐命之功,任寄隆重,瞻愈憂懼** 

宿,使瞻居于晉南郡公主婿羊賁故第,在領軍府東門。 總戎重,萬里遠出,必生疑謗。」時果有訴告晦反者。 時年三十五 臨終,遺晦書曰:「吾得啓體幸全,歸骨山足,亦何所多恨。 永初二年,在郡遇疾,不肯自治,幸於不永。 晦聞疾奔往,瞻見之,曰:「汝爲國大臣,又 瞻疾篤還都, 高祖以晦禁旅, 不得出 瞻曰:「吾有先人弊廬, 弟思自勉厲,爲國爲家。」**遂**卒, 何爲於此!

互有 年而亡。 弘微等共遊戲,使瞻與靈運共車,靈運登車,四便商較人物,瞻謂之曰:「秘書早亡,談者亦 同異。」靈運默然,言論自此 瞻善於文章,辭采之美,與族叔混、族弟靈運相抗。〔三]靈運父瑍,無才能,爲秘書郎,早 靈運好臧否人物,混患之,欲加裁折,未有方也,謂瞻曰:「非汝莫能。」乃與晦、曜、 衰 止。

闕 時,勤容戚顏,未嘗暫改,恐僕役營疾懈倦,躬自執勞。 弟 暇字宣鏡,幼有殊行。 年數歲,所生母郭氏,久嬰痼疾,晨昏溫凊,嘗藥捧膳,至不 母爲病畏驚,微踐過甚,於一

舍人,俄遷秘書丞。自以兄居權貴,己蒙超擢,固辭不就。 家尊卑,感嚼至性,咸納屨而行,屛氣而語,如此者十餘年。 元嘉三年,從坐伏誅,時年三十一。 有詔宥其子世平,又早卒,無後。 徐羨之請爲司空長史,黃門郎。 初爲州主簿,中軍行參軍,太子

以嚴刑 者也。 制 其爲生之業,禁之可也。今農自務穀,工自務器,四民各肄其業,何嘗致勤於錢。 次食,豈不以交易之所資, [弘]爲用之至要者乎。 若使不以交易,百姓用力於爲錢,則是妨 桓玄輔政爲太尉,以爲西閤祭酒。〔<〕桓玄時議欲廢錢用穀帛,琳之議曰:「洪範八政,以貨 用,此之爲敝,著於自曩。故鍾繇曰:『巧僞之民,競蘊濕穀以要利,制薄絹以充資。』魏世制 無用之貨,以通有用之財,旣無毀敗之費,又省運置之苦,此錢所以嗣功龜貝,歷代不廢 自至於廢,有由 琳之强正有志力,好文義,解音律,能彈棊,妙善草隸。郡命主簿,不就,後辟本國常侍。 孔琳之字意琳,會稽山陰人。祖沈,晉丞相掾。 ,弗能禁也。是以司馬芝以爲用錢非徒豐國,亦所以省刑。 穀帛爲寶,本充衣食,今分以爲貨,則致損甚多。又勞毀於商販之手,耗棄於割截之 而然,漢末是也。 今旣用而廢之,則百姓頓亡其財。[10]今括囊天下之 父<u></u>麼,[刊光祿大夫。 錢之不用,由於兵亂積 故聖王

列傳第十六

孔琳

五六〇

弊之術,無取於廢錢。」 之由。公旣援而拯之,大革視聽,弘敦本之敎,明廣農之科,敬授民時,各順其業,遊蕩知 帛殷阜,幾乎家給人足,驗之事實,錢又不妨民也。頃兵革屢興,荒饉荐及,飢寒未振,實此 矣。斯實由困而思革,改而更張耳。近孝武之末,天下無事,時和年豐,百姓樂業,便自穀 謀,而先成季之信,以爲雖有一時之勳,不如萬世之益。于時名賢在列,君子盈朝,大謀天 世或謂魏氏不用錢久,日間積累巨萬,故欲行之,利公富國。斯殆不然。昔晉文後舅犯之 以爲宜復用錢,口回民無異情,朝無異論。彼尙舍穀帛而用錢,足以明穀帛之弊,著於已試。 穀邪?魏明帝時,錢廢穀用,三十年矣。以不便於民,乃舉朝大議。精才達治之士,曰三莫不 反,務末自休,固以南畝競力,野無遺壤矣。於是以往,升平必至,何衣食之足卹。 下之利害,將定經國之要術。若穀實便錢,義不昧當時之近利,而廢永用之通業,斷可知 處不爲貧,用穀之處不爲富。又民習來久,革之必惑。語曰:『利不百,不易業。』況又錢便於 穀,口以周天下之食,或倉庾充衍,或糧靡斗儲,以相資通,則貧者仰富,致之之道,實假於 一朝斷之,便爲棄物,是有錢無糧之民,皆坐而饑困,此斷錢之立敝也。且據今用錢之 愚謂救

惟變所適。書曰『刑罰世輕世重』,言隨時也。夫三代風純而事簡,故罕蹈刑辟,季末俗巧 玄又議復肉刑,琳之以爲「唐、虞象刑,夏禹立辟,蓋淳薄旣異,致化實同,寬猛相濟,

民。 復者 活者衆 論 息,逋逃爲先,屢叛不革,宜令逃身靡所,CIKI亦以肅戒未犯, 佩,況在小人,尤其所惑,或目所不覩,則忽而 前賢恨 之不 而 而 務殷,故動陷憲網。 也 必不傷,輕之不必不懼,而可以全其性命,蕃其產育, 未獲厥中者也。 故孝景嗣 矣。 恨,議之而未辯。 漢文發仁惻之意,傷自新之路莫由,革古創制,號稱刑厝,然名 降死之生,誠爲輕法,然人情愼顯 位,輕之以緩。 兵荒後,罹法更多。 若三千行於叔世,必有踊貴之尤,江西此五帝不相循法,肉刑不 鍾繇、陳羣之意,雖小有不同,而欲右 緩而民慢,又不禁邪,期于刑罰之中,所以見美在昔, 棄市之刑,本斬右趾,漢文一謬, 不戒,日陳于前, 而 輕昧,忽遠 仁旣濟物, 而驚近,是以 永絕惡原。 則驚 趾代棄市。 心駭 功亦益衆。 矚。 盤 輕 至於餘條, 宜依 承而 而實 盂有銘, 若從其言,則 由 弗革,所 重, 此言之, 又今之所 韋 弦 反 歷 ·可悉 代 更 舊 作 所 傷 重 以 詳

服闋 除司 玄好 人附悅,而琳之不能順旨, 徒左西掾,以父致仕 服闋,補太尉主簿,尚書左丞,揚州治中從事史,所 自解。 是以不見知。 時司馬休之爲 遷楚臺員外散騎侍郎。 會稽內史、 居 後將 著 軍 仍以琳之爲 遭 母 憂,去 長史。 職。

制。

豊

日允中,貴獻管穴。」

調。 琳之於衆議之外,別建言曰:「夫璽印者,所以辯章官爵,立契符信。 時責衆官獻便宜,江艺議者以爲宜修庠序,卹 ·典刑,審官方, 明黜陟, 舉逸拔才, 官莫大於皇帝,爵 務農簡

列

鑄,喪功消實,金銀銅炭之費,不可稱言,非所以因循舊貫易簡之道。愚謂衆官卽用一印, 莫尊於公侯。 尉一職,獨用一印,至於內外羣官,每遷悉改,討尋其義,私所未達。若謂官各異姓,與傳襲 無煩改作。若有新置官,又官多印少,文或零失,然後乃鑄,則仰裨天府,非唯小益。」 尊,不疑於傳璽,人臣衆僚之卑,何嫌於卽印。載籍未聞其說,推例自乖其准。而終年刻 之臣、忌其凶穢、則漢用秦璽、延祚四百、未聞以子嬰身戮國亡、而棄之不佩。帝王公侯之 不同,則未若異代之爲殊也。若論其名器,雖有公卿之貴,未若帝王之重。若以或有誅夷 而傳國之璽,歷代迭用,襲封之印,奕世相傳,貴在仍舊,無取改作。 今世唯

葬之以禮,其若此乎。 遵先典,釐革後謬,況復兼以游費,實爲民患者乎。 凡人士喪儀,多出閭里,每有此須,動十 數萬,損民 .之有由,卒革必駭。 然苟無關於情,而有愆禮度,存之未有所明,去之未有所失,固當式 又曰:「凶門栢裝,不出禮典,起自末代,積習生常,遂成舊俗。 爰自天子,達于庶人,誠 財力,而義無所取。至於寒庶,則人思自竭,雖復室如懸磬,莫不傾產殫財,所謂 謂宜謹遵先典,一罷凶門之式,表以素扇,足以示凶。」

袍襖裲襠,必俟戰陣,實在庫藏,永無損毀。今儀從直衞及邀羅使命,或有防衞送迎,日公悉 滋,雖懃厲 又曰:「昔事故飢荒,米穀綿絹皆貴,其後米價登復,而絹于今一倍。 綿絹旣貴,蠶業者 兼倍,而貴猶不息。 **愚謂致此,良有其由。昔事故之前,軍器正用鎧而已,至於** 

私服爲之艱匱,[10]官庫爲之空盡。 年,便自敗裂。 用袍襖之屬,非唯一府,衆軍皆然。 每絲緜新登,易折租 綿帛易敗,勢不支久。 愚謂若侍衞所須,固不可廢,其餘則依舊用鎧。 .以市,又諸府競收,動有千萬,曰己積貴不已,實 又畫以禦寒,夜以寢臥, 由於斯, 小小使 曾未周

命送迎之屬,止宜給仗,不煩鎧襖。

用之旣簡,則其價自降。」

而流。」 所甘不過一味,而陳必方丈,適口之外,皆爲悅目之費,富者以之示夸,貧者爲之殫產,衆所 同鄙,而莫能獨異。 叉曰:「夫不恥惡食,唯君子能之。 愚謂宜粗爲其品,使奢儉有中,若有不改,加以貶黜,則德儉之化,不日 肴饌尚奢,爲日久矣。今雖改張是弘,而此風未革。

高祖 平北、征西長史,遷侍中。 遷尙書吏部郎。 義熙六年,高祖領平西將軍,以爲長史,大司馬琅邪王從事 宋臺初建、除宋國侍中。 出爲吳興太守,公事免。 中郎,又除

錄。 何人駡詈收捕,諮審欲錄。每有公事,臣常慮有紛紜,語令勿問,而何人獨駡不止,臣乃使 日,預皇太子正會。會畢車去,幷猥臣停門待闕。有何人乘馬,當臣車前, 憲爲恭,臨下以威嚴爲整。然後朝典惟明,莅衆必肅。斯道或替,則憲綱其頹。臣以今月七 何人不肯下馬,連叫大喚,有兩威儀走來,擊臣收捕。 永初二年,爲御史中丞,明憲直法,無所屈橈。 奏劾尚書令徐羨之曰:「臣聞 尚書令省事倪宗又牽威儀手力, 收捕驅遣命去。 事 上以奉

列

陵犯監 撃臣 問,二三虧違,宜有裁貶。 肆,凌暴憲司, 業,家尤貧素。 固 羡之領揚州刺史,琳之弟璩之爲治中,羨之使璩之解釋琳之,停寢其事。 檢處。」詔曰:「小人難可檢御,司空無所問,餘 羡之內居朝右,外司輦轂,位任隆重,百辟所瞻。 **紜若此,或云羡之不禁,或云羡之禁而** 能還臺。 不得關,凶勢輔張,有頃乃散。 陳,琳之謂 ,莫敢犯禁。 下人。 司,凶聲彰赫,容縱宗等,曾無糾問,虧損 臣 宗云:『中丞何得行凶,敢錄令公人。 自錄非,本無對校,而宗敢乘勢凶恣,篡奪罪身。 曰:「我觸忤宰相,正當罪 凶赫之聲,起自京邑, 高祖甚嘉之,行經蘭臺,親加臨幸。 請免羡之所居官,以公還第。 又有羣人就臣車側,錄收捕樊馬子,互行築馬子 所謂己有短垣,而自踰之。 止一身爾,汝 不 塢 如奏。」羡之任居朝端,不欲以 縱而不禁,旣乖國憲 (國威, 凡是中丞收捕,威儀悉皆縛取。』臣勑 而不能弘惜朝章,肅是風軌。 必不 又領本州大中正,遷祠部尚書。 無大臣之體,不有準繩, 應從坐,何須勤勤邪!自是百 宗等篡奪之愆,已屬掌故御史隨 尚書令臣羨之, 又宗爲篡奪之主,縱不 禁而 不止, 琳之不許。 犯 與臣 憲示 致使宇下縱 叉不 風裁 頓 列 不治產 物。 車,紛 伏,不 何寄。 ·經通。 「僚震 璩之 下人 時 糾 事

景平元年,卒,時年五十五。追贈太常。

子邈,有父風,官至揚州治中從事史。 邈子覬,別有傳。 **覵弟道存,世祖大明中,** 

門東部郎,臨海王子頭前軍長史、南郡太守。 晉安王子勛建偽號,爲侍中,行雍州事。 事敗

捐 豐衍 代。 故穡人去而從商,商子事逸,至三末業流而浸廣,泉貨所通,非復始造之意。於是競收罕至 衣被體。雖懋遷之道,通用濟乏,龜貝之益,爲功蓋輕。而事有譌變,隆敝代起,昏作役苦, 用,交易所 夫千匹爲貨,事難於懷璧,萬斛爲市,未易於越鄉,斯可使末伎自禁,游**食**知反。 而 救渴於湯世,回到其蠹病亦已深矣。固宜一罷錢貨,專用穀帛,使民知役生之路,非此莫由。 之珍,遠蓄未名之貨,明珠翠羽,無足而馳,絲罽文犀,飛不待翼,天下蕩蕩,咸以棄本爲事 珠清壑。 昔醇民未離,情嗜疎寡,奉生贍己,事有易周。一夫躬稼,則餘食委室;匹婦務織,則**兼** 則同多稌之資,饑凶又減田家之蓄。錢雖盈尺,旣不療饑於堯年,曰三貝或如輪,信無 史臣曰:民生所貴,曰食與貨。貨以通幣,食爲民天。是以九棘播於農皇,十朋興於上 與事習,或庫盈朽貫,而高廪未充,或家有藏鏹,而良疇罕闢。 寄,旦夕無待,雖致乎要術,而非可卒行。 然後 驅 世之民,反耕桑之路,使縑粟羡溢,同於水火。 先宜削華止偽,還淳反古,抵壁幽峯, 旣而蕩滌園法,銷鑄勿 若事 ·改一朝,廢而莫 年世推

列傳

第

遺,立制垂統,永傳于後,比屋稱仁,豈伊唐世。 桓玄知其始而不覽其終,孔琳之覩其末而

不統其本,豈慮有開塞,將一往之談可然乎。

#### 校勘記

C1 ] 吾家以素退爲業 各本並作「吾家素以退爲業」,據南史、元龜八四九訂正。通鑑宋武帝永初二

年作「吾家素以恬退爲業」。

17 乃籬隔門庭 「乃」下通鑑有「以」字。

與族叔混族弟靈運相抗 「族弟」之「族」,各本並脫,據南史補。

29 使瞻與靈運共車靈運登車 各本並脫「共車靈運」四字,據南史補。

五五 嘗藥捧膳 「嘗」三朝本作「河」,顯誤。北監本、毛本、殿本、局本作「和」,元龜七五二作「嘗」,義

並可通,今從元龜。

ハベン 母為病畏驚微踐過甚 三朝本、北監本、毛本作「微踐」,殿本、局本、繭史作「微賤」,今作「微

踐 李慈銘宋書札記云:「案微踐過甚者,謂踐履甚微,恐以行步聲驚其母也。」張元濟校勘記

云:「下文云納履而行,作踐文義較長。」

[4] 父厳 「厳」各本並作「殿」,據南史、晉書孔沈傳改。

桓玄輔政爲太尉以爲西閤祭酒 「桓玄至西閤祭酒」十三字,各本並作「輕之尉」三字,據南史

訂

九九 豈不以交易之所資 各本並脱「所」字,據南史、通典食貨典補

則百姓頓亡其財 「財」,各本同,通典食貨典、元龜四九九作「利」。

今括囊天下之穀 各本並脫「之」字,據通典食貨典、元龜四九 九補

精才達治之士 「才」各本並作「力」,據南史、通典食貨典、元龜 四九 九改。

莫不 以爲 宜復 用錢 各本並脫「爲」字,據通典食貨典補

世或謂

魏

氏

不

用

錢久

各本

並脫「或」字

,據元龜四

九

九補

至

必有踊貴之尤 「有」各本 並作「省」,據南史改。

宜令逃身 靡所 各本 並脫「宜令」二字,據南史補。

[4] 時責 衆官 獻 便宜 各 本並脫「時責」二字,據御覽六八三引補

或 有 防 衞 送迎 各本 並脫「或」字,據元龜四 七 補

二之 動 有 节 萬 「動」各本並作「勳」。 張元濟、張森楷校 勘 ? 記云:「勳當作動。」按二張校是, 今改正。

私服為 之艱匱 「艱匱」各本 並作「難貴」,據元龜四七一改。

商子 列 傳 事 第 逸 + 六 商 子 校 勘 通典食貨典作「商工」,義似更長。 記

## 宋書卷五十七

### 列傳第十七

蔡廓 子興宗

立法,弘治稽化,必隨時置制,德刑兼施。貞一以閑其邪,敎禁以檢其慢,灑湛露以膏潤,厲 役,不足止其姦,況乎黥劓,豈能反其善,徒有酸慘之聲,而無濟治之益。至於棄市之條,實 操,故能勝殘去殺,化隆無爲。季末澆僞,法網彌密,利巧之懷日滋,恥畏之情轉寡,終身劇 嚴霜以肅威,晞風者陶和而安恬,畏戾者聞憲而警慮。雖復質文迭用,而斯道莫革。 非不赦之罪,事非手殺,日子律同歸,輕重均科,滅降路塞,鍾、陳以之抗言,元皇所爲留 之設,肇自哲王。蓋由曩世風淳,民多惇謹,圖像旣陳,則機心冥戢,刑人在塗,則不逞改 蔡廓字子度,濟陽考城人也。 會祖謨,晉司徒。 |廓博涉羣書,言行以禮。 起家著作佐郎。 時桓玄輔晉,議復肉刑,廓上議曰:「夫建封 祖系,撫軍長史。父綝,司徒左西屬。 肉刑

列

育,申哀矜以革濫,移大辟於支體,全性命之至重,恢繁息於將來。 三陽,干時之華,監商飆而知懼。威惠俱宣,感畏偕設,全生拯暴,於是乎在。」 今英輔翼讚,道邈伊、周,雖閉否之運甫開,而遐遺之難未已。 使將斷之骨,荷更樂於 誠宜明愼用刑,愛民弘

五七〇

從事中郎。 閑 咸 莫此爲大。 郎,領記室。一宋臺建,爲侍中,建議以爲:「鞫獄不宜令子孫下辭明言父祖之罪,虧敎傷情, 素,爲高祖所知。及高祖領兗州,廓爲別駕從事史,委以州任。尋除中軍諮議參軍,太尉 以爲允,從之。 遷司徒主簿,尙書度支殿中郎,通直郎,高祖太尉參軍,司徒屬,中書、黃門郎。 自今但令家人與囚相見,無乞鞫之訴,便足以明伏罪,不須責家人下辭。」朝議 未拜,遭母憂。性至孝,三年不櫛沐,殆不勝喪。服闋,相國府復板爲從事中 以方鯁

|亮與 亮, 史中丞。 每諮廓然後施行。 廓 一等,則皇子居然在王公之上。陸士衡起居注,式乾殿集,諸皇子悉在三司上。今抄 世子左衞率謝靈運輒殺人,御史中丞王准之坐不糾免官,高祖以廓剛直,不容邪枉,補 一一揚州自應著刺史服耳。 多所糾奏,百僚震肅。時中書令傅亮任寄隆重,學冠當時,朝廷儀典,皆取定於 詩序云:『王姬下嫁於諸侯,衣服禮秩,不係其夫,下王后一等。』 亮意若有不同,廓終不爲屈。時疑揚州刺史廬陵王義眞朝堂班次, 然謂坐起班次,應在朝堂諸官上,不應依 官次坐下。 推王姬下

若如 殊禮 杜斌 者。 次也。 位 常侍之下,又 將軍 錄,梁王肜 廓答曰:「揚州位居卿君之下,常亦惟疑。 司 疏 爲 在 前 徒,[三 中 旣 如 梁王 足下 別。 足下言,皇子便在公右,回則齊王本次自尊,何改鎭軍,令在驃騎上,明知故依見位爲 ,蔡公次之耳。 最高,又都督中外,而次在二王之下,豈非下皇子邪。 叉謁 至 叉 齊獻王 而 引 齊王 簡文爲撫軍開府,對錄朝政。一樣爲正司,不應反在儀同之下,而于時位次, 然 李 肜 又海西卽位赦文,太宰武陵王第一,撫軍將軍會稽王第二,大司 為 以齊王柔之爲賀首。 後道 式乾 太后, 復不 車 衞 **|爲司空,賈充爲太尉,俱錄尚書署事,常在|充後。** 爲驃騎,孫秀來降,武帝欲優異之,以秀爲驃騎,轉齊王爲鎭軍,在驃騎上。 騎 將軍,署在太尉 足下 公王,吾謂 趙王 通。 宗正 諸例甚多,不能復具疏。 所疏 倫 蓋書家指疏時事,不必存其班次,式乾亦是私宴,異於朝堂。 尚書符令以高密王 然後 四王,在三司之上,反在黄門郞下, 未 可爲據。 云司 隴西王泰、司徒王玄沖下。 立安帝爲太子,上禮,四 徒王戎耳。 其云上出式 然朝廷以位相次,不以本封,復無明文云皇子加 爲首,時王 揚州反乃居卿君之下,恐此失禮,宜改之邪。」 梁、趙二王亦 乾,召侍 東亭爲僕射。 近太元初,賀新宮成,司馬太傅 徐邈爲郎,位次亦以太傅在 此文今具在也。 中彭城 是皇子,屬 有 潘正叔奏公羊事,于時三 何 義? 王植 王、徐皆是近 一、荀組 且 拿位 '馬第三。 四王之下 永和中,蔡公爲 齊, 潘岳 在 世 、嵇紹、 大司 識 則 豫 如 古今 一个含 諸王 章王 相王 云大

督中外便在公右也。今護軍總方伯,而位次故在持節都督下,足下復思之。」 公,自應在大司馬前耳。簡文雖撫軍,時已授丞相殊禮,又中外都督,故以本任爲班,不以 有位則依朝,復示之班序。唯引泰和赦文,差可爲言。然赦文前後,亦參差不同。太宰上 故 《事則不然,今寫如別。 ·西堂,足下在僕射下,侍中在尚書下耳。來示又云曾祖與簡文對錄,位在簡文下。 王姬身無爵位,故可得不從夫而以王女爲尊。 皇子出任則 有位,

不論,不然,不能拜也。」亮以語錄尚書徐羨之,羨之曰:「黃門郎以下,悉以委察,吾徒不復 使居權要,徙爲祠部尚書。 小字也。 厝懷;自此以上,故宜共參同異。」廓曰:「我不能爲徐干木署紙尾也。」遂不拜。干木,羨之 遷司徒左長史,出爲豫章太守,徵爲吏部尚書。廓因北地傅隆問亮:「選事若悉以見付, 選案黃紙、錄尚書與吏部尚書連名、故廓云「署紙尾」也。羨之亦以廓正直、不欲

路、詣廓別、廓謂曰:「營陽在吳,宜厚加供奉。」營陽不幸,卿諸人有弑主之名,欲立於世,將 何裁轉背,便賣惡於人。」及太祖卽位,謝晦將之荆州,與廓別,屛人問曰:「吾其兔乎。」廓 可得邪。」亮已與羨之議害少帝,乃馳信止之,信至,已不及。「羨之大怒曰:「與人共計議,云 「卿受先帝顧命,任以社稷,廢昏立明,義無不可。但殺人二昆,而以之北面,云挾震主 入奉大統,尚書令傅亮率百僚奉迎,廓亦俱行。至尋陽,遇疾,不堪前。亮將進

之威,據上流之重,以古推今,自免爲難也。」

四十七。高祖嘗云:「羊徽、蔡廓,可平世三公。」少子興宗。 而 後行,公祿賞賜,一皆入軌,有所資須,悉就典者請焉。從高祖在彭城,妻郗氏書求夏服, 廖年位並輕,而爲時流所推重,每至歲時,皆束帶到門。 奉兄 軌如父,家事小大,皆諮 元嘉二年,廓卒,時年

宇未立,軌罷長沙郡還,送錢五十萬以補宅直。興宗年十歲,白母曰:「一家由來豐儉必共, 見。」尋喪母。 今日宅價不宜受也。」母悅而從焉。 鹹有愧色,謂其子淡曰:「我年六十,行事不及十歲小 興宗年十歲失父,哀毀有異凡童。廓罷豫章郡還,起二宅。先成東宅,與軌,廓亡而館

宗厚善。元凶弑立,僧綽被誅,凶威方盛,親故莫敢往,興宗獨臨哭盡哀。出爲司空何尚之 軍,武昌太守。又爲太子洗馬,義陽王友,中書侍郎。中書令建平王宏、侍中王僧綽並與興 少好學,以業尙素立見稱。 初爲彭城王義康司徒行參軍,太子舍人,南平穆王冠軍參

世祖踐作,還先職,遷臨海太守,徵爲黃門郎,太子中庶子,轉游擊將軍,俄遷尙書吏部

長史,又遷太子中庶子。

職。 寧州,親戚故人,無敢瞻送,〔世〕興宗在直,請急,詣郞別。 宗至廣陵,躬自收殯,致喪還豫章舊墓,上聞之,甚不悅。 竟陵王誕據廣陵城爲逆,事平,興宗奉旨慰勞。 也。」轉司 尋左遷司空沈慶之長史,行兗州事,還爲廷尉卿 時尚書何偃 `徒左長史,復爲中庶子,領前軍將軍,遷侍中。 每正言得失,無所顧憚,由是失旨。 |疾患,上謂興宗曰:「卿詳練淸濁,今以選事相付, 州別駕范義與興宗素善,在城 上知尤怒。坐屬疾多日,白衣領 廬陵內史周朗以正言得罪,鎖付 便可開門當之, 内同誅。 無所讓

怨,况 司徒 洗 興宗議曰:「若坦昔爲戎首,身今尙存,累經肆眚,猶應蒙宥。令孫天屬,理相爲隱。況人亡 簿 事遠,追相誣訐,斷以禮律,義不合關。若士先審知逆謀,當時卽應聞啓,苞藏積年,發因私 正,敕以當訊,權繫尙方。興宗以訟民本在求理,故不加械,卽若繫尙方,於事爲苦。 丘元敬等九人,或下疾假,或去職已久。又加執啓,事悉見從。 前劾送武康令謝沈及郡縣尉還職司十一人,坐仲良鑄錢不禽,久已判結。又送郡主 有解士先者,告申坦昔與丞相義宣同謀。時坦已死,子令孫時作山陽郡,自繫廷尉。 稱風聲路傳,實無定主,而干黷欺罔,罪合極法。」又有訟民嚴道恩等二十二人,事未 叉

尙 出 頃之,轉掌吏部。時上方盛淫宴,虐侮羣臣,自江夏王義恭以下,咸加穢辱,唯興宗以 爲 東陽太守,遷安陸王子綏後軍長史、江夏內史,行郢州事。徵還,未拜,留爲左民

是大明 耽之日 魯昭 蔡尙 顏 朝權,威行近遠。 怕 南 尙書, 可檢視 方直見憚,不被侵媒。 又箴規得 事,受遺輔 日,復安用此。」興宗曰:「累朝故事,莫不皆然。近永初之末,營陽王卽位,亦有文策,今在 而 師 北 不能 凡 .'書今日可謂能負荷矣。<sub>」</sub> 伯 諸 馳道之屬,皆被毀壞,自孝建以來至大明末,凡諸制度,無或存者。 大明末,前廢帝卽位,興宗告太宰江夏王義恭,應須策文,義恭曰:「建立儲副,本爲今 在戚 :「蔡豫章昔在相府,亦以方嚴不狎,武帝宴私之日,未嘗相召,每至官賭,常在勝朋。 世,奢侈無度,多所造立,賦調煩 用 制 曰:「先帝雖非盛德主,要以道始終。 失,博論 度興造,不論是非,一皆刊削。 政,阿衡幼主, 而 有嘉容,終之以釁結大臣, 也。」不從。 朝政。 興宗職管九流,銓衡所寄,每至上朝,輒與令錄以下,陳欲登賢進士之意, 尚書僕射顏師伯謂議曹郎王耽之曰:「蔡尙書常免昵戲,去人實遠。」 義恭素性惟橈,阿順法興, 而引身避事,政歸近習。 興宗時親奉璽綬,嗣主容色自若,了無哀貌。 嚴,徵役過苦。 昭子請死。 雖復禪代,亦不至爾。 三年無改,古典所貴。 越騎校尉戴法興、中書舍人巢尚之專制 常慮失旨,聞興宗言,輒戰懼無計。 國家之禍, 至是發詔,悉皆削除, 天下有識,當以此窺人。」師 其在 今殯宮始徹,山陵未遠, 此乎。」時義恭 興宗於都坐慨 興宗出謂親故曰:

、錄尚書

由此紫極

殿

先

然謂

列

官宜加超授者、[10]殷恒便應侍中,那得為黃門而已。」興宗又曰:「中庶、侍中,相去實遠。 謂安都晚達微人,本宜裁抑,令名器不輕,宜有貫序。謹依選體,非私安都。」義恭曰:「若宮 執,義恭然後署案。 且安都作率十年,殷恒中庶百日,今又領校,不爲少也。」使選令史顏禕之、薛慶先等往復論 爲左衞,興宗曰:「率衞相去,唯阿之間。且已失征虜,非乃超越,復奪常侍,頓爲降貶。 庶子。「亞興宗先選安都爲左衞將軍,常侍如故,殷恒爲黃門,領校。太宰嫌安都爲多,欲單 莊等遷授失序,只與宗又欲爲美選。時薛安都爲散騎常侍、征虜將軍,太子左率殷恒爲中 「主上諒闇,不親萬機,而選舉密事,多被删改,復非公筆,亦不知是何天子意。」王景文、謝 興宗每陳選事,法興、尚之等輒點定回換,僅有在者。 興宗於朝堂謂義恭及師伯曰:

求益 臣或 結黨連羣,譏訴互起,街談巷議,罔顧聽聞,乃撤實憲制所宜禁經之巨蠹。曰己侍中祕書監 !非輕,准之前人,不爲屈後。 京郡本以爲祿,不計戶之少多,遇좷便用,無關高下。 撫軍 政愈怒,又轉爲新安王子鸞撫軍司馬、輔國將軍、南東海太守,行南徐州事。又不拜,苦 州。 自表父疾,必求侍養,聖旨矜體,特順所陳,改授臣府元僚,兼帶軍郡。雖臣駑劣,府 旣中旨以安都爲右衞,加給事中,由是大忤義恭及法興等,出興宗吳郡太守。固辭郡, 義恭於是大怒,上表曰:「臣聞愼節言語,大易有規,銓序九流,無取裁□。若乃

疏

見

朕

出

內

數

公。 『今月十八日,往尚書袁愍孫論選事。愍孫云,昨詣顏僕射,出蔡尚書疏見示,言辭甚苦。 法 付 害政,混穢大猷,紛紜彰謬,上延詔旨,不有霜准,軌憲斯淪。 還爲矛楯。 掌 已久,謂應秘書監。』帶授興宗手跡數紙,文翰炳然,事證明白,不假覈辨。愍孫任居官人,職 去歲愆戾,非爲深罪,依其望復門下一人。張淹昔忝南下,預同休戚,自己雖屢經愆黜,事亦 士之美,所歷已多,近頻授卽復回改,於理爲屈,門下無人,此是名選。又張永人地可論,其 又云所得亦少。主上踐阼始爾,朝士有此人不多,物議謂應美用,乃更恨少,使咨事便啓錄 ,銓裁,若有未允,自為則宜顯言,而私加許與,自相選署,託云物論,終成虛詭,隱末出端, 廷尉 ,可令思愆遠封。 又謝莊□時未老,其疾以轉差,今居此任,復爲非宜,謂宜中書令才望爲允。又孔覬南 法獄治罪,免愍孫所居官。」詔曰:「興宗首亂朝典,允當明憲,以其昔經近侍,未忍盡 臣聞九官成讓,虞風垂則,誹主怨時,漢罪夙斷。 愍孫竊評自己,委咎物議,可以子領職。」 況義爲身發,**言謗朝序,**亂辟 請解興宗新附官,須 事御,收

者並 頃之,法興見殺,尚之被繫,義恭、師伯誅,復起興宗爲臨海王子頭前軍長史、輔國將軍、南 甚美,有名京 云由 除興宗新昌太守,郡屬交州。 師伯,師伯 師,迎車已去,而 甚病之。 法興等既不欲以徙大臣爲名,師伯又欲止息物議,由 師伯密遣人誘之,潛往載取,興宗迎 朝廷莫不嗟駭。 先是,興宗納何后寺尼智妃爲妾,姿貌 人不覺。 及興宗被徙,論 此 停行

郡太守,行荆州事,不行。

大臣 各行所見,不亦善乎。」時京城危懼,衣冠咸欲遠徙,後皆流離外難,百不一存。 內外,人不自保,會應有變。若內難得弭,外釁未必可量。汝欲在外求全,我欲居內兒禍, 口,而 通 便。 [¬朝夕難保。 舅今出居陝西¬爲八州行事¬[[+]]顗在襄、沔,地勝兵强,去江陵咫尺,水陸 時前廢帝凶暴,興宗外甥袁顗爲雍州刺史,勸興宗行,曰:「朝廷形勢,人所共見,在內 ·守此危逼,後求復出,豈得哉。」興宗曰:「吾素門平進,與主上甚疎,未容有患。 宮省 若朝廷有事,可共立恒、文之功,豈與受制凶狂,禍難不測,同年而語乎。今不去虎

已。 敢盡言,願公思爲其計。」慶之曰:「僕比日前,慮不復自保,口口但盡忠奉國,始終以之,正當 朝遑遑,人人危怖,指麾之日,誰不景從,如其不斷,旦暮禍及。 此 駕。 命 宗 者所行,人倫道盡。 ,要興宗令往。 謂羨曰「公閉門絕客,以避悠悠請託耳,身非有求,何爲見拒。」還造慶之,慶之遣羨報 若復坐視成敗者,非唯身禍不 主上紹臨,四海淸謐,即位正是舉止違夷,小小得失耳,亦謂春秋尙富,進德可期。而 重除吏部尚書。 興宗因說之曰:「先帝雖無功於天下,要能定平凶逆,在位十一年,以道晏 太尉沈慶之深慮危禍,閉門不通賓客,嘗遣左右范羨詣興宗屬事。 今所忌憚,唯在於公,百姓喁喁,無復假息之望,所冀正在公一人而 測,四海 重責,將有所歸。 公威名素著,天下所服,今舉 僕昔佐貴府,蒙眷異常,故 興

列

攸之、恩仁,公家口子弟耳, [10]誰敢不從。且公門徒義附,並三吳勇士, 宅內奴僮, 人有數 况公威風先著,統戎累朝,諸舊部曲,布在宮省,宗越、譚金之徒,日立出公宇下,並受生成,

急,禍百往代乎。 仗,以配衣宇下,使攸之率以前驅,天下之事定矣。 更簡賢明,以奉社稷。 百。陸攸之今入東討賊,又大送鎧仗,在靑溪未發。攸之公之鄉人,驍勇有膽力, 又朝廷諸所行造,民間皆云公悉豫之。 昔太甲罪不加民,昌邑虐不及下,伊尹、霍光猶成大事,況今蒼生窘 僕在尙書中,自當率百僚案前 今若沈疑不決,當有先公起事者, 世故事, 取其器

所能行,事至故當抱忠以沒耳。」頃之,慶之果以見忌致禍。 公亦不免附從之禍。 僕荷眷深重,「三」故吐去梯之言,宜詳其禍福。」慶之曰「深感君無已。 車駕屢幸貴第,醉酣彌留,又聞屛左右獨入閤內,此萬世一時,機不可 意此事大,非僕

東陽,興宗故郡民也,爲玄謨所信,見使至,興宗因謂曰:「領軍殊當憂懼。」法樂曰:「領軍比 時領軍王玄謨大將有威名,邑里訛言云已見誅,市道喧擾。 玄謨典籤包法榮者,家在

坐待禍至。」初,玄謨舊部曲猶有三千人,廢帝頗疑之,徹配監者。 日殆不復食、「川」夜亦不眠,常言收已在門,不保俄頃。」興宗曰:「領軍憂懼,當爲方略,那得 玄謨太息深怨,啓留五百

列傳第十七 蔡廓

祚,玄謨責所親故吏郭季產、女壻韋希眞等曰:「當艱難時,周旋輩無一言相扣發者。」季產 失事機。君還,可白領軍如此。」玄謨遣法榮報曰:「此亦未易可行,期當不泄君言。」太宗踐 今以領軍威名,率此爲朝廷唱始,事便立剋。領軍雖復失脚,自可乘譽處分。 人巖山營墓,事猶未畢,少帝欲獵,又悉喚還城。巖兵在中堂,興宗勸以此衆舉事,曰:「當 曰:「蔡尙書令包法榮所道,非不會機,但大事難行爾,季產言亦何益。」玄謨有慚色。 禍殆不測,勿

宗得免。 言。」帝每因朝宴,捶毆羣臣,自驃騎大將軍建安王休仁以下侍中袁愍孫等,成見陵曳,唯興 隆從車後過,興宗謂曰:「劉公!比日思一閑寫。」道隆深達此旨,掐興宗手曰:「蔡公!勿多 右衞將軍劉道隆爲帝所寵信,專統禁兵,乘輿嘗夜幸著作佐郎江斅宅,興宗馬車從道

凶悖,要是天下之主,宜使喪禮粗足。若直如此,四海必將乘人。」 頃之,太宗定大事。是夜,廢帝橫尸在太醫閤口,興宗謂尚書右僕射王景文曰:「此雖

定,人有戰心,六軍精勇,器甲犀利,以待不習之兵,其勢相萬耳。願陛下勿憂。」上從之。 宮省危懼,上集羣臣以謀成敗。興宗曰:「今普天圖逆,人有異志,宜鎭之以靜,曰三以至信 時諸方並舉兵反,國家所保,唯丹陽、淮南數郡,其間諸縣,或已應賊。東兵已至永世, 比者逆徒親戚,布在宮省,若繩之以法,則土崩立至,宜明罪不相及之義。物情旣

封興宗始昌縣伯,食邑五百戶,固讓不許,封樂安縣伯,邑三百戶,國秩東力,終以不受。 「如卿言。」赭圻平,函送袁顗首,勑從登南掖門樓觀之,曰三興宗漼然流涕,上不悅。事平, 事後,猶羊公言旣平之後,方當勞聖慮耳。」尚書褚淵以手板築興宗,興宗言之不已,上曰: 今商旅斷絕,而米甚豐賤,四方雲合,而人情更安,以此卜之,淸蕩可必。 但臣之所憂,更在 「諸處未 定,殷琰已復同逆。頃日人情云何?事當濟不。」興宗曰:「逆之與順,臣無以辨。 加游 擊將軍 未拜,遷尚書右僕射,[四]尋領衞尉,又領兗州大中正。太宗謂興宗曰:

**|琰,興宗曰:「天下旣定,是琰思過之日,陛下宜賜手詔數行以相弘慰。 久乃歸順** 必疑謂非眞,未是所以速淸方難也。」不從。 時殷琰據壽陽爲逆,遣輔國將軍劉勔攻圍。 琰得詔,謂劉勔詐造,果不敢降。 四方旣平,琰嬰城固守, 今直中 上使中書爲詔譬 書爲詔,彼 攻戰經時,

嶮固,兵强將勇,圍之旣難,攻不可拔,疆塞之虞,二三宜慮,臣爲朝廷憂之。」時張永已行, 弘 以 曰:「安都遣使歸順,此誠不虚。今宜撫之以和,卽安所莅,不過須單使及咫尺書耳。Cltj若 重兵迎之,勢必疑懼,或能招引北虜,爲患不測。 先徐州刺史薛安都據彭城反,後遣使歸順。泰始二年冬,至民造張永率軍迎之。 況安都外據强地,密邇邊關,考之國計,尤宜馴養。 叛臣釁重,必宜翦戮,則比者所宥,亦已 如其遂叛,將生旰食之憂。

淮 不 見從。 北 四 州 安都聞大軍過淮,嬰城自守,要取索虜。 其先見如 此。 初,永敗問至,上在乾明殿,公公先召司徒建安王休仁,又召興宗, 永戰大敗,又值寒雪,死者十八九,遂失

休仁

.日:「吾慚蔡僕射。」以敗書示興宗,曰:「我愧卿。」

從。 省,封略山湖,妨民害治。 安、永嘉、臨海 東還。 侵興宗。 亂在所,大爲民患,子息滋長,督責無窮。 在竟陵,爲吳喜所殺。 爲 諮 三吳舊有鄉射禮, 議參軍,初不被許,後又重陳,上怒,貶號平西將軍,尋又復號。 三年春,出爲使持節、都督郢州諸軍 在任三年,遷鎭東將軍、會稽 珍孫子景先,人才甚美,興宗與之周旋。 五 郡 諸軍 母老女稚,流離夏口。 **久不復修,興宗行之,禮儀甚整。** 事,給鼓吹一 興宗皆以法繩之。 太守, 部。 事、安西將軍、郢州刺史。 興宗悉啓罷省。 會稽多諸豪右,不遵王憲。 加散騎常侍,尋領兵置佐,加都督會稽、東陽、新 |會土全實,民物殷阜,王公妃主,邸舍相望,橈 興宗至郢州, 及景先爲鄱陽郡,值晉安王子勛爲逆,轉 先是元嘉中,羊玄保爲郡, 又陳原諸逋負,解遣 親自臨哭,致其喪柩家累,令得 坐詣尚書切論以何始眞 初,吳興丘珍孫言論常 又幸臣近習,參半宮 雑役, 並見

興宗為使持 太宗崩 節、 ,興宗與尚書令袁粲、右僕射褚淵 都 督荆湘雍益梁寧南北秦八州諸軍事、征西將軍、開府儀同三司、荆州 、中領 軍劉勔、鎭軍將軍沈攸之同被顧 命。 刺 以

鄉射

帝 坐。 前, 中 殷 、劉並雜,無所知也。 ·書監、左光祿大夫,開府儀同三司、常侍如故,固辭不拜。 加班劍二十人,常侍如故。 不敢就席,良久方去,竟不呼坐。元嘉初,中書舍人秋當詣太子詹事王曇首,回己不敢 其 後 我便無如此何。」五十年中,有此三事。道隆等以興宗强正,不欲使擁兵上流,改爲 中書舍人王弘爲太祖所愛遇,如己上謂曰「卿欲作士人,得就王球坐,乃當判耳。 若往詣球,可稱旨就席。」」球舉扇曰:「若不得爾。」弘還,依事啓聞, 被徵還都。 時右軍將軍王道隆任參內政,權重一時,躡履到

宗亦 行己 意。 聰 不終,顗 姻,明帝 明 意 大明 興宗 有 婦 興宗 恭 人也,有才藻學見,與錫弟僧達書,詰讓之曰:「昔謝太傅奉嫂王夫人如慈母,今蔡興 則國 亦勑 叉 姊 和 幼立風概,家行尤謹,奉宗姑,事寡嫂,養孤兄子,有聞於世。太子左率王錫妻范, 初,詔興宗女與南平王敬猷婚,興宗以姊生平之懷,屢經陳啓,答曰「卿諸 洞 り即覬 之稱。」其爲世所重如 適 家 敗,彖等淪廢當時,孤微 何由 謝氏,興宗 母 也、「一一孫一姪,躬自撫養,年齒相比,欲爲婚姻,每見興宗,輒言此 得婚? 並不許,以女適象。 且姊言豈是不可違之處邪。」舊意旣乖,緣亦 此。 理盡。 妻劉氏早卒,一女甚幼,外甥袁覬始生彖而妻劉氏亦 敬猷遇害,興宗女無子 北地 傳隆與廓相善,興宗修父友敬 嫠居,名門高胄 (他娶。 其後 多 彖家 人欲各 欲結 好

泰豫元年,薨,時年五十八。遺令薄葬,奏還封爵。

追贈後授,子景玄固辭不受,至三又

通誥。 之號焉。文集傳於世。 全,而哀款難奪,可特申不瞑之請, 儀同三司、樂安縣開國伯興宗,忠恪立朝,謀猷宣著,往屬時難,勳亮帷幄,錫珪 奏還封?表疏十餘上,見許。 卜曰:「亥年當作公,官有大字者,不可受也。」及有開府之授,而太歲在亥,果薨於光祿大夫 而懇誠慊訴,備彰存沒,廉概素情,有絜聲軌。 韶曰:「景玄表如此。 永矜克讓之風。」初,興宗爲郢州府參軍,彭城顏敬 故散騎常侍、中書監、左光祿大夫、開府 景玄固陳先志,良以惻然。 一分壤,實允 雖彝典宜 以式

景玄雅有父風,爲中書郎,晉陵太守,太尉從事中郎。 昇明末卒。

下。 之任也。遠矣哉! 及其固辭銓衡,恥爲志屈,豈不知選錄同體,義無偏斷乎。 史臣曰:世重清談,士推素論,蔡廓雖業力弘正,而年位未高,一世名臣, 良以主闇時難,不欲居通塞 風格皆出其

#### 校勘記

事非 五 作「手殺」。 手殺 「手殺」三朝本作「王殺」、北監本、毛本、殿本、局本作「三殺」、通典刑典、元龜六一 今據通典、元龜改。

列

- = 蔡公爲司 徒 「司徒」下,各本並有「司馬」二字,李慈銘宋書札記云:「蔡公, 謂蔡謨 也。 此司馬
- 二字當衍。」按晉書蔡謨傳,謨曾爲司徒,卒贈司空,無爲司馬事。 李說是,今删
- 皇子便在公右 「便」各本並作「使」,據元龜五七二改。孫彪宋書考論云:「使當 爲
- [四] 上禮 「上」各本並作「止」,據元龜五七二改。
- $\neg$ 五. 召侍中彭城王植荀組潘岳嵇紹杜斌 「召侍中」各本並作「古傳中」。 孫彪宋書考論云:「古傳中

疑是召侍中之譌。 晉書彭城王植傳,爲侍中、尚書,當是時。」按孫說是,今改正。

- ゲン 而 以之北 面 各本並脫「之」字,據南史、通鑑宋文帝元嘉元年、元龜四六五補。
- $\Gamma$ -1-1 親 爲 桓宣武 戚 故 人 司 無敢瞻送 馬,將發新亭,朝士咸出瞻送」。 「瞻送」各本並作「贍送」。 贍送當卽瞻送之譌,今改正。 按「贍送」不辭,世說新語排調篇言謝安「後出
- 王景文謝莊等遷授失序 謝莊」各本並作「謝章」、據南史改。
- 太子 殷恒 趙宋 左率殷恒爲中庶子 諱改,應據南史正。」下三出「殷常」,並改正。 「殷恒」各本並作「殷常」,據南史改。 李慈銘宋書礼記云:「殷常當作
- [10] 若宮官宜加超授者 各本並脫「若宮」二字,據陳史補。
- [11] 乃撤實憲制所宜禁經之巨蠹 句有譌奪,不可解
- 而辭擇適情起自庶族 李慈銘宋書札記云:「當作『而興宗起自庶族、辭擇適情』,兩句互倒,又

### 脫興宗二字耳。」

- 仍 出 疏 見示 「示」各本並作「公」,據李慈銘說改。 李慈銘宋書札記云:「見公當作見示。」
- 今薛慶先列 「薛」各本並作「辞」,據嚴輯全朱文改。 按前有選令史薛慶先、當即其人。列猶供

詞。

二 吾 張淹 昔忝南下預同休戚 「昔」各本並作「替」,「同」各本並作「因」,據李慈銘說改。 李慈銘宋

書札記云:「替當作昔」因當作同。」

- 二公 若有未允 「允」各本並作「久」,李慈銘宋書札記云:「久當作允。」按李說是,今改正。
- 二世 爲八州行事 各本並脱「行」字,據南史、通鑑宋景和元年補
- 僕比日前慮不復自保 「比日」二字各本並作「皆」一字、據南史改。
- 二九 宗越譚金之徒 「宗」各本並作「宋」,據本書卷八十三宗越傳訂 正。
- 急 攸之恩仁公家口子弟耳 「恩仁」疑當作「思仁」,沈思仁見本書卷八十四孔號傳
- [三] 僕荷眷深重 「眷」各本並作「養」,據南史改。
- 領軍比日殆不復食 「比日」各本並作「此日」,據預史改。
- 至 宜鎭之以靜 各本並脫「之」字,據元龜四七七、通鑑宋泰始二 一年補。
- 遷尙 書右僕射 明帝紀、通鑑宋泰始二年作「尚書左僕射」。 南史、建康實錄作「尚 書右僕射」。

傳第十七 校勘記

列

- 至 物從 登南掖門樓觀之 「南掖門樓」各本並作「高掖門樓」,據南史改。
- 三古 泰始二年冬 「二年」各本並作「元年」,據強改改。 按明帝紀, 薛安都引北魏軍在泰始二年冬。
- 不過須單使及咫尺書耳 「不過」各本並作「乃遣」,據元龜四六五改。
- 吕 上在 乾明 殿 「殿」各本並作「欲」,據远龜四六五改。
- 三式 中書舍人秋當詣太子詹事王曇首 「秋當」各本並作「狄當」,據元大德本、 毛本南史改。

其後中書舍人王弘爲太祖所愛遇 「秋,又姓,宋中書舍人秋當。」參見本書卷四十四謝晦傳校勘記第九條。 錢大昕廿二史考異云:「按球傳云中書舍人徐爱,不言興

宗。」李慈銘宋書札記云:「南史王球傳作徐爱,差爲得之。」

- 外甥 Ę, 廿二史考異 袁覬始生彖 云:此 而妻劉氏亦亡與宗姊卽覬母也 兩『顗』字當作『覬』,因前 兩「覬」字, 文有外甥袁顗、相涉而譌耳。 人傳寫之譌,非史家之失也。」 各本並作「顗」,據錢氏考異說改 凱與顗 爲 親兄
- 呈 子景玄固 I 解不 受 景 玄 南史作 「子順字景玄」, 蓋景玄本名順、沈約避梁武帝父諱,單稱

其字。

弟,則顗

母

即覬母。

顗、覬皆爲

興宗甥,無可

疑者。

此後

## 宋書卷五十八

### 列傳第十八

# 王惠 謝弘微 王球

惠 國初建,當置郎中令,高祖難其人,謂傅亮曰:「今用郎中令,不可令滅袁曜卿也。」旣而曰: 名,以問其從兄誕, [1] 誕日:「惠後來秀令,鄙宗之美也。」卽以爲行太尉參軍事,府主簿,從 至,座者皆馳散,惠徐起,姿制不異常日。世子爲荆州,惠長史如故,領南郡太守,不拜。宋 事中郎。世子建府,以爲征虜長史,仍轉中軍長史。時會稽內史劉懷敬之郡,送者傾京師, 亦造別,還過從弟球。球問:「向何所見?」惠曰:「惟覺卽時逢人耳。」常臨曲水,風雨暴 與兄弟羣從造惠,談論鋒起,文史間發,惠時相酬應,言清理遠,瞻等慚而退。高祖聞其 惠幼而夷簡,爲叔父司徒謐所知。恬靜不交遊,未嘗有雜事。 王惠字令明,琅邪臨沂人,太保弘從祖弟也。祖劭,車騎將軍。父默,左光祿大夫。 陳郡謝瞻才辯有風氣,

列

傳

·吾得其人矣。」乃以惠居之。 遷世子詹事,轉尙書,吳興太守。

書求官者,得輒聚置閣上,及去職,印封如初時。談者以廓之不拜,惠之卽拜,雖事異而意 食!」惠又曰:「亦復何用食爲。」其標寄如此。」元嘉三年,卒,時年四十二。追贈太常。無子。 同也。兄鑒,頗好聚斂,廣營田業,惠意甚不同,謂鑒曰:「何用田爲。」鑒怒曰:「無田何由得 少帝卽位,以蔡廓爲吏部尚書,不肯拜,乃以惠代焉。惠被召卽拜,未嘗接客,人有與

也,無後,以弘徽爲嗣。弘微本名密,犯所繼內諱,故以字行。 謝弘微,陳郡陽夏人也。祖韶,車騎司馬。父思,曰武昌太守。從叔峻,司空琰第二

祿,本應與北舍共之,國侯旣不措意,今可依常分送。」弘微重違混言,乃少有所受。 數千卷,國吏數人而已,遺財祿秩,一不關豫。混聞而驚歎,謂國郎中令漆凱之曰:「建昌國 識,率意承接,皆合禮衷。 敏,方成佳器。有子如此,足矣。」年十歲出繼。所繼父於弘微本總麻,親戚中表,素不相 童幼時,精神端審,時然後言。所繼叔父混名知人,見而異之,謂思曰:「此兒深中夙 義熙初,襲峻爵建昌縣侯。弘微家素貧儉,而所繼豐泰,唯受書

混風格高峻,少所交納,唯與族子靈運、瞻、曜、弘微並以文義賞會。 嘗共宴處,居在烏

列傳第十八 謝弘徽

亦以此 衣巷, 外無所愼。」靈運等並有誠厲之言,唯弘微獨盡褒美。 胤,質勝誠無文,其尚又能峻。 基微尚,無勧由慕藺,勿輕 輔。」嘗因酣宴之餘,爲韻語以獎勸靈運、瞻等曰:「康樂誕通度,實有名家韻,若加繩染功, 剖瑩乃瓊瑾。 一汝諸 時譽,莫敢造門。 阿遠剛躁負氣 靈運 人雖才義豐辯,未必皆愜衆心,至於領會機賞,言約理要,故當與我共推微子。」常云: 故謂之烏衣之遊,混五言詩所云「昔爲鳥衣遊,戚戚皆親姪」者也。〔三其外雖復 爲恨;至如微子,吾無間然。」又云:「微子異不傷物,同不害正,若年迨六十,必至公 小名客兒。 宣明體遠識,穎達且沈儁,若能去方執,穆穆三才順。 阿客博 瞻等才辭辯富,弘微每以約言服之, 混特所敬貴, 而 無檢 簣少,進往將千仞。 通遠懷淸悟,采采摽蘭訊,直轡鮮不 ,曜恃才而持操不篤,晦自 數子勉之哉,風流 曜, 弘微兄, 多, 其小字也。 知而納善不周,設復功濟三才,終 由爾 躓,抑用解偏吝。 號 阿多標獨解,弱冠纂華 日 振,如不犯 微 子。 謂瞻等日 所 遠卽瞻 知,此 微子 高流

參軍 晉世名家身有國封者, 起家多拜員外散騎侍郎, 弘微亦拜員外散騎, 琅邪王

氏離 絕,公主以混家事委之弘微。 義熙 八年,混以劉毅黨見誅,妻晉陵公主改適琅邪 混仍世宰輔,一門兩封,田業十餘處,僮僕千人,唯有二 王練,公主雖執意不行,而詔 其 與謝

或爲之涕流,感弘微之義也。性嚴正,舉止必循禮度,事繼親之黨,恭謹過常。伯叔二母, 女,年數歲。 尊卑小大,敬之若神。 重此 室宇修整,倉廩充盈,門徒業使,不異平日,田疇墾闢,有加於舊。 晉陵公主降爲東鄉君,以混得罪前代,東鄉君節義可嘉,聽還謝氏。 子,可謂知人。僕射爲不亡矣。」中外姻親,道俗義舊,見東鄉之歸者,入門莫不歎息, 兩姑,晨夕瞻奉,盡其誠敬。內或傳語通訊,輒正其衣冠。婢僕之前,不妄言笑,由是 弘微經紀生業,事若在公,一錢尺帛出入,皆有文簿。 東鄉君嘆曰:「僕射平生 自混亡,至是九載,而 遷通直郞。 高祖受命,

劉湛 服 闋 踰年 等號曰五臣。 居身清約,器服不華,而飲食滋味,盡其豐美。 太祖鎭江陵,朱初封宜都王,以琅邪王球爲友,弘微爲文學。母憂去職,居喪以孝稱, ,菜蔬不改。除鎭西諮議參軍。太祖 遷尙書吏部郎,參預機密。 即位,爲黃門侍郎,與王華、王曇首、殷景仁、 **尋轉右衞將軍。諸故吏臣佐,並委弘微選** 

除,猶不 變,禮不可踰。 頃者肌 兄曜歷御史中丞,彭城王義康驃騎長史,元嘉四年卒。弘微蔬食積時,哀戚過禮,服雖 色微損,卽吉之後,猶未復膳。 噉魚肉。 在心之哀,實未能已。」遂廢食感咽,歔欷不自勝。 沙門釋慧琳詣 弘微,弘微與之共食,猶獨蔬素。 若以 無益傷生,豈所望於得理。」弘微答曰:「衣冠之 弘微少孤,事兄如父,兄 慧琳曰:「檀越素旣多疾,

傳第十八 謝弘微

列

弟友穆之至,舉世莫及也。 弘微口不言人短長,而曜好臧否人物,曜每言論,弘微常以它語

亂之。

年秋, 微與親故經營,旣進之後,親人問上所御,弘微不答,別以餘語酬之,時人比漢世孔光。 中庶子。 六年,東宮始建,領中庶子,又尋加侍中。 有疾,解右衞,領太子右衞率,還家。議欲解弘微侍中,以率加吏部尚書,固陳疾篤, 每有獻替及論時事, 必手書焚草, 人莫之知。上以弘微能營膳羞,嘗就求食。 弘微志在素宦,畏忌權寵,固讓不拜,乃聽解 弘

豈可導之使爭。今分多共少,不至有乏,身死之後,豈復見關。」東鄉君葬,混墓開,弘徽牽 立清名,而令家內不足,亦吾所不取也。」弘微曰:「親戚爭財,爲鄙之甚。今內人尙能無言, 產,充殷君一朝戲責,理之不允,莫此爲大。 分以還戲責,內人皆化弘微之讓,一無所爭。 弘微舅子領軍將軍劉湛性不堪其非,謂弘微 取,自以私祿營葬。混女夫殷叡素好樗蒱,聞弘微不取財物,乃濫奪其妻妹及伯母兩姑之 業,奴僮猶 曰:「天下事宜有裁衷。 九年,東鄉君薨,資財鉅萬,園宅十餘所,又會稽、吳興、琅邪諸處,太傅、司空琰時事 有數百人。公私咸謂室內資財,宜歸二女,田宅僮僕,應屬弘微。 卿此不治,何以治官。」弘微笑而不答。或有譏之曰:「謝氏累世財 卿親而不言,[四] 譬棄物江海以爲廉耳。 弘微 一無所 設使

疾臨赴,病遂甚。十年,卒,時年四十二。時有一長鬼寄司馬文宣家,云受遣殺弘微,弘微 疾增劇,輒豫告文宣。弘微旣死,與文宣分別而去。 須劉領軍 至,可於前燒之,愼勿開也。」書皆是太祖手勑。 弘微 臨終,語左右曰:「有二封書,[三 上甚痛惜之,使二衞千人營畢葬

事

追贈太常。

子莊、別有傳。

王球字倩玉,琅邪臨沂人,太常惠從父弟也。 父謐,司徒。

章公世子 軍,在郡有寬惠之美,徙太子右衞率。 諮議參軍,以疾 球少與惠齊 中軍功曹。 大去職。 名。 美容止。 宋國建,初拜世子中舍人。高祖受命,仍爲太子中舍人,宜都王友,轉 元嘉四年,起爲義興太守。 除著作佐郎,不拜。 入爲侍中,領冠軍將軍,又領本州大中正,徙中書令, 從兄弘爲揚州、服親不得相臨、加宣威將 尋除琅邪王大司馬行參軍,轉主簿,豫

湛 職,接客甚希,不視求官書疏,而銓衡有序,朝野稱之。 並 遷吏部 重權,傾動內外,球雖通家姻戚,未嘗往來。 尚書。 球公子簡貴,素不交遊,筵席虛靜,門無異客。 頗好文義,唯與琅邪顏延之相善。 本多羸疾,屢自陳解。 尚書僕射殷景仁、領軍劉 遷光祿大夫, 居選

侍中如故。

加 金章紫綬,領廬陵王師

中鄓。 球 汝,何如。」履怖懼不得答,球徐曰:「阿父在,汝亦何憂。」命左右:「扶郎還齋。」〔七〕上以球 毎訓厲、不納。 兄子履進利爲行,深結劉湛,委誠大將軍彭城王義康,與劉斌、孔胤秀等並有異志,「於」 太祖甚銜之。 自大將軍從事中郎,轉太子中庶子,流涕訴義康不願違離,以 及湛誅之夕,履徒跣告球。 球命爲取履,先溫酒與之,謂曰「常日語 此 復爲 從 事

故,履得免死,廢於家

常侍。 見者。 故。 也。」「台猶坐白衣領職。 放恣如此,恐宜以法糾之。」尚之曰:「球有素尚,加又多疾,應以淡退求之,未可以 素有脚疾。 十七年,球復爲太子詹事,大夫、王師如故。未拜,會殷景仁卒,因除尚書僕射,王師如 唯球輒去,未嘗肯停。 無子,從孫奐爲後。 錄尚書江夏王義恭謂尚書何尚之曰:「當今乏才,羣下宜加勠力, 時羣臣詔見,多不卽前,卑疎者或至數十日 大明末,吳興太守。 十八年,卒,時年四十九。 追贈特進、金紫光祿大夫,加散騎 ,大臣亦有十餘 文案責 日 而 不被 王 球

或 人人問 列 傳 ·史臣曰:「王惠何如。」答之曰:「今明簡。」又問:「王球何如。」答曰:「倩玉炎。」又 第 + 八 王 球 校 勘 記

問:「謝弘微何如。」曰:「簡而不失,淡而不流,古之所謂名臣,弘微當之矣。」

#### 校勘記

以問其從兄誕 各本並脱「其」字,據南史補。

父思 「思」南史同。 晉書謝萬傳作「恩」。

**昔爲烏衣遊戚戚皆親姪** 「姪」南史作「姓」。

卵親 派而不言 「親」南史作「視」。

五 有二封書 「二封」彌史作「二厨」。

<u>へ</u> 六 し 與劉斌孔胤秀等並有異志 「孔胤秀」各本並作「孔胤季」,據本書卷六八彭城王義康傳改正。

により 扶郎還齋 「郎」各本並作「即」、據南史改。

未可以文案責也 「責」各本並作「索」,據南史、元龜四七八改。

